

# রাণী ভবানী ।

---

( ধর্মমূলক ঐতিহাসিক উপন্যাস )

দ্বিতীয় সংস্করণ—সংশোধিত ।

শ্রী হারাণচন্দ্র বস্কিন্ত প্রণীত ।

প্রকাশক—শ্রী প্রতাপচন্দ্র কেশিক

মজিলপুর—২৪ পরগণা ।

আষাঢ়, ১৩১৬ ।

মূল্য ১।০ একটাকা চারি আনা ।

---

কলিকাতা,

১৭ নং নন্দকুমার চৌধুরীর দ্বিতীয় মেন,

“কালিকা-যন্ত্রে”

শ্রীশরচ্চন্দ্র চক্রবর্তী কর্তৃক মুদ্রিত ।

---



# বাণী ভাষানী ।

প্রথম খণ্ড ।

বালিকা—গৌরী ।

প্রথম পরিচ্ছেদ ।

শুভ শারদীয় উৎসব । সমগ্র বঙ্গ হাস্তময় । বঙ্গবাসী  
আনন্দে আত্মহারা । দেশ জুড়িয়া আনন্দ-হিল্লোল প্রবাহিত ।  
আনন্দ-গীতিতে দিক্-সমূহ মুখরিত ।

এমনি আনন্দ-বাসরে, উত্তরবঙ্গের একটি ক্ষুদ্র পল্লীতে  
আজ আনন্দের সহস্রধারা প্রবাহিত হইতেছে । সে প্রবাহে  
পল্লীবাসিগণ হাবুড়ুবু খাইতেছে । আনন্দময়ী প্রতিমার সম্মুখে,  
সহস্র সহস্র লোক, আনন্দে নৃত্য করিতেছে । এইভাবে মহা-  
সপ্তমীর মহা উৎসব নিৰ্ব্বিলম্বে সমাধা হইয়া গিয়াছে : আজ মহা

অষ্টমী ;—বড় পুণ্যময় মাহেজ্ঞকণ । সেই মাহেজ্ঞকণে, পরম পুণ্যময় মুহূর্তে, ভাগ্যবান্ গৃহস্থামীর একটি সর্বস্বলক্ষণযুতা, অপূর্ব রাজশ্রী-চিহ্নিতা, পরম লাবণ্যবতী কন্যা ভূমিষ্ঠ হইল ।

একে মহাষ্টমী, তার রহস্পতিবার ; হিন্দুর পক্ষে আজ বড় শুভদিন । সেই শুভদিনে, মহামঙ্গলময় মুহূর্তে, যে ভাগ্যবানের এই কন্যার ভূমিষ্ঠ হইল,—তিনি একজন পরম ভাগবত হিন্দু ভূম্যধিকারী । তাঁহার নাম,—আম্বারাম চৌধুরী । তিনি এক জন বারেন্দ্র শ্রেণীস্থ বিশিষ্ট ব্রাহ্মণ । আধুনিক রাজসাহী জেলার অন্তর্গত ছাতিন গ্রাম তাঁহার জন্মভূমি ।

সেই ছাতিন গ্রামে, মুসলমান রাজত্বের শেষ-দশায়, যে প্রাতঃস্মরণীয়া, পুণ্যবতী, লোক-পালয়িত্রী রমণী জন্মগ্রহণ করিয়া-ছিলেন, তাঁহার পবিত্র-কাহিনী আলোচনা করিয়া, আজ আমরা ধন্য হইব ।

মহাষ্টমীর পুণ্যময় মুহূর্তে,—সেই শুভ রহস্পতিবারে, আনন্দ-বাসরে, ভাগ্যবান্ গৃহস্থামীর লক্ষীস্বরূপা কন্যা ভূমিষ্ঠ হইয়াছে,—এই শুভসংবাদ অল্পক্ষণ মধ্যে, গ্রামময় রাষ্ট্র হইল । বাড়ীতে মহা সমারোহে মায়ের মহাপূজা,—লোকে লোকারণ্য ;—তাঁহার উপর এই শুভসংবাদ পাইয়া, দলে দলে লোক আসিতে লাগিল । স্ত্রীলোকগণ স্বতন্ত্র পথ দিয়া অন্তঃপুরে প্রবেশ করিল । সেকালের ধনাঢ্য হিন্দুগৃহস্থের বাড়ীর পূজা ; লোক-সমাগম ত আছেই ;—তত্পরি সেই প্রকীর্ত্ত গৃহস্থামীর এইমাত্র প্রথম কন্যা ;—মহাষ্টমী-জাত, সুলক্ষণাক্রান্ত, পরম রূপবতী কন্যা ;—গ্রাম ভাঙ্গিয়া লোকদল, দলে দলে আসিতে লাগিল । উৎসবের হাটে, আর এক অভিনব উৎসবের জমাট বাধিয়া গেল ।



নব-প্রসূতা কন্যাকে যে দেখিল, সে-ই শতমুখে প্রশংসা করিতে লাগিল।—“আহা, কি রূপ ! কি লক্ষণ ! রূপে সূতিকা-গৃহ যেন আলোকিত হইয়াছে !” সকলের মুখেই এই কথা । এক দল বলিল,—“না হইবে কেন ? আজ একে লক্ষ্মীবার, তায় মায়ের মহাষ্টমী পূজা ; এমন মণিকাঞ্চন-যোগ কি, হয় বলিলেই হয় ?” কেহ বলিল, “আহা, যেন সাক্ষাৎ লক্ষ্মী !” কেহ বলিল, “যেন ভগবতী !” কেহ বলিল, “যেন মা-অন্নপূর্ণা !”—এইরূপ যাহার মনে যে ভাবের উদয় হইতে লাগিল, সে, সেই ভাবেই সেই সন্তঃপ্রসূতা কন্যার রূপের প্রশংসা করিতে লাগিল । গৃহ-স্বামীর একজন নিকট-সম্পর্কীয়া প্রাচীনা কহিলেন,—“আহা, মা-গৌরী যেন গিরিরাজের ঘর হইতে পথ ভুলিয়া বউএর কোলে এসেছে !”

শিশু স্বাভাবিকই সুন্দর । শূলবিশেষে সৌন্দর্যের আধিক্য করিয়া, লোকে শিশুকে, দেব-দেবীর রূপের সহিত তুলনা করিয়া থাকে । পরন্তু এ ক্ষেত্রে সে তুলনা সার্থক হইয়াছে । আত্মারাম-দুহিতার,—এই নবপ্রসূতা কন্যার মুখমণ্ডলে কি এক অপূর্ণ করুণামিশ্রিত স্নিগ্ধ-জ্যোতিঃ নিহিত রহিয়াছে যে, তাহা দেখিলে সেই ত্রিলোকজননী, সৃষ্টিরক্ষাকারিণী, সেই করুণাময়ী অন্নপূর্ণা-মূর্তি মনে পড়ে । তাই, যে দেখিতেছে, সেই-ই প্রাণ খুলিয়া, সর্বাঙ্গঃকরণে শিশুর কল্যাণকামনা করিতেছে ।

সহানুভূতি মানুষের স্বভাবসিদ্ধ ধর্ম । করুণার কাণ্ডাল মানুষ, করুণা দেখিলেই, সহজে আদ্র হয় । করুণার সহিত মাধুরীর চির-মিশ্রণ । মধুরতা জগৎকে বশ করে । তাই কৃষ্ণ-ভক্ত বৈষ্ণব, মাধুর্য্য-রসের প্রাধান্য দেন । আত্মারাম-দুহিতা—

এই সজ্জাজাতা কন্যার মুখে, সেই করুণামিশ্রিত মাধুর্যের পূর্ণ বিকাশ । ইহাকে স্বর্গীয় আভা বল, আর মহামায়ার মুখচ্ছবি বল,—এমনি কিছু একটা তাহাতে মিশ্রিত ছিল ।

তারপর বার ক্ষণ, তিথি লগ্ন, নক্ষত্র কাল,—হিন্দুর জ্যোতিষ অনুসারে কন্যার জন্মকাল খতদূর শুভ হইতে হয়, হইয়াছে । সুতরাং সাধারণ হিসাবে, লোকে যাহা দেখিল, তাহা চরম শুভ বলিয়াই বুঝিল । এইরূপ নানাকারণে, সেই কন্যার দর্শনে, সকলে মুগ্ধ হইল । আত্মারামকে দেখিয়া সকলে জয়ধ্বনি করিতে লাগিল ।

গৃহস্বামী আত্মারাম, দুর্গোৎসব উপলক্ষে বহু অর্থ ব্যয় করেন ; কন্যার শুভ জন্ম-উপলক্ষেও বহু অর্থ ব্যয় করিলেন । সমাগত আহুত অনাহুত সহস্র সহস্র লোক, তাঁহার দানে ও সমাদরে সান্ত্বিত হইল । দেশ-দেশান্তর-আগত কাঙ্গালী-ভিখারী-দল, পর্যাপ্ত পরিমাণে সুপেয় ও সুস্বাদু পানাহারে,—তদুপরি এক একখানি নববস্ত্র ও এক এক রজত-মুদ্রা লাভে, দুই হাত তুলিয়া নৃত্য করিতে লাগিল । তাহারা আনন্দ-বিভোর প্রাণে হরিধ্বনি করিতে করিতে, মহামায়ার নামের সহিত কন্যার নাম লইতে লইতে, স্বস্থানে প্রস্থান করিল । আত্মারামের অণুর আনন্দ-রসে আপ্লুত ; কিন্তু বাহিরে তাহার বিশেষ বিকাশ নাই ;—ধীর স্থির গম্ভীর এবং প্রশান্তভাবে তিনি সকলকে আদর-অভ্যর্থনা করিতেছেন ।

সম্মুখে আনন্দময়ী প্রতিমা ; আত্মারাম যাকে ভক্তিভরে প্রণাম করিয়া কন্যাদর্শন করিতে, অন্তঃপুরে গেলেন । গিয়া দেখিলেন, যেন জন্ম-জন্ম চির-পরিচিত, চির-বাঞ্ছিত একটি

আরাধ্যা দেবী-মূর্তি,—তাঁহার শিশু কন্যারূপে, সেই স্মৃতিকা-গৃহ আলোকিত করিয়া রহিয়াছে ! তাঁহার মনে হইল, বর্ষে বর্ষে, যে আনন্দময়ী মূর্তি দর্শনে, সমগ্র বঙ্গ আনন্দে উৎফুল্ল হয়, সেই করুণাময়ী লোক-পালয়িত্রী মূর্তির সহিত. বৃষ্টি এ মুখের কিছূ সাদৃশ্য আছে !

দেখিতে দেখিতে মুহূর্তের জন্য, আত্মারামের সর্বশরীর রোমাঞ্চিত হইয়া উঠিল.—অতীতের অনেক স্মৃতি মনে জাগিল,—তাঁহার চোখে জল আসিল।—জল আসিল ? হাঁ, জল আসিল। কেন আসিল, তাহা তিনিই জানেন।

আত্মারাম অনিমেষ নরনে শিশুকে দেখিলেন। উহারই মধ্যে, একবার সকলের অলক্ষ্যে, চক্ষু মুদিত করিয়া, মনের মধ্যে যেন কি একটু দেখিয়া লইলেন। ক্ষুদ্র নিখাসের সহিত তাঁহার অপাঙ্গে ক্ষুদ্র এক ফোঁটা জল বরিণ।—“তারা” “তারা” বলিতে বলিতে, ঈষৎ হাসি-হাসি মুখে, স্নকোশলে, তিনি সেই জলটুকু মুছিয়া ফেলিলেন,—কেহ তাহা বৃষ্টিতে পারিল না।

সর্বসুলক্ষণা, অপূর্ণ রূপশ্রীসম্পন্ন, গৌরীরূপা আত্মজার প্রথম দর্শনে, আত্মারামের চক্ষু হইতে এক বিন্দু জল পড়িল কেন ? মূর্তিমতী মহামায়ার মুখ-জ্যোতিঃ, অথবা সেই ত্রিনয়নার করুণা-দ্র্যতি, কি সত্য সত্যই তিনি নবদুহিতার মুখকমলে নিরীক্ষণ করিলেন ? দুয়ের সাদৃশ্য কি এক হইল ? তাই কি সকলের অলক্ষ্যে, তাঁহার এই এক বিন্দু আনন্দাশ্রু পতিত হইল ? অথবা, হায় ! আর কোন্ অজ্ঞেয় কারণে তাঁহার চোখ দিয়া এই এক ফোঁটা জল পড়িল, তাহা কে বলিতে পারে ?





## দ্বিতীয় পরিচ্ছেদ ।



দিনে দিনে শশিকলার ন্যায় এই কন্যার রূপ-শৌর্বা বাড়তে লাগিল । হিন্দুর শাস্ত্র ও লোকাচার অনুসারে, স্তৃতিকাগারের যাবতীয় কার্য নিৰ্ব্বিন্দে সম্পন্ন হইল । কন্যার ভূমিককাল হইতে গৃহস্বামীর স্তৈখণ্ডের আর সীমা রহিল না । কোথা হইতে কি ভাবে যে, তাহার বিদায়-বিভব এবং জন্মদারীর আর বাড়িতে লাগিল, তাহা তিনি বুঝিয়া উঠিতে পারিলেন না । সকলই যেন দৈবশক্তি প্রভাবে, সাক্ষাৎ কমলার রূপাদৃষ্টিকলে হইতে লাগিল,—সকলেই এইরূপ বুঝিল । সকলে কন্যার জননীকে 'রত্নগভা' নামে অভিহিত করিল । এই ভাগ্যবতী জননীর নাম,—জয়দুর্গা । জয়দুর্গা রূপে গুণে পতিগৃহ উজ্জ্বল করিয়া আছেন ।

পূর্বেই উক্ত হইয়াছে, আয়ারাম একজন নিষ্ঠাবান্ আনুষ্ঠানিক হিন্দু । স্তুরাং হিন্দুর জ্যোতিষশাস্ত্রে, তিনি বিশেষ গ্ৰাণবান্ । তিনি বিশেষ মনোযোগ পূর্বক কন্যার জন্মকাল,—তিথি বার, লগ্ন কাল, নক্ষত্র ক্ষণ প্রভৃতি লিপিবদ্ধ করিয়া

রাখিয়াছিলেন। মায়ের মহাপূজার মহাষ্টমী তিথি,—মহা-  
শুভজনক হইলেও, জ্যোতিষের কড়াক্রান্তি হিসাবে, সূক্ষ্ম হইতে  
সূক্ষ্মতর গণনার, কোথায় কোন গ্রহ কি ভাবে বিরাজ করিতে-  
ছিল এবং তাহার ভাবী ফল কি, তাহা বিশেষরূপে অবগত  
হইবার জ্ঞান, তিনি কণ্ঠার এক খানি কোষ্ঠি প্রস্তুত করিতে মনস্থ  
করিলেন। কণ্ঠা ষতই সুলক্ষণাক্রান্ত অথবা 'পরমশু' হউক,—  
তথাপি ভবিষ্যতে তাহার অদৃষ্ট-সুত্র আর একজনের সহিত  
গথিত হইবে; আর একজনের জীবনের সুখদুঃখ, সম্পদ বিপদ,  
শুভ-অশুভের সহিত তাহার জীবন বৃত্তের অন্তিম নিভর করিবে;  
—হহা তিনি বুঝিতেন। অপিচ, কন্যার জন্মকাল সর্বপ্রকার  
শুভযোগ-সম্পন্ন হইলেও, তাহার মনোরূপী নারায়ণ প্রথর অশু-  
দৃষ্টিবলে, সচনাতেই যেন কি একটু বুঝিতে পারিয়াছিলেন।  
বুঝিতে পারিয়াছিলেন, কালে এই কন্যা রাজরাজেশ্বরী অপেক্ষা  
বশস্বিনী হইতে পারিলেও,—ভাগ্যবতী হইতে পারিবে না।—  
স্কানোকের পক্ষে যাহা সন্দেহপূর্ণ গোরব ও শাঘার বিষয়, সেই  
দুই মহাবস্তু হইতে সে বঞ্চিত হইবে।

মনের ধারণা বা সংস্কার, পরীক্ষা করিবার জ্ঞান, আত্মারাম  
একজন শাস্ত্র-বিশারদ প্রবীণ জ্যোতির্বিদ পণ্ডিতকে আনাই-  
লেন। সেই পণ্ডিত দ্বারা কণ্ঠার একখানি কোষ্ঠি প্রস্তুত  
করাইলেন। কোষ্ঠির ফলাফল আশ্চর্যপাত্ত গণনা করিয়া,  
জ্যোতিষী কিছু বিষয় হইলেন। পুনঃ পুনঃ পরীক্ষা করিয়াও,  
সেই একই ফল দাঁড়াইল। তিনি বুঝিলেন, বিধি-লিপি অগ্রথা  
করিবার হাত—মানুষের নাই।

তথাপি, তখনও তিনি কন্যার পিতাকে সে কথা বলিলেন

না । ভাবিলেন,—“যখন সম্মুখে উপস্থিত আছি, তখন এই কন্যাকে একবার চাক্ষুস দেখিব । এমন অপূর্ব রাশিচক্র আমি কখন দেখি নাই ; এমন অলৌকিক গ্রহ-সম্মিলনও আমি কখন গণনা করি নাই । দৈবের বিশেষ রূপা ভিন্ন, পিতামাতার জন্মার্জিত বিশেষ স্মৃতি ব্যতীত, এমন সম্মান লাভ হয় না । সকলই অদ্ভুত ও অত্যাশ্চর্য্য দেখিতেছি ।—কিন্তু হায় ! এদিকেও বাহা দেখিতেছি, তাহা প্রকাশ করিতেও বৃকের রক্ত ওকাইয়া যায় !—এমন সৌভাগ্যবতী কন্যারও এমন দুর্ভাগ্য ! ধনস্তুরির পরিপূর্ণ সূধাভাণ্ডে, কে রে এমন এক বিন্দু তীব্র হলাহল মিশ্রিত করিয়া রাখিল !—অহো ভাগ্য !”

জ্যোতিষী, মনের ভাব মনে রাখিয়া, আশ্চার্য্যমকে কহিলেন, “মহাশয়, আপনার এ লক্ষীস্বরূপিণী কন্যাকে একবার দেখিতে পাই ? আমি একবার সেই মহালক্ষ্মীকে চক্ষে দেখিয়া, আমার জ্যোতিষ-গণনা সার্থক করি ।”

আশ্চার্য্যম, কন্যাকে অন্তঃপুর হইতে আনাইলেন । এক পরিচারিকা, সেই সোনার গৌরীকে কোড়ে লইয়া আসিল । সেই শিশু দেবীমূর্তি দর্শনে, ভাগ্য-গণনাকারী সেই ব্রাহ্মণ, মুহূর্ত্ত-কাল বিস্ময়-বিস্ফারিত নেত্রে তৎপ্রতি চাহিয়া রহিলেন । পরে আশ্চর্য্যভাবে আশ্চার্য্যমকে কহিলেন, “মহাত্মন ! আপনি সামান্য নন,—আপনার এই শিশু-কন্যাও সামান্য নন । এরূপ অপূর্ব রূপশ্রী-মিশ্রিত শুভলক্ষণ, আমি জীবনে দেখি নাই । এমন অদ্ভুত কোষ্ঠীও আমি কখনও প্রস্তুত করি নাই । যেন সাক্ষাৎ মহামায়া, গৌরীরূপে আপনার গৃহে বিরাজিতা ।—দেখি মা, তোমার হাত খানি ?”

দাসী, কন্যাকে জ্যোতিষীর সম্মুখে আনিল । জ্যোতিষী সেই ক্ষুদ্র কনক কর-পদ্মের রেখাগুলি দেখিলেন । আবার নূতন করিয়া অঙ্ক কষিলেন ; কমিয়া পূর্ক-গণনার সহিত মিলাইলেন । আবার দেখিলেন, আবার মিলাইলেন ।—একটি নিখাস ফেলিয়া, ছল-ছল চক্ষে কন্যার মুখের দিকে একবার চাহিলেন ।—দাসীকে কহিলেন, “মাও, মাকে অন্তঃপুরে লইয়া যাও ।”

ব্রাহ্মণ, মুহূর্তকাল বিমর্ষভাবে থাকিয়া, জন্মপত্রিকার বাকী এক ঘর পূরণ করিয়া, কালি-কলম দূরে রাখিলেন । পুনরায় একটি নিখাস ফেলিয়া, কোষ্ঠি খানি আপন পুণ্ডির মধ্যে রাখিয়া দিলেন ।

আয়ারাম, জ্যোতিষশাস্ত্রে অতিজ্ঞ না হইয়াও, আপন মন দিয়া, কন্যার ভাবী অদৃষ্ট-ফল কতক বুঝিতে পারিয়াছেন ;—এক্ষণে জ্যোতিষীর মুখের ভাব দেখিয়া বুঝিলেন, তিনি যে আশঙ্কা করিয়াছিলেন, বুঝি তাহা ঠিক মিলিয়া গেল । মনে মনে তিনি একটু হাসিলেন । বিধাতার অব্যর্থ বিধান দেখিয়া হাসিলেন । প্রকাণ্ডে জ্যোতিষীকে কহিলেন,—“কি দেখিলেন, ঠাকুর ?”

জ্যোতিষী ।—যাহা দেখিলাম, এমনটি আর কখন দেখি নাই !

আয়ারাম ।—যাহা দেখেন নাই, তাহা দেখিতে পাইয়াই কি এরূপ বিষয়-ভাব প্রকাশ করিতেছেন ? কিন্তু ইহার ফল ত ভাল-মন্দ দুই-ই হইতে পারে ?

জ্যোতিষী ।—তাহা পারে । কিন্তু প্রকৃত ভাল-মন্দ বিচার করিবার শক্তি আমাদের কে ?

আত্মারাম ।—লৌকিক হিসাবে যাহা ভাল ও মন্দ, আমি তাহাই জানিতে চাই ।

জ্যোতিষী ।—আপনার এই কন্যা অশেষ ভাগ্যবতী । কালে লোকসমাজে ইনি প্রাতঃস্মরণীয়া, পুণাশোকস্বরূপা অভিহিতা হইবেন । ইহার কীর্তিকলাপ দেশবিদেশে প্রচারিত হইবে । সাক্ষাৎ অন্নপূর্ণা মূর্তিতে, মহামাতৃভাবে ইনি লোকের হৃদয়োপরি আসন লইবেন ।—আর কি শুনিতে চান ? যাহা বলিলাম, ইহার এক বর্ণও অন্যথা হইবার নয় ।

আত্মারাম মনে মনে বলিলেন,—“তাহা জানি । মার আমার জ্যোতিষ্য মুখমণ্ডলে ও করুণাপূর্ণ নয়নপল্লবে, সে মহামাতৃভাব, উজ্জ্বলরূপেই অঙ্কিত আছে । সে কথা জানিবার জন্য জন্মপত্রিকার প্রয়োজন হয় নাই ।”

আত্মারামকে নীরব থাকিতে দেখিয়া, জ্যোতিষী পুনরায় বলিলেন,—“মহাশয়, আমি গণনা করিয়া আরও যাহা জানিতে পারিয়াছি, তাহা শুনুন । আপনার কন্যার জন্মস্থানে—স্বপ্পষ্ট ও উজ্জ্বল “রাজযোগ” আছে । কেন না ইহার জন্মস্থানে বুধ তুঙ্গী হইয়া বিলম্ব-গত হইয়াছেন ; এবং ইহার আয়-স্থানে বৃহস্পতি, ধনে শুক্র, দশমে চন্দ্র আছেন ।\* আমি বুক ঠুকিয়া বলিতেছি,—কালে এই কন্যা নিশ্চয়ই রাজকুললক্ষ্মী—রাজেন্দ্রাণী হইবেন । বিশেষ এই কন্যার ধর্মভাব আরও উচ্চ, আরও মহৎ ; সর্বজীবে ইহার দয়া থাকিবে ।—করুণায় ও মমতায় ইনি জগৎসংসার

\* “যস্য বুধস্তঙ্গগতো বিলম্বে লাভস্থলে দেবপুরোহিতশ্চ ধনেতি শুক্রে। দশমে শশাঙ্কঃ সঃ সার্কভৌমস্য বধূর্ভবিত্রী ।”



কিনিয়া লইবেন ।—লক্ষ লক্ষ লোক ইহাকে ভক্তিপুষ্পাঞ্জলিতে পূজা করিবে ।”

আত্মারাম একটি দীর্ঘনিশ্বাস ফেলিয়া কহিলেন,—

“লৌকিক হিসাবে, ইহা সৌভাগ্যের চরম সোপান, সন্দেহ নাই ।—কিন্তু ঠাকুর, দুর্ভাগ্যের দিকে, ইহার বিপরীত কোন ফল দেখিলেন ?—আপনি সঙ্কচিত হইবেন না ;—যাহা বিধি-লিপি, তাহা প্রকাশ করুন ।”

জ্যোতিষী ।—ইহার পর যাহা দেখিয়াছি, তাহা আর আপ-নার শুনিয়া কাজ নাই ;—তাহা আমি আপনাকে বলিতে পারিব না ।

জ্যোতিষীর স্বর আর্দ্র, চক্ষু অশ্রুভারাক্রান্ত হইল ।

আত্মারাম মুখ উন্নত করিয়া, বক্ষঃ একটু দৃঢ় ও স্ফীত করিয়া, রুদ্ধশ্বাসে, গম্ভীরকণ্ঠে কহিলেন, “বলিতে পারিবেন না,—কেন ঠাকুর ?—বলুন । যত কণ্ঠের অমঙ্গম কাহিনী হয়, আপনি বলুন । বিধি-লিপি,—মানুষের ত কোন হাত নাই,—আপনি বলুন ।”

গদ-গদ স্বরে জ্যোতিষী বলিলেন, “আমায় ক্ষমা করিবেন,—আমি তাহা বলিতে পারিব না । তরুণ অরুণরাগ-রঞ্জিত মায়ের গৌরীমূর্তি,—কোন মূর্খ ধূসর ধূমাবতী মূর্তিতে দেখিতে চায় ? সাধ করিয়া, কে হুম্মুখ নাম লইতে অভিলাম্বী হয় ?”

এবার আত্মারাম জোরে একটি নিশ্বাস ফেলিয়া, অর্ধক্ষুণ্টস্বরে কহিলেন, “এঁয়া ! তবে আমি যা ভাবিয়াছি, গণনাও তাই মিলিয়া গেল ?—মন, সত্যই তুমি নারায়ণ !”

জ্যোতিষী ব্রাহ্মণ, মস্তক অবনত করিয়া, অকারণে সস্মুখস্থ

পুঁথির পাতা উল্টাইতেছেন,—আত্মারাম গম্ভীরভাবে কন্যার জন্মপত্রিকাখানি দেখিতে চাহিলেন। ব্রাহ্মণ কল্পিত-হস্তে পত্রিকাখানি তাঁহার সম্মুখে ধরিলেন। আত্মারামের চক্ষু বিস্ফারিত হইল। মূহূর্তের জন্য সৰ্ব্বশরীর রোমাঞ্চিত হইয়া উঠিল।—সেই মহাষ্টমী, সেই মায়ের মহাপূজা, সেই বাড়ীতে সহস্র সহস্র লোক-সমাগম, সেই মহা আনন্দ-বাসর,—সেই সৰ্ব্বস্বলক্ষণযুক্ত গৌরীরূপা কন্যার জন্মগ্রহণ,—সেই উৎসবের হাতে অভিনব উৎসবের সমাবেশ — ভাবিতে ভাবিতে আত্মারাম সম্মুখেই যেন মহামায়ার প্রতিচ্ছবি দেখিতে পাঠিলেন। কিন্তু হায় ! সেই ছবির সঙ্গে সঙ্গেই পশ্চাতে দেখিলেন —

কি দেখিলেন ? পিতার প্রাণ, কন্যার সে বিমাদমলিন-মূর্ধি দেখিতে পারিল না ;—সৰ্ব্বশরীর মথিত করিয়া, তাঁহার সেই বিশাল বিস্ফারিত চক্ষু দিয়া, এক কোঁটা গরম জল, জন্মপত্রিকার উপর পড়িল। যে নির্দিষ্ট স্থানটি লক্ষ্য করিবার জন্য, তাঁহার মনঃচক্ষু চঞ্চল হইয়া উঠিতেছিল,—তপ্ত অশ্রুবিन्दু, যেন ঠিক সেই স্থান লক্ষ্য করিয়াই নিপতিত হইল !

এক্ষণে যেন অন্তর্জগৎ-নিমগ্ন আত্মারামের চমক ভাঙ্গিল। প্রকৃতিস্থ হইয়া “তারা” তারা” বলিতে বলিতে, তিনি চক্ষু মুছিলেন। চক্ষু মুছিয়া পত্রিকাপানে চাহিয়া দেখিলেন,—কন্যার “রাজযোগের” পাশ্বেই যেন উজ্জ্বল বড় বড় অক্ষরে লিখিত রহিয়াছে,—“বৈধব্য-যোগ।”

কিন্তু, প্রকৃত প্রস্তাবে, সে স্থানের লেখা কিছু অস্পষ্ট ছিল। গাঢ় ছিল, তাহাও আবার সন্ধ্যোনিঃসৃত তপ্ত অশ্রুবিन्दুতে একটু মুছিয়াও গিয়াছিল। তাহা সত্ত্বেও, আত্মারাম যেন স্পষ্ট দেখিতে

পাইলেন, উজ্জ্বল বড় বড় অক্ষরে লিখিত রহিয়াছে—“বৈধব্য-যোগ” । তখন সেই জন্মপত্রিকা খানির চারিপাশ্বে ই যেন তিনি ঐ প্রাণঘাতিনী বাণীর প্রতিলিপি দেখিতে পাইলেন ।—সর্বত্রই যেন অবান্তর পাঁচ-কথার সহিত উজ্জ্বল অক্ষরে লিখিত রহিয়াছে —“বৈধব্য-যোগ” ।

আম্বারাম আর ক্ষণকাল বিলম্ব না করিয়া, তন্মূর্ত্তেই,— অথচ গীরভাবে—সেই পত্রিকাখানি ছিঁড়িয়া খণ্ড খণ্ড করিলেন । অদূরে ভৃত্য চক্ৰমকি ঠুকিয়া তামাকুর বন্দোবস্ত করিতেছিল ;— ইঙ্গিতে গম্ভীরভাবে তাহাকে চক্ৰমকিটি নিকটে আনিতে আদেশ করিলেন । পরে স্বহস্তে সেই চক্ৰমকি হইতে আগুন জালিয়া, তাহাতে কণ্ঠার সেই সন্তঃ-প্রস্তুত জন্মপত্রিকাখানি পোড়াইয়া ভস্মীভূত করিলেন ।

জ্যোতিষী ব্রাহ্মণ এতক্ষণ নির্লাক্ হইয়া আম্বারামকে দেখিতেছিলেন ;—মুখে তাঁহাকে কোন কথা বলিতে সাহস করেন নাই । কোণ্ঠাটি নষ্ট হইল দেখিয়া, এবার মনে মনে বলিলেন,—“নষ্ট কোণ্ঠীর পুনরুদ্ধার করিবার সৌভাগ্য আমার আছে । আমি ভাবী রাজরাজেশ্বরীর জন্মকালাদি সমস্তই ছকে আঁকিয়া লইয়াছি ;—যখনই ইচ্ছা, কোণ্ঠী প্রস্তুত করিতে পারিব । কিন্তু পরমজ্ঞানী আম্বারাম চৌধুরী,—এ করিলেন কি ?— কোণ্ঠীর লেখা আগুনে পোড়াইয়া ছাই করিলেন বটে ; কিন্তু কপালের লিখন, হায় ! কোন্ আগুনে তিনি পোড়াইবেন ?”

আম্বারাম ভাবিলেন,—“দূর হোক । যাহা হইবার, তাহা ত হইবেই,—তবে কেন পূর্ব হইতে মন ধারাপ করি ? বিশেষ অশুভ বার্তা পূর্ব হইতে জানিয়া রাখার ফল এই,—প্রতিক্রম

সেই অশুভ ঘটনায় আপনাকে ডুবিয়া থাকিতে হয় ।—বাড়ার ভাগে, শুভসংবাদের যেটুকু নিরবচ্ছিন্ন বিমল সুখ, তাহাও সেই অশুভ-দুশ্চিন্তায় ডুবিয়া যায় । তবে সাধ করিয়া কণ্ঠার নামাক্তিত এই অশুভ ছবি,—গৃহে রাখিয়া ফল কি ? আর কণ্ঠার জন্মকালীন শুভফল ?—তাহাত আমি মাথের মথ দেখিয়াই বুঝিয়াছি ? সেজন্য আর জ্যোতির্বিদের এ গণনার কি আবশ্যক ছিল ?”





## তৃতীয় পরিচ্ছেদ ।

— ০ —

শিশু-কণ্ঠার ভূমিষ্ঠের সঙ্গে সঙ্গেই, আত্মারামের পরিবারস্থ সকলেই, শিশুর ভিন্ন ভিন্ন নাম রাখিল। নাম গুলি অবশ্য, সমস্তই পৌরাণিক। অতঃপর যথাকালে, মহা সমারোহে, কণ্ঠার অন্নপ্রাশন-সংস্কার সম্পন্ন হইল। অন্নপ্রাশনে রাশিচক্র অনুসারে, কুল-পুরোহিত কণ্ঠার নামকরণ করিলেন,—“গৌরী”। গৌরীনাম সকলেরই মনে ধরিল। কাঁচা সোনার সে তরল চলুচলে রং, সে মোহাগ-সংমিশ্রিতা, সর্ব-সুলক্ষণযুতা, অপূর্ব রূপ শ্রী,—সর্বোপরি কমলার রূপাদৃষ্টির সহিত লোকের ঐকান্তিক আদর ও স্নেহমিশ্রিত এই নাম,—সকলেই ভাল বাসিল। ভালবাসার সহিত, পরিপূর্ণ মোহাগে, সকলে এই নামে কণ্ঠাকে ডাকিল, আদর করিল, প্রাণের আশীর্বাদের সহিত স্নেহাশ্রুপূর্ণ চক্ষে, পিতামাতার সমক্ষে কণ্ঠার ভাবী উচ্চ ভাগ্যফল আলোচনা করিতে লাগিল।—কিন্তু গম্ভীরপ্রকৃতি আত্মারাম ইহাতে স্পৃষ্ট বা পুলকিত না হইয়া, মনে কি ভাবিয়া, কণ্ঠার নাম রাখিলেন,—“ভবানী”।

‘ভবানী’—এই ধ্বনিই স্বাভাবিক কিছু গম্ভীর। ইহার

উচ্চারণেও গাঙ্গীর্ষ্য, ইহার সম্বোধনেও গাঙ্গীর্ষ্য । পরন্তু ইহাতে পবিত্রতা ও পৌরাণিকতা. —পূর্ণরূপে বিদ্যমান । অপিচ, 'গৌরী' নামে বা উক্ত সম্বোধনে.—যে সরসতা, যে মধুরতা, যে কবিতা এবং গাথা কৰ্ণমূলে ধ্বনিত হয়, 'ভবানী' নামে যেন তাহা নাই— ইহা যেন স্বভাবতই কিছু শ্রুতিগম্ভীর । 'পরন্তু এ দুই-ই মহা-মহিমা-ব্যঞ্জক ; দুই-ই সেই জগন্মাতা জগদম্বার দুইটি পৌরাণিক নাম । নামের উচ্চারণে বা সম্বোধনে যে ধ্বনি উদ্ভিত হয়, এবং তাহা গিয়া কৰ্ণমূলে ও তথা হইতে হৃদয়-তলে গিয়া যে ভাবে বাজে, সেই বাজের সামঞ্জস্যের সহিত আত্মারামের প্রাণের যে, কি বিশেষ সম্বন্ধ ছিল, তাহা তিনিই জানিতেন । তাই তিনি সকলের ঐ সোহাগ-আদর-স্নেহ-সংবলিত, গীতি বাক্য-বুথরিত, সরসমধুর কবিত্বপূর্ণ নামের পরিবর্তে, কণ্ঠকে অপেক্ষাকৃত ধীর-গম্ভীর-ভক্তিপূর্ণ প্রবীণ নামে অভিহিত করিলেন । বৃন্দ সেই নামের সঙ্গে সঙ্গে, প্রকুল উষার অরুণ-রাগ-রঞ্জিত দিবা-বালিকামূর্তির পরিবর্তে, সুকুমারী কণ্ঠকে তিনি অশুরের অশুরে বধীশী প্রোটার বেশেই দেখিতে লাগিলেন । এবং তাহার সহিত একটু অস্পষ্ট কষ্ট, একটু ব্যথা, একটু কাতরতা, একটু যাতনাজড়িত দয়া মিশ্রিত হইয়া, স্বাভাবিক সরস বাৎসল্য-স্নেহ হইতে, শিশুকে কিছু দূরে রাখিয়া দিল ।—এ সকলেরই মূল,—সেই জ্যোতির্বিদের গণনা, - অথবা আত্মারামের হৃদয়ের বন্ধমূল সংস্কার । সত্যই আত্মারাম, কণ্ঠার ভাবী ভাগ্য-ফল পূর্কাবে জানিতে পারিয়া বহু পূর্ব হইতে অসুখী । কোষ্ঠ ছিঁড়িয়া ফেলিয়া, কোষ্ঠীর ফলাফল ভুলিয়া যাইতে তিনি সচেষ্ট হইলেন বটে, কিন্তু সেই চেষ্টাটাই তাহার স্মৃতিকে

অধিকতর উজ্জল করিয়া রাখিল । তাই তিনি পরিবারস্থ সকলের স্নেহ-সম্বোধন সোহাগে যেন একটু বঞ্চিত করিয়া, পরিণাম অবস্থার সামঞ্জস্য রক্ষার জন্ত, কন্যার নাম রাখিলেন, - 'ভবানী ।' কেন যে তিনি এরূপ জিদ্ দেখাইয়া, স্নেহ-পুতুলি শিশুকন্যার এ নাম পরিবর্তন করিলেন, তাহা তিনি কাহাকেও বলিলেন না । এরূপ স্থলে মনের ভাব প্রকাশ করিবার লোকও তিনি নন ।

তা, আশ্চর্য্যাম ত কন্যাকে 'ভবানী' নামে অভিহিত করুন, আর কালে সেই নামেই কন্যা প্রখ্যাতনামা হউন,-- কিন্তু উপস্থিত আমরা,—এই তপ্তকাঞ্চনপ্রভা স্নিগ্ধ জ্যোতির্ময়ী গৌরী-প্রতিমাকে, তাহার মাতা ও অন্যান্য পরিজনের সহিত 'গৌরী' নামেই অভিহিত করিব । অভিহিত করিব, শুধু নামের গৌরবে নহে,—ঘটনার পার্শ্বার্থ্য এবং এই অদৃষ্ট-বালিকার বাল্য-জীবনও সেই সূত্রে গ্রথিত হইয়াছে ।

গৌরীকে সোহাগভরে সকলেই কোলে লয় ; কোলে লইয়া তাপিত বক্ষঃ শীতল করে ;—গৌরীও সকলের কোলে উঠিয়া উচ্চ মধুর হাসির লহরী তুলিয়া, চক্ষু স্বাভাবিক স্নেহাদ্ধ করুণা-জ্যোতিঃ খেলাইয়া, ভুবন আলোকিত করে । সে স্নিগ্ধ-মধুর আলোকে, যে কোলে লয়, সে-ও কৃতার্থ হয় ; আর যে একটু আপনা ভুলিয়া শিশুকে নিরাঙ্কণ করে, সে-ও যেন ক্ষণকালের জন্য মত্তমুগ্ধ হইয়া যায় । সেই স্নিগ্ধ নবনীত দেহ. সেই সাক্ষাৎ সরলতা ও পবিত্রতার আধার স্বচ্ছ হৃদয়, সেই স্বর্গীয় আভা-বিশিষ্ট মুখ-কমল, সেই সৌন্দর্য্যের সারভূত অনির্কচনীয় কোমল-করুণ দৃষ্টি,—সত্যই সকলকে আকৃষ্ট করিয়া ফেলে ।

এই আকৃষ্টতার ফলে, স্ত্রী পুরুষ সকলেই,—গৌরীকে ভাব-চক্ষে,  
—যেন সেই জগদারাধ্যা, জগন্মাতাজ্ঞানে নিরীক্ষণ করিয়া  
থাকে। এগনই মেহ-সমাদরে এবং উচ্চ সম্মান-ভক্তি ও  
অনুরাগ-ভালবাসার ক্রোড়ে, পরম পুণ্যের সংসারে, শিশু গৌরী  
পরিবর্দ্ধিত হইতে লাগিল।

প্রাতঃকালীন আরণ্য পক্ষীর মধুর কণ্ঠস্বরের ন্যায় যখন  
গৌরীর সুধাকণ্ঠে অক্ষুট স্বর-সঙ্গীত বাক্যারিত হইল, তখন পিতা  
মাতা ও পোষ্য-পরিজনদের আর আনন্দের সীমা রহিল না। কণ্ঠে  
অক্ষুট মধুর ভাব ও চক্ষে অতীতের স্মৃতি বা স্মৃতি-বিজড়িত  
সোনার স্বপ্ন,—শিশুর এ স্বর্গীয় শোভা, যে উপভোগ করিতে  
না জানিয়াছে, তাহার মনুষ্যজন্মই রথ।। স্মিতবদনী সোনার  
গৌরী আধভায়ে কথা কহিতে শিখিল, আর তাহার সেই  
তপ্তকাকননিভ সুকোমল মুখপানে অজস্র চুম্বন-বৃষ্টি হইতে  
লাগিল। বিধাতার বিধানে সুমিষ্ট পানীয় গঙ্গাজলের যেমন  
কেহ মালিক নাই—অথবা থাকিয়াও নাই, অনৃতাদার শিশু-মুখে  
চুম্বন করিতেও তেমনি কোন নিষেধ-বিধি নাই। শিশুকে  
দেখিয়া মেহাদ্র হৃদয়ে শিশুর মুখচুম্বন করিতে, শিশুর পিতা-  
মাতা, বা অন্য অভিভাবকের অনুমতি আবশ্যক হয় না। অবস্থার  
হীনতার বা অন্য কোন কারণে, যে আন্তরিক ইচ্ছাসহেও শিশুর  
মুখচুম্বনে বঞ্চিত হয়, সে প্রকৃতই বড় অভাগ্য। আর যে প্রস্তর-  
কঠিন-হৃদয় নরপিণাচ, মোহে বা দুষ্টে অথবা এমনি কোন  
একটা কারণে, তাহার আপনার বা আপনসম্পর্কীয় কিংবা  
তাহার ক্ষমতাধীন কোন শিশুকে,—অন্যের আকাঙ্ক্ষিত  
স্বাভাবিক নিঃস্বার্থ আদর ও অনাবিল মেহ-চুম্বন হইতে বঞ্চিত



রাখে এবং তৎসঙ্গে সেই আদরাকাজ্জীর মনে, কোনও প্রকারে এতটুকুও ক্রেশ বা ব্যথা দেয়, তার বাড়ী মহাপাপী, বৃষ্টি এ সংসারে আর নাই ।

গৌরী আধভাষে কথা কহিতে শিখিল, আর তাহার মুখ-কমলে অজস্র চুম্বন-বৃষ্টি হইতে লাগিল । আবার কখন কখন, কাহাকে কাহাকে, সে চুম্বনের প্রতিচুম্বন দিয়া, উচ্চ হাসির লহরী তুলিয়া, বালিকা পিতার পুণ্যের সংসার সজীব করিয়া রাখিল । সে দৃশ্য দেখিয়া পরমজ্ঞানী আয়ারামও, এক একবার আত্মবিস্মৃত হইতেন,—বিধাতার বিধান ভুলিয়া যাইতেন,—কণ্ঠ্য ভাবী অশুভ ভাগ্যফলও মিথ্যা বলিয়া মনে করিতেন । ভাবিতেন,—“না, না, এ রত্ন রথা হইবে না । কিহু হয় রে ! এ অমলা নিধিও পরের হইবে ? আয়ার এ নির্মল ছবি, আর একজনের সুখদুঃখময় অদৃষ্ট-দর্পণে প্রতিকলিত হইবে ? ইহার এতটুকু স্বাভাব্য, এতটুকুও স্বাধীনতা থাকিবে না ? বিধাতা তোমার বিধান তুমিই ভাল বুঝ ! ক্ষুদ্র কীটাকৌট আমরা,—তোমার লীলা, কি বৃষ্টিব লীলাময় !”

আয়ারাম-পত্নী জয়দুর্গা ভাবিতেন,—“মা আমার ! বড় সাধে তোমার ‘গৌরী’ নাম রেখেছি । অষ্টমবর্ষেই তোমার বিবাহ দিব । দিয়া, আমরা গৌরীদানের ফল পাব । হে মা বিশ্বরূপিণী গৌরী ! যেন আমার গৌরীর যোগ্য শিব-জামাতা পাই !—মা যেন আমার, রাজরাজেশ্বরী মূর্তিতে শোভা পায় ।”

সূচনাতেই জনক-জননী এইরূপ আশা ও প্রার্থনা ! এইরূপ আত্মনিবেদন ও দৈবে বিশ্বাস !—এমন সম্ভানও অকৃতজ্ঞ হয় ?





## চতুর্থ পরিচ্ছেদ ।

— ২৭২ —

গৌরী কথা কহিতে শিখিল, ত তাহার কথা আর  
কুরায় না । এক কথা, শত রকমে, শতবার সে কহিতে থাকে ।  
শ্রোতা ও বক্তা, দুইজনেই যেন ক্লাস্ত হইয়া পড়ে । তবে এ  
ক্লাস্তি বড় আরামের, বড় সুখের । শিশুকে যে, কথা শিখায়  
এবং শিশুর কথা যে শুনে, তাহাকেও তৎসময় শিশু হইতে হয় ।  
নচেৎ শিশুর মাধুর্যা, তাহার কথার তাৎপর্যা, সে উপলক্ষি  
করিতে পারে না । গৌরী আধস্বরে, সুধাবচনে কহিল,—  
“ঠাকুল” ; শ্রোতা উত্তর দিল,—“ঠাকুল কৈ ?” গৌরী পুনশ্চ  
বলিল, “ঠাকুল” ; উত্তর—“ঠাকুল কৈ ?” এইরূপ পুনঃ পুনঃ  
একই কথা, একই উত্তর ।—বেজার হইলে চলিবে না ; কিংবা  
“ঠাকুলের” ‘ল’ উঠাইয়া, শুদ্ধ করিয়া ‘র’ বসাইয়া, ‘ঠাকুর’  
উচ্চারণ করিলে, শিশুর প্রকৃতি বুঝা যাইবে না । এইরূপ গৌরী  
রাঙাকে বলে—‘আঙা’ ; ‘ঘর’কে বলে ‘ঘল’ ; ‘গরু’কে বলে  
‘গ-উ’ । বাটীর কেহ যদি কাহাকে ডাকিল, - ‘ও ভাই, এসো  
না’ ; সুধামুখী গৌরী সুধাস্বরে অমনি তাহার অনুকরণ করিল,—  
‘ও বাই, এচ না ।’ যদি কেহ বলিল,—“ও কেষ্ট, ভাত খাবি  
আয়” ;—গৌরীর কাণ অমনি সেই দিকে গেল, -আধভাষে  
বলিল, “ও কেতো, ভাত আয় ।” -সবটা আর কণ্ঠে ধ্বনিত

হইল না ;—“খাবি” কথাটা এককালে লোপ পাইল । এইরূপ কেহ হয়ত কাহাকে স্নান করিতে নিষেধ করিয়া বলিল,—“নেয়ো না, অসুখ করিবে” ; সোনামুখী গৌরী অমনি তাহাকে সাবধান করিল,—“না, অসুখ কে।”—“অসুখের” ‘খ’ স্থানে ‘ল’, “করিবে” স্থানে শুধু ‘নে’ ; আর “নেয়ো” কথাটা এক-দগে ছাড়্ !—এত শব্দহীন, ছন্দোহীন, যতিহীন অস্পষ্ট ভাষা,— তবুও তাহা কত মধুর ও মর্ম্মস্পর্শী ;—কত কবিত্বপূর্ণ ও ভাবময় ! —বঙ্গভাষার আধুনিক বৈয়াকরণ ও ভাষা-সমালোচকগণ যদি দিন কত বৃথা ‘শাদার পিঠে কালি’ দেওয়া বন্ধ রাখিয়া, একটু যুক্তিবিশয়না কমাইয়া, বিনামূল্যে উপদেশদানের ব্যবস্থাটা উঠাইয়া দিয়া— এইরূপ শিশু-প্রকৃতি লাভ করেন,—শিশুর মত সরল পবিত্র ও ঘেঘ-হিংসা বর্জিত হন, তবে তাঁহার ভাষা, শিশুর মত অস্পষ্ট হইলেও, আমরা তাঁহাকে পূজা করিতেও প্রস্তুত আছি । দেখ, শিশুর ভাষার ব্যাকরণ নাই, বিভক্তি নাই, বিশেষ্য-বিশেষণ-লিঙ্গ-সমাজের দন্দ নাই,—কোনরূপ বগড়া কচ্-কচি কিংবা ‘জুজুর ভয়’ দেখানো নাই,—তথাপি তাহা কত সরল, কত সুন্দর, কত পরিষ্কার ।\*

তা এইরূপ ব্যাকরণ-ব্যাখ্যা অথবা ভাষা-সমালোচনা যার কাজ, তিনিই করিতে থাকুন,—আমরা গৌরীর কথা বলিতে-ছিলাম, গৌরীর কথাই বলি ।

\* এ গো ! শিশুর কথায় লেখকের নিজের ভাষাই ব্যাকরণদোষ ছুঁই হইতেছে । বিশেষণ “পরিষ্কার” ‘কৃত’ উঠাইয়া, লেখক ঐস্থানে স্পষ্টরূপে বিশেষ্য “পরিষ্কার” শব্দ লিখিয়া বসিলেন ।—ইতি ছাপাখানার ভুত ।

একে খাইতে আহ্বান করা হইতেছে, ওকে হয়ত 'অসুখ করিবে' বলিয়া ভয়-দেখানো হইতেছে, কিন্তু সেই সময় যদি কেউ গৌরীকে দুধ খাইতে ডাকে, বা দুধের সরঞ্জামাদি লইয়া বসে,—তবে গৌরী যেন আর সে অঞ্চলেও নাই।—কচি-পায়ে তুড়্ তুড়্ দৌড়িয়া, মুখখানা ভার-ভার—পরে ঈষৎ কাঁদ-কাঁদ করিয়া, খুব বিরক্তি দেখাইয়া, এক একবার পশ্চাৎ চাহিতে চাহিতে বলে,—“না, দুধ না।” আবার যদি কেউ সেই সময় দুধ-খাবার কপা ভুলাইয়া, গৌরীকে কোলে লইয়া, আদর করিয়া, তাহার মুখে চুমা খাইতে খাইতে বলে,—“বলো দেখি, আমি কে?”—গৌরী অমনি সেই দুধ-খাওয়া-রূপ জুঁজুর ভয় ভুলিয়া গিয়া, স্নেহভায়ে উত্তর দেয়,—“আমি।” প্রণকারী—“আমি কে?” উত্তর—“আমি।”—“কে” এ কথার উত্তর আর মিলিতেছে না। তার পর প্রণকারী যদি বলে—“আমি পিশেমশাই।” উত্তর—“পিচে নানা।” প্রণকারী (হাসিয়া) “বল দেখি—চণ্ডীগুপ্ত?” উত্তর—“চণ্ডী মা।”—অমনি বুঝি মাকে মনে পড়ে—উদ্দেশে বলে,—“মা, আমি চন্দী যাব।” ———“মা”. নাম কাহাকেও শিখাইতে হয় না।—শিশু ভূমিষ্ঠ হইয়াই বুঝি তাহা শিখে, এবং হাসি বা কান্নার প্রথম উচ্ছ্বাসেই শিশু-কণ্ঠে অস্পষ্টভাৱে ধ্বনিত হয়—“মা”!—এই অমৃতময়ী বাণীই বোধ হয় জীব-জগতের আদি এবং শেষ।

বালিকা যেন 'কয়া' পাখী।—কল্ কল্ বকিতেছে, খল্ খল্ হাসিতেছে, আপন মনে খেলিতেছে। শিশুর কলকণ্ঠ, সুমধুর হান্ত এবং আপন মনে খেলা, যে সংসারে নাই, সে সংসারে সব থাকিয়াও যেন কিছু নাই—সে সংসার যেন মৃত।

এইরূপ গৌরী যা শুনে, তাই বলে।—এক কথা শতবার আনুষ্ঠিত করিতে থাকে ।

এ দৃশ্যে, পিতামাতার আর আনন্দের সীমা থাকে না। আত্মারাম অতি ধীমান্ হইলেও, স্বাভাবিক বাৎসল্য-স্নেহ অথবা মোহের অধীন।—কতকটা সাধ করিয়াই তিনি এ মোহে জড়িত। মোহ বা মায়া, সাংসারিক জীবের পক্ষে অপরিহার্য। অল্পই হউক আর অধিকই হউক,—কেহ এককালে ইহার হাত এড়াইতে পারে না। পানভোজনের সঙ্গে সঙ্গে, ইহা জীব-দ্বন্দয়ে সংক্রামিত হইয়া যায়। তাই, আত্মারাম অন্তর্দৃষ্টিবলে সকলই দেখিয়া এবং কণ্ঠার জন্মকোষ্ঠীর ফল সমস্ত জানিতে পারিয়াও, বিশ্ববিজয়িনী মায়ার অব্যর্থ আকর্ষণবলে,—মমতার মধুর কল্লনায়,—আশার মোহিনী মূর্তি দেখিতে দেখিতে, কণ্ঠার ভাবী বৈধব্যযোগের কথা এক একবার ভুলিয়া যাইতেন এবং তাহার স্থানে, অতি উজ্জ্বলরূপে কণ্ঠার রাজরাজেশ্বরী মূর্তি অবলোকন করিয়া, মনঃপ্রাণ স্মীতল করিতেন। তখন আর কণ্ঠাকে গম্ভীর ‘ভবানী’ নামে সম্বোধন করিতে তাঁহার ইচ্ছা হইত না ;—পরিবারস্থ সকলের সহিত তখন তিনিও মনে মনে কণ্ঠাকে ‘গৌরী’ নামেই অভিহিত করিতেন।—কিছুই আশ্চর্যের বিষয় নহে,—‘সকলেই মরিতেছে,—মরণ অবশ্যস্তাবী,—অতএব আমাকেও একদিন মরিতে হইবে,’—ইহা জানিয়াও যখন আমরা জীবনের অধিকাংশ কাল আপনাদিগকে ‘অজর’ ও ‘অমর’ স্থির করিয়া সম্পূর্ণ নিশ্চিত থাকি, তখন প্রাণাধিকা তনয়ার ভাবী বৈধব্য-চিন্তাও যে, আত্মারাম মোহবশে এক একবার বিশ্বস্ত হইবেন, ইহা আর অধিক কথা কি? ফলে, বালিকা

গৌরী যখন আপন তপ্তকাঞ্চনপ্রভা বিস্তার করিয়া, মেহময়ী জননীৰ স্নিগ্ধকোল আলোকিত করিত এবং তৎসঙ্গে স্বভাব-সুন্দর মধুর হাসির লহরী তুলিয়া কণকালের জল ধরায় অমরার সৃষ্টি করিতে থাকিত,—তারপর সেই হাস্যদ্যুত মুখ যখন জননীৰ মুখে সন্মিলিত হইত,—স্নিতবদনী মাতা ও কণ্ঠায় যখন চুসনের নিনিময় চলিত,—তখন, সেই মধুরমুহূর্তে, স্বর্গের সেই মোহন দৃশ্য দেখিয়া, আত্মারামের চক্ষু আনন্দাশ্রুপূর্ণ ও সর্বশরীর রোমাঞ্চিত হইয়া উঠিত ;—হৃদয়ের পরিপূর্ণ আবেগে, আত্মবিস্মৃতভাবে, অনিমেষ নয়নে, তখন তিনি ইহা দেখিতে থাকিতেন । সে সময় তাঁহার মনে হইত, স্বপ্ন ও সত্য এবং নিদ্রা ও জাগরণ,—ভিন্ন বস্তু নহে । মনে হইত,—“মনুষ্য-জীবন এত সুন্দর !—কে বলে সংসার দুঃখময় ?”—অদূরে জনককে দেখিয়া, বালিকা গৌরী আর একবার উচ্চ হাসির লহরী তুলিয়া, সোনার কচি হাত ছ’খানি উত্তোলিত করিয়া, মধুমাখা আধস্বরে—“ঐ বাবা, আমি যাবো”—বলিয়া, পিতার ক্রোড়ে যাইতে ইচ্ছা প্রকাশ করিত । আত্মারামের তখন চক্ষে জল ও অধরে ঈশ্বর হাস্যের আবির্ভাব হইত । অমনি তিনি প্রগাঢ় বাৎসল্য-স্নেহে অভিভূত হইয়া বারংবার কণ্ঠার মুখচুসন করিতেন,—কণ্ঠাও স্নিতবদনে পিতাকে প্রতিচুসন দিত ;—তার পর মায়ের কোল ছাড়িয়া পিতার কোলে ঝাঁপাইয়া পড়িত । এইবার তিনজনের মধ্যে চুসন-বৃষ্টি হইতে থাকিত । সেই চুসনবৃষ্টির সহিত পিতামাতার ধীর-স্থির-নির্ঝক হাস্য ; কিন্তু গৌরীর হাস্য লহরে লহরে উঠিয়া, পঞ্চমে—সপ্তমে চড়িতে থাকিত । তাহাতে অপত্যপ্রাণ জনক-জননীৰ, প্রাণে যে কি সুখ, তাহা তাঁহারা ই বুঝিতেন ।

এমনই অবস্থায় আত্মারাম, গৌরীর মুখচুম্বন করিয়া, গৌরীকে সহধর্মিণীর ক্রোড়ে দিতেন। বলিতেন,—“মাকে তুমিই কোলে লও। তোমার ঐ লাভণ্যময় কোলে, তোমার আর-আধখানি মূর্তি, আমি দেখিতে বড় ভালবাসি। সংসারের অনেক সৌন্দর্য—অনেক পবিত্রতা জীবনে অনেকবার দেখি-  
য়াছি ; কিন্তু তোমার কোলে, তোমার এই সজীব ছায়ামূর্তি,—  
এই জীবনসর্বস্ব মায়ার পুত্রলি, বৃষ্টি অতুলনীয়। এই স্বর্গীয় শোভা,  
প্রাণ ভরিয়া দেখিতে সাধ যায়। গৌরী—ভবানীকে তুমিই  
কোলে লও, আমি প্রাণ ভরিয়া তোমাদের দুইজনকে দেখি !”

প্রেমিকপ্রবর ! তাহাই দেখ ! এই স্বর্গীয় শোভা দেখিবার  
জন্য, সমগ্র সংসার লালায়িত। এ স্থানে আর বর্ণভেদ, সমাজ-  
ভেদ থাকে না। এই শোভা দেখিলে কবির কবিত্ব, দার্শনিকের  
দর্শন-বিজ্ঞান, ভগবন্তের ভক্তি,—স্বতঃই উচ্ছ্বসিত হয়।  
তাই না হিন্দুর পুরাণকার—জগন্মাতা জগদম্বার ক্রোড়ে এই  
ভাবে হেরকে রাখিয়া, ত্রিভুবনের শোভা একত্র করিয়াছিলেন ?

এই অবস্থায় আত্মারাম-পত্নী—সাম্বী জয়চূর্ণা, স্বামীর পদ-  
রেণু মাথায় লইয়া, ভক্তিগদগদকণ্ঠে কহিতেন,—“প্রভু, আমি  
এমনি ভাগ্যবতী !—তোমার রূপায় আমি সাক্ষাৎ গৌরীকে  
গর্ভে ধারণ করিতে পারিয়াছি। আশীর্বাদ করিও নাথ, গৌরী  
যেন আমার চিরায়ুতী হয়।”

এই ভাবেই ধর্মপ্রাণ প্রৌঢ়-দম্পতী, সন্তানকে লালনপালন  
করিতে লাগিলেন। এই ভাবেই, পুণ্যময় প্রেমধর্মের কঙ্ক-পুটে  
বাস্তবিক গৌরী পরিবর্জিত হইতে লাগিল। ইহার ফল যেরূপ  
হওয়া উচিত, সেইরূপই হইবে।



ক্রমে গোরী আরও একটু বড় হইল ;—পাঁচে পা দিল ।  
 বালিকার স্বাভাবিক রূপরাশি ক্রমেই ফুটিয়া উঠিতে লাগিল ।  
 কুঞ্চিত কৃষ্ণকেশসজ্জাত ক্ষুদ্র অলকাগুচ্ছ,—সুন্দর খেত মুখপদ্মে  
 শোভা পাইতেছে । মুক্তাপাঁতির ন্যায় ক্ষুদ্র দন্তশ্রেণী,—ঈষৎ  
 হাশ্বময় লাল টুকটুকে পাতলা ঠোঁট দু'খানি ভেদ করিয়া ক্ষুদ্র  
 মুখবিবরে দেখা দিতেছে । সন্তঃপ্রস্ফুটিত গোলাপতুল্য কোমল  
 গণ্ডস্থল,—পরিবারস্থ স্ত্রীপুরুষের স্নেহ-চুম্বনে সদাই আমোদিত ও  
 সজীবিত হইয়া রহিয়াছে । আত্মার সাক্ষিস্বরূপ অমল প্রকৃতি-  
 দর্পণে,—সেই ঈষৎ-সজল নয়ন-কোনে, স্নিগ্ধ-পবিত্র-কোমল  
 কটাক্ষ ও করুণা-জ্যোতি,—অতি অপূর্ব মাধুরী বিস্তার করি-  
 তেছে । তিলফুলের ন্যায় সুন্দর নাসা,—কনুকণ্ঠ,—হস্তপদগ্রীবা  
 প্রভৃতি সমস্ত অঙ্গসৌষ্ঠব অতি সুন্দর ও সুলক্ষণাক্রান্ত । বুঝি  
 অস্তঃপ্রকৃতি এতদপেক্ষাও সুন্দর বলিয়া, বালিকার বাহ্যপ্রকৃতিও  
 এত সুন্দর পরিলক্ষিত হইতেছে । কেন না, অস্তঃপ্রকৃতির  
 আংশিক ছাপ, বাহ্যপ্রকৃতিতেও পড়িয়া থাকে । সূতরাং গোরীর  
 ভিতর-বাহির সুন্দর,—ভিতর-বাহির পবিত্রতার আধার ।

পাঁচে পা দিয়াই, বালিকা যেন জীবের সহিত জগতের এবং  
 জগতের সহিত জগদীশ্বরের সম্বন্ধ, কিছু কিছু বুঝিতে পারিল ।  
 বুঝিতে পারিল যেন,—“জীবে প্রেম,স্বার্থত্যাগ,ভক্তি ভগবানে”—  
 ইহাই মানবের সারধর্ম,—এবং এই মহান্ উদ্দেশ্যসাধনের জন্মই  
 —মানব-জন্ম । বালিকা যেন জাতিস্বরার ন্যায় আপন পূর্বজন্ম-  
 বৃত্তান্তসহ, প্রথর অস্তদৃষ্টিবলে, অতি অল্পেই বুঝিয়া লইল,—  
 জগতের সর্বত্রই ব্যথা,—সর্বত্রই হাহাকার,—সর্বত্রই পরপীড়ন ।  
 —অতএব পরোপকার রূপ মহান্ ধর্ম দ্বারাই,—এই ব্যথা, এই



হাহাকার, এই পরপীড়ন রোধ করিতে হইবে।—পঞ্চম বর্ষেই  
 হৃৎকের শিশু বালিকার প্রাণে করুণার ছবি অঙ্কিত হইল। সেই  
 করুণা হইতেই,—ধীরে, অতি ধীরে, অজ্ঞাতসারে ভগবন্তুক্তির  
 বীজ অঙ্কুরিত হইবে। এবং কালে সেই করুণা ও ভগবন্তুক্তি—  
 হৃৎকের মিলিয়া সংসার নন্দনকানন করিয়া ফেলিবে।

হায়, স্বর্গভ্রষ্ট শিশু ! চিরদিন তুমি শিশুই থাকো ;—তোমার  
 আর সংসারে মিশিয়া কাজ নাই ! এই বিপ্লববিবর্তনময় জীব-  
 নের বিনিময়ে,—হে শৈশব ! তোমার কি আর ফিরিয়া পাওয়া  
 যায় না ?





## পঞ্চম পরিচ্ছেদ ।

করুণা বার প্রাণে আসিল, সেই-ই জগৎ জয় করিল । করুণায় যেমন আপনাকে কোমল করা যায়, অপরকেও তদ্রূপ কোমল করা বাইতে পারে । তবে ইহা সাধনা-সাপেক্ষ,—একদিনের কাজ নয় । অনেক সংযম, অনেক সহিষ্ণুতা, অনেক আত্ম-ত্যাগ, অনেক অহমিকাবর্জন অভ্যাস করিতে করিতে, এ অমূল্য নিধি আয়ত্ত হয় । করুণা আয়ত্ত হওয়ার সঙ্গে সঙ্গে মনে এক অতি অপূর্ব ভাবের সঞ্চার হইতে থাকে । সে ভাবটি,—মাধুর্য্য-রসের আশ্বাদন । এ আশ্বাদনে, জগৎ আপনার বোধ হয় । তখন আর শত্রু মিত্র, সুন্দর কুৎসিত, উত্তম অধম,—এ সব বড় একটা জ্ঞান থাকে না । জ্ঞান থাকিলেও, তাহার ক্রিয়াশক্তিতে, অভিমানের দাবানল জ্বলিতে থাকে না । ক্রমেই তাহা সহজ ও স্বাভাবিক বৃত্তির সহিত একীভূত হইয়া যায় ।

এই অপার্থিব করুণা,—ঈশ্বরের সান্নিধ্যলাভের একটি সহজ উপায় । করুণার আবির্ভাবের সঙ্গে সঙ্গে মন কাদার মত কোমল হয় এবং সেই কোমলতার সঙ্গে সঙ্গে মনে ভগবন্তক্তির বীজ অঙ্কুরিত হইতে থাকে । সেই অঙ্কুর,—ক্রমেই পল্লবিত,

মুকুলিত ও ফুলে ফলে সুশোভিত হইয়া ধরিত্রীর প্রাণ শীতল করে । তখন প্রাণ প্রেমে পুলকিত হয়,—সকলকে আশ্রয় দেখিতে ও সকলকে ভালবাসিতে ঐকান্তিক ইচ্ছা হয়,—মনে হয়, যে যথায় পাপী তাপী, দীন দুঃখী, অনাথ আতুর আছে,—সে সকলই আমি । এ প্রগাঢ় সহানুভূতি,—এ গভীর আমিত্ব-বোধ,—সাধারণতঃ দুঃখদৈন্যের মধ্যেই সমধিক পরিলক্ষিত হইয়া থাকে । কেননা, দীনতার সহিত করুণার মাখামাখিটা কিছু অধিক ।—তখন শুধু মানব-মানবীর মধ্যেই এ প্রেম সীমাবদ্ধ হইয়া সম্বৃষ্ট থাকিতে চাহে না, - বিধিস্বষ্ট সর্বভূতে—পশুপক্ষী কীট-পতঙ্গও সেই প্রেম প্রবাহিত হইয়া যায় ; মনে হয়, এ সকলই সেই চিদ্মন সচ্চিদানন্দের পূর্ণবিকাশ । সেই সচ্চিদানন্দ যেমন আমাতে আছেন. তেমনি অন্যেতেও আছেন ;—সুতরাং কাহাকেও ত আত্মপর ভাবিলে চলিবে না? সবটা জড়াইয়া তিনি—সুতরাং সর্বত্রই আনন্দ, সর্বত্রই মাধুর্য, সর্বত্রই মঙ্গলময় ভাব,—সর্বত্রই আমি ।—এই মহাজ্ঞানই পরমপ্রেমিকের লক্ষণ । এই পরম প্রেমিকই, ধরার ভার লাঘব করিতে পারেন । সম্বল,—তাঁহার এই অপরাজিতা করুণা,—এবং এই করুণা-সমুদ্ভূত ভগবৎ-প্রেম ।—তাই বলিয়াছি, করুণা যার প্রাণে আসিল, সেই-ই জগৎ জয় করিল ।

পাঁচ বৎসরের ছন্ধের শিশু গৌরীর প্রাণে করুণার ছবি অঙ্কিত হইয়াছে । সে করুণা কেমন, এখন সেই কথাই বলিব ।

পূর্বেই উক্ত হইয়াছে. আত্মারাম চৌধুরী একজন আনুষ্ঠানিক হিন্দু ও পরম ভগবদ্ভক্ত । তক্ত হিন্দুর গৃহে, সর্বকার্যের মধ্যেই ভগবদ্ভক্তির বিমল ছবি পরিলক্ষিত হয় ; নিত্য ক্রিয়ায় ও

নৈমিত্তিক কার্যে, পর্বে ও পৌরাণিক উৎসবে,—দেবপূজায় ও অতিথি-সেবায়, অন্নদানে ও পরহুঃখ মোচনে,—এমন কি, বিলাসে ও ব্যসনে,—সর্বকার্যেই একটু-না-একটু ভক্তির ভাব জড়িত থাকে । জগ্মার্জ্জিত স্কৃতিফলে, সেই ভাব, যে হৃদয়ঙ্গম করিতে পারে, সেই-ই ধন্য হয় । শিশু গৌরীর স্বভাবসুন্দর স্বচ্ছ হৃদয়ে, পুণ্যময় পিতৃগৃহের এই ভক্তির ভাব,—অতি সহজেই বিজড়িত হইতে লাগিল । যেখানে পিতামাতা দু'য়েই পুণ্য-প্রাণ,—যে গৃহে পুণ্য-কথা প্রতিনিয়তই পরিকীর্তিত,—যে সংসারে পুণ্যের আদর্শ পোষ্য-পরিজনের মধ্যেও অল্পাধিক পরি-লক্ষিত, সেখানে স্বভাবসরল শিশুর প্রাণে পুণ্যের মঙ্গলমূর্তি উদ্ভূত না হইবে কেন ? যখন শঙ্খ-ঘণ্টা-দামামার গভীর রোলে দেবতার আরাতি হয় : যখন ধূপে দীপে ফুলে—চারিদিক আলোকিত ও সুরভিত হয় : যখন বিশুদ্ধ ব্রাহ্মণের মুখ-নিঃসৃত বিশুদ্ধ বৈদিক-মন্ত্র গম্ভীর রবে ধ্বনিত হয় ;—তখন, সেই পুণ্যময় মুহূর্ত্তে, বালিকা গৌরী স্থিরমুগ্ধনেত্রে নিশ্চল প্রতিমার ন্যায়, দেবতার পানে চাহিয়া থাকে । বহুকণ ধরিয়৷ এই অর্চনা চলিতে থাকে ; সেই বহুকণ পর্য্যন্ত গৌরী স্থিরভাবে বসিয়া একদৃষ্টে তাহা দেখিতে থাকে—সে বহুকণের মধ্যে সে চোখের পলক বুঝি একবার পড়ে না ।

আবার সে দেখিবার ভঙ্গিই বা কেমন ? পরিচারিকা বালিকাকে কোল হইতে নামাইয়া সুশীতল খেত-প্রস্তর হস্ততলে বসাইয়া দেয়, দিয়া পশ্চাতে দাড়াইয়া থাকে,—বালিকা স্বভাব-সুন্দর করুণাপূর্ণ চক্ষে, ঈষৎ সজলনয়নে, অনিমেধে দেবতাপানে চাহিয়া থাকে । কচি-মুখে সেই করুণা-জ্যোতিঃ, আর চোখে

এই সজল করুণা-দ্যুতি,—ছুই করুণা তখন এক হইয়া দেবতার প্রতিই ন্যস্ত হয় ।

আর সেই দেবতাই বা কে ?—ত্রিলোকপালিনী—সৃষ্টিরক্ষাকারিণী—জননী অন্নপূর্ণা । তিনি কেমন ?—শান্ত, শীতলা, প্রসন্নবদনা, ত্রিনয়নী—তিনটি চক্রেই যেন তিনটি স্নিগ্ধ করুণা-দ্যুতি উদ্ভাসিত । যেন মূর্ত্তিমতী করুণা, জননীরূপে, অভুক্ত সন্তানকে স্বহস্তে অন্নদান করিতেছেন । মায়ের অফুরন্ত ভাণ্ডার,—ক্ষুধার্ত্তকে অন্ন দিতেই তিনি অবতীর্ণা । স্বয়ং ত্রিলোকেশ্বর সদাশিবও প্রীতি-প্রসন্নবদনে, অঞ্জলি পুরিয়া, সে অন্ন গ্রহণ করিতেছেন । মায়ের বাম হস্তে স্বর্ণ-খাল, দক্ষিণ হস্তে দাবী ;—অকাতরে অক্লিষ্ট মনে—সর্বজীবে পরিতোষ পূর্বক ভোজন করাইবার জন্যই তাঁহার মর্ত্ত্যে আগমন । মা আমার লক্ষ্মীস্বরূপিণী,—তাই কমলাসনা । জগৎকে শিক্ষা দিতেছেন,—“যে যতটুকু পার, —অভুক্তকে অন্ন দাও,—জীবে দয়া কর,—জননীর হৃদয় লইয়া সংসার-ধর্ম্ম পালন কর ;—তবেই তোমার মানবজন্ম সার্থক হইবে,—তবেই তুমি আমার কাছে আসিবে ।”—এ হেন দেবতার দর্শনে বালিকা অনিমেঘনয়না,—বুঝি একরূপ বাহুজ্ঞান-শূণ্ণা !—কে বলিবে, পাঁচ বৎসরের শিশুর প্রাণে এই মহামাতৃরূপিণী অন্নপূর্ণামূর্ত্তি দর্শনে, কি ভাবের আবির্ভাব হইয়াছে ? তবে সমাগত দর্শকবৃন্দ এক একদিন বিষয়-বিস্ফারিত নেত্রে দেখিত, মায়ের স্নিগ্ধ করুণদৃষ্টি,—আত্মারাম-দুহিতার সেই স্থির-নিশ্চল-অনিমেঘ দৃষ্টির সহিত; ঠিক যেন এক হইয়া গিয়াছে ;—সেই ছুই মুখের স্বর্গীয় লাবণ্যমিশ্রিত করুণাও যেন মিলিয়া মিশিয়া সমান হইয়া গিয়াছে ;—কোনটি প্রতিমা, কোনটি গৌরী,—সহসা বুঝিয়া উঠা দুষ্কর । আরতিশেষে


পরিচারিকাও এক একদিন, প্রতিমাকে প্রণাম করিতে গিয়া, গৌরীকে প্রণাম করিয়া ফেলিত ।

স্বয়ং আত্মারামেরও এক একদিন এমনি ভ্রম হইত । তখন তিনি যুক্তকরে, অশ্রুসিক্ত নয়নে, গদগদকণ্ঠে, অন্নের অগোচরে, জননী-অন্নপূর্ণাকে উদ্দেশ্য করিয়া বলিতেন,—“মা, আমার মোহ-চক্ষু খুলে দাও,—আমার ভুল ভেঙ্গে দাও,—আমি বুঝিতে পারিতেছি না,—তুমি কে, আর আমার ভবানী কে ?”

এমন পুণ্যের সংসারে, এমন পবিত্র আশ্রমে,—যে পুণ্যপ্রাণ শিশুর—পূর্বজন্মার্জিত প্রকৃতি ও উচ্চ সংস্কার লইয়া জন্ম, পরিবর্ধন এবং শিক্ষা ও দীক্ষা,—তাহার মধ্যে যে করুণা ও ভগবৎ-প্রেম আসিবে,—পঞ্চমবর্ষেই যে তাহার এরূপ আত্মবোধ ও আত্ম-সংস্কার দীপ্যমান হইয়া উঠিবে,—তাহার আর বিচিত্রতা কি ?

তাই বলিতেছিলাম, গৌরীর করুণাই একদিন জগৎ বশ করিবে,—এবং কালে সেই করুণাই একদিন জগৎকে শিক্ষা দিবে,—“জীবে প্রেম, স্বার্থ ত্যাগ, ভক্তি ভগবানে”—ইহাই সার্বজনীন ধর্ম ।

এখন এই করুণার দুই একটি সজীব ছায়া-চিত্র দেখাইতে পারিলে, আমাদের উদ্দেশ্য সিদ্ধ হয় । করুণাময়ী জননীই সে আশা পূর্ণ করুন ।





## ষষ্ঠ প্যারচ্ছেদ ।

— ০ —

আম্বারাম চৌধুরী—শাক্ত । শক্তি-উপাসনা,— তাঁহার কুল-ধর্ম । কিন্তু তাঁহাতে গোঁড়ামী ছিল না । তাঁহার ধর্মমত অতি উদার ও প্রশস্ত ছিল । ‘যে কালী, সে-ই কুম্ভ’—এবং ‘যে-ই কুম্ভ, সে-ই কালী’—ইহাই তিনি অত্রান্ত সত্য বলিয়া বিশ্বাস করিতেন । সেই জন্তই তিনি প্রতি-অমাবস্যা রাত্রিতে কালীপূজা করিতেন ; ষোড়শোপচারে মায়ের ভোগ ও বলি দিতেন ;— আবার বাড়ীতে রাধাকৃষ্ণের সুন্দর মূগলমূর্তিও প্রতিষ্ঠিত করিয়া- ছিলেন ;—প্রতিদিন যথানিয়মে তাঁহার অর্চনা হইত,—দোলে ও রাসে সমারোহে তাঁহার পূজা সম্পন্ন হইত । আম্বারামের বাড়ীতে, কোন দিন হৃদয়োন্মত্তকারী হরি-সঙ্কীর্্তন হইত ;— খোল-করতালের গভীর রোলে দিগ্দিগন্ত পূর্ণ হইত ;—আবার কোন দিন বা শ্রামা-সঙ্কীতে, সুমধুর চণ্ডীর গানে, সুধামাধা ‘মা-মা’-নামে গগন আচ্ছন্ন হইয়া যাইত । শাক্ত ও বৈষ্ণব, সমান আদরে, সমান সম্মানে, তাঁহার গৃহে অভ্যর্ষিত ও সম্পূজিত হইতেন ।

ইহা ব্যতীত আম্বারাম ঐকান্তিক অনুরাগে, প্রচুর অর্থব্যয়ে,

বাটীর সন্নিহিত এক বিস্তৃত ভূখণ্ডে অন্নপূর্ণার এক প্রকাণ্ড বাড়ী ও সুরম্য মন্দির প্রস্তুত করিয়া দিয়াছিলেন। এবং সেই খেত-প্রস্তরের সুরম্য মন্দিরে, অষ্টধাতু-নির্মিত মায়ের সুন্দর সুবর্ণময়ী মূর্তি সংস্থাপিত করিয়া দিয়া, আপন ধর্ম-পিপাসার সম্যক পরিচয় প্রদান করিয়াছিলেন। প্রতিমার গঠন ও কারুকার্য এমন সুন্দর ও হৃদয়গ্রাহী যে, তাহা দেখিয়া অতি-বড় পাষাণও ক্ষণকালের জন্ম আদ হইয়া যায়।

এই অন্নপূর্ণার সেবা ও ভোগের আয়োজন বড় পরিপাটী ছিল। দেশের জনপ্রাণী কেহই কোন দিন অভুক্ত না থাকে,— দেশ-দেশান্তর হইতে আগত অতিথি-অভ্যাগত, সাধু-সন্ন্যাসী; কাকালী-ভিখারী, দীন-দুঃখী—কেহই না ক্ষুধার অন্ন ও তৃষ্ণার জলে বঞ্চিত হয়,—প্রধানতঃ এই উদ্দেশ্যেই আশ্চর্য্যাম, স্বর্ণীরা জননী নামে, জননী-অন্নপূর্ণামূর্তি প্রতিষ্ঠিত করিয়াছিলেন, এবং সুপ্রচুর পরিমাণে তাহার নিত্য-সেবা ও ভোগের বন্দোবস্ত করিয়া দিয়াছিলেন।

বিস্তৃত মন্দির-প্রাঙ্গণের এক পাশ্বে অতিথিশালা, অন্নপ্রাণ্ডে বিদেশী বিদ্যার্থী ছাত্রবৃন্দের জন্ম টোল বা চতুপাঠী। চতুপাঠীতে চারিজন সংস্কৃত অধ্যাপক ব্রাহ্মণ নিযুক্ত ছিলেন। ইহা ব্যতীত দেশস্থ ব্রাহ্মণ-পণ্ডিতদিগের জন্ম মাসিক বৃত্তি নির্দিষ্ট ছিল। সেই বৃত্তির কল্যাণে, তাহারা সচ্ছলে জীবিকা নির্বাহ করিয়া নিশ্চিন্ত মনে দেশস্থ বিদ্যার্থী ছাত্রগণকে বিদ্যাদান করিতেন।

এইরূপ সদাব্রত,—অন্নদান, বস্ত্রদান, জলদান, ব্রাহ্মণগণের বৃত্তি,—পুষ্করিণী ও বৃক্ষ-প্রতিষ্ঠা,—লোকের পিতৃদায়, মাতৃদায়, কন্যাদায় সাহায্য,—দেব ও গো-ব্রাহ্মণ-সেবা,—প্রভৃতি বিবিধ



পুণ্যস্থানে আত্মারাম চৌধুরী দেশ-বিদেশে প্রসিদ্ধ হইয়াছিলেন । তাঁহার পুণ্যময় নামে সকলে জয়-জয়কার করিত এবং দুই হাত তুলিয়া তাঁহাকে আশীর্বাদ করিত ।—এ হেন হিন্দু ভূম্যধিকারীর গৃহে, কুল পবিত্র ও গৃহ আলোকিত করিয়া, একমাত্র নয়নানন্দ-রূপিনী মেহময়ী গৌরী-প্রতিমার আবির্ভাব হইয়াছে । সে সঙ্গীত-প্রতিমা,—সদৃশের সৌরভে সকলকে আমোদিত করিয়া, ধীরে ধীরে লোকলোচনের সম্মুখবর্তিনী হইলেন ।

আত্মারামের বাটীতে পুরাণ-পাঠ ও কথকতা হয়, বালিকা গৌরী একাগ্রমনে তাহা শুনে, শুনিয়া কণ্ঠস্থ করে, কখন বা তাহা স্মর করিয়া আনন্দিত করিতে থাকে । সেই মধুমাখা কণ্ঠে, মধুময়ী পুরাণকথা ও ভক্তিরসাম্বিশ্রিত সঙ্গীতগাথা, মধুর হইতে মধুরতর বোধ হয় । পোষ্য-পরিজন বালিকাকে কোলে লইয়া, আদরে তাহার মুখচুম্বন করিয়া বলিতে থাকে,—“ওমা গৌরী, আজ কি গান শিখেছ, আমাদের শোনাও দেখি ?”

বালিকা উৎসাহে কোল হইতে নামিয়া, হাসি-হাসি মুখে আধ-আধ ভাষে বলিতে থাকে,—“শুনাইব ;—কি দিবে ?”

একজন প্রবীণা বলিলেন,—“কি দিব মা, বল ?”

হাসিতে মুক্তার মালা ছড়াইয়া গৌরী উত্তর দিল,—“আমি বলিব কেন ?—তুমি বল, কি দিবে ?”

প্রবীণা ।—তোমায় মা কি দিব,—কি দিতে পারি ?

গৌরী ।—মনে করিলে সব দিতে পার ।

প্রবীণা ।—সব দিব,—কি মা ?

একজন নবীনা বলিলেন,—“পিসীমা আর সব কি দিবেন, বোন ? উনি বিধবা মানুষ ;—কোথায় কি পাবেন ?”

গৌরী।—বিধবা? বিধবা কাকে বলে দিদি?

দিদি উত্তর দিলেন,—“আগে বড় হও বোন, তারপর সব বুঝিতে পারিবে।”

গৌরী।—কেন, ছোট ব’লে কি ‘বিধবা’ বুঝিতে পারিব না?—পিসীমা, তুমি বল, বিধবা কাকে বলে?

পিসি-মা একটি নিশ্বাস ফেলিলেন। গৌরী তাহা লক্ষ্য করিল। বুঝিল, কথাটা পিসীমার লাগিয়াছে। পিসীমার লাগিয়াছে, সুতরাং তাহারও লাগিল। পরের ব্যথা, সে আপনার করিয়া লইতে জানে বলিয়া, লাগিল। ঈষৎ কাতরভাবে বলিল,—

“পিসীমা, তুমি নিশ্বাস ফেলিলে কেন? ও কথায় কি তোমার কষ্ট হইল?—বিধবা কি তবে রুষ্টির কথা?”

পিসীমা অন্য কথা পাড়িবার চেষ্টা করিলেন। গৌরী তাহা বুঝিল। অন্য কথায় মনও দিল;—কিন্তু ‘বিধবা’ কথা ভুলিল না। কোনরূপ ব্যথার কথা সে ভুলে না। পরের ব্যথা, সে, আপন ব্যথার ন্যায়, অন্তরের অন্তরে জাগাইয়া রাখিতে জানে।

পিসিমা অন্যকথা পাড়িলেন, বালিকা সে কথার জবাব দিল। পিসীকে সন্তুষ্ট করিবার জন্য জবাব দিল। কিন্তু তাহার মনে জাগিয়া রহিল,—‘বিধবা।’

তারপর পিসীকে বলিল,—“পিসীমা, যে গান শিখেছি, কৈ, তাহা শুনিলে না?”

পিসী।—বলিবে?—বল যা, শুনি।

সেই দিদি বলিল,—“বল ত বোন গৌরী, আমি ঐ খাঁচাওহ পাখীটা তোমায় দিব।”

গৌরী ।—খাঁচা-শুদ্ধ পাখী ?—আমি ও পাখী উড়িয়ে দিব ।”

দিদী ।—কেন, উড়িয়ে দিবে কেন ?

গৌরী ।—বনের পাখী বনে থাক,—আকাশের পাখী আকাশে উড়ুক,—ওতেই ওদের সুখ । আর তাতে আমারও সুখ ।

আর একজন বলিলেন, “আমি একটি ফুল দিব,—তুমি গাও ত সোনামণি ?”

আবার হাসির লহরী ছুটিল । হাসিতে হাসিতে সেই কচি-মুখে বালিকা বলিল,—

“না বাপু, ফুলটা-ফলটার আমার গান শুনিতে পাবে না ;—আরো কিছু উঠিতে হবে । ফুল আমি ভালবাসি বটে, কিন্তু গাছ থেকে তাহা ভুলিতে ইচ্ছা হয় না । ফুল, গাছে ফুটে থাকে, তাই দেখিতে ভাল । আর যদি তোলাই হয়, ত দেবতার পূজায় তা দাও—হু’য়ে মানাবে ভাল ।—আর কে কি দিতে পার বল ?”

নিকটে একজন প্রাচীনা পরিচারিকা দাঁড়াইয়াছিল, সে বলিল,—“তোমার হু’হাতে দুটি সন্দেশ দিব,—গাওত মা ?”

গৌরী ।—না ঝি, তোমার এ লোভ-দেখানয় আমি ভুলিতে পারিলাম না । সন্দেশ আমি ভালবাসি না । আর ভালবাসিলেও, অন্যে খেলে যেমন সুখ হয়, নিজে খেলে তেমন হয় না ।—তুমি সন্দেশ খাবে ?

পরিচারিকা অপ্রতিভ হইয়া দাঁড়াইয়া রহিল ।

গৌরীর মন পড়িয়া রহিয়াছে,—সেই পিসীর উপর । পিসী প্রথম প্রস্তাব করিয়াছেন, আর ‘বিধবা’ কথায় তিনি ব্যথিত

হইয়াছেন, সুতরাং গান গাহিতে হয়, ত তাঁহার কথাই রাখিতে হইবে।

গৌরী এবার অতিমাত্র মধুবর্ষী কণ্ঠে, তাহার সেই স্বাভাবিক ককণামাখা ঈষৎ সজল চক্ষু, পিসীর মুখোপরি স্থাপিত করিয়া বলিল,—“পিসীমা, এবার তুমি বলিলেই আমি গান গাই।”

পিসি স্নেহে মুখচুশ্বন করিয়া বলিলেন,—“তবে মা, পিসীর কথাই রাখিবে? মা আমার দয়াময়ী!—এত দয়া তোমার প্রাণে? পরের মন তুমি এমনি করিয়া বৃষ্টিতে জান?”

মনে মনে বলিলেন,—“কে এ বালিকা? এ কচি-বয়সে কিরূপে এমন পরের ব্যথা বৃষ্টিতে শিখিল? সত্যই কি জগদ্ধাত্রী গৌরী শাপ-ভ্রষ্টা হ'য়ে এসেছে?”

গৌরী ভাবিল,—“পিসিমা বিধবা; বিধবার তবে বড় কষ্ট; কি করিলে এ কষ্ট দূর হয়?—এমন বিধবা তবে আরো অনেক আছে? আচ্ছা, এখন ত গান গেয়ে সকলকে ভুলিয়ে রাখি,—এর পর ‘বিধবা’ কি বুঝিব।”

পিসী বলিলেন, “তবে মা গানটি গাও,—নেচে নেচে হাতে তালি দিয়ে গাও।—আশীর্বাদ করি, তোমার শতবর্ষ পরমাযু হোক।”

গৌরী।—তবে নাকি পিসীমা তোমার কিছু নেই?—হাঁ দিদি, তুমিও না বলিতেছিলে,—পিসীমা—কি মানুষ,—কোথায় কি পাবেন,—কি দিবেন? হঁ, এমন জিনিস থাকিতে, আবার কি দিবেন? প্রাণের আশীর্বাদের বাড়া আর কোন্ জিনিস বড়? সকলে এমন আশীর্বাদ করিতে পারে কি?

এমন সময় গৌরী-জননী গৃহকর্তী জয়দুর্গা তথায় আসিলেন।

তাঁহাকে দেখিয়া সকলে একটু সঙ্কচিত হইয়া দাঁড়াইল । ধীরা, প্রশান্তগমনা, গম্ভীরা তিনি ;—ধীরপদে আসিয়া, স্মিতমুখে অথচ গম্ভীরভাবে কণ্ঠাকে সম্বোধন করিয়া কহিলেন,—

“সকলে, কি আশীর্বাদ করিতে পারে না, গৌরী ?”

গৌরী ।—এই মা, প্রাণের আশীর্বাদ ।—হাঁ মা, সত্য নয় ?

মাতা গম্ভীরভাবে বলিলেন—“সত্য । প্রাণের সহিত আশীর্বাদ করিতে পারিলে, নারায়ণ তার কথা শুনেন ।”

গৌরী । - মা, এ কথাটি তোমার কাছে এই নূতন শুনলাম । এমন কথা আমি আর কখন শুনি নাই ;—‘প্রাণের সহিত আশীর্বাদ করিতে পারিলে, নারায়ণ তার কথা শুনেন ।’ আমিও মা তবে বড় হ’লে, লোককে প্রাণের সহিত আশীর্বাদ করিতে শিখিব ।

জয়দুর্গা, সেই বর্ষায়সী বিধবা-‘পিসির’ পানে চাহিয়া কহিলেন,—“কথাটি কি হইতেছিল দিদি ?”

বিধবা, গৌরীর গানের কথা বলিলেন । তার মুখে গান শুনিতে সকলের ইচ্ছা হইয়াছে, সেই কথা বলিলেন । এবং সেই জন্মই তাঁহাকে আশীর্বাদ করা হইয়াছে,—তাঁহাও বলিলেন ;—কেবল সেই অবাস্তুর কথাটি—তাঁহার বৈধব্যদশার কথাটি বলিলেন না ।

শুনিয়া জয়দুর্গা বলিলেন,—“তা বেশ ত, গৌরী নূতন গান কি শিখেছ, তোমার পিসীমাকে শুনাও না ?”

গৌরী । - শুনাই মা ।—তবে পিসীমা, তুমি সেই রকম হাতে হাতে তালি দাও ।

পিসী ।—দিই মা,—তুমি গাও ।



( তুমি ) রাখ আর মার, তবুও কাঙাল,—

‘কাঙালের হরি’, ব’লে গাবে জয় ॥

তবে কেন হরি, ‘ব্যথাহারী’ নামে,

কলঙ্ক রটাও সাধ করি জানে,

আঁধারে ডুবাও অজ্ঞানে অধমে,

কোলে টেনে লও, করুণাময় ॥ \*

কচি-পায়ে নাচিতে নাচিতে, ক্ষুদ্র কনক-করে তালি দিতে  
দিতে, মধুবর্ষিণী অক্ষুট ভাষায়, সুর করিয়া গৌরী গাহিতে  
লাগিল,—‘ব’য়ে-‘স’য়ে, ‘হ’য়ে-‘ম’য়ে, ‘ক’য়ে-‘থ’য়ে, উচ্চারণে  
উলট-পালট করিয়া,—এর-কথা ওর-ঘাড়ে, ওর-কথা তার-ঘাড়ে  
ফেলিয়া,—যোড়ে-তাড়ে অক্ষুট অস্পষ্ট শব্দে গাহিতে লাগিল,—  
তথাপি সেই স্বর-সঙ্গীতে—করুণা, প্রেম, অভিমান, ভাব, ভক্তি,  
ভালবাসা,—সকলই যেন সজীব হইয়া ফুটিয়া উঠিল,—চারি-  
দিকে যেন সুধারষ্টি হইল ;—সকলের হৃদয় মন তাহাতে আকৃষ্ট  
হইয়া পড়িল ।

আমরা যে সর্বস্থানে শিশুর ভাষায় শিশুর ভাব বা ভাব-  
অভিব্যক্তি ব্যক্ত করিয়াছি বা করিব, তাহা নহে,—আবশ্যক-  
বোধে কোথাও স্বভাবের যথাযথ অনুসরণ করিয়াছি ; কোথাও  
বা স্বভাবের স্থূল-দৃষ্টির অতীত অপূর্ব আদর্শের সূক্ষ্ম-সৃষ্টির  
অনুসরণ করিতে বাধ্য হইয়াছি । এমন না করিলে, এ শ্রেণীর  
চরিত্র চিত্রিত করা সম্ভবে না ;—অন্ততঃ এ ক্ষুদ্র লেখকের পক্ষে  
তাহা অসাধ্য ।

\* গৌরী—একতারা ।

গৌরী গান গাহিল, সে গানে সকলের হৃদয় দ্রব হইল ।  
বালিকা নিজেও বুঝি দ্রব হইয়াছে ;—তাহার সেই সজল নয়ন-  
পল্লবে দুইটি অশ্রু-মুক্তা ঝুলিতেছে ।

সকলের সকল অর্থবোধ হয় না । বোধ না হইলেও, ভাবে  
সকলে মুগ্ধ হইতে পারে,—মুগ্ধ হয়ও । তাই হিন্দুর শাস্ত্র-  
ব্যাখ্যাকার অনেক ভাবিয়া বলিয়াছেন,—“ভাবগ্রাহী জনাৰ্দ্ধনঃ ।”

ভাব বুঝিয়া সকলকেই চলিতে হয় । ভগবানকে ত বটেই,—  
মানুষকেও বটে । যে মানুষ বলে,—“আমার ভাবও নাই  
ভক্তিও নাই,—আমি সাদা-মাটা কথাই বুঝি,—প্রত্যেক শব্দের  
অর্থবোধ না হইলে, আমার নিকট সকলই অবোধ্য হয়”—  
সে সাক্ষি মিথ্যা কথা কয়, কিংবা কৌশলে বড়ই বিজ্ঞতার বড়াই  
করে । কথার মারপেঁচে ঘাঁহা বুঝাইতে হয় বুঝাও, হয়ত তোমার  
সমধর্মী শ্রোতাও অনেক ছুটিবে,—কিন্তু এ কথাটা খুবই খাঁটি  
যে, ভাব বুঝিয়াই অর্থবোধ করিতে হয় ;—অর্থের খুটীনাটী  
ধরিয়া, ভাব বুঝিতে গিয়া, ভাবের ঘরে গোল করিতে নাই ।

মানব-ভাষা বুঝাইবার ত বিবিধ উপায় আছে ; পরন্তু  
পশুপক্ষী, কীটপতঙ্গ, তরুলতা—এ সবার ভাষা ত এক ‘ভাব’  
ব্যতীত আর কিছুতেই বুঝিবার যো নাই ? মানব-ভাষাই যদি  
তোমার সত্য সত্যই অবোধ্য হয়, তবে এ সবার হাত এড়াইবে  
কিরাপে ? ইহাদের ত পুঁথিগত ভাষাও নাই, শব্দও নাই,—এখন  
ইহাদের লইয়াও ত ঘরকন্যা করিতে হইবে ? ভাবে ভগবানকে  
বুঝা ত দূরের কথা,—ভাবে ইহাদিগকে বুঝিতে না পারিলে যে,  
তোমার সংসারই অচল হইবে, এবং স্বয়ং তুমিও যে ক্রমেই একটি  
জড়পিণ্ডবৎ অচল হইয়া পড়িবে ?



তাই বলিতেছিলাম, ভাবের কথায় ভাষাজ্ঞানের বা শব্দার্থ-বোধের তত আবশ্যক হয় না,—যত আবশ্যক হয়,—ভাব উপলক্ষি করিতে । নিরক্ষরা, দুন্ধের শিশু গৌরী ভাবের কান লইয়া, কথকের মুখে পুরাণ-কাহিনী ও ভক্তিসঙ্গীত শুনিয়াছে,—সেই কাহিনী ও সঙ্গীত তাহার ‘কানের ভিতর দিয়া মরমে’ পশিয়াছে ;—তাই সেই কাহিনী ও সঙ্গীতের সম্যক উপলক্ষি না হইলেও, সে ভাব বা সে ভাবের ছবি তাহার বুকের মধ্যে দৃঢ়রূপে অঙ্কিত হইয়া গিয়াছে ;—সুতরাং, সম্যকরূপে অর্থবোধ না করিয়াও সে তাহাতে না ডুবিবে কেন ? আর যাহারা সে গান শুনিল, তাহারাই বা সে গানের সম্যক অর্থ উপলক্ষি না করিয়াও তাহাতে মুগ্ধ না হইবে কেন ? তাই গৌরী, আধভাবে অস্পষ্ট-স্বরে গান গাহিয়া নিজেও ভাবময়ী হইল,—অন্যকেও ভাবে নিমগ্ন করিতে পারিল । আর সেই জন্যই তাহার সেই করুণা-পূর্ণ নয়নপল্লবে, করুণার দুটি ক্ষুদ্র বিন্দু মুক্তাকলের ন্যায় বিরাজ করিতে লাগিল ।

এই হিসাবে এ কথাও এখানে বলা অসঙ্গত হইবে না যে, দেশকালপাত্রভেদে, পাঁচ বৎসরের শিশুতেও অনেক উচ্চভাবপূর্ণ কথা বলিতে পারে,—আবার অনেক সাধারণ কথাও অজ্ঞতা-বশতঃ বলিতে বা বুঝিতে পারে না ।

এই কথা স্মরণ রাখিয়া গৌরীর বিষয় আলোচনা করিলে স্পষ্টই প্রতীয়মান হয় যে, সেই দুন্ধের শিশু,—যখন যে অসাধারণ বিষয় ভাবে বা দেখে, বলে বা শুনে,—তাহার মূলে, তাহার জন্মার্জিত একটি অভ্রান্ত সত্য ও উচ্চ সংস্কার নিহিত আছে ;—সুললিতভাবে, ভাসা-ভাসা চোখে তাহা দেখিলে, কিছুই বুঝা

যাইবে না। সুতরাং এরূপস্থলে আমরাগকে ধ্রুব-প্রহ্লাদের কথা স্মরণ করিয়া, সেই পৌরাণিক উচ্চ আদর্শবাদ অবলম্বনে চলিতে হইবে,—নচেৎ উপায়ান্তর নাই।

গৌরী, কথক-মুখনিঃসৃত একটি গানে, - যেন জগতের ব্যথা উপলক্ষি করিতে করিতে,—আধভাষে আধ সুরে তাহা আবৃত্তি করিয়া সকলকে দ্রব করিল,—এবং নিজেও দ্রব হইল। তারপর বালিকা সেইরূপ ভাবের লহর ছড়াইতে ছড়াইতে, করুণার আধভাষে, রোমাঞ্চিত-কলেবরে, পুনরায় একটি গান ধরিল। এবারও সেই ‘ক’-য়ে ‘ত’-য়ে, ‘ব’-য়ে ‘ভ’-য়ে, ‘ম’-য়ে ‘শ’-য়ে উলট-পালট করিয়া ফেলিল। গানটির বিশুদ্ধ অবস্থা এই;—

( মাগো ) আর কত কাল, এ ভব-যন্ত্রণা ।

যাতায়াত-ক্লেশ, হ'বে নাকি শেষ,

জনমে জনমে আর যে পারি না ॥

ছেঁড়' কর্ম্ম-ফাঁস, জীবনের ত্রাস,

অশান্তি উদ্বেগ ভাবনা হতাশ,

কর দূর মায়া, দে মা পদ-ছায়া,

মিটেছে আশার সংসার-কামনা ॥

দেখি মা নিয়ত, আসে যায় কত,

জলবিশ্ব সম ফোটে ডোবে শত,

গ্রহ তারা খসে, পুন চাঁদ হাসে,

সে হাসিতে মন প্রবোধ মানে না ॥

কৈদে কৈদে হয়, হ'য়েছি পাষণ,

জীবন যেন গো বিজন শ্মশান,

স'য়েছি বিস্তর,                      বিপদ হস্তর,  
 সকলি ত জানো, তুমি ত্রিনয়না ; —  
 (আর) কাজ নাই খেলা,              প'ড়ে এল' বেলা,  
 চাহি না জিতিতে, (এবার) হারিবার পালা,  
 ধীরে ডুবে মোর অদৃষ্টের ভেলা,—  
 হায় রে পাষণি ! তোরি ত ছলনা ॥\*

গান শুনিয়া পুর-মহিলা এবং পোষ্য-পরিজনগণ সকলেই যেন ঋণকালের জন্ম উদাস হইয়া গেল, এবং সকলেই যেন অন্তরের অন্তরে তপ্তশ্বাস ফেলিয়া এক একবার বলিল,— “সত্যই এবার ভবের খেলায় হার হইল ।”

তখন জননী-জয়দুর্গা, গৌরীকে কোলে লইয়া, অঞ্চলে চক্ষু মুছিতে মুছিতে, প্রগাঢ় স্নেহভরে গৌরীর মুখচুম্বন করিলেন । মনে মনে বলিলেন, “মা আমার ! আশীর্বাদ করি, বাচিয়া থাকে ।”

উপরি-উপরি দুইটি গান গাহিয়া বালিকা যেন কিছু ক্লান্ত হইয়া পড়িয়াছিল । তাহার সেই সুকুমার মুখপন্থে বিন্দু বিন্দু ঘর্ম্ম, তিলকের ঞ্চায় শোভা পাইতেছিল । পিসী সযত্নে সেই ঘর্ম্ম-বিন্দু মুছাইয়া দিয়া, তাহাকে জননী-কোল হইতে আপন ক্রোড়ে গ্রহণ করিলেন । এবং স্নেহে তাহার মুখচুম্বন করিয়া কহিলেন,—

“মা আমার, দু'দিন পরে কেমন করিয়া তুই আমাদের ভুলিয়া পরের ঘরে যাইবি ?”

\* সুরট-মল্লার -- একতালা ।

আধভাষে গৌরী জিজ্ঞাসিল,—“পরের ঘর, কোথায় পিসী মা ?”

পিসী ।—এই তোমার শশুর-বাড়া,—স্বামীর ঘর ।”

গৌরী ।—স্বামীর ঘর কি পিসীমা, পরের ঘর ?

মার দিকে চাহিয়া বলিল,—“হাঁ মা, পিসীমার কথা সত্য ?”

এ কথায়, মাও গোলে পড়িলেন, পিসীও পড়িলেন । পাঁচ-সাত ভাবিয়া মা উত্তর দিলেন,—“ও একটা কথার কথা ।”

আবার কি জানি কেন, বালিকার সেই পূর্ব-কথা মনে পড়িল,—পিসীর সেই ‘বিধবা’ কথার অর্থ ও ভাব-গ্রহণে আগ্রহ বাড়িল । মাকে জিজ্ঞাসা করিল,—

“হাঁ মা, ‘বিধবা’ কার নাম ? বিধবা বড় কষ্টের কথা - না মা ?—ঐ দেখ মা, পিসী-মা কেমন জড়সড় হ’চ্ছেন । পিসীমার বড় কষ্ট, না মা ?”

জয়দুর্গার গা-টা, সহসা যেন কেমন ছ’্যাৎ করিয়া উঠিল । পিসী, গৌরীর কথায়, সত্য সত্যই একটু জড়-সড় হইয়া পড়িয়া-ছিলেন । এখন যেন একটু ভৎসনার ভাবে বলিলেন,—“ও কি কথা গৌরী ?”

জননী জয়দুর্গাও যেন একটু রাগতভাবে কহিলেন,—“ছি মা, ও-সব কথা তোমার কেন ? ছেলে-মুখে বুড়ো-কথা শুনিলে লোকে নিন্দা করিবে ।—চল, ঝির সঙ্গে তোমার মার-মন্দিরে পাঠাই ।”

জননী কণ্ঠকে শাসন করিলেন এবং ভুলাইলেন । বুদ্ধিমতী বালিকা, কিন্তু ভুলিল না ;—তাহার অন্তরের অন্তরে উজ্জলরূপে জাগিয়া রহিল, সেই—‘বিধবা’ ।

বালিকা ভাবিল,—“বিধবা নিশ্চয়ই কষ্টের কথা । নহিলে পিসী-মা অমন কাতরভাবে আমার পানে চাহিয়া, আমায় কোলে করিবেন কেন ? আর মা-ই বা কেন ও-কথা শুনে, অমন ক’রে শিহরিয়া উঠিবেন ?—আহা, পিসী-মার তবে কি কষ্ট ! কি করিলে, পিসীমার এ কষ্ট দূর হয় ?—হে হরি, তুমি ব’লে দাও, কি করিলে পিসীমার এ কষ্ট দূর হয় ?”

এমনি ভাবে পর-ব্যথা-মোচনের কারণ-নির্ণয়ে, বালিকা উন্মনা হইল । জীবনের সুখ-উষায়, এই ভাবেই করুণার কনক-রশ্মি ফুটিয়া উঠিল । হায় মা, করুণারূপিণি !

রাত্রে শয়নকালে, বালিকা, পিতাকে জিজ্ঞাসা করিল,—  
“বাবা, ‘বিধবা’ কার নাম ? বিধবা কি বড় কষ্টের কথা ?  
আহা, পিসীমা বিধবা ;—পিসীমার তবে বড় কষ্ট ! আচ্ছা,  
আমি যদি বিধবা হই, তবে আমারও এমনি কষ্ট হ’বে ?—ওকি  
বাবা, অমন ক’রে চুপ ক’রে রইলে যে ?”

হঠাৎ প্রদীপের আলোটা নিবিয়া গেল । ছাদের আলিসায় বসিয়া একটা পেচক বিকট-রবে ডাকিয়া উঠিল । জননী জয়-দুর্গার বুক দুক-দুক কাঁপিতে লাগিল । তিনি কপালে করাঘাত করিলেন । হস্তস্থিত কঙ্কণ-আঘাতে একটু রক্তপাতও হইল ।

প্রশ্ন শুনিয়া, আত্মারাম অন্তরের অন্তরে শিহরিলেন । কিন্তু তৎসঙ্গেই মনে মনে একটু হাসিলেন । বিধাতার অব্যর্থ বিধান দেখিয়া হাসিলেন । আবার সেই ভবিতব্য, সেই জ্যোতির্বিদের গণনা, সেই গৌরীর জন্ম, সেই মায়ের মহাপূজা—একে একে মনে জাগিতে লাগিল । বুঝিলেন, ইহারই নাম ভবিতব্য, বা নিয়তির টান,—অথবা অদৃষ্টের লিখন । কোন্ হস্তে কোন্

কথার কি ফল হয়, তাহা তিনি জানিতেন। শাস্ত্রকারের অভ্রান্ত বাণী তাঁহার মনে পড়িল,—“যাদৃশী ভাবনা যস্য সিদ্ধির্ভবতি তাদৃশী।”—হায়! আত্মারামের ভাবনাও কি তবে আত্মজার হৃদয়ে স্থান পাইয়াছে? দুই হৃদয়ে কি এমনি যোগ হয়? চিন্তাও কি তবে সংক্রামক?

এইরূপ এবং আরও অনেকরূপ ভাবনা ভাবিতে ভাবিতে, আত্মারাম বিনিদ্র-নেত্রে রাত্রি যাপন করিলেন।

এইরূপ অতি সূক্ষ্ম কথার আলোচনায়, মনে মনে অনেক করুণার ছবি অঙ্কিত করিয়া, বালিকা বাল্যেই যেন বর্ষায়সী করুণাময়ী জননী হইয়া পড়িল। গুরুজন, শাস্ত্রজ্ঞ ব্রাহ্মণ-পণ্ডিত ও কথকের মুখ-নিঃসৃত উপদেশ,—এবং সর্বোপরি জন্মান্তরীণ আত্ম-সংস্কারে,—বাল্যেই বালিকা ধর্মের অনেক নিগূঢ় রহস্য উপলব্ধি করিল। এমনভাবে আরও দুই বৎসর কাটিয়া গেল। বালিকা সপ্তমবর্ষে পদার্পণ করিল। এ সময়েরও দুই একটি কাহিনী লিপিবদ্ধ করিতে হইবে।





## সপ্তম পরিচ্ছেদ ।

— • —

অন্নপূর্ণার মন্দিরে সুমধুর নহবৎ বাজিল । চিত্রা, গৌরী, পুরবী,—এই সব আপরাহ্নিক কোমল সুরে বাণী বাজিতে লাগিল,—আর তদনুরূপ মিঠা বোলে, ধীর তালে, বাদক দামামায় ঠেকা দিয়া গেল । গোধূলির সোনার কিরণ বক্ষশিরে, মন্দির-চুড়ায়, অটালিকা-শিখরে, কুটীর-অগ্রভাগে ঝক্ ঝক্ করিতে লাগিল । আধ আলো, আধ ছায়ায় প্রকৃতি-সুন্দরী যেন হরগৌরী মূর্তিতে শোভা পাইতে লাগিলেন ।

স্বভাবের সেই শাস্ত স্নিগ্ধ গোধূলি-ছায়ায়,—সেই পরম প্রীতিপ্রদ পবিত্র সময়ে, অন্নপূর্ণার মন্দিরে নহবৎ বাজিতে লাগিল । আত্মারাম সপারিষদবর্গ শ্বেতপ্রস্তর সুশীতল মন্দির-মঞ্চতলে বসিয়া, সেই নহবৎ-ধ্বনি শুনিতে লাগিলেন । সে ধ্বনি মধুর হইতে মধুরতর ;—স্থানকাল-মনের মধুর মিলনে, সে ধ্বনিতে যেন অমৃতবর্ষণ হইতে লাগিল ।

শুদ্ধপ্রকৃতি আত্মারাম, প্রশান্ত গম্ভীরভাবে, নির্ঝিকার চিত্তে বসিয়া, সেই আনন্দ উপভোগ করিতেছেন, এমন সময় তাঁহার

নয়নানন্দরূপিণী কণ্ঠা, মুখে অপার্থিব করুণা ও হৃদয়ে সেই করুণা-প্রতিবিম্বিত সোনার স্বপ্ন লইয়া, পিতৃ-আনন্দ পরিবর্দ্ধিত কণ্ঠে কণ্ঠে, যেন সেইখানে উপস্থিত হইল। তাহার মূর্তি, — তাহারই যোগ্য স্বামী একটি বালিকা, — যেন ছায়ার তায় দীর্ঘ ধীরে, তাহার অনুসরণ করিল। সেই বালিকার নাম, — শিবানী।

শিবানী, আত্মারামের পুরোহিত-কণ্ঠা। উজ্জ্বল শ্রামবর্ণ, তলতল মুখ, সুকুমার অঙ্গসৌষ্ঠব। ত্রমর-কৃষ্ণ অলকা গুচ্ছ চোখে মুখে নাকে চিবুকে আসিলা পড়িয়াছে। গৌরীর পার্শ্বে সে উজ্জ্বল শ্রামমূর্তি, অপরূপ সাজে শোভা পাইতে লাগিল। শিবানী ও গৌরী—সমবয়স্কা।

দুই বালিকায় বেশভূষায় সজ্জিত হইয়া অনূর্ণার মন্দিরে আসিতে লাগিল, পশ্চাতে পরিচারিকা তাহাদিগকে আঙুলিয়া চলিতেছিল। গৌরীর এক হস্তে ক্ষুদ্র এক পাত্রে কিছু শর্করা; অন্য হস্তে জলপূর্ণ একটি ক্ষুদ্র ঘট। শিবানীরও এইরূপ দুই হস্ত আবদ্ধ—এক হাতে ক্ষুদ্র এক খুঁচিপূর্ণ কিছু তণ্ডুল, অন্যহাতে কিছু যব-ছোলা-কড়াই।—করুণারূপিণী বালিকাটির মনে কি উচ্চ আশা লইয়া, এই ভাবে মায়ের মন্দিরাভিমুখে অগ্রসর হইতে লাগিল।

কচি-পায়ে পথ চলিতে চলিতে গৌরী এক স্থানে থমকিয়া দাঁড়াইল। ঈষৎ নীচু হইয়া, অতি সন্তর্পণে তাহার সেই সযত্ন-রক্ষিত ঘটটি ভূতলে রাখিল। পরিচারিকা, সেটি তুলিয়া নিজ-হস্তে লইতে গেল,—গৌরী নিষেধ করিল। স্বহস্তে সে তাহার মনের বাসনা পূর্ণ করিবে,—এই জ্ঞা নিষেধ করিল। তার পর বালিকা দেখিল, সেই পথের পার্শ্বে এক স্থানে একটি ক্ষুদ্র গর্ত



হইতে একদল পিপীলিকা উঠিয়া সার গাঁথিয়া, উৎসাহভরে, আহারান্বেষণে চলিতেছে। তন্মধ্যে বা দুই দশটা পিপীলিকা দলব্রষ্ট হইয়া, এদিক ওদিক ঘুরিতে ঘুরিতে খাণ্ডদ্রব্যের আশ্রয় লইয়া বেড়াইতেছে। বালিকা আপন কনক করস্থিত পাত্র হইতে কিছু শর্করা তুলিয়া লইয়া সেই পিপীলিকাদলে অর্পণ করিল। যে গর্ত হইতে পিপীলিকা-দল উঠিতেছে ও যে স্থান পর্য্যন্ত তাহাদের গতি গিয়াছে, সেই দুই স্থানে কিছু কিছু চিনি রাখিয়া দিল। গতিশীল পিপীলিকা-দল, সহসা স্মৃতীত্র খাণ্ড-গন্ধ পাইয়া একটু স্থির হইয়া দাড়াইল ;—কোথায় খাণ্ড পড়িয়াছে, ঘ্রাণেন্দ্রিয়ের দ্বারা তাহার সন্ধান লইল,—তারপর ধীরে ধীরে সেই পথে চলিতে লাগিল। এইরূপে, যাই সিদ্ধান্ত হইল, শর্করাটুকু তাহাদের আহারীয় দ্রব্য বটে, অমনি ঝটিতি দলে দলে ক্ষিপ্ৰ-গতিতে সহস্র সহস্র পিপীলিকা সেই স্থানে সমবেত হইল এবং পরিপূর্ণ উৎসাহে সেই খাদ্য সঞ্চয়ে ও আহারে মনোযোগী হইল। এ দৃশ্য দেখিয়া, বালিকা, সত্য সত্যই অপার আনন্দ অনুভব করিল। মনে মনে বলিল,—

“হার, মানুষ আপন আপন আহার লইয়াই ব্যস্ত ; অন্নের আহার হয় কিনা,—হওয়ার সম্ভাবনা আছে কিনা, সে কথা একবার ভাবেও না। বড় জোর, এক মানুষ, আর এক মানুষের আহার যোগাইয়াই আপন কর্তব্য শেষ হইল, মনে করে। বড় হইয়া আমি এ প্রথা উঠাইব। মা-অন্নপূর্ণার রাজ্যে, কোন প্রাণী না অভুক্ত থাকে, আমি সেই ব্যবস্থা করিব।”

কেবল এক স্থানেই এই পিপীলিকা-দলে শর্করা বিলাইয়া বালিকা ক্ষান্ত হইল না,—যেখানে যেখানে পিপীলিকার গর্ত

আছে দেখিল, বা যেখানে যেখানে পিপীলিকা থাকার সম্ভাবনা  
বুঝিল, সেই সেই স্থানেই, সে শর্করা ছড়াইল। এইরূপ,  
ভূতলে, দেওয়ালের ফাটালে, ক্ষুদ্র চারা বৃক্ষতলে, কিছু কিছু  
শর্করা রাখিয়া দিয়া,—মাতৃরূপিণী গৌরী, জীবের কল্যাণ কামনা  
করিতে করিতে চলিল। এইরূপ সে প্রতিদিনই করিত।

গৌরীকে দেখিয়া, সহসা কোথা হইতে এক দল চড়ুই  
পাখী আসিয়া, গৌরীকে ঘেরিল। মুখে আনন্দস্ফূটক ধ্বনি  
করিতে করিতে, তাহার সম্মুখে পশ্চাতে, বামে দক্ষিণে,  
উর্ধ্বে অধে আসিয়া লুটোপুটি হইতে লাগিল। কেহ মস্তকে,  
কেহ স্কন্ধে, কেহ বাহুমূলে বসিয়া,—কেহ আশাপূর্ণ অন্তরে  
সম্মুখে উড়িয়া,—আর কেহ বা অতি আব্দারে বালি-  
কার পায়ে-পায়ে জড়াইয়া, আনন্দপ্রকাশ করিতে লাগিল।  
তাহারা যেন বিলক্ষণরূপে বুঝিতে পারিল, তাহাদের এক অতি  
আপনার জন, সারাদিনের পর তাহাদিগকে স্নেহ-সম্বোধনে  
প্রবোধিত করিয়া আদর করিতে, তাহাদের সম্মুখে আসিয়া  
দাঁড়াইয়াছে। বুঝিতে পারিল, যেন মূর্ত্তিমতী স্নেহরূপিণী মাতা  
স্নেহস্তুতদানস্বরূপ, তাহাদের জন্ত তৃষ্ণার জল ও ক্ষুধার তণ্ডু-  
লাদি সংগ্রহ করিয়া আনিয়াছেন। তাই তাহারা প্রকৃতিদত্ত  
কিচিমিচি স্বরে, মুক্তকণ্ঠে আনন্দ-কোলাহল করিতে লাগিল।  
অনেকক্ষণের পর মাকে দেখিতে পাইয়া, মায়ের স্নেহের নিধি  
শিশুসন্তানগণ যেরূপ আনন্দ-কোলাহল করিয়া থাকে, সেইরূপ  
আনন্দ-কোলাহল করিতে লাগিল। দেখিয়া, বালিকার চোখে  
জল আসিল। মনে মনে বলিল,—

“তবে, ইহারই নাম ভালবাসা ;—ইহারই নাম করুণা।

বড় হইয়া তবে আমি এই ভালবাসায় ও করুণায়,—জগৎ-সংসারকে আপনার করিয়া লইব । মানুষ ত দূরের কথা,—এই ভালবাসা ও করুণায়,—পশু পক্ষী কীট পতঙ্গকেও আপনার করা যায় ।—বড় হইয়া কি তবে আমি এই ভাবে জীব, জগৎ ও জগদীশ্বরকে দেখিতে পারিব না ? মা-জগজ্জননি ! তুমিই আমার সহায় হইও ।”

গৌরী, সন্নিবী শিবানীর হস্ত হইতে তণ্ডুলাদি লইয়া সমবেত চড়ুই পাখী দলকে খাইতে দিল । ভূতলে নিক্ষেপ করিবার আর বিলম্ব সহে না,—তাহারা গৌরীর সেই ক্ষুদ্র কনক-কর-পন্ন হইতেই সেই আহারীয়, নিভয়ে ও নিরুদ্বেগ চিত্তে, মনের আনন্দেই খাইতে লাগিল । তারপর গৌরী সেই জলপূর্ণ ঘটটি তাহাদের সম্মুখে ধরিল ;—তাহারা মনের সাথে সেই সুশীতল জল পান করিয়া পরিতৃপ্ত হইল ।

সেখান হইতে ছই পা অগ্রসর হইতে-না-হইতে অট্টালিকা-আলিসা ও মন্দির-চড়া হইতে একদল পারাবত আসিয়া জুটিল । তাহারাও ঐ ভাবে গৌরী-প্রদত্ত জল তণ্ডুলাদি পানাহারে প্ররত্ত হইল । শিবানী মনে কি ভাবিয়া, স্বহস্তে একটি পারাবতকে খাওয়াইতে গেল । পারাবত তাহার সে স্নেহে ভুলিল না,—বুঝিল, তাহার সেই বাহ্যিক স্নেহের সহিত, বুঝি আন্তরিক আর একটু কি সম্বন্ধ আছে । বুঝিল, সে স্নেহ গৌরীর স্নেহের মত অকৃত্রিম ও সরলতাময় নয় । তাই সে, তাহার নিকট হইতে একটু সরিয়া বসিল,—তার পর কি মনে করিয়া, তথা হইতে একেবারে উড়িয়া গেল ।—সে দিন আর তাহার ভাগ্যে গৌরী-প্রদত্ত আহার জুটিল না ।

ঘটনাটি গৌরী লক্ষ্য করিল,—পরিচারিকা লক্ষ্য করিল,—  
 আর শিবানী ত লক্ষ্য করিয়াছে । গৌরী তাহার সেই স্বভাব-  
 সজ্জল নয়ন-পদ্ম লইয়া, ঈষৎ হাসি হাসি মুখে, সঙ্গিনীর পানে  
 চাহিল । সঙ্গিনী শিবানী ক্ষুদ্র বালিকা হইলেও, গৌরীর সে  
 নীরব হাসির অর্থ বুঝিল । মনে মনে সে অপ্রতিভ হইল ।  
 অপ্রতিভ হইল বটে, কিন্তু ব্যথিত হইল না । করুণাময়ী গৌরীর  
 স্বাভাবিক করুণদৃষ্টি, অন্তায় বা অযথা দেখিলেও, সহসা কাহাকে  
 ব্যথা দেয় না,—ব্যথা দিতে পারে না । তাই শিবানী, আপন  
 প্রকৃতির দুর্বলতা ও করুণার অপূর্ণতা উপলব্ধি করিয়া,—অধিকন্তু  
 গৌরী তাহা বুঝিতে পারিয়াছে ভাবিয়া, অপ্রতিভ হইল ।  
 বিধাতার বিধানে, হৃদয়ের সৃষ্ণবৃত্তি গুলি, মানবের সকল অব-  
 স্থাতেই সমান । বাল্যে, কৈশোরে যৌবনে, বার্দ্ধক্যে সর্ব-  
 কালেই এক ;—কেবল অবস্থাভেদে তাহার ব্যবস্থা বা প্রকার-  
 ভেদ হয় মাত্র । তাই, কারণ ঘটিলে, অপ্রতিভ বা সপ্রতিভ,  
 দুষ্কের শিশুতেও হয়,—হইয়াও থাকে । এ ঘটনা সংসারে নিত্য  
 ঘটে । সূক্ষ্মভাবে দেখিতে জানিলে, শিশুতেও মহানু মানব-হৃদয়-  
 রহস্য দেখিতে পাওয়া যায় । শিবানী আত্ম-ব্যবহারে, আপনিই  
 লজ্জিত হইয়াছে ; কারণ পারাবতটি তাহার কৃত্রিম স্নেহ বুঝিতে  
 পারিয়া উড়িয়া গিয়াছে : আর গৌরী তাহা বুঝিতে পারিয়া  
 ঈষৎ হাসি-হাসি মুখে শিবানীর পানে চাহিয়াছে । গৌরীর সেই  
 নীরব হাস্যের পর তাহাকে আর কোন কথা কহিতে হইল না —  
 শিবানী আপনা হইতে বলিল,—“তাই গঙ্গাজল ! পায়রাটা  
 আপনা হইতে উড়িয়া গেল ।—তবে পায়রাতেও আমাদের  
 মনের ভাব বুঝিতে পারে ?”

স্নেহপূর্ণ স্বরে গৌরী উত্তর দিল,—“শুধু পায়রা কেন ভাই—  
ক্ষুদ্র উইপোকা-উকুনটি পর্য্যন্ত আমাদের মনের ভাব বুঝিতে  
পারে । আর কিছু না পারুক, ভালবাসা আর নিষ্ঠুরতাটি  
বুঝিতে পারে । কেননা এই দুইটি লইয়াই জীবের জীবন-  
সমস্যা । ভগবান্ এই দুটি বুঝিবার শক্তি সকলকে দিয়াছেন ।  
মানব হইতে পশু-পক্ষী, কীট-পতঙ্গ পর্য্যন্ত ইহা বুঝিতে পারে ।  
এই অংশে, সকল জীব সমান । সেইজন্য কাহারও প্রতি নিষ্ঠুরা-  
চরণ করিতে নাই, কাহারও প্রতি ঘেঁষ-হিংসা করিতে নাই,—  
সকলকেই আশ্রয় দেখিতে হয়,—সকলকে ভালবাসিতে হয় ।”

শিবানী বলিল,—“আমি ভাই অত-অত বুঝিতে পারি না,—  
তাই আমোদ ক’রে পায়রাটা ধরিতে গিয়াছিলাম ।”

এবার গৌরী হাসিতে হাসিতে বলিল,—“শুধুই কি ধরিবার  
আমোদ মনে ছিল ?—তার বেশী আর কিছু নয় ?”

শিবানী ।—তোমার কাছে লুকাইব কেন গঙ্গাজল ?—  
পায়রাটা ধরিয়া তাহার ডানা হইতে দুটো পালক লইব মনে  
ক’রেছিলাম ।

গৌরী এবার যেন একটু অধিক ব্যথিত হইয়া গদগদস্বরে  
বলিল,—“তবে দেখ, তোমার মনে এক, আর মুখে এক ছিল !  
এমন মনে-মুখে পৃথক্ করিতে নাই । আর এমন আমোদও  
মনে স্থান দিতে নাই । যাতে আর এক জনের কষ্ট হয়,—আর  
একজন যাতে ব্যথা পায়,—তাতে তোমার আমার আমোদ বা  
উপকার হ’লেও, তা করা মহাপাপ ।”

শিবানী ।—এ কথা আমায় কেহ শিখায় নাই । সংসারে  
সকলেই এমনি করে, আমিও তাই ঐরূপ করিতে গিয়াছিলাম ।

ভাবিয়াছিলাম, ইহাই বুঝি সংসারের রীতি । বুঝিলাম, এই কপটতা ও প্রবঞ্চনা ভাল নয়—সকলেই ইহা বুঝিতে পারে,—পাখীটিও বাদ যায় না । ঐ পায়রাটির যদি মানুষের মত কথা কহিবার শক্তি থাকিত, ত নিশ্চয়ই সে স্বর্গার সহিত আমায় হুঁকথা শুনাইয়া দিত, আর ঐ মন্দির-চুড়ায় বসিয়া, আমার পানে চাহিয়া, অবজ্ঞাভরে আমায় উপহাস করিত ।—বোন, তোমার ঐ করুণামাখা মুখমণ্ডল ও স্বভাব-সজল নয়ন-পল্লব দেখিয়া, এখন আমি সহজেই যেন এ ভাব উপলব্ধি করিতে পারিতেছি ।

গৌরী ।—ভগবান্ তোমার মনের চোখ খুলে দিন,—তুমি যেন এই ভাবে জগৎকে দেখিতে শিখ ।

শিবানী ।—এখন বুঝিতেছি: পায়রাতেও সত্য মানুষ চিনে । আমার মনের পাপ বুঝিয়া, তাহারা আমার হাতে খাইল না, কিন্তু তোমার হাতে কেমন আয়োদ ক'রে খাইতে লাগিল । আর চড়ুইপাখী গুলো তো একেবারে কাঁক বেঁধে তোমার গায়ে এসে পড়িল । সত্য বোন, তুমি ভাগ্যবতী ।

গৌরী ।—মনে করিলে, এ ভাগ্য তো তোমারও হয় ? পরমেশ্বর আর আর বিষয়ে মানুষকে অণের মুখাপেক্ষী করিয়া-ছেন বটে, কিন্তু অন্তরে সকলকে সমান স্বাধীন করিয়া দিয়া-ছেন । মনে করিলে সকলেই অন্তরে বড় হইতে পারে ।—আহা, সকলে তাহা মনে করে না কেন ? তাহা হইলে সংসার কি সূতের স্থান হয় !

শিবানী ।—আমি বোন, এখন হইতে সর্ববিষয়ে তোমায় দেখে-শুনে তোমার মত হ'য়ে চলিতে চেষ্টা করিব ।

গৌরী ।—ঠিক তা নয়, আমারও দোষ আছে,—পরে আরও দোষ জন্মিতে পারে,—তুমি সহজ-জ্ঞানে সরল পথ ধরিয়া চলিও,—কখন বাঁকা-পথে যাইও না । বাঁকা-পথে পদে পদে বিপদ—নিজেরও বটে, পরেরও বটে । বিশেষ, আহারের কি কোনরূপ আসক্তির লোভ দেখাইয়া, দুর্বল লোভী জীবকে আপন আয়ত্তে আনিয়া, ছলে বলে বা কৌশলে তাহার কোন-রূপ অনিষ্ট করা, অতি-বড় নিষ্ঠুরের কাজ ।—ভাই ! আমার ‘গঙ্গাজল’ হইয়া, তুমি এমন নিষ্ঠুরকার্য্যে লিপ্ত হইবে কেন ?

শিবানী ।—যা হইবার হইয়াছে,—আর আমি কখন কপটতার প্রশয় দিব না । মনকে গঙ্গাজলের মত,—ভাই গঙ্গাজল, তোমার মত, পবিত্র, শীতল ও স্বচ্ছ করিব । বাবা তোমায় বলেন—করুণাময়ী । সত্যই তুমি করুণাময়ী । প্রাণে করুণা না থাকিলে কি তুমি কীট-পতঙ্গের আহার যোগাও ?—পশু-পক্ষীও তোমার বশ হয় ? এখন চল ভাই, মার মন্দিরে গিয়া উঠি । ঐ দেখ ভাই, তোমার বাপ, কেমন একদৃষ্টে তোমায় দেখিতেছেন । বুঝি উনি আমাদের কথাবার্তা, কতক কতক শুনিতেও পাইয়াছেন ।

গৌরী ।—তা শুনুন না, কিছু মন্দ কথা ত হয় নাই ?

বালিকাঙ্গয় অগ্রে অগ্রে, পশ্চাতে পরিচারিকা, অন্নপূর্ণার মন্দিরে গমন করিতে লাগিল । তখন সন্ধ্যা হয়-হয় । তাহারা বিস্তৃত মন্দির সোপানাবলী আরোহণ করিবার উপক্রম করিয়াছে, এমন সময় একটি নিরীহ কপোত, হিংস্রক শ্বেন-পক্ষী কর্তৃক আহত হইয়া, রক্তাক্ত কলেবরে, গৌরীর বন্ধের উপর আসিয়া লুটাইয়া পড়িল । চমকিত গৌরী, সজলনয়নে একবার



সেই কপোতপানে, আর বার উর্দ্ধে আকাশপানে চাহিয়া দেখিল,—হায় ! এমন নিষ্ঠুরের কাজ কে করিল ? ঐ বড় পাখীটা কি ? পাখী হইয়া পাখীর প্রাণসংহার করিল ?

করুণাময়ী বালিকার কোমল প্রাণ কাঁদিয়া উঠিল,—নীরবে শতধারে বুক ভাসিয়া যাইতে লাগিল,—সে তপ্ত অশ্রুধারায় কপোতের স্তম্ভকৃত রক্তাক্ত দেহ নিষিক্ত হইল,—তাহা ধোতের জল বুঝি স্বতন্ত্র জলের আর প্রয়োজন হইল না ।—মুহূর্তের জল কপোত একবার চক্ষু মেলিল । মুমূর্ষু সন্তান, যেমন অস্তিম-যন্ত্রণায় কাতর হইয়া, নীরবে, সজল নয়নে, জননীপানে চাহিয়া থাকে,—বলি বলি করিয়া যেমন সে যন্ত্রণা সে ব্যক্ত করিতে পারে না,—কপোত যেন ঠিক সেই ভাবে সেই অস্তিম-যন্ত্রণা বুঝাইবার জল,—একবার চক্ষু মেলিল । দেখিল, মেহময়ী জননী তাহাকে বুকে করিয়া করুণার অমৃতধারা ফেলিতেছেন । এ দৃশ্য দেখিয়া পক্ষীর পক্ষি-জন্ম ধল হইল । সে বুঝি মমতার এ অমৃতাস্বাদ জন্মান্তরে পাইয়াছিল,—তাই সেই নিষ্ঠুর শ্যেনের তীক্ষ্ণ নখরে দীর্ঘপ্রায় হইয়া, সে যন্ত্রণার তীব্রতা বুঝাইবার জল, অন্য কোথাও পতিত না হইয়া, জননীরূপিণী মেহময়ী গৌরীর অঙ্গেই রক্তাক্ত কলেবরে মুচ্ছিত হইয়া পড়িয়াছিল । আর সেই মমতাময়ী মাতাও, যেন প্রকৃত সন্তান-বাৎসল্যে অভিভূত হইয়া, কণ্ঠকের তরে, আত্মবিস্মৃতভাবে, বিগলিত অস্তরে, তাহাকে নিরীকণ করিতে লাগিল । পরম্পরের সে নীরব সন্দর্শনে, নীরব অশ্রুধারাই, পরম্পরের উত্তর প্রদান করিল । প্রবলের অত্যাচারে সাংঘাতিকরূপে আহত—মুমূর্ষু সন্তানকে কোলে করিয়া বসিয়া, জননী যেমন নির্ঝাঁক স্থির নিশ্চল দৃষ্টিতে তৎপ্রতি



চাহিতে চাহিতে, প্রতি পলে যবণাধিক যন্ত্রণা অনুভব কবেন,  
 .গারীও যেন ঠিক সেইরূপ যন্ত্রণা অনুভব করিতে করিতে মুমূর্ষু  
 কপোতের মত লইয়া, তাহার ঘাড়ে তাহার ঘাড়ে তাহার ঘাড়ে তাহার ঘাড়ে  
 বহিয়াছে ! পরিচাবিকা জল আনিয়া কপোতের মুখে চোখে  
 নিক্ষেপ করিল,——হবি হবি । সেই জলে মুহূর্তের জন্ম কণ্টকিত  
 কলেবর হইয়া, বাব দুই চাব কণ্ঠনালী ঝাপাইয়া, কপোত—  
 কপোত জন্ম শেষ করিল । তাহার ঘাডের হাড় ভাঙ্গিয়া পড়িল—  
 জন্মের মত তাহার দুই চক্ষু মুদিত হইল,—ব্রহ্মাণ্ডের বিনাময়েও  
 সে চক্ষু আব ধুলিবে না ।





## অষ্টম পরিচ্ছেদ ।

জন্মান্তরীণ কর্মফলে, নিষ্ঠুর শ্যেন-কর্তৃক আহত হইয়া, কপোত কপোত-জন্ম শেষ করিল,—বালিকা গৌরী মৃত-কপোত কোলে লইয়া, স্থির-নিশ্চলভাবে, নির্নিমেষ নয়নে বসিয়া রহিল। কপোত মরিল, তৎসঙ্গে করুণারূপিণী বালিকার হৃদয়ে, চিরদিনের মত একটি করুণার ছাপ পড়িল। অনেক সহিতে হইবে বলিয়াই, বিধাতা বহুপূর্বে বালিকার কচি-বুকে শোকের শক্তি-শেল বসাইয়া দিলেন।

বালিকা মৃত-কপোত কোলে লইয়া, যেন মৃতকল্প হইয়া বসিয়া রহিল,—মুহূর্তকাল কেহ কোন কথা বলিতে পারিল না,—বলিতে সাহসী হইল না। পরিচারিকা ও শিবানী, সেখানে ঠায় দাঁড়াইয়া রহিল। পরিচারিকা মনে মনে ভাবিল,—“ওমা, আমি ত এমন ধারা আর কখন দেখি নাই। আমার এই এত-খানি বয়স হ'লো,—ঢের-ঢের ছেলে-মেয়ে দেখেছি,—এমনটি আর কোথাও দেখি নাই। এঁয়া! এ গৌরী কি তবে শাপভ্রষ্টা সৌরী? এই কচি প্রাণে এত দয়া,—এত ব্যথাবোধ! আমার যে একেবারে হক্চকিয়ে দিলে,—মুখের 'রা' যে ফুটে না?”

শিবানী ভাবিল,—“এ আমারই নষ্টবুদ্ধির ফল ! মনের মধ্যে পাপ পুষ্টিয়া, যে পায়রাটিকে আমি খাওয়াইতে গিয়াছিলাম, বুঝি এ সেই পায়রা । হায় ! পায়রাটি না খাইয়া, প্রবলের অত্যাচারে, বাজ্-পক্ষীর তীক্ষ্ণ নখরাঘাতে, ব্যথার ব্যথীর বুকে পড়িয়াই মরিল,—আমার এ পোড়া বুকে আসিল না ! গঙ্গাজল যেন আমার, কেমন হইয়া গেল ।—কোন্ মুখে আর কথা কই ?”

গৌরীর মনে, তখন বুঝি এই ভাবের উদয় হইতেছিল,—  
“হায়, দুর্ভাগ্য জীব ! কেন তোর এমন নিষ্ঠুর মরণ হইল ? আমার বুকের কলিজা ভাঙ্গিয়া দিবি বলিয়া কি, তুই আমার বুকে পড়িয়া মরিলি ? হায়, কে তোর এ দশা করিল ? এমন ভাবে, কে তোর মৃত্যুর কারণ হইল ? বাজ্-পক্ষীই কি এ ক্ষেত্রে সকল অনর্থের মূল ? তারই বা এ ক্ষমতা কে দিল ?—ব্যথাহারী মধুসূদন, এই কি তোমার ব্যথাহারী নাম ? হায় মা পৃথিবী ! তোর বুকে এত ব্যথা ?”

তিন জনেই নীরব,—কাহারও মুখে বাক্-ফুর্তি নাই । মুহূর্ত-কাল এইভাবে অতিবাহিত হইল ।

মায়ের মর্মর মঞ্চতলে বসিয়া,—আত্মচিন্তা-নিরত আত্মারাম এই করুণদৃশ্য দেখিতেছিলেন । দেখিতে দেখিতে, তাঁহার অনেক চিন্তা মনে জাগিতেছিল । প্রাণাধিকা তনয়ার অত্যাচার কার্য্যাবলী, তাঁহার বিশেষ মনোযোগ আকর্ষণ করিয়াছিল । তিনি বহুক্ষণ হইতে, নিবিষ্টমনে গৌরীকে লক্ষ্য করিতেছিলেন,—ভাববিহ্বলচিত্তে বালিকার কার্য্যকলাপ নিরীক্ষণ করিয়া, মনে অনেক ভাঙ্গা-গড়ার কল্পনা করিতেছিলেন ।—বালিকার সেই পিপীলিকাকে শর্করাদান, কপোত-চড়ুই পাখীদের সেই

জল-তুলাদি দান,—পরম প্রীতিপূর্ণ নেত্রে অবলোকন  
 করিতেছিলেন। তার পর দুই বালিকার উচ্চভাবপূর্ণ কথাবার্তা,  
 —তাহারও কতক কতক তিনি শুনিতেছিলেন। শুনিয়া হর্ষে,  
 আনন্দে, বিষয়ে—এক একবার রোমাঞ্চিত-কলেবর হইয়া  
 উঠিতেছিলেন। নহবতের সেই ধীর-মধুর ধ্বনি অপেক্ষাও  
 গৌরীর কণ্ঠধ্বনি—বালিকার সেই গভীর জ্ঞানগর্ভ কথোপকথন,  
 —তাঁহার মধুরতর বোধ হইতেছিল। তিনি একাগ্রচিত্তে,  
 আনুজ্ঞার এই অপরূপ শৈশব-খেলা দেখিতেছিলেন। তারপর,  
 হায়!—তারপর যখন দেখিলেন, মন্দির-সোপান আরোহণের  
 সম-সমকালে, গৌরীর কচি বন্ধে, রক্তাক্ত কলেবর একটি  
 কপোত উর্দ্ধ হইতে লুটাইয়া পড়িল,—শিকারী শ্রেনের স্মৃতিঙ্ক  
 নখরাঘাতে ও বিষম পাক্সাটে,—যখন সেই নিরীহ পারাবতটি  
 মৃতকল্প হইয়া, অস্তিমের সহানুভূতিলাভে, জননীরূপিণী মূর্ত্তিমতী  
 করুণার কোমল ক্রোড়ে স্থানলাভ করিল,—এবং তারপর  
 যখন সেই মাতাপুত্রের নীরব যন্ত্রণানুভব ও নির্ঝাক রোদন,  
 পরম্পরের প্রতি সেই অনিমেষ কাতর দৃষ্টি, সেই বাকহীন  
 মর্শ্বস্তদ ব্যথা, ও সর্বশেষ—সেই একের বিয়োগে অন্যের গভীর  
 শোক-বিহ্বলতা -- সম্যক্রূপে উপলব্ধি করিলেন, তখন তাঁহার  
 সেই স্বাভাবিক গভীরমূর্ত্তি আরও গাভীর্য্যে পরিপূর্ণ হইল ;—  
 পরন্তু সেই গাভীর্য্যে তাঁহার মুখশ্রী অতি অপূর্ব ভাব ধারণ  
 করিল। মূর্ত্তি বা মুখের ভাব পরিবর্তনের সঙ্গে সঙ্গে, স্বাভাবিক  
 স্বরেরও অনেক তারতম্য হয়। তাই, উপস্থিত মুহূর্ত্তে, আন্বা-  
 রামের কণ্ঠস্বর বড় মধুর, বড় পবিত্র, বড় করুণাপূর্ণ হইল।  
 সেই করুণাপূর্ণ কণ্ঠে, অন্যের অগোচরে, তিনি আপনাপনি

কহিলেন,--“মা অন্নপূর্ণে! তোমার মন্দির-প্রাঙ্গণে এ স্নিগ্ধ সায়ং-সন্ধ্যায়, আজ এ কি করুণার ভাবাভিনয় দেখিলাম! মা আমার, আমার ভবানীর মঙ্গল ক’রো!”

ধীর পাদক্ষেপে, গুরুগম্ভীরভাবে, আত্মারাম মন্দির হইতে অবতরণ করিলেন। যেখানে, মৃত-কপোত ক্রোড়ে লইয়া করুণারূপিণী কণ্ঠা স্থির নিশ্চলভাবে বসিয়াছিল, ধীরপদে সেইখানে আসিলেন। স্নেহপরিপ্লুতস্বরে, গদগদ কণ্ঠে বলিলেন, “মা আমার! মন্দির-উপরে এস,- মার আরাতির সময় হ’লো।”

গৌরী নির্বাক নিস্তব্ধভাবে রহিল,—সে স্বর তাহার কর্ণে স্থান পাইল না।

পিতা পুনরায় ডাকিলেন,—“ভবানী, এখান হইতে উঠ,— মার মন্দিরে যাইবে চল।”

এবার যেন বালিকার চমক ভাঙ্গিল। খুব জোরে একটা মর্ম্মচ্ছেদকর নিশ্বাস ফেলিয়া পিতার পানে চাহিল।

আবার সেই স্বভাবসজল স্থির করুণ দৃষ্টি! সে দৃষ্টিতে, নূতন যেন কি মিশিয়াছে।—আত্মারামের চক্ষে জল আসিল,— যুহুর্ভের জন্ম তাঁহার কণ্ঠরোধ,—বুঝি দৃষ্টিলোপও হইল।

এমন সময় অদূরে, মায়ের মন্দির-সন্নিহিত অতিথিশালায়— “বল হরি—হরিবোল” রবে এক ধ্বনি উঠিল। সকলের কান সেই দিকে গেল। আত্মারাম, সন্মুখবর্তী এক ভৃত্যের মুখে অবগত হইলেন, অতিথিশালায় এক যাত্রীর মৃত্যু হইয়াছে। ধীরভাবে তিনি একটি নিশ্বাস ফেলিলেন।

কণ্ঠার পানে চাহিয়া পুনরায় বলিলেন, “ভবানী, এখান হইতে উঠিয়া মার মন্দিরে চল।”

এবার গৌরী কথা কহিল । কিছু ভার-ভার স্বরে, অপেক্ষাকৃত গভীরকণ্ঠে পিতাকে বলিল, “বাবা, আজ আর আমি মার মন্দিরে উঠিব না,—আজ আমি অশুচি ।”

‘কে, এ বালিকা ? এ কি শিশু,—না বর্ষীয়সী কোন প্রৌড়া ? অথবা হায়, ছন্নবেশিনী,—বালিকারূপিণী কোন দেবী ?’

আত্মারামের যেন ভ্রম হইল,—তিনি যেন কিছুই বুঝিয়া উঠিতে পারিলেন না । মুহূর্তের জ্ঞ স্তম্ভিত হইয়া দাঁড়াইয়া রহিলেন ।

ভৃত্য আসিয়া সংবাদ দিল,—“মায়ের আরতির সময় হ’য়েছে,—আপনি আসুন ।”

আত্মারাম ।—ভবানী, আজ তবে মায়ের আরতি দেখিবে না ? আমি তবে যাই ?

গৌরী ।—হাঁ বাবা, যাও । আমার অশৌচ,—মাকে এ কথা জানায়ো ।

আবার সেই করুণস্বর,—“আমার অশৌচ ।” আত্মারামের শরীর রোমাঞ্চিত হইয়া উঠিল, চক্ষে জল আসিল । মনে মনে বলিলেন, “মা, অশৌচ তোমার ? এই কচি-বয়সেই জীবের প্রতি এ মমতার ভার স্বেচ্ছায় গ্রহণ করিলে ? মমতাময়ি, বালিকে ! মাতার বিশ্বপ্রসারিণী মমতা লইয়াই তুমি জন্মগ্রহণ করিয়াছ,—সেই জগন্মাতা জগদম্বাই তোমার মমত্ব-বুদ্ধির সহায় হইবেন ।”

গৌরী ও শিবানীকে বাটা লইয়া যাইতে, আত্মারাম পরিচারিকাকে আদেশ করিলেন । তিনি মায়ের আরতি দর্শন করিতে গেলেন ।

আবার সেই অতিশিখালা হইতে গম্ভীরস্বরে ধ্বনিত হইল,—  
“বল হরি—হরিবোল ।”

মূর্ত্তের জন্য সকলের শরীর রোমাঞ্চিত হইয়া উঠিল । কি পবিত্র, গম্ভীর, ভীতিবৈরাগ্যপূর্ণ সে স্বর ! মন্দির-সোপানে উঠিতে উঠিতে আশ্চার্যম মনে মনে বলিলেন,— “কে রে . ভাগ্য-বান্, এ মধুর সন্ধ্যায়, মায়ের-আরতির সময়, গম্ভীর হরিধ্বনি শুনিতে শুনিতে, স্বর্গে যাইতেছে !”

গৌরী ভাবিল,—“জীবের এই পরিণাম ? সকলকেই তবে যাইতে হয় ? কেহ সুখে যায়, কেহ দুঃখে যায়,—এই মাত্র প্রভেদ । কোথায় যায় ?—মা . আনন্দময়ীর ক্রোড়ে । তবে আশ্রয়ও একদিন যাইতে হইবে ? কিন্তু বিলম্ব আছে । যাইবার আগে কাজ করিয়া যাইব,—পরকালের পথ প্রশস্ত করিয়া যাইব,—নচেৎ আবার আসিতে হইবে ।”

কে, এ বালিকা ? একি বালিকা, না মায়ামূর্ত্তি ?





## নবম পরিচ্ছেদ ।

—\*—

এবার সেই পরিচারিকা আপনা আপনি বলিয়া উঠিল,—

“কি সুখের মরণ !”

স্নেহমাখা স্বরে গৌরী বলিল, “কি, এইরূপ মৃত্যু তোমার ইচ্ছা হয় ?”

পরিচারিকা ।—জন্মিলেই যখন মৃত্যু, তখন এমন মরণ, কে না কামনা করে ?

গৌরী ।—মৃত্যুই তবে নিশ্চিত,— আর সব অনিশ্চিত ?— কেমন কি ?

এ প্রশ্ন ঝি়ের যেন ভাল লাগিল না, বলিল, “তা এ সব কথা তোমার কেন দিদি ? এখন ঘরে চল,—মরা পায়রাটা কোল থেকে ফেলে দাও । গা-হাত-পা ধুয়ে কাপড় ছাড়িবে চল । অমন বিষণ্ণ ভাবে থেকো না । মার আরাতির পর, হুর্গাবাড়ীতে পুরাণ-পাঠ হ'বে, শুনিবে তখন ।”

এবার বালিকার চোখে জল আসিল । কাঁদ-কাঁদ মুখে বলিল, “কি, পায়রাটিকে ফেলে ঘরে যাব কিরূপে ? আমার পা যেমন অবশ হ'য়ে গেছে,—এখান থেকে উঠিতে পারি না ।”



পরিচারিকা ।—আমার কোলে উঠে যাবে চল ! কি করবে বোন,—সংসারের গতিই এই । দুর্বলের উপর প্রবলের অত্যাচার, চিরদিন হ'য়ে আসছে ।

গৌরী আবার যেন তত্ত্বজ্ঞানময়ী প্রোড়া হইল । বলিল,—“চিরদিন হ'য়ে আসছে ? কেন হয় ? এ নিয়ম কি কেহ রোধ করিতে পারে না ? এর কি কেহ কর্তা নাই ?”

অনেকক্ষণের পর শিবানী এবার কথা कहিল । দেখিয়া শুনিয়া, সে-ও যেন জ্ঞানবিজ্ঞানময়ী প্রোড়া হইয়াছে । সঙ্গ গুণে উচ্চ মনোবৃত্তির প্রভাব, আর একজনের উপরও আসিয়া পড়ে । গৌরীর প্রভাব, শিবানীর উপরও কিছু আসিয়া পড়িয়াছে । তাই শিবানী বলিল,—“কর্তা সেই ভগবান্ । তাঁরই ইচ্ছায় সকলই হয় । এই যে বাজপক্ষী পায়রাটিকে বিনষ্ট করিল, এও তাঁর ইচ্ছা ।”

গৌরী ।—তাঁর ইচ্ছা ? তবে তিনি কেমন ?—তিনি কি নিষ্ঠুর,—ইহাই বলিতে চাও ?

শিবানী ।—বাবার কাছে শুনেছি, জন্মার্জিত কর্মফলে জীব এ যন্ত্রণা ভোগ করে । এ সকলি জন্মার্জিত কর্মফল ।—এতে বিধাতার কোন হাত নাই ।

গৌরী ।—হায়, কেমন সে বিধাতা ? কিরূপ তাঁর বিধান ? শুনেছি,—তিনি সর্লশক্তিমান্ ও ইচ্ছাময় । তা ইচ্ছাই যার কার্য্য, তিনি ইচ্ছা করিলেই ত এ জগৎ সূখের করিতে পারিতেন ? তবে কেন জগতে এত দুঃখ ?

শিবানী । সূখ দুঃখ লইয়াই সংসার । শুধু সূখটুকু থাকিবে, দুঃখ থাকিবে না,—এমন হইতে পারে না । আলোর পর

অন্ধকার, গ্রীষ্মের পর বর্ষা, জীবনের পর মৃত্যু—পর্যায়ক্রমে হইয়া আসিতেছে । সুখ দুঃখও সেই পর্যায়ভুক্ত । এ নিয়ম কে রোধ করিবে ?

গৌরী ।—কে রোধ করিবে, তা জানি না । কিন্তু আমার মনে হয়, জগৎ হইতে হিংসারূতি উঠিয়া গেলেই ধরার ভার অর্ধেক লাঘব হয় । দুর্বলের প্রতি প্রবলের যে অত্যাচার, তাহার মূলেও হিংসা । এই হিংসাই সর্ব অনর্থের মূল । দেখ, স্বজাতির প্রতি স্বজাতির হিংসা, যেন প্রকৃতিগত একটা ধর্ম । মানুষ মানুষের প্রতি হিংসা করে, পক্ষী পক্ষীর প্রতি হিংসা করে ;—কীটপতঙ্গাদি পর্য্যন্ত এ নিয়মে বাদ পড়ে না ।

শিবানী ।—এই হিংসার মূল কোথায়, ভাবিয়াছ কি ?

গৌরী । ভাবিয়াছি,—স্বার্থ । আত্মরক্ষা ও আত্মপ্রাধান্যের জন্মই এই স্বার্থ অবলম্বন করিতে হয় । ছোটটি হইতে বড়টি পর্য্যন্ত,—কীট-পতঙ্গ হইতে মানুষ অবধি,—এই স্বার্থে জড়িত । বাজ পক্ষী যে পায়রাটিকে বিনষ্ট করিল,—ইহাও তাহার জীব-ধর্মের ফল—সেই স্বার্থ । এই স্বার্থ বর্জন করিতে হইবে । বিধাতার চরম সৃষ্টি—মানবকে ইহার আদর্শস্থানীয় হইতে হইবে । কেননা, মানব-মনেই ভগবান্ বিবেকবুদ্ধি ও ধর্মপ্রবৃত্তি দিয়াছেন,—অন্য জীব তাহাতে বঞ্চিত । সেই জন্মই মানবের সারধর্ম—

“জীবে প্রেম, স্বার্থ ত্যাগ, ভক্তি ভগবানে ।”

বড় হইয়া আমি এই মহাধর্ম গ্রহণ করিব ।

শিবানী ।—গ্রহণ করিব কেন বলিতেছ, ইতিমধ্যেই তুমি তাহা গ্রহণ করিয়াছ । জীবে প্রেম ও ভগবানে ভক্তি না হইলে

কি তুমি একটি পায়রার বিয়োগে বিচলিত হও? ভাই গঙ্গাজল,  
তুমিই সার বুঝিয়াছ,—

‘জীবে প্রেম, স্বার্থ ত্যাগ, ভক্তি ভগবানে ।’

—ইহাই মানবের সার ধর্ম।—তবে আর ভগবানের বিধানে  
দোষ দাও কেন ভাই?”

গৌরী।—দোষ দিই নাই,—তবে কিছু ব্যথিত হইয়াছি।  
তা এ ব্যথাবোধও আমার জন্মার্জিত কর্মফল—গঙ্গাজল তোমার  
কথাই ঠিক বটে। আমি ক্ষণিক শোকের মোহে, এ সার কথা  
ভুলিয়াছিলাম। মা জগজ্জননি, আমায় ক্ষমা কর।

ঢং-ঢং ঠং-ঠং তেঁ-পেঁ রবে, শঙ্খ-ঘণ্টা-কাসর বাজিয়া উঠিল;  
তাহার সহিত দামামার গম্ভীরধ্বনিও মিলিত হইল;—ঘোর  
রোলে অন্নপূর্ণার আরতি হইতে লাগিল। সেই আরতির সঙ্গে  
সঙ্গে বালিকাদ্বয়ের তরুণকথারও অবসান হইল।

সন্ধ্যা উত্তীর্ণ হইয়াছে। জ্যেৎশ্না-রাত্রি। পরিষ্কার জ্যেৎশ্না।  
জ্যেৎশ্নারূপ শীতল-সলিলে তাপদহা প্রকৃতি যেন স্নাতা হইতে  
ছেন। চারিদিক শান্ত, স্থির ও মধুময়। বিরু-বিরু বাতাস  
বহিতেছে। সকলেই উৎফুল্ল। কেবল হায়! গৌরীর বুকের  
ভিতর মর্মকাতরতা,—তাহার প্রাণের ভিতর আজ করুণার  
সজীব ছবি!

শঙ্খ-ঘণ্টা-দামামার ঘোর রোলে, ধূপ-ধূনার সদগন্ধে ও পঞ্চ-  
প্রদীপের উজ্জল আলোকে, মায়ের আরতি হইতে লাগিল,—  
দর্শকবৃন্দ ভক্তিভরে সে আরতি দর্শনে রোমাঞ্চিত কলেবর  
হইল,—যার যাহা প্রার্থনা, সে মনে মনে মার নিকট তাহা

‘মানৎ’ করিল,—আর গৌরী, পরিচারিকা সহচরী-সহ, মায়ের মন্দির-নিম্নে, বিস্তৃত প্রাঙ্গণে, শম্পশয্যাতে বসিয়া, মৃত পারাবত বুকে লইয়া, অশুচি কলেবরে, সে আরতির মঙ্গলধ্বনি শুনিতে লাগিল। শুনিতে শুনিতে বালিকার দেহ রোমাঞ্চিত হইল। সেই রোমাঞ্চিত দেহে, যুক্তকরে, সজল উর্দ্ধ নয়নে, বালিকা বলিতে লাগিল,—

“মা বিশ্বজননি ! আজ আর তোমার আরতিদর্শন, আমার ভাগ্যে ঘটিল না। অন্তর্যামিনি, পরমেশ্বর ! আমার অন্তর দেখিতেছ,—কি দুঃসহ দুঃখে আজ আমি অভিভূত হইয়াছি ! মাগো, আজ আমি কাঁদিব।—আমার কাঁদিবার দিন,—তাই আজ সকলকে লুকাইয়া, এখানে বসিয়া, কাঁদিব। যদি এ ক্রন্দন তোমার চরণে স্থান পায়, তবেই আমার কান্না সার্থক হইবে।—মঙ্গলময়ি, তোমার রাজ্যে এত অমঙ্গল, এত হাহাকার, এত পর-পীড়ন কেন ? জরা, ব্যাধি, শোক, মৃত্যুতে জীব জর্জরীভূত হয় কেন ? জীব-ধর্ম্ম,—ক্ষুৎপিপাসায় অক্ল হইয়া, জীব অন্তর মৃত্যুরূপ নিজ শিব চরণে দলন করে কেন ? এ তোমার কি লীলা, লীলাময়ি ? হায় মা, এ লীলা সংবরণ করো ! জীবের মোহ-চক্ষু খুলে দাও,—হৃদয়ে প্রেম ধর্ম্ম ঢেলে দাও—তার অন্ত চিন্তা দূর করো,—সে কেন নিশ্চিন্ত-চিত্তে, নির্ভয়ে, তোমার নাম লইতে লইতে, করুণার প্রবাহে, জগৎ-সংসার প্লাবিত করিতে পারে। মা অন্নপূর্ণে ! দয়া করিবে না কি ? তনয়ার কাতর-ক্রন্দনে বিগলিত হইবে না কি ?

“এই দেখ’ মা, অভুক্ত মৃত-কপোত আমার দেহে ! বাছ। আমার আহারাবেষণে মন্দির-চূড়ায় বসিয়া মরিল ! যে ইহাকে

মারিল, সেও জঠর-জ্বালায় দিগ্বিদিক্ জ্ঞানশূন্য হইয়া ইহাকে মারিল ।—তার দোষ কি মা ? তুই তার আহারের সংস্থান ক'রে দিলে, হয়ত সে ইহাকে মারিত না !—এইরূপ জগতের অনন্ত-কোটি প্রাণী অন্নের অন্বেষণে—অন্নের অভাবে মরিতেছে,—পরস্পর পরস্পরকে হনন করিতে বাধ্য হইতেছে । এ আশুরিক প্রতিদ্বন্দ্বিতা, এ প্রবলের প্রতিষ্ঠা, এ ভীষণ জয়-পরাজয়,—কতদিনে ধরাবক্ষঃ হইতে বিলুপ্ত হইবে, জননি ! কতদিনে মা, সর্বজীব সমতা প্রাপ্ত হইবে ? কতদিনে এ বসুকরা শান্ত শীতলা প্রসন্ন-বদনা,—মা, তোমার মত হইবে ? এ বিষম রক্তপাত, এ কলহ-সংগ্রাম, এ ঘেঁষ-হিংসা-বৈরিতার কি অবসান নাই ? জগৎ যে অতি পুরাতন হইয়া আসিল ? হায় মা ! তুমি ত এ বিরাট ব্রহ্মাণ্ডে, বিরাট অন্নসত্র খুলিয়া, শান্তির শীতল ছবি দেখাইতেছ ? তবে মা বসুকরা অন্নহীনা হইবেন কেন,—তোমার সন্তান অন্নাভাবে মরিবে ও অন্নে মরিবে কেন ? জননি ! প্রসন্ন হও,—জীবে রূপা করো,—ধরার তাপ বিলুপ্ত করো,—তোমার অন্নপূর্ণা-নাম সার্থক হউক ।”

সেই জ্যোৎস্নাময়ী রজনীতে মায়ের আরতির সঙ্গে সঙ্গে, যুক্তকরে, উর্দ্ধনয়নে, মৃত-কপোত কোলে লইয়া, করুণাময়ী বালিকার এই আশ্বনিবেদন ও অন্তরের প্রার্থনা ।—দেবতার চরণে কি ইহা স্থান পাইবে না ?

মায়ের আরতিও শেষ হইল, আর অতিথিশালা হইতে সুস্বর তান-লয়-সংযোগে, এক সাধক-কণ্ঠ হইতে এই গীতটি ধ্বনিত হইল,—

মায়ের রূপার নাইরে তুলনা ।

যে জেনেছে,                      সেই ম'জ্জেছে,

জানবে কিরে আর জনা ॥

শিশু না আসিতে ভবে,                      মাতৃ-স্তনে দুগ্ধ হ'বে,

যা পিয়ে সে বেঁচে রবে.

ক'রবে মায়ের সাধনা ॥

ভুলে' জীব এ স্মৃতি কথা,                      ঘুরে বেড়ায় হেথা সেথা,

পাঁচ ভূতে তার খায় রে মাথা,

( বলে ) 'কোথা মা তোর করুণা' ;—

মার চেয়ে করুণা যার, 'ডাইন' ধ্যাতি আছে রে তার,

আমি তার ধারিনা ধার,

যে হোক সে হোক গে না ॥\*

গৌরী একাগ্রচিত্তে এই গান শুনিল । একবার, দুইবার,  
তিনবার শুনিল,—কণ্ঠস্থ করিল,—অথবা আপনা হইতে তাহা  
কণ্ঠস্থ হইয়া গেল । মনে মনে বলিল,—

“এই কথাই ঠিক । মাকে যে পেয়েছে, সেই মার করুণা  
বুঝেছে । কৈ, আমিত মাকে পাই নাই,—তবে তাঁর করুণা  
বুঝিব কিরূপে ? আমার মানস-পদ্ম আজিও প্রস্ফুটিত হয় নাই,—  
মা বসিবেন কোথায় ? তাই মধ্যো মধ্যো মায়ের প্রতি অবিশ্বাস,  
মায়ের করুণার প্রতি অনাস্থা হয় ।—অস্তুর্যামিনী করুণাময়ী মা  
আমার কি অবোধ তনয়াকে শিক্ষা দিবার জন্ম, এমন সময়, তাঁর  
ভক্তের মুখ দিয়া এই গানটি আমার শুনাইলেন ? হ'বেও বা,—

মায়ের লীলা সকলই বিচিত্র । আমার মনে কিছু অহমিকা জন্মেছিল, সেই অহংবুদ্ধি ঘুচাইবার জগ্গই বুঝি করুণাময়ী মা আমার, ঠিক যথাসময়ে তাঁর ভক্তের মুখ দিয়া এই গান আমায় শুনাইলেন ।—মাগো, যথেষ্ট হ'য়েছে,—আর লজ্জা দিও না মা !  
—আর আমি করুণার বড়াই করিব না ।”

গৌরী, এবার আপনা হইতে সেই স্থান ত্যাগ করিয়া উঠিল । পরিচারিকাকে বলিল,—চল ঝি, বাড়ী যাই,—রাত অনেক হ'য়েছে ।—পায়রাটা ফেলে দিয়ে যাও ।”

সকলে নানা ভাব মনে লইয়া গৃহে প্রস্থান করিল ।

ওদিকে, মৃতকপোত কোলে লইয়া, করুণারূপিণী গৌরী এখন জগজ্জননীকে জগতের ব্যথা জানাইতেছিল, সেই সময় মায়ের আরতি দর্শন করিতে করিতে, আত্মারাম আত্মনিবেদনে হৃদয়ের কবাট খুলিয়া বলিতেছিলেন,—

“মা বিশ্বেশ্বরী ! দাও মা, আমার ভুল ভেঙ্গে দাও,—আমার মোহ-চক্ষু খুলে দাও ।—সত্যই আমি আজিও বুঝিতে পারিলাম না,—তুমি কে, আর আমার ভবানী কে ? মাগো, আজ তার কচি-মুখে, যে করুণার সজীব শাস্ত্রমূর্ত্তি দেখিলাম, তাতে আমার বোধ হয় না যে, সে বালিকা—সামান্য । আহা, মৃতকপোত মুখে লইয়া, মা আমার অশ্রুসিক্ত মুখে, অতি করুণকণ্ঠে আমার বলিল,—“বাবা, আজ আমি অশুচি,—মাকে একথা জানায়ো !”

—হায় মা, ত্রিলোকজননি ! তুমি জানো, তার মনের ভাব কি !  
মা হোক মা, মার আমার মনের কামনা পূর্ণ করিও । জননি, তোমার পুণ্যময়ী মূর্ত্তি প্রতিষ্ঠা, আমার সার্থক হ'য়েছে,—আমি জননীরূপিণী করুণাময়ী কণ্ঠা লাভ ক'রেছি ।—মা, ভবানী

যেন আয়ার চিরায়ুতী—ভা-গ্য-ব-তী—রমণী-কুললক্ষ্মী হয় ।”

“ভাগ্যবতী”—এই কথাটি উচ্চারণ করিবার সময়, আয়ারামের স্বর যেন কিছু কম্পিত হইল,—তিনি যেন ভয়ে ভয়ে ঐ কথাটি উচ্চারণ করিলেন । তাঁহার শরীর রোমাঞ্চিত হইয়া উঠিল ।

একটি নিখাস ফেলিয়া, আয়ারাম মন্দির হইতে নিষ্ক্রান্ত হইলেন । আবার সেই জ্যোতির্বিদের গণনা, গৌরীর জন্ম, মায়ের মহাপূজা ইত্যাকার যাবতীয় ঘটনা,—আয়ারামের স্মৃতিপথে জাগরুক হইল । সকলই যেন তিনি চক্ষুর সমক্ষে দেখিতে পাইলেন । একটু বিরক্ত হইয়া মনে মনে বলিলেন,—

“দূর হোক ।—ও বিষয়টা, যত ভাবিবনা মনে করি, ততই যেন উহা মনের মধ্যে বদ্ধমূল হইয়া যায়,—সব গোলমাল করিয়া ফেলে । হায় রে, নিয়তি-লিখন ! জগদম্বার কাছে প্রার্থনার সময়ও তুমি নিষ্ঠুর মুর্তিতে দেখা দাও ? স্মৃতিস্তা ও সন্ধ্যাবের সময়ও তুমি কণ্ঠে বিরাজ করিতে থাকো ?—হায় মা ! তবে তোমার ইচ্ছাই পূর্ণ হউক ।”

আরতি অন্তে, পূজক ব্রাহ্মণ, তানপুরা লইয়া মায়ের সম্মুখে গান ধরিলেন,—

( য়েধ—চৌতাল । )

নমামি কালিকে, ঈশানি, অম্বিকে,

রাধ' মা চণ্ডিকে, বিপাকে পায় ।

কাতরে কাঁদি মা, কৃপা কর শ্রামা,

রবি-সুত-ভয়ে ঠেকেছি দায় ॥

আঁধার গগন,

আঁধার জীবন,



আঁধারে খেলিছে বিজলী ভীষণ,  
 এ আঁধার নাশি' পূর্ণচন্দ্র হাসি,  
 দেখাও জননি, স্বরূপ-প্রভায় ॥  
 'মাতৈভঃ মাতৈভঃ' বল্ মা বদনে,  
 এই যে মা তোরে হেরি হৃদাসনে,  
 ( আর ) কারে করি ভয়, কিসেরি বা ভয়,  
 (ত্রৈ) ভয় পেয়ে ভয় পলায়ে যার ॥

গুঁচিল শঙ্কা, বাজাও ডঙ্কা,  
 কালী কালী ব'লে ডাক রে ভাই ।  
 জনমে জনমে, জীবনে মরণে,  
 কালী নাম ওরে না যায় বৃথায় ॥

গান শুনিতে শুনিতে, রোমাঞ্চিত কলেবরে, আশ্চার্য্য  
 গৃহাভিমুখীন হইলেন ।

সেই রাত্রে, শয্যায় জননী-পার্শ্বে শুইয়া, গৌরী স্বপ্ন  
 দেখিল,—যেন মা-অন্নপূর্ণা, শান্ত প্রসন্নবদনে, উজ্জল গৌরবরণে,  
 দিক্ আলোকিত করিয়া. তাহার শিরে আসিয়া দাঁড়াইয়াছেন ।  
 গৃহে যেন এককালে সহস্র চন্দ্রের উদয় হইয়াছে,—মায়ের  
 রাঙা পা দু'খানিতে যেন সপদ্য ভ্রমর গুন্ গুন্ করিতেছে,—  
 পদ-নখে যেন কোমুদী ফুটিয়া বাহির হইতেছে,—স্বগন্ধে  
 চারিদিক্ পরিপূর্ণ হইয়াছে,—মা যেন মৃদু-মন্দ হাসিতেছেন ।—  
 গৌরী অকস্মাৎ সেই ভুবনমোহিনী-মূর্ত্তি দর্শনে বিস্মিত, পুলকিত,  
 রোমাঞ্চিত-কলেবর হইল,—ভক্তিভরে সাষ্টাঙ্গে সেই মূর্ত্তিকে  
 প্রণাম করিল । তখন মা যেন তাহার মস্তকে পদ্মহস্ত অর্পণ

করিয়া, তাহার চিবুক ধরিয়া, বীণাবিনিন্দিষ্মরে—অতি স্নেহ,  
অতি কোমল, অতি করুণ-কণ্ঠে তাহাকে বলিলেন,—

“বৎসে, এই দেখ, আমি আসিয়াছি । আমায় তুমি প্রাণের  
সহিত ডাকিয়াছিলে, তাই আসিয়াছি । এমন ভাবে যে ডাকে,  
তাকে দেখা না দিয়া আমি ডাকিতে পারি না । তুমি পরের  
ব্যথা নিজের ভাবিয়া, তন্নয়ী হইয়া আমায় ডাকিয়াছিলে, তাই  
আমি আসিয়াছি । তোমার আহ্বানরূপ কাতর-ক্রন্দনে, আমার  
পদ্মাসন টলটল কাঁপিয়াছিল,—আমি স্থির থাকিতে পারি  
নাই,—তাই আসিয়াছি । তোমার মনস্কাম পূর্ণ হোক,—  
অন্নদানে তুমি জীবের প্রাণ নীতল করো । শীঘ্রই তোমার সে  
উচ্চক্ষমতা মিলিবে ।

“দেখ, আমি নিজ হস্তে কিছু করি না,—যোগ্যপাত্র পেলে,  
আমার ইঙ্গিত কার্যের ভার দিই । অনেক দিন হ’তে  
যোগ্যপাত্র খুঁজিতেছিলাম,—আজ তোমার মধ্যে তার বীজ  
দেখ্লেম । আশীর্বাদ করি, এই বীজে মহাবৃক্ষ জন্মিবে,  
এবং কালে তাহাতে অমৃতময় ফল ফলিবে । বৎসে, জন্মার্জিত  
সুকৃতিফলে, যে করুণার অমৃতাস্বাদ তুমি পাইয়াছ,—সেই  
করুণাবলেই, একদিন তুমি মহামা তুমুর্ভিতে লোকের হৃদয়োপরি  
অধিষ্ঠিত হইতে পারিবে । একদিন লোকে, আমার নামের  
সহিত তোমার নাম গ্রহণ করিবে,—প্রাতঃস্মরণীয়া জননী-  
অন্নপূর্ণা নামে তুমি অভিহিত হইবে । জন্মান্তরে তুমি যে  
কঠোর তপস্বী করিয়াছিলে, ইহজন্মে তাহার ফল পাইবে ।

“কলির জীব—অন্নগত প্রাণ, তা জানি । কিন্তু জীবের সে  
ভোগ কৈ ?—আমি কি করিব ?—কি করিতে পারি ? যে

যেমন ভাগ্য লইয়া আসিয়াছে, সে সেইমত কল ভোগ করিয়া যাইবে । তুমি যাহা চাহিয়াছ, তাহা পাইবে,—জীবকে অন্নদান করিতে পারিবে । যতদিন বাঁচিয়া থাকিবে, তোমার এ ব্রত নিষ্ফল হইবে না ।

“তোমার মৃত-কপোত কোলে লইয়া রোদন, আমি প্রত্যক্ষ করিয়াছি । কতখানি করুণার উদ্ভব তোমাতে হইতে পারে, তাহা দেখিয়াছি । দেখিয়াছি, করুণাময়ী মাতৃমূর্তিই তোমায় মানাইবে ভাল । এই মূর্তিতেই আমি তোমায় সিংহাসনে বসাইব ।

“কিন্তু মা, অবিখাসিনী হইও না,—আমার বিধানে অনাস্থা করিও না । সুখে দুঃখে অবিচলিত থাকিও,—সম্পূর্ণরূপে আমাতে নির্ভর করিও,—তোমার পরমা গতি লাভ হইবে ।

“এই দেখ বৎসে, তোমার সেই মৃতকপোত,—আর এই দেখ তাহার হস্তারূপী সেই গ্ৰেন পক্ষী!—কিছু বুঝিতেছ কি ? দেখ, তোমার কপোতও মরে নাই, গ্ৰেনও ইহাকে মারে নাই,—ইহারা সখ্যভাবে আমার দেহ মধ্যেই বিরাজ করিতেছে । এই দেখ, অহি-নকুল সমভাবেই আছে,—এখানে আর দুর্বল, প্রবল, অত্যাচার—এ সব কিছু নাই । তোমায় পরীক্ষার জন্ত, ক্ষণিক বৈষ্ণবী মায়ায়, আমি এই মায়া-কপোত ও গ্ৰেন সৃষ্টি করিয়াছিলাম,—সে মায়া অন্তর্হিত,—এখন দিব্যদৃষ্টিতে দেখ, হস্তাও কেহ নাই, হতও কেহ নাই,—আমিই সব ।—এ সব তত্ত্ব, সম্যক্রূপে এখন তোমার বুঝিবার সময় হয় নাই,—সময়ে হয়ত কিছু কিছু বুঝিবে ।

“এক বিষয়ে, তোমায় বড় দুর্ভাগ্যবতী হইতে হইবে ।

সাংসারিক সুখ, তোমার অদৃষ্টে বড় বেণী দিন স্থায়ী হইবে না । সুখ অপেক্ষা বরং দুঃখের ভাগই তোমার অধিক হইবে । ] তাহাতে বিচলিত হইও না, লক্ষ্যভ্রষ্ট হইও না,—কিংবা সামান্য জনার গায় অধীর হইয়া, আপন পায়ের, আপন মঙ্গলঘট ভাঙ্গিয়া ফেলিও না । সংসারে তোমায় সব দিব, কিন্তু একে একে সকলই কাড়িয়া লইব । তোমার কোন বন্ধন রাখিব না,—সংসারের সার-বন্ধনও সময়ে ছিঁড়িয়া দিব । বন্ধনে আবদ্ধ হইয়া, পাছে তুমি লুতাতস্তুর গায় আপন জালে আপনি জড়াইতে থাকো,—এই জন্ত তোমার সকল বন্ধন খসাইব । অতি উচ্চ ভার তোমার মস্তকে অর্পিত ; দেবতার কাজ তোমায় করিতে হইবে ;—সুতরাং সাধারণ মানব মানবীর ন্যায় সুখ দুঃখে জড়িত হইলে, তোমার চলিবে না । বৎসে ! প্রস্তুত হও,—হৃদয়-মন সংযত করিতে শিখ । এক দিন তোমায় অতি কঠোর পরীক্ষা দিতে হইবে । একাধারে তুমি কুমুমকোমলা ও বজ্রকঠিনা হইতে অভয়ান করো,—অতি উচ্চতর ভার তোমাতে অর্পিত । শেষ পর্য্যন্ত তোমায় যুক্তিতে হইবে ;—কিন্তু সর্ব-সময়েই তোমার করুণার জয় । সে করুণা,—অলৌকিক, অপার্থিব, ও নিঃস্বাম । মানব, চিরদিন সে করুণার পূজা করিবে । লোকে প্রাতঃ-সন্ধ্যায় তোমার নাম গ্রহণ করিবে ।

“শেষ কথা :—বৎসে, তিনটি পরমবস্তু তুমি জীবনের প্রিয়তর করিবে । সেই তিনটি,—তোমার অপরাজিতা করুণার চির-সহায় ও মুক্তিপথের প্রধান আশ্রয় হইবে । শিবপূজা, গঙ্গাস্নান ও সাধুদর্শন,—এই তিন মহাবস্তুর কথা আমি তোমায় বলিতেছি । এখন হইতে যতটুকু পারো, ইহার অনুষ্ঠান

করো,—উত্তর জীবনে ইহাই তোমার সম্বল ও সাহসনার বিষয় হইবে । যখন আবশ্যক বুঝিব, তোমায় দেখা দিব ।”

জননী অন্তর্হিতা হইলেন,—গৌরীর সোনার স্বপ্নও ভাঙ্গিয়া গেল । চমকিত হইয়া বালিকা বলিয়া উঠিল,—“মা, মা, তবে আবার দেখা দিবে ?”

বহুকণ অবধি বালিকা ভাববিহ্বলা হইয়া, শয্যায় শয়ন করিয়া রহিল । ক্রমে রাত্রির অবসান হইয়া আসিল । উষার কনক-রশ্মি গবাক্ষ-পথ দিয়া গৃহে প্রবেশ করিল ।

সেই শান্ত স্নিগ্ধ মধুর উষায়, গৌরী শুনিতে পাইল,—অন্নপূর্ণার মন্দির সন্নিহিত অতিথিশালা হইতে, সেই সাধক, গত সন্ধ্যার সেই সম্মোহন স্বরে, ধীর-মধুর-কণ্ঠে, আপন মনে গাহিতেছেন,—

( সিকু-খান্ধাজ—মধ্যমান । )

মার ভাবনা মায়ে ভাবে, তুমি আমি কি কর্তে পারি ।

মা যে কাঁদায়- কাঁদি, হাসায়—হাসি,

কলের কাজ যেন কলে সারি ॥

( মন ) ভুলোনা রে, অহঙ্কারে,

‘আমি করি’—ভেবোনা রে,

করানু তিনি, ব্রহ্মময়ী,

( তাই ) কখন জিতি, কখন হারি ॥

হারা জেতা কারা হাসি,

সর্ব্বঘটে সেই সর্ব্বনাশী,—

প্রাণ কাড়ে, কখন বাজিয়ে বাণী,—

কালী কালী চিন্তে নারি ॥

গান শুনিতে শুনিতে, রোমাঞ্চিত কলেবরে গৌরী গাত্রোথান করিল । আপন মনে বলিল, “কি মধুর গান ! এ গানও কি আমায় উদ্দেশ করিয়া গীত হইল ? সত্য, -মার ভাবনা মা-ই ভাবেন ;—আমরা ভাবিয়া তার কি করিতে পারি ?—অন্ধকার মাত্র দেখা সার হয় ।—কে, এ গায়ক ? এ গায়ককে দেখিতে হইবে ।”





## দশম পরিচ্ছেদ ।

আত্মারামের প্রতিষ্ঠিত অতিথিশালা,—এক অপূর্ণ দৃশ্য । দেশ-দেশান্তর-আগত শত শত সাধুসন্ন্যাসী, বৈরাগী ভিক্ষুক, পর্য্যটক পথিক—তথায় আশ্রয়গ্রহণ করে,—সমাদরে ও শ্রদ্ধা-সহকারে তথায় থাকিতে পায় । গৃহস্থামীর সুবন্দোবস্ত-গুণে, কাহারও কোনরূপ কষ্ট হয় না । মহামায়া অন্নপূর্ণার ভোগ ত প্রচুর পরিমাণেই আছে ; তদ্ব্যতীত কেহ ইচ্ছা করিলে এবং কাহারও আবশ্যক হইলে, ভাণ্ডার হইতে যথোচিত সিধা প্রদত্ত হয়,—কাহারও বা তৈয়ারী জলযোগাদিরও সবিশেষ বন্দোবস্ত হইয়া থাকে । এজন্য পাচক ও কর্মচারীতে দশজন লোক নিযুক্ত আছে । স্বয়ং আত্মারামও মধ্যে মধ্যে ইহার তত্ত্বাবধারণ করিয়া থাকেন । অতিথি ভিক্ষুগণের মধ্যে কেহ পীড়িত বা অসুস্থ হইলে, তাহারও স্বতন্ত্র বন্দোবস্ত আছে । তজ্জন্য ঔষধ, পথ্য বা সেবা-সুশ্রমার কোন অভাব হয় না,—নির্দিষ্ট লোকজনের প্রতি এই নির্দিষ্ট-ভার অর্পিত আছে ।

বিস্তৃত অতিথিশালার এক প্রান্তে, - পীড়িত অতিথিগণের জগ্ন পরিষ্কৃত গৃহ সকল নির্দিষ্ট থাকে, - রোগিগণ যথানিয়মে তথায় থাকিতে পায়। এইরূপ অপূর্ব আতিথ্য-ধর্মের অনুষ্ঠান, - তখনকার লোকে পরম পুণ্যকর ও গৃহীর অবশ্যকর্তব্য কল্প বলিয়া জানিত। আশ্রামের এই অপূর্ব অতিথি-সেবা-ত্রত, তাঁহার মহান্ ধর্মজীবনের একটি উজ্জ্বল নিদর্শন।

পিতৃ-প্রতিষ্ঠিত এই পুণ্যময় ধর্মশালায়, বালিকা গৌরী সর্বদাই যাতায়াত করিত, - যাতায়াত করিতে ভাল বাসিত। তথায় প্রতিদিন সে, কত নূতন নূতন লোক দেখিত, - কত লোকের কতপ্রকার কার্যাবলী, ভাবভঙ্গী, ও আচার-ব্যবহার মনোযোগের সহিত পর্যবেক্ষণ করিত, - কত লোকের কত রকমের কথাবার্তা ও ধর্মমতের বাগ্-বিতণ্ডা শুনিত। কোথাও দেখিত, - গায়ে ভস্মমাখা অর্ধ-উলঙ্গ জটাভূটধারী কোন সন্ন্যাসী অগ্নি জালিয়া হোম করিতেছেন ; কোথাও দেখিত, - গৈরিক-বসন-পরিহিত ব্যাঘ্রচর্মাসীন কোন সাধু মুদিতনেত্রে ধ্যানমগ্ন আছেন ; কোথাও অবলোকন করিত, - হস্তে ত্রিশূল, গলে রুদ্রাক্ষ, কপালে ত্রিপুণ্ড্র কোন শাক্ত-রক্তবস্ত্রে আকৃত হইয়া, গম্ভীরস্বরে 'মা মা' 'তারা তারা' ধ্বনি করিতে করিতে, ভাবে বিভোর হইয়া পড়িতেছেন। এইরূপ বালিকা কোথাও বা দেখিতে পাইত, - মুণ্ডিত কেশ ও প্রকৃত সাধুজনোচিত আড়ম্বরহীন বেশধারী কোন মধুরাকৃতি শান্তপ্রকৃতি বৈষ্ণব - একপার্শ্বে জড়সড় ও সঙ্কুচিত হইয়া কুশাসনে বসিয়া, নীরবে মধুসূদন নাম জপ করিতেছেন ; - কেহ বা স্নানান্তে পবিত্র হইয়া আপন মনে 'ভাগবত' পাঠে ভগ্নয় আছেন। আবার কোথাও বা দেখিত,



একদল ভিখারী কীর্তনীয়া, — নাকে তিলক, গলায় কণ্ঠি, মাথায় টিকি,—খঞ্জনী সহযোগে, সম্বরে, ‘হরেকৃষ্ণ’ নাম গাহিয়া,—লোক জড় করিতেছে। কোথাও কেবলই তামাক, দোস্তা, এবং আরও কিছু মুহুর্নু পুড়িতেছে। সে সুবাস কাহারও কাহারও বড় আরামদায়ক ও তৃপ্তিপ্রদ হইতেছে, — আর কেহ কেহ বা, সে মধুর মোলায়েম গন্ধ সহিতে না পারিয়া, নাকে কাপড় দিয়া, দশ হাত অন্তরে সরিয়া বসিতেছে। কোথাও বা খোস-গল্প ; কোথাও ‘কালী বড় কি কৃষ্ণ বড়’ এই তর্ক ; কোথাও কথার হের-ফেরে নানারূপ বাগ্‌যুদ্ধ ; আর কোথাও গৃহস্থামি-প্রদত্ত ভোজ্যবস্তুর সমালোচনা,—ধীর-মহুর গতিতে চলিতেছে ;—বালিকা এই সমস্ত দেখিত ও শুনিত। এইরূপ শত প্রকারের শতরূপ ভাবাভিনয় দেখিয়া ও শুনিয়া,—ভক্ত অভক্ত, সাধু ভণ্ড, বিষয়ী বৈরাগীর সমান সম্মিলন—পর্যবেক্ষণ করিয়া,—বালিকার মনে নানা চিন্তার উদ্ভব হইত। বালিকা ভাবিত,—

“এ কত মানুষ,—কতরকম প্রকৃতি ! এক মানুষের সহিত আর এক মানুষের সম্পূর্ণ ঐক্য নাই,—আকৃতিতেও নাই, প্রকৃতিতেও নাই। বৈষম্যই যেন জগতের ধর্ম। অথচ, সকলেই এক লক্ষ্যে ছুটিতেছে। জানেই হউক আর অজ্ঞানেই হউক, সকলেই মিলন-পথে ধাবিত হইতেছে। এ মিলন-পথ কোথায় ? — সেই জগৎ-কর্তা, শ্রীহরির শ্রীচরণ। যার জীব আহারাবেষণেই ব্যতিব্যস্ত ; ভাবিবার অবসর পায় কৈ ? নহিলে, ভাবিতে পারিলে সকলেই ভগবদ্ভক্ত হইতে পারিত। হায়, কি করিলে জীবের এই আহারাবেষণ-চেষ্টা দূর হয় ?”

অতিথিশালার মধ্যাহ্নকালীন দৃশ্যও অতি অপূর্ব । দেশ-দেশান্তর-আগত নানাশ্রেণীর ভিক্ষুক—স্ত্রী ও পুরুষ এবং বালক ও বৃদ্ধ,—সারি গাঁথিয়া আহারে উপবিষ্ট । পরিতোষ পূর্বক তাহারা ভোজনে ব্যাপ্ত । গৌরী সেখানে আসিয়া দাঁড়াইবামাত্র, সকলে সম্মুখে “জয় মা অননুপূর্ণার জয়” বলিয়া উল্লাসধ্বনি করিয়া উঠিত । সে ধ্বনি শ্রবণ করিয়া বালিকার সর্কশরীর রোমান্থিত হইত ও চক্ষে জল আসিত । বালিকা মনে মনে বলিত,—“হায় মা, পরমেশ্বর! তোমার অন্নের মহিমা এত ? মঙ্গলা, আমি কি তোমার এ উচ্চ আদর্শ গ্রহণ করিতে পারিব ? জননি, তোমার ধর্ম তুমিই রাখিও ।”

অনুপূর্ণার ভোগ—সর্কজীবে, সমান শ্রদ্ধাসহকারে বিতরিত । পশু পক্ষী, কীট-পতঙ্গও সে ভোগে বঞ্চিত হয় না । করুণারূপিণী গৌরী, স্বয়ং দাঁড়াইয়া, নিজ হস্তে এই শেষোক্ত জীবগণকে আহার দিয়া থাকে । ইহাদিগকে স্বহস্তে আহার দিতে, বালিকার বড় আনন্দ হয় । আর ইহারাও গৌরী-প্রদত্ত আহারে যেমন পরিতুষ্ট হয়, অণু কেহ তাহা বণ্টন করিয়া দিলে, সেরূপ হয় না । গৌরী তাহার সেই কনক-হস্তে অন্নের থালা লইয়া দাঁড়াইবামাত্র, কোথা হইতে নানা শ্রেণীর সহস্র সহস্র পক্ষী ঝাঁক ঝাঁথিয়া আসিয়া, তাহার সম্মুখে লুটোপুটি হইতে থাকিত ;—আদরে, সোহাগে, অনুরাগে, তাহার হাত হইতেই তাহা গ্রহণ করিতে থাকিত ;—কিচিমিচি রবে ছড়োছড়ি কাড়াকাড়ি করিয়া,—এ উহার ঘাড়ে, সে তাহার ঘাড়ে পড়িয়া উৎসাহভরে গ্রহণ করিত ;—বালিকাকে আর বণ্টন করিবার অবসর দিত না । সে সময় যদি কোন পরিচারক আসিয়া সেখানে দাঁড়াইত,

তাহা হইলে, পক্ষাদিগের সে আনন্দ-কোলাহল, সহসা যেন কেমন মন্দীভূত হইয়া যাইত,—তাহারা যেন মানস-নেত্রে ভয় ও আতঙ্কের ছায়ামূর্ত্তি দেখিয়া ইতস্ততঃ সরিয়া পড়িত,—তাহাদের সেই স্বভাবসুন্দর অনুরাগোৎকুল মূর্ত্তি সহসা যেন কেমন ম্লান ও মলিন হইয়া যাইত । এ দৃশ্য আশ্চার্য এক একদিন লক্ষ্য করিতেন,—কি ভাবিয়া তিনিও এক এক দিন কন্যার পাশে গিয়া দাঁড়াইতেন,—তাহাতেও পক্ষিগণ ঐরূপ ভাব প্রাপ্ত হইত । তখন আশ্চার্য মনে মনে বলিতেন,—

“এ আর কিছু নয়,—অপার্থিব করুণার অত্যুপলব্ধি করিয়া, পাখীর দল এমন ভাব প্রাপ্ত হয় । ভবানীর ন্যায় আমাদের প্রাণে সে অপার্থিব করুণা কৈ ? আমাদের প্রাণে ঘেব আছে, হিংসা আছে, স্বাতন্ত্র্যবোধ আছে,—যার প্রাণে যে কেবলই অমৃত-নিশ্চন্দিনী করুণার মন্দাকিনী-ধারা প্রবাহিত ! হায় মা, করুণারূপিণি ! তোমারই জয় হউক । তুমিই জীবকে করুণার মহাত্মত শিক্ষা দাও ।”

অতিশিখালার যে প্রান্তে বিদেনী, অসহার, নিরাশ্রয় রোগী-দিগের বিশ্রামাগার আছে, করুণারূপিণী গৌরী, সেখানেও মূর্ত্তিমতী আশার গায়, মুখে সাধুনা ও নয়নে অমৃতধারা লইয়া দাঁড়াইত । সঙ্গে সঙ্গিনী শিবানীও থাকিত । বালিকার সেই মধুবর্ষিণী কথায়, সেই সহানুভূতিসূচক সজল করুণদৃষ্টিতে যেন রোগীর অর্ধেক রোগ-যন্ত্রণা বিদূরিত হইত । কাহারও অঙ্গে পয়হস্ত বুলাইয়া, কাহারও মুখে জল দিয়া, কোন রোগীকে ঔষধ খাওয়াইয়া, কাহারও পথ্যের ব্যবস্থা করিয়া,—কীলিকা শ্বেহময়ী জননীরূপিণী ধাত্রীর গায় সর্বত্র বিচরণ করিতেন ।

‘কেমন আছ’, ‘কি চাই’, ‘কি কষ্ট হ’চ্ছে’—প্রত্যেক রোগীর শিররে বসিয়া, গায়ে হাত বুলাইতে বুলাইতে, মধুমাখা কণ্ঠে এইরূপ জিজ্ঞাসা করিত। সে সহানুভূতিশীতল সান্ত্বনা-বাণী ও সে আন্তরিকতাপূর্ণ নিঃস্বার্থ সেবা-শুশ্রূষায়, রোগী রোগ-শয্যায় পড়িয়াও, সজলনয়নে, রুদ্ধকণ্ঠে করুণাক্রুপিণী বালিকার কল্যাণকামনা করিত। ফলতঃ গৌরী যখন তাহার সেই কনক-কিরণমণ্ডিত, লাবণ্যতরঙ্গায়িত সুকুমার দেহলতা লইয়া,—মুখে পবিত্রতার বিমল ভাতি বিকীর্ণ করিতে করিতে, স্বভাবসজল চক্রে করুণার স্নিগ্ধদৃষ্টি নিক্ষেপ করিত, এবং যখন সেই পরদুঃখ-কাতরা দেবীমূর্তি দেখিয়া, রোগী বিগলিত অন্তরে মা মা বলিতে বলিতে মুদিত নয়নে সেই মহামাতৃক্রুপিণী মহামায়ার মূর্তি ধ্যান করিতে থাকিত, তখন বোধ হইত, যেন আর্তের দুঃখে ব্যথিত হইয়া, সত্য সত্যই জননী অভয়া—মর্ত্যধামে আবিভূতা! এক হস্তে বর ও অণু হস্তে অভয়দান করিয়া, যেন তিনি ভয়ান্ত সন্তানকে সান্ত্বনা করিতেছেন। প্রাণাধিকা কণ্ঠার এই মহামাতৃ-ভাবের প্রভাব হৃদয়ঙ্গম করিয়া, সহস্র সহস্র জীবের অন্তরের সহিত কণ্ঠার অন্তর বিজড়িত দেখিয়া, আত্মারাম পুলকে রোমাঞ্চিত কলেবর হইতেন। ভাবিতেন,—“ইহারই নাম ভগ-বৎ-প্রেম।—এই-ই বিশ্ববিজয়ী মেহ! এ হেন কণ্ঠার জনক হওয়া পরম শ্লাঘার বিষয় সন্দেহ নাই। এই আতুরাশ্রমে, ভবানী সত্যই যেন সেই সর্বদুঃখহরা—ভবভয়-হারিণী—ভবানী!—ঐ দেখ না, কি মধুর মনোহর দৃশ্য!”

অদূরে এক রোগ-শয্যায় শুইয়া এক দুর্ভাগা, রোগ যন্ত্রণায় পরিত্রাহিকণ্ঠে চীৎকার করিতেছে,—জনপ্রাণী তাহার কাছে

ঘেসিতে সাহসী হইতেছে না,—পরদুঃখকাতরা সপ্তমবর্ষীয়া বালিকা অমানবদনে তাহার শিয়রে গিয়া বসিল। সেখানে বসিয়া বালিকার বদন-কমল যেন অধিকতর প্রফুল্ল হইল। পরার্থপর হৃদয়, যে কোনপ্রকারে হউক, পরের উপকার করিতে পারিলেই যেন প্রফুল্ল হয়,—আপনাকে সার্থকজন্মা বোধ করে। বালিকা গৌরী গিয়া সেই দুর্ভাগা রোগীর শিয়রে বসিল, আর সেই রোগী যেন প্রাণ পাইল। কে যেন সহসা, তাহার তাপদগ্ধ হৃদয়ে শান্তিবারি সিঞ্চন করিতে লাগিল। দুর্ভাগার বোধ হইতে লাগিল, যেন তাহার কাতর-ক্রন্দনে করুণাদ্রা হইয়া, বিমান-পথ বিহারিণী কোন দেবী, সুধাপূর্ণ হেম-ঝারি হস্তে লইয়া বরাভয়দায়িনী মূর্ত্তিতে তাহার শিয়রে সমুপস্থিত হইয়াছেন, আর ধীরে ধীরে তাহার সর্বাঙ্গে সেই সুধা সিঞ্চন করিতেছেন !

দুর্ভাগা, ভীষণ বসন্তরোগে আক্রান্ত। সর্বাঙ্গে ফোটকতুল্য বসন্ত ফুটিয়া বাহির হইয়াছে ; তাহার জ্বালাময় উত্তাপে অঙ্গ পুড়িয়া যাইতেছে ; পিপাসায় কণ্ঠতালু বিস্তক হইয়াছে ; শয্যা-কণ্ঠকৌ বিকারের রোগীর ঞায়, দুর্ভাগা শয্যায় পড়িয়া ছটফট করিতেছে। জীবন যায় যায়, হায় ! তবু জীবন যাইতেছে না ;—যন্ত্রণা দেখিয়া বুঝি পাষণ্ড বিদীর্ণ হয়,—তথাপি প্রাণভয়ে জনপ্রাণী তাহার কাছে ঘেসিতেছে না। এমনি অবস্থায়, অনাথের দৈবসখার ঞায়, দয়ার্দ্ৰহৃদয়া বালিকা গৌরী, রোগীর শিয়রে গিয়া বসিল। নির্ঝিকারা, ঘৃণাভয়-রহিতা, স্নেহ-বিগলিতা হইয়া—বসিল। প্রাণাধিক সন্তানের বিষম রোগ-যন্ত্রণা দেখিয়া জননী যে ভাবে গিয়া রোগ শয্যায় বসেন, সেই ভাবে গিয়া বসিল।—আত্মপ্রাণ তুচ্ছবোধ করিয়া, অথবা সেই দুর্ভাগাতেই

সম্পূর্ণরূপে আত্ম-উপলব্ধি করিয়া, অকৃত্রিম স্নেহের আকর্ষণে, মহামাতৃমূর্তিতে তথায় গিয়া বসিল। সেই পুণ্যময়ী মধুর মূর্তি দেখিয়াই, রোগীর সর্বশরীর পুলকে পূর্ণ হইল, গোখে জল আসিল—আবার তাহার বাঁচিতে সাধ যাইল। এত যে রোগ-যন্ত্রণা, এত যে আপন অদৃষ্টে ধিকার, এত যে মুহূর্তে মৃত্যু-কাঁদনা,—বালিকা গৌরীর দর্শনে, তাহার সে সকলই বিদূরিত হইল। অভাগা সজল নয়নে, যুক্তকরে গৌরীর পানে চাহিল,—গৌরী স্নেহাশ্রুপূর্ণ কোমলদৃষ্টিতে তাহার হাত ছ'খানি ধরিল,—মধুবর্ষী অমৃতশীতল কণ্ঠে—“ভয় নাই বাছা” বলিয়া তাহার গায়ে পন্নহস্ত বুলাইতে লাগিল।

আর কোথায় সেই জলন্ত অঙ্গারদণ্ডের ছায় গাত্রদাহ,—কোথায় সেই মরণাধিক রোগ-যন্ত্রণা,—আর কোথায় সেই প্রাণহাণী চীৎকার ও শয্যাকণ্টকী ছটফট অবস্থা! যেন স্বয়ং দেবী শীতলা, ধনস্তুরির অমৃত-কলস হইতে সঞ্জীবনী-সুধা লইয়া, দুর্ভাগার অঙ্গে সিঞ্চন করিলেন,—তার পর পন্নহস্তে ধীরে ধীরে তাহার অঙ্গ বুলাইতে লাগিলেন! সে অমৃতশীতল করপন্ন-সঞ্চালন-গুণে, রোগী রোগ-শয্যা হইতে উঠিয়া বসিল;—ভক্তি-বিমিশ্রিত আবেগময় ‘মা-মা’ রবে দিগ্বাণুল মুখরিত করিয়া, গৌরীর পাদতলে লুটাইয়া পড়িল।

বালিকা গৌরী ত্রস্তভাবে—ঝটিতি তথা হইয়া উঠিয়া দাঁড়াইল; তার পর রোগীর পার্শ্বে বসিয়া, স্নেহে তাহার মস্তক আপন ক্রোড়ে লইয়া, ধীরে ধীরে ব্যঞ্জন করিতে লাগিল!

অদূরে মন্ত্রমুগ্ধের ছায় দাঁড়াইয়া, ভাববিভোর আত্মারাম

এই অলৌকিক দৃশ্য অবলোকন করিতেছিলেন । তাঁহার অপাঙ্গে  
ফোঁটা-ফোঁটা জল পড়িতেছিল ।

এমন সময় সেই সঙ্গীতপ্রাণ সাধক,—‘মা’-নাম-গানে যিনি  
অতিথিশালা পুলকপূর্ণ করিয়া রাখিয়াছেন,—সেই সাধক,—  
শ্বিতযুখে একটি গান গাহিতে গাহিতে তথায় উপনীত হইলেন ।  
তাঁহার সন্ন্যাসীর বেশ । সে বেশে তাঁহার সেই সৌম্য-শান্ত-  
পবিত্র মূর্তি বড় সুন্দর মানাইয়াছে । গৌরী এই অপরূপ মূর্তি  
দেখিয়া যেন কিছু বিস্মিত, পুলকিত ও রোমাঞ্চিত-কলেবর  
হইল । মনে মনে বলিল, “এই—সেই । হাঁ, নিশ্চয়ই সেই ।  
ইহঁার চরণে শরণ লইতে হইবে । —“কিছু ইহঁাকে যেন আর  
কোথাও দেখিয়াছি ;” —“না, দেখিয়াছি কেন,—এ পূণ্যমূর্তি  
যেন আমার জন্ম-জন্ম-পরিচিত,—চিরবাস্তিত” ; —“এ সন্ন্যাসী  
যেন আপন হ’তেও আপনার”—এই রকম একটা ভাব গৌরীর  
মনে উদয় হইতে লাগিল । বালিকা নিরীক, নিস্পন্দ হইয়া  
সন্ন্যাসীকে দেখিতে লাগিল ।—কোড়দেশে সেই বসন্ত-রোগী ;—  
পার্শ্বে রোগীর সেবার উপকরণাদি লইয়া সঙ্গিনী শিবানী ;—  
ইতস্ততঃ দাঁড়াইয়া কোঁতুহলাক্রান্ত দুই চারিজন দর্শক ;—সর্ব-  
চক্ষুর দৃষ্টিভেদ করিয়া একরূপ অলৌকিক মধুর দৃষ্টিতে গৌরী  
সন্ন্যাসীর পানে চাহিল । তরুজিঙ্গাসু যে ভাবে ধর্ম্মাত্মা সাধুর  
পানে চান, সেই ভাবে চাহিল । সেই অনিমেঘ চাহনিতে যেন  
কত কথাই প্রকাশ পাইল,—কত অব্যক্ত ভাবই যেন তাহাতে  
পরিব্যক্ত হইল । তখন সেই অন্তর্দর্শী সন্ন্যাসী, শ্বিতযুখে, এক  
গানেতেই যেন সকল কথার উত্তর দিলেন । তিনি গাহিতে  
লাগিলেন,—



## রাণী ভবানী ।

( ধাম্বাজ—একতাল। )

ভুলি নাই মাগো, তোমারি চরণ,  
 জন্ম জন্ম তুমি অনাথ-শরণ,  
 তোমারি লাগিয়া ভ্রমি অনুক্ষণ,  
 কানন কান্তার নগর গিরি ।

অন্নপূর্ণা-ধামে তুমি খা অন্নদা,  
 অন্ন দিবে জীবে যাবে ভব-ক্ষুধা,  
 হাসিবে ধরনী, পান ক'রে সুধা,—  
 এ আশায় মাগো, জীবন ধরি ।

কত দিনে আশা : পূরিবে জননি !  
 কবে বা সে শোভা হেরিবে অবনী,  
 নিত্য স্মরি আমি সেই দৈব-বাণী,  
 — গোনা দিন মোর—ফুরায়ে যায় ।

হরা ক'রে এস, ওমা শিব-রাণী,  
 ওই গুন বঁাদে অনন্ত পরাণী,  
 দাও ভালবাসা, বুক-ভরা আশা,  
 আশাতেই তারা বাঁচিতে চায় ।

কেউ নাই যার, তুমি আছ তার,  
 তব মুখ চেয়ে আছে মা সংসার,  
 কে শোধিবে তব করুণার ধার,  
 করুণারূপিণি ! তাই ভেবে মরি ।



আর কত কাল কত জন্ম যাবে,  
মিছে ঘুরে ফিরে বহুরূপী-সাজে,  
ও রাস্তা চরণ হৃদয়ে রাজিবে,  
কবে মা ছিঁড়িবে করম-ডুরি ।

খেলাতে এনু মা, সাধ ক'রে হেথা,—  
চোখে আসে জল, ভাবিলে সে কথা,  
ললাট-লিখন কে করে অণুখা,—  
তবু মা দেখিব, পারি কি হারি ।

বুকে দাও বল, জীবনে বিশ্বাস,  
হৃদয়-মাঝারে হও মা প্রকাশ,  
তোমারি রূপায় তোমারি এ দাস,  
শ্রীপদে বাধিবে জীবন-তারি ॥

গান গাহিতে গাহিতে, সন্ন্যাসীরও মুখের নানা ভাবান্তর হইতে লাগিল,—নিবিষ্টচিত্তা গৌরীও সে গান শুনিয়া, কি জানি কেন, মনে নানা ভাঙ্গাগড়ার কল্পনা করিতে লাগিল । সঙ্গিনী শিবানী, একবার এক-দৃষ্টে সন্ন্যাসীকে দেখিতেছে, আর বার স্থিরনেত্রে গৌরীকে অবলোকন করিতেছে । গান গাহিতে গাহিতে, সন্ন্যাসী কখন হাসিল, কখন কাঁদিল, কখন যুক্তকরে উর্দ্ধে দৃষ্টি করিয়া স্থির হইয়া দাঁড়াইল,—আর কখন বা গৌরীর সম্মুখে নতজানু হইয়া, অঞ্জলি পাতিয়া, কি ভিক্ষা করিল । বালিকা গৌরী, যেন কিছু না বুঝিয়াও, সকলই বুঝিল । কি বুঝিল, তা সে-ই জানিল,—কাঁথাকে কিছু বলিল না ।





## একাদশ পরিচ্ছেদ ।

— ❦ —

অপরূপ শৈশব-খেলা খেলিতে খেলিতে, অপরূপ বালিকার সাত বৎসর কাটিয়া গেল,—গৌরী অষ্টমবর্ষে পদার্পণ করিল । ‘অষ্টবর্ষা ভবেদ্ গৌরী’—আট বৎসরের কণ্ঠাদান—গৌরীদানের সমতুল্য । সুতরাং সে কালের ধর্মপ্রাণ হিন্দুপরিবারের আট বৎসরের কুমারী কণ্ঠা,—অনুভা থাকিবার নহে । আশ্বারাম, কণ্ঠার বিবাহের সম্বন্ধ নির্ণয় জ্ঞাঘটক নিযুক্ত করিলেন । ঘটকদল নানাস্থানে ঘুরিয়া উপযুক্ত পাত্রের অনুসন্ধান করিতে লাগিলেন । রূপে গুণে, ধনে মানে, কুলে শীলে সর্বাংশে করণীয় হয়,—অবশ্য এইরূপ স্থলেই পাত্রের অনুসন্ধান হইতে লাগিল । ধনবান্ জমিদার আশ্বারাম চৌধুরীর একমাত্র কণ্ঠা,—রূপবতী, গুণবতী ও সর্বমূলক্ষণাক্রান্তা প্রিয়তমা কন্যা ;—সুতরাং তদনুযায়ী ঘর ও বরের চেষ্টা হইতে লাগিল । অনেক চেষ্টা ও অনুসন্ধানফলে পাত্র মিলিল,—উপযুক্ত ও সর্বাংশে করণীয়—এমন পাত্র মিলিল ;—নাটোরের মহাস্ত রাজ-

পরিবারে এই সম্বন্ধ নির্ণীত হইল। নাটোর রাজবংশের আদি রাজা—রামজীবন রায়ের দত্তকপুত্রের সহিত এই বিবাহ-সম্বন্ধ স্থির হইল। এই দত্তকপুত্রের নাম—রামকান্ত। রামকান্ত রূপে গুণে আত্মরাম-দুহিতার যোগ্য বর।

উভয়পক্ষের দেখা শুনা ও কথাবার্তা একরূপ স্থির হইয়া গেল। লগ্নপত্র ও পাকা-দেখার দিন, পাত্র-পক্ষে স্বয়ং রাজা রামজীবন আসিয়া কন্যা দেখিলেন। লোকমুখে তিনি যেরূপ শুনিয়াছিলেন, তাহার অপেক্ষা বরং বেশী দেখিলেন।—তাবী পুত্রবধুর অপরূপ রূপ ও অলৌকিক লক্ষণ দেখিয়া তিনি মুগ্ধ হইলেন। মনে মনে বলিলেন, “এ কি সত্যই আত্মরাম-দুহিতা, না ছদ্মবেশিনী কোন দেব-কন্যা? আমার দৃষ্টব্রন হইতেছে না ত?—মা আমার! তোমার মুখ দেখিয়া মনে হয় না যে, তুমি মানবী! বুঝিলাম, তুমিই নাটোরের রাজকুললক্ষ্মী হইয়া, ইষ্টদেবীর ন্যায় প্রজাপুঞ্জের পূজা পাইবে। সার্থক তোমার রত্নগর্ভা জননী!—এ মেয়ের আর কোণী দেখিব কি?”

নাটোরাধিপতি মহারাজ রামজীবনের সহিত অমাত্য-কর্মচারী, লোক-লঙ্কর অনেক আসিয়াছিল; তন্মধ্যে দয়ারাম রায় নামে মহারাজের এক অতি বিখ্যস্ত বুদ্ধিমান্ কার্যকুশল কর্মচারীও ছিলেন। দয়ারামকে লক্ষ্য করিয়া রামজীবন জনান্তিকে বলিলেন,—“এ মেয়ের আর কোণী দেখিব কি? মেয়ের কোণী দেখিতে পাও নাই বলিয়া তুমি অনুযোগ করিতেছিলে; তা এমন সর্বশূলক্ষণা, অপূর্ব রাজশ্রী-চিহ্নিতা কন্যার কোণীফল পরীক্ষা করার কোন প্রয়োজন দেখি না।”

দয়ারাম। ( জনান্তিকে ) তবু মহারাজ, পূর্বাপর যে নিয়ম

চলিয়া আসিতেছে, তাহা 'নয়' করিলে, মনে কেমন একটা খটকা লাগে ।

রামজীবন । না, না, এমন সন্দেহ মনে স্থান দিতে নাই । দেখিতেছ না, এমন দেবীভূত রূপ, এমন মনোহর অঙ্গপ্রত্যঙ্গ, এমন করুণাপূর্ণ অপরূপ মুখচ্ছবি—এমন মঙ্গলময়ী মূর্তিতে কোনরূপ অমঙ্গলের ছায়াও পড়িতে পারে না ।

দয়্যারাম । তাই হউক, মহারাজ ! যাকে যেন নির্ঝিল্লি গৃহে লইয়া গিয়া, তাই রামকান্তের বামে বসাইয়া, নাটোর-রাজগৃহের অধিষ্ঠাত্রী দেবীজ্ঞানে, আমরা পূজা করিতে পারি।—জয় মা শঙ্করি ! যেন এই সজীব প্রতিমার পাদপদ্মে পুষ্পাঞ্জলি দিতে দিতে, এ রাজভূত্যের আয়ুঃশেষ হয় ।

রামজীবন অগণিত মণিমুক্তা-কাঞ্চন-মুদ্রা সহ ধান-দূর্বাদলে কন্যাকে আশীর্বাদ করিলেন । রাজ-পুরোহিত সঙ্গে আসিয়া-ছিলেন ;—তিনিও ভাবী রাজ-লক্ষ্মীকে স্বস্তিবচনে আশীর্বাদ করিলেন ।

বরপক্ষের ও কন্যাপক্ষের পাকা কথাবার্তা স্থির হইয়া গেল । যথারীতি লগ্নপত্রও লিখিত হইল । লগ্নপত্রের লিখন-কার্য্য দয়্যারামই সম্পন্ন করিলেন । শুভদিনে, শুভক্ষণে, মহাসমারোহে, এই উদ্বাহ-ক্রিয়া সুসম্পন্ন হইবে ।

এই সময়ে আর এক ঘটনা ঘটিল । গৌরীর খেলাধুলার সহচরী—ছায়ার ন্যায় চিরসঙ্গিনী শিবানীকে দেখিয়া, তাহার সবিশেষ পরিচয় পাইয়া, রাজপুরোহিত, বালিকা শিবানীকে আপন পুত্রবধু করিতে মনস্থ করিলেন ।

এ প্রস্তাবে, স্বয়ং রাজা রামজীবন সন্তুষ্ট হইলেন, তাহার

অনুচর-সহচরবৃন্দ ও দৃষ্টচিতে উৎসাহভরে ইহাতে সম্মতি প্রকাশ করিলেন ;—অপরপক্ষে আয়ারাম চৌধুরী ও তাঁহার কুল-পুরোহিত—শিবানীর পিতাও এ প্রস্তাব আফ্লাদের সহিত গ্রহণ করিলেন ।—কাহারো কোনও বিষয়ে কিছুমাত্র আপত্তি রহিল না । একই দিনে একই লগ্নে,—দুই শৈশব-সঙ্গিনী, দুই সুযোগ্য পাত্রের সমর্পিতা হইয়া, মনের সুখে সংসার-ধর্ম পালন করিবে,—ইহার বাড়া, আত্মীয়-স্বজনের আর শুভাকাঙ্ক্ষা কি ?

কারাগ-কার্য্য-কাল—দিনের সংঘটন হইল । অদৃষ্ট অলক্ষ্যে থাকিয়া, আপন চক্রে বসিয়া, ঘুরিতে লাগিল । এ ঘূর্ণনের ফল কি, তাহা ভবিতব্যতাই জানেন ।

রাজ-কুলের সমুচিত মর্যাদা রক্ষার জন্য, কন্যাকুল হইতে কন্যা আনা হইয়া, আপন অধিকারে বসিয়া, সেই কন্যার সহিত পুত্রের বিবাহ দেওয়া, তদানীন্তন রাজাদিগের রীতি ছিল । এ ক্ষেত্রেও সেই কথা উত্থাপিত হইল । দয়ারাম প্রভৃতি রাজ-পক্ষীয় সকলেই এই কথার যৌক্তিকতা প্রতিপন্ন করিতে লাগিলেন । দৃষ্টচিত্ত আয়ারাম কিন্তু এ প্রস্তাবে সম্মত হইতে পারিলেন না । ধনে মানে বংশ-মর্যাদার তিনিও ছাতিন-গাঁ অঞ্চলে কম নন । কিন্তু মনের এ ভাব মনে রাখিয়া, বিনীত ভাবে—অথচ স্পষ্টবাক্যে, তিনি ভাবী বৈবাহিককে জানাইলেন,—

“মহারাজ ! আমার এই একমাত্র মেহপুত্রলি কন্যা ;—দ্বিতীয়-সন্তান-সন্ততি কিছুই নাই ;—সুতরাং এমন কন্যার বিবাহ—আমার পুর-মহিলা ও প্রজামণ্ডলী দেখিতে পাইবে না,—ইহা হইতেই পারে না । বিশেষ সকলেই আশা করিয়া আছে যে, এই বিবাহোৎসবে যোগদান করিয়া, আমোদ-আফ্লাদ

## একাদশ পরিচ্ছেদ ।

করিবে । আমিও কণ্ঠার জন্মকাল হইতে দিন গণনা করিয়া আসিতেছি যে, কণ্ঠার বিবাহ সময়ে অমুক করিব,—অমুককে অমুক দিব,—ছাতিন গাঁর অমুক স্থানে অমুক উৎসব হইবে ;—মহারাজ ! ক্ষমা করিবেন, রাজকূলে কণ্ঠাদান করিবার সৌভাগ্য হইয়াছে বলিয়া, আমি এত লোকের এত সাধ, এত আশ্লাদ, এত আশা ভঙ্গ করিতে পারিব না,—আমার মনও ইহাতে প্রবোধ মানিবে না ।”

রামজীবন দেখিলেন, এ ক্ষেত্রে আর বাদ-প্রতিবাদ করা বৃথা,—আত্মারাম দ্বিতীয় কথার লোক নন ।

দয়্যারাম বুঝিলেন, এমন স্থানে তাঁহার বুদ্ধির মাপকাটা বড় একটা কিছু করিতে পারিবে না,—কেননা, আত্মারাম স্নাবলম্বী—পরমুখাপেক্ষী নহেন,—স্মৃতরাং দৃঢ়চেতা ও তেজস্বী ;—তাঁহার কথার ঝাঁজেই তাহা বুঝা গিয়াছে ।

তথাপি, ভীষ্ণবুদ্ধি দয়্যারাম একেবারে হটিলেন না ;—অভাবপক্ষে, প্রভুর কিছু ভূমিলাভ হয়, এবং তৎসঙ্গে প্রকারান্তরে প্রভুর মর্যাদাও রক্ষা পায়,—মনের মধ্যে এই হিসাব করিয়া, তিনি আত্মারামকে বলিলেন,—

“তা চৌধুরী মহাশয় বাহা অনুমতি করিলেন, এক পক্ষে ইহা অতি সমীচীন । কিন্তু মহারাজের দিক্ হইতেও একটা কথা বলিবার আছে । কিছু মনে করিবেন না,—কিন্তু ভাবুন দেখি, মহারাজ যে ছেলের হাত ধ’রে এখানে বিবাহ দিতে আসিবেন, তা কার জমিদারী দিয়ে তাঁকে আসতে হবে ? মহারাজ—নাটোরেরই মহারাজ আছেন ;—এ ছাতিন-গাঁর তিনি কে ?—এখানকার মহারাজ—আর হর্তা-কর্তা-বিধাতা—

যাই বলুন,—আপনি স্বয়ং আশ্চারাম চৌধুরী মহাশয় !—  
কেমন কিনা ?—আপনারা পাঁচজনে বলুন না ?—এই পরের  
ভূঁই দিয়ে ত মহরাজকে বেটার বিয়ে দিতে আসতে হ'বে ?”

“সে কথা ঠিক”—“সে কথা ঠিক”—সভার মাঝে এইরূপ  
একটা ধ্বনি ও মাথা-নাড়ার পালা পড়িয়া গেল ।

বাকপটু দয়ারাম, তখন সুযোগ বুঝিয়া, আবার গলা সাড়া  
দিয়া বলিলেন,—

“হাঁ, আমার কাছে মশাই স্পষ্ট কথা—তা মহারাজই হউন,  
আর দীন দুনিয়ার মালিকই হউন ।”

এই দয়ারাম, নাটোর-রাজের একরূপ দক্ষিণ-হস্ত-স্বরূপ ।  
অতি সামান্য অবস্থা হইতে—রাজ-সংসারের তুচ্ছ ভাণ্ডারীর  
পদ হইতে—আজ তাঁহার এই প্রধান অমাত্যপদ—পরামর্শদাতা  
মন্ত্রীর পদ প্রাপ্তি । অসাধারণ বিষয়-বুদ্ধিকৌশল ও সর্ববিধ  
কার্যপটুতা গুণে, রাজসংসারে তাঁহার এই প্রতিপত্তি ও পসার ।  
অপিচ, দয়ারামের প্রভুভক্তি, বিশ্বস্ততা ও সর্বকার্যে সুদক্ষতা  
কাহারও অবিদিত ছিল না । জাতিতে তিলি ; কিন্তু স্বয়ং  
ব্রাহ্মণ জমিদার নাটোর-রাজ,—তাঁহাকে পুত্রের গায় স্নেহ  
করিতেন । সেই দয়ারাম রায় যখন এইরূপ প্রস্তাব করিলেন,  
তখন আশ্চারাম বুঝিলেন,—“এ কার্যে কিছু উঠিতে হইবে ;—  
দয়ারামের এ ব'ড়ের চাল ।”

আশ্চারাম আর এতদ্বিরুদ্ধে বাঙনিষ্পত্তি না করিয়া,  
বিনীতভাবে বলিলেন,—“যে আজ্ঞা, রাজ-মর্যাদা আমি যথা-  
সাধ্য রক্ষা করিব ! মহারাজ রামজীবন রায়ের প্রিয়পুত্রের  
বিবাহের যৌতুক স্বরূপ, আমি আমার এই ছাতিনগাঁ পরগণার



একাংশ, মহারাজকে উপচৌকন স্বরূপ প্রদান করিব । যে স্থানে বিপুল বাদ্যভাণ্ড ও ফৌজ-বরকন্দাজ-সহ বর ও বরযাত্রি-গণ সমবেত হইয়া বাসাবাটী নির্মাণ করিবেন,—অতঃ হইতে সেই ভূমির সহিত আত্মারাম চৌধুরীর আর কোন সংশ্রব রহিল না ! আমি স্বৈচ্ছায়, আনন্দচিত্তে এই শুভ-প্রস্তাবে সম্মত হইলাম । ভরসা করি, অতঃপর মহারাজ আর আমাকে রাজধানীতে কণ্ঠা লইয়া গিয়া, সম্প্রদান কার্য সম্পন্ন করিতে, অনুমতি করিবেননা ।

রামজীবনের মুখ হইতে কোন কথা বাহির হইবার পূর্বেই, দয়ারাম উৎসাহভরে বলিয়া উঠিলেন,—“সাধু, সাধু!—চৌধুরী মহাশয়, আপনি সাধু ! তা ত হ'বেই,—তা ত হ'বেই—এই মানীর মান মানীই রাখে ;—অন্তে তার কি জান্বে বলুন ? বুঝলেম, যোগ্যস্থানে মহারাজ বৈবাহিক-সম্বন্ধ স্থির ক'রেছেন । এখন প্রজাপতির ইচ্ছায় শুভকার্য্য নির্বিন্দে সম্পন্ন হউক,—কায়মনোবাক্যে এই প্রার্থনা করি ।—চৌধুরী মহাশয় ! আপনার সকলই প্রতুল হবে,—সব সোজাসুজি হ'য়ে যাবে,—আপনার মন ভাল ।”

দয়ারাম একাই এক-শ'—আর কাহাকে কোন কথা কহিবার অবসরই দিলেন না ।

একই দিনে, একই লগ্নে—দুই কণ্ঠার বিবাহ । দুই শৈশব-সহচরী, নিত্য-সঙ্গিনী, দুই সমবয়স্কা কণ্ঠার বিবাহ । দর্পণে ছায়ার গায় একত্রে আহার-বিহার-বেশভূষা,—বাক্য-কথন-শিক্ষা,—খেলাধুলা ও ভাব-ভালবাসা,—এমনই দুই কণ্ঠার বিবাহ । যেন গঙ্গা ও যমুনা একই স্রোতে প্রবাহিতা ;—এমনই দুই কণ্ঠার বিবাহ । এক,—গোরীরূপা ভবানী ; আর

—শ্রামারূপা শিবানী । ভবানী ও শিবানী হু'য়ে মিলিয়া শাস্ত্র-  
বিহিত সংসার-ধর্ম পালন করুক,—সংসারে অমৃতময় ফল  
ফলিবে ।

কিন্তু পিতামাতার মনে যে সোনার স্বপ্ন জাগিতেছে, সে  
স্বপ্ন কি সফল হইবে ? কে জানে, কাহার কিমে সফল হয়, আর  
কিমে বিফল হয় !

সফল বিফলের ভাবনা, তোমার আগার ভাবিয়া কাজ  
নাই ;—যে যাহার অদৃষ্ট ও কর্মানুসারে ফলভোগ করিয়া  
যাইবে ;—তুমি আমি নিমিত্ত মাত্র ।





## দ্বাদশ পরিচ্ছেদ ।



“ওলো গোরী, ওলো শিবি, এইবার তোদের আইবুড় নাম ঘুচলো রে !”

শিবানী । কেন ঠান্দিদি, হিংসে হয় নাকি ?

ঠান্দিদি । আর ভাই, অমন কচি কচি সোণার-টাঁপা বর পেলে, কার না হিংসে হয় বল ?

শিবা । তা ঠাকুরদাদাকে বলবো, না হয় তিনি দিনকত ছুটি নিন,—তাঁর জায়গায় “সোণার টাঁপা” এসে আসন নিন ।

ঠান্ । আর দিদি, আর কি সে বয়েস আছে, যে, সোণার টাঁপাদের মনে ধ'রবে ?

শিবা । বালাই, যাট্ ! ঠান্দিদি, তোমার কিসের বয়েস,—কিসের অভাব ? তোমার মাথার চুল—আজও যেন চিকণ কাল !

( ঠান্দিদীর মাথার প্রায় পনেরো আনা চুল পাকিয়া, জট বাঁধিয়া, যেন শোণের দড়ী হইয়াছে ! )

ঠান্ । তা ভাই, তুই ভালবাসিস, তাই এমন বল্চিস ।

শিবা । না না, সত্যিই তোমার চিকণ কাল চুল,—ইচ্ছে হয়, এই চুল নিয়ে ঘোষালদের বোয়ের ধোপার দড়ী বিলুই ।

( ঘোষালদের বউ-এর উপর শিবানীর বড় রাগ,—সে তার ‘গঙ্গাজলকে’ একদিন মদা-মেয়ে ব’লে নাক সিটকেছিল । গঙ্গাজলের অপরাধ যে, সে তার বাপের অতিথিশালায় যায়, কান্দাল-গরীবের খাওয়া দেখে,—কেউ পীড়িত হ’লে তার সেবা-শুশ্রূষা ক’রে থাকে ।—এতেও লোকে আবার তার প্রশংসা করে,—আর ঘোষাল-বোয়ের সেই কালো-কোলো—লোভাভে হাংলা মেয়েটাকে কেউ দু’-চক্ষে দেখতে পারে না । )

মাথার চুল ‘চিকণ কাল’ শুনিয়ে, ঠান্দিদী একবার মাথায় হাত দিলেন ; মাথার কাপড়টি একটু টানিয়ে দিলেন ; আদর করিয়া শিবানীকে বলিলেন,—“সত্যি বল্চিস্ বোন, আমার মাথার চুল কালো ?—তা অভাগ্যের দশা,—মিথ্যেই বা তুই বলতে যাবি কেন,—তোমার তেমন স্বভাব নয় ;—আহা, ভগবান জেঁরে স্নেহে রাখুন ।—মনের মত সোয়ামী পেয়ে, তুই বোন স্নেহে ঘর-সংসার কর ; তোমার হাতের-নো ক্ষয় যাক্ ।” (ইত্যাদি, ইত্যাদি । )

শিবানী বয়সে যাই হউক, বুদ্ধিতে পাকা বুড়ী ;—ঠান্দিদীকে পাইয়া বেশ একটু রঙ্গ করিয়া লইল ; বলিল,—“ঠান্দিদি, তোমার দাঁতগুলি যেন মুক্তোর ঝুরি !”

ঠান্দিদীর প্রায় সকল দন্তই পড়িয়া গিয়াছে,—কেবল কসে ও পাশে দুই চারিটা দাঁত বিরাজ করিতেছে ;—মধ্যস্থলে মাড়ী মাত্র সার । সেই মাড়ী বাহির করিয়া ঠান্দিদী এক-গাল হাসি

হাসিলেন। হাসিতে হাসিতে মাড়ীতে হাত দিয়া বলিলেন,  
“হ্যাঁ দিদি, এই গেল বারের সেই কনক'নে শীতে এই সামনের  
দাঁত ছোটো আনুগা হ'য়ে গেছিল,—খাবার কষ্ট হ'তো ব'লে  
সাধ ক'রে আমি তা উপ্ড়ে ফেলেছি!”

শিবানী—ছুটে শিবানী, কষ্টে হাস্য সংবরণ করিয়া বলিল,  
“ঠান্দিদীর নাকটি কেমন টীকলো,—যেন মোহন বাঁশীর মত!”

ঠান্দিদী একবার নাকে হাত দিয়া, যেন একটু জড়সড় হইয়া  
ঈষৎ হাসিলেন। বলিলেন, “না না, তা নয়,—তুই রঙ্গ কচ্ছিস্।”

শিবা। না ঠান্দিদী. রঙ্গ নয়,—সত্যি বল্চি, তোমার  
নাকটি টীকলো,—ধনুকের আগার মত।

ঠান্। তা—তা হ'বেও বা। তুই ত এমন মেয়ে নোস  
যে, মিছে কথা ব'লে মন রাখ'বি।

শিবানী। তাই বল্চি ঠান্দিদী।—আর কে বলে ঠান্দিদীর  
আমার গাল ভুব্ড়ে গেছে? আমি ত দেখি পাকা আঁব্টি!  
আর ঠেঁটি ছ'খানি যেন টুকটুকে তেলাকুচো!”

এবার ঠান্দিদী একেবারে শিবানীর গায়ে আসিয়া পড়িলেন;  
সোহাগভরে তাহার চিবুক ধরিয়া চুম্বন করিলেন। বলিলেন,  
“বাছা নিজে ভাল কিনা, তাই ওর ঠান্দিদীর সব ভাল দেখে।—  
আহা,—মা মঙ্গলচণ্ডী বাছার মঙ্গল করুন।—এই দেখ্ বোনু,  
আমি এই বড়-গলা ক'রে বল্চি,—তোমার ভাল হ'বে। তোমার  
মন ভাল,—তোমার ভাল হ'বেই—হবে। ঐ যে কথায় বলে,—  
“মন ভাল নয় তীথি কর, মিছে কাজে ঘুরে মর।—”

শিবানী।—( হাসি চাপিয়া ) আর ঠান্দিদী, বল্তে ভুল-  
ছিলেম,—তোমার গায়ের রং—আজও যেন হুধে-আলুতায়

গোলা!—হঠাৎ কে দেখে বলবে যে, ঠান্দিদীর বয়স কুড়ি পেরিয়েছে!

এবার আর ঠান্দিদী সামলাইতে পারিলেন না,—গলা ছাড়িয়া বলিয়া ফেলিলেন,—“ওরে আমার দিদীমণিটিরে! যদি কথা পাড়লি, ত বলি শোন। এই তোঁর ঠাকুরদাদা যখন আমায় বিয়ে ক’রে আনুলে, তখন আমি এই তোঁদেরি বয়সী—আট বছরের মেয়ে; তার পর পাঁচ আট কি ছ-আট ( এক-আট হাতে রাখিয়া ) পেরিয়েছে,—এরি মধ্যে পোড়া-লোকে রুটিয়ে দিলে কিনা,—কুড়ি পেরিয়ে ঠান্দিদী বুড়ী হ’য়েছে!—( পড়সীদের উদ্দেশে ) আরে বুড়ী হ’য়েচি, তা তোঁদের কি? তোঁদের কি ভালটা খেয়েচি রে?”

এখন, এই ‘ভালটা-খাওয়ার’ কথা হইতে অনেক রকম ভাল-খাওয়ার কথা উঠিল।—ঠান্দিদীর মুখে যেন চড়বড় করিয়া থৈ ফুটিতে লাগিল। সেই থৈ-ফোটা আর খামে না,—বহুক্ষণ তাহাতে অতিবাহিত হইল।

শিবানী ঠান্দিদীকে শাস্ত করিয়া বলিল,—“তা ঠান্দিদি, লোকের কথা তুমি শোন কেন? আমরা সুবাদে নাত্নি হ’লেও, তোমাকে ‘সই’ ব’লে জানি।”

ঠান্। তুমি কেমন মেয়ে,—তুমি জানবে না বোন?—আর ধরো ছ-আট বয়েসই না হয় আমার হ’য়েচে,—মেনে নিলেমই পোড়া-লোকের কথা;—তা বলত বোন,—ছ-আট—কত হয়? ( আঙ্গুলে পর্ক গণনা করিয়া ) আট—এই নয়, দশ, এগারো,—কত হয়?

শিবা। চৌদ্দ।—ষাট! কুড়িই বা তোমার পেরুবে কেন?—

ছ-আট চৌদ্দ হয় ;—ঠান্দিদীর বয়েস আমাদের এই চৌদ্দ বছর !

ঠান্ । ( ঈষৎ হাসিয়া ) চৌদ্দ নয় বাছা,—মিছে বল্‌বো না,—এই উনিশ বছর ন-মাস ;—কুড়ি পূর্বে এখনো ছ-মাস বাকী ।

ঠান্দিদীর এই “কুড়ি পূর্বে ছ-মাস বাকী”—অনেকে অনেক কাল হইতে শুনিয়া আসিতেছে,—এ কুড়ি আর পূর্বে না ! শিবানী ত শিবানী,—শিবানীর মার বিয়ের সময় শিবানীর মাও এই কথা শুনিয়াছে ; শিবানার বাপও বিয়ের আগে থেকে একথা শুনে আস্চে ;—আর আজ শিবানীও তাহা শুনিল । শুনিয়া, মনের মধ্যে বেদম হাসিয়া লইল । হাসি চাপিতে চাপিতে, তাহার গাল-গলা-পেট যেন ফুলিয়া উঠিল ।

এবার অভি কষ্টে কাসির ভাণ করিয়া, শিবানী বলিল,—  
“ঠান্দিদী, তবে এস, আমাদের শিবপূজার সময় হ'লো—ফুল তুলে নিয়ে যাই ।”

ঠান্ । হাঁ দিদী, যাই ।—আমিও একবার গিন্নী-মার কাছে যাব ।—ওকি ! ‘মা মা’ শব্দ করে কে ?—গৌরা না ? চল দেখি, দেখি, কি হ'লো ? এঁ্যা ! এক সঙ্কনাশ !

উভয়ে ত্বরিতপদে, ব্যাকুল অন্তরে, গৌরীর নিকট পঁহুছিল ।





## ত্রয়োদশ পরিচ্ছেদ ।

— ৩\*৫ —

একটি সুবর্ণময় ফুলের সাজি লইয়া, গৌরী অস্তঃপুরস্থ পুষ্পোদ্যানে, স্বহস্তে পুষ্পচয়ন করিতেছিল। মধুর প্রভাত, মধুর মলয়ানিল, মধুর পুষ্পবাস—তিন মাধুর্যে মাধুরিমময়ীর মধুরতা,—অপূর্বভাবে পরিণত হইতেছিল। স্তবকে স্তবকে কুমুমরাজি, স্তরে স্তরে কোরক-গুচ্ছ, পত্রে পত্রে বালার্ক-কিরণ,—তপ্তকান্দনপ্রভা গৌরী ধূপছায়া রংগের বিচিত্র পট্টবাসে আবৃত হইয়া, কুমুমকোমল করে সোনার ফুলের সাজি লইয়া, অপক্লপ রূপ-জ্যোতি বিকীর্ণ করিতে করিতে, সেই প্রফুল্ল পুষ্পোদ্যান মাথে, ফুল-রাণীরূপে বিরাজ করিতেছিল। দাস দাসীর অভাব ছিল না,—ইচ্ছামাত্রেই কার্য্য সমাধা হইতে পারিত,—তথাপি বালিকা দৈনন্দিন শিবপূজার ফুল স্বহস্তে সাজি ভরিয়া তুলিত, তুলিয়া সুখী হইত। উত্তর-জীবনে যে উচ্চ আদর্শ দেখাইয়া, বালিকা দেবীপদবাচ্যা হইবে, শাস্ত্রময় শৈশবের সুখ-উষার, প্রকৃতি যেন আপনা হইতে তাহাকে সেই শিক্ষা দিয়া রাখিল। স্বভাবের এমনই আশ্চর্য্য নিয়ম!—অঙ্কুরেই বৃক্ষের বৃক্ষত্ব প্রারম্ভ হইয়া থাকে।



( এই কথা স্বরণ রাখিয়া ভবানী-চরিত্র অধ্যয়ন করিলে, লেখকের শ্রম সার্থক হইবে । )

সোনার গৌরী সোনার সাজি লইয়া, সঙ্গিনী সহ পবিত্রমনে পুষ্পচয়ন করিতেছিল ;—কি ভাবে, কখন, কোন্ মস্তোচ্চারণের সহিত, কোন্ ফুলটি শিবলিঙ্গে অর্পণ করিবে ভাবিতেছিল ;—এমন সময় পাড়ার ঠান্দিদি আসিয়া, তাহার সেই বিমল ‘মানসিকে’ বাধা দিল । বালিকা সহসা, কেমন যেন চমকিত হইয়া, একটু খত-মত খাইয়া, অদূরস্থ এক লতাকুঞ্জে গিয়া বসিয়া পড়িল । সেখানে সঙ্গিনী শিবানী বা ঠান্দিদীর কথাবার্তা তাহার কানেই পৌঁছিল না,—সে আপন মনে আত্মচিন্তানিরত হইয়া ভাবিতে ভাবিতে, বিনা-হতায় এক অপূর্ব মালা গাঁথিল ।—পুষ্পরাজি রুস্তে-রুস্তে সংযুক্ত ও গ্রথিত হইয়া, এই সুন্দর মালার আকার ধারণ করিল । সে মালা যাহার মাথায় উঠিবে, তিনি দেব-দেব মহাদেব । মহাদেব ও সেই অদৃষ্টপূর্ব অদ্ভুত সন্ন্যাসীকে স্বরণ করিয়া, বালিকার চোখে জল আসিল ।

সময়গুণে, ইহার সহিত আবার, সেই অপূর্ব স্বপ্নবৃত্তান্তও অন্তরে জাগরিত হইল । মা-অন্নপূর্ণা তাহাকে প্রত্যাদেশ করিয়া গিয়াছেন,—“শিবপূজা, গঙ্গাস্নান ও সাধুদর্শন,—এই তিন পরমবস্তু,—জীবনের প্রিয়তর করিও ।”—গৌরী এখন তাহাই ভাবিতে লাগিল ; মনে মনে বলিল,—

“মা পরমেশ্বরী ! তোমার আদেশ আমি যথাসাধ্য পালন করিয়া আসিতেছি । শিবপূজা যথানিয়মে প্রতিদিনই করিতেছি,—সংপ্রতি তোমার ইচ্ছায়, মা ! আমার সাধুদর্শনও হইয়াছে ।—সাধুদর্শন কি প্রত্যক্ষ শিবদর্শন,—তা মা, ছুমিই

জান। কিন্তু গঙ্গান্নান,—সে আমি কিরূপে করিব ? এ ছাতিন-গাঁয় ত মায়ের আবির্ভাব হয় নাই ? তবে ধর্ম্মাত্মা পিতা আমার বহু যত্নে, বহু অর্থব্যয়ে সর্কতীর্থের জল সংগ্রহ করিয়া রাখিয়াছেন ; আমি তাহা হইতে প্রতিদিনই একরূপ গঙ্গান্নান করিয়া থাকি। সুরধুনী পতিতপাবনী তিনি ; ব্রহ্মার কমণ্ডলুতে যখন তিনি অবস্থিতি করিতে পারেন, তখন যে তাঁহার নিত্য-স্পর্শে, আমার পাপতাপও বিদূরিত না হইবে, এমন হইতেই পারে না।—মা, তবে যা চেয়েছি, তাই এখন দাও। অন্তর্য্যামিনি, এ শরণাগতার অন্তরে পূর্ণরূপে অধিষ্ঠিতা হও। মা, আমার স্বামী দাও। স্ত্রীলোকের পরম দেবতা, পরম গুরু, পূর্ণব্রহ্ম স্বামী আমার দাও। তেজস্বী, ধর্ম্মাত্মা, চিরজীবী স্বামী আমায় দান কর। মা, বরাভয়দায়িনি ! তোমার দয়ায় ত কেউ-ই বঞ্চিত হয় না ?”

“তুমিও হইবে না,—তবে সম্পূর্ণ নহে।”

গৌরীর কানের কাছে, কে যেন বজ্রগন্তীর স্বরে, এই ধ্বনি করিয়া গেল। স্বর গন্তীর, কিন্তু অতি মধুর।

নিম্নলিতনেত্রী গৌরী কাঁদ-কাঁদ কণ্ঠে কহিল,—“বাবা, বাবা, এ কি বলিলে ? হে শিব, তুমি এ ছলনা করিলে ?”

পুনরায় গৌরী যেন গুনিতে পাইল,—“আমি ছলনা করি নাই ;—তোমার প্রতি প্রসন্ন হইয়া তোমাকে বাল-বৈধব্যের হাত হইতে রক্ষা করিলাম।”

গৌরী। ( পূর্ব্ববৎ আত্মমনে ) এঁয়া ! বাল-বৈধব্যের হাত হইতে রক্ষা ? স্বামীর অকাল মরণ ? বাবা, বাবা, কণ্ঠার বৈধব্য ঘটাইলে ?

সেই স্বর পূর্ববৎ গৌরীর কাণে বাজিল,—“আমি ঘটাই নাই,—তোমার জন্মান্তরীণ প্রাক্তন-ফলেই এইরূপ ঘটিল। বলিয়াছি ত, তোমার প্রতি আমি প্রসন্ন ; তাই তোমার অদ্ভুত তপশ্চায় ও পিতৃপুণ্যে, তোমার বালবৈধব্য, বলিব কি, তোমার বাসর-বৈধব্য আমি রোধ করিয়াছি। এখন, ইহার অধিক আর শুনিতে চাহিও না।—কেন, তুমি কি সকলই বিস্মৃত হইতেছ ? কে তুমি,—কেন আসিয়াছ,—তাহা কি কিছুই মনে নাই ? এখন সেই স্বপ্ন-বৃত্তান্ত স্মরণ কর। তুমিত পূর্কালেই জানিতে পারিয়াছ,—“সংসারিক সুখ তোমার অদৃষ্টে বড় বেণী ঘটিবে না ; সুখ অপেক্ষা বরং দুঃখের ভাগই অধিক।”—সুতরাং এই প্রত্যাদেশ স্মরণ করিয়া আশ্বস্ত হও ; এখন হইতেই বুকে বল সঞ্চয় কর ;—পরাৎপরা তোমার সহায় হইবেন। দেখ দেখি, আমি কে ?”

গৌরী চক্ষু মেলিল,—দেখিল, সেই জটাজুটধারী, বিভূতি পরিলেপিত, তেজঃপুঞ্জ সন্ন্যাসী।—তপ্তকাঞ্চননিভ গৌরবরণ, ঢুলু ঢুলু নয়ন, নির্ঝিকার সদানন্দ ভাব ;—সন্ন্যাসী গৌরীর পানে অতি করুণ বাৎসল্যভাবে চাহিতে চাহিতে, মৃদু মধুর হাসিতে লাগিলেন।

গৌরী যেন আবেগে, অনুরাগে, পরিপূর্ণ উৎসাহে, সন্ন্যাসীর পদপ্রান্তে লুটাইয়া পড়িতে গিয়া বলিল,—“বাবা, বাবা, তুমি ?”

“হাঁ, আমি।”

জলদগন্তীর-স্বরে সন্ন্যাসী বলিলেন,—“হাঁ, আমি।”

বলিতে বলিতে সন্ন্যাসীর সেই বিরাট্ শৈবমূর্তি যেন শূন্যে উঠিল ;—নিম্নে ভূমিতলে তাঁহার হস্তস্থিত ত্রিশূলের একটি উজ্জল ছায়া পড়িল।

ভাববিহ্বলা গৌরী এবার কাঁদিতে লাগিল । তখন সেই বিমানপথবিহারী দেবমূর্তি—অতি মধুর—অতি কোমল ও অতি করুণকণ্ঠে বলিলেন,—

“আমি ছিলাম, আছি ও থাকিব ।—বৎসে, কাঁদিও না ;—শান্ত হও ; —এখন আমি চলিলাম । তোমার সুহৃৎ জাতিস্বরা-তুল্য শৈশব বা সোনার স্বপ্ন-কাল ফুরাইল । এখন তোমার জাগরণের অবস্থা । আর তোমার মধো, কেহ বড় একটা অঘটন ঘটন, অপূৰ্ণ কণন, ও অলৌকিক কার্যাবলীর সমাবেশ দেখিতে পাইবে না । তোমার নিজেরও এই অপার্কিব দেবমায়া-মিশ্রিত শৈশব-স্মৃতি, বড় একটা মনে থাকিবে না । এইবার তুমি সংসারে প্রবিষ্ট হও । লোকসাধারণে উচ্চ আদর্শ দেখাও । রাজলক্ষ্মী হইয়া, জীবের আরো উন্নত-প্রণালীতে অন্ন-দান করিতে আরম্ভ কর । এই অন্নদান মহাব্রতে, কালে তুমি জননী-অন্নপূর্ণা সমা গরীয়সী হইবে । তোমার জীবন সফল হইবে । যাইবার কালে আবার বলি,—বৎসে ! শিবপূজা, গঙ্গাস্নান ও সাধুদর্শন,—এই তিন পরমবস্তু জীবনের নিত্য-ব্রত করিও ;—তোমার পরমা গতি লাভ হইবে :—ইহজীবনেই তুমি তাহার প্রত্যক্ষ ফল দেখিবে ।”

মূর্তি অন্তর্হিত হইলেন ; গৌরী মা মা রবে কাঁপিতে কাঁপিতে মূচ্ছিত হইয়া পড়িল ।

এই ‘মা মা’ রব শুনিয়া, শিবানী ও ঠান্দিদি ছুটিয়া আসিয়াছিল ।





## চতুর্দশ পরিচ্ছেদ ।

—(ঃ\*ঃ)—

গৌরীর বিবাহ-ব্যাপারে, ছাতিন-গাঁয়ে, মহা সমারোহ পড়িয়া গেল । লোক-নকর, নগদী বেহারা, উড়ে ভাট, মিল্লী মজুর,—চারিদিকে জনশ্রোত ছুটা ছুটি হুড়াহুড়ি করিতে লাগিল । কোথাও চালা বাধা হইতেছে, কোথাত সাঁমিয়ানা খাটানো হইতেছে, কোথাও টং বাধা হইতেছে, কোথাও রোস্নাইয়ের আলোর জল সারি-গাঁথা বাঁশের খোপা বসানো হইতেছে, কোথাও নহবৎ-রোসনচৌকী বাজনার ঘর তৈয়ারী হইতেছে । ইহা ব্যতীত তোরণ, সিংহদ্বার, ফটক, বাজী-পোড়ানর মাঠে দর্শকের বসিবার আসন, কাঙ্গালী-তোজনের স্থান—চালা, আটচালা, ভিয়ান-ঘর—কতস্থানে যে কতবিধ ব্যাপারের আয়োজন হইতেছে, তাহার সংখ্যা নাই । ছাতিন গাঁ অঞ্চলে বংশকুল নিশ্চূল হইল, দেবদারু-বৃক্ষশাখা ছুপ্রাপ্য হইয়া উঠিল, এবং দড়ি-দড়া-পাট ও দরুমা—চতুর্গুণ মূল্যে বিক্রীত হইতে লাগিল । ফুলের বাগানে কাহারো আর ফুল রহিল না,—ফুল ও সুদৃশ্য আরণ্য লতাপাতা—গ্রাম ছাড়িয়া গ্রামান্তরে গিয়া সংগ্রহ করিতে হইল । ফুলের বাড়, ফুলের তোড়া, ফুলের মালা,

যে কত তৈয়ারী হইল, তাহার আর সংখ্যা নাই। ইহা ব্যতীত সোলার-তৈয়ারী ফুল - সোলার লতা-পাতা-গাছ,— সোলার হাতী-ঘোড়া-ভেড়া-মেড়া-উট,— সোলার পাহাড়-পর্বত-রথ—সোলার গরু-বানর-সাপ—এক সোলারই যে কত জিনিস তৈয়ারী হইল,—কে তাহার সংখ্যা করে? এইরূপ ভিন্ন ভিন্ন কারিকর, ভিন্ন ভিন্ন মিস্ত্রী-মজুর, ভিন্ন ভিন্ন কার্যে লিপ্ত আছে। ভিন্ন ভিন্ন স্থান হইতে ভিন্ন ভিন্ন লাঠিয়াল ও মল্লযোদ্ধ, গণও সমবেত হইয়াছে ;—তাহারা ঢাল-সড়কী-লাঠীখেলা দেখাইয়া, নানারূপ কুস্তির কোশল প্রদর্শন করিয়া, কণ্ঠা-কর্তার নিকট হইতে প্রচুর পুরস্কার আদায় করিলে। বাজেদার-ঢুলি যে কত স্থান হইতে কতদল আসিতেছে, তাহার আর সংখ্যা নাই। কাহাকেও কোন বিষয়ের জ্ঞান 'না' বলা না হয়, ইহাই যেন কৰ্ম্মকর্তার ইচ্ছা। সুতরাং যে যেখানে ছিল, এবং যাহার যে বিষয়ের বতদূর বিদ্যা বা কেরামৎ ছিল, সে সেই বিষয় দেখাইয়া পুরস্কৃত হইবার আশায়, বিনা আহ্বানে, ছাতিন গাঁয়ে আত্মারামের এলাকায় আসিয়া সমবেত হইতে লাগিল।

একদিকে এই ব্যাপার ;—অন্যদিকের ব্যাপার আরও গুরুতর।—ভোজ্য-আয়োজনের কথাই বলি। আত্মারামের ৮ পূজার বাড়ীর পশ্চাতে—একটা খুব বড় কর্দা জায়গা—বিশ পঁচিশ বিঘা ভূমি এককালে ঘেরিয়া ফেলা হইয়াছে। সেই জায়গায় এক প্রকাণ্ড খোলার ঘর তৈয়ারী হইয়াছে। সেই খোলার ঘরে ছোট বড় অসংখ্য কুঠরী। প্রত্যেক কুঠরীতে ভিন্ন ভিন্ন দ্রব্য, রাণীকৃত—পর্বতপ্রমাণ সজ্জিত হইয়াছে। যে কুঠরীতে ময়দা আছে, তাহাতে কেবল ময়দাই আছে,—বস্তার

উপর বস্তা,—একেবারে আড়কাঠ ঠেকিয়াছে । যে কুঠরীতে দি আছে, তাহা কেবল ঘি়ের মটকীতেই বোঝাই—পা গলাই-বার যো নাই । এইরূপ গুড়ের কুঠরী,—গুড়ের মেটেয় পরিপূর্ণ—মাছি ভন্ ভন্ করিতেছে । আর চালডাল তেল-নুন চিনি-মসলা তরী-তরকারী—এ সব কুঠরীতে ত তিলধারণেরও স্থান নাই,—সে এক বিচিত্র ব্যাপার । প্রত্যেক কুঠরীর গায়ে এক এক ফর্দ কাগজ আঁটা ;—কাগজে লেখা—অমুক দ্রব্যের কুঠরী । এত যে বিরাট আয়োজন,—এত যে অসংখ্য দ্রব্যের সমাবেশ, তা এতটুকুও বিগৃহ্ণন-ভাব নাই ;—কোন বিষয়ে একটুও উলট-পালট হইবার যো নাই । প্রত্যেক কুঠরী—এক এক ভাণ্ডারীর জিন্মা । প্রত্যেক ভাণ্ডারী এক এক জিনিসের হিসাব-নিকাশের দায়ী । সকলের উপর এক সরকার আছে,—সে-ই মধ্যো মধ্যো এ-কুঠরী—ও-কুঠরী দেখিয়া বেড়াইতেছে,—কোন জিনিস কত আছে, বা কি কম পড়িতে পারে ।

শতাধিক পাচক ব্রাহ্মণ ও সুদক্ষ ময়রা—ভিয়ান্-কার্যে নিযুক্ত । দিন থাকিতে পৰ্ব্বতপ্রমাণ মিষ্টান্ন—খাজা-গজা-রস-গোল্লা,—পানভূয়া-বোদে-জিলিপি,—মিহিদানা-মতিচূর-মাল্পো,—সরপুরিয়া-সরভাজা-সন্দেশ প্রস্তুত হইতে লাগিল । বড় জাঁকের বিবাহ,—ভাবী রাজলক্ষ্মীর বিবাহ ; সুতরাং মিষ্টানের যে ছড়াছড়ি হইবে, তাহা আর বেশী কথা কি ? বিশেষ, বর ও বরযাত্রী হইতে কণ্ঠাযাত্রী ও কান্দালীকুল পর্য্যন্ত সমানভাবে, সমান পর্যায়ে পরিতোষ পূৰ্ব্বক ভোজন করে, ইহা কন্মকর্তার ঐকান্তিক সাধ । তাই মিষ্টান্ন আয়োজনের আর অবধি রহিল না । আশ্চর্য্য ভাবিলেন,—



“কেন, কাঙ্গালীর রসনা কি নিমন্ত্রিত সম্ভ্রান্ত ব্যক্তিগণের রসনা হইতে ভিন্ন? জীবনে তাহারা একদিন পেট পূরিয়া ভাল সামগ্রী খায়, ইহা কি বিধাতার ইচ্ছা নয়? বাহা ধনী ও মানিগণ প্রায় প্রতিদিন ইচ্ছামাত্রেই আহা করেন, কাঙ্গালী-ভিখারীকে তাহাদের দুঃখদৈন্যময় সমগ্র জীবনের মধ্যে একদিন সেইরূপ খাওয়াইলে,—অবস্থাপন্ন ভাগ্যবানের কি অপমান হয়? নিমন্ত্রিতের পাতে উৎকৃষ্ট ভোজ্য বা মিষ্টান্ন পড়িয়া থাকিলেও, কৰ্ম্মকর্তার ইচ্ছানুসারে পরিবেষ্টা তাহাকে সাধিয়া সাধিয়া সেই সব জিনিস দেন;—আর কাঙ্গালীকুলকে কদর্য্য ডাল-ভাত বা সামান্য চিড়া-ঠে দিয়াই, শৃগালকুকুরের গায়, ঘৃণা ও অশ্রদ্ধাভরে দূর দূর করিয়া তাড়াইয়া দেয়। কখন বা তাহাদের অঙ্গে বেত্রাঘাত—এমন কি পদাঘাত পর্য্যন্তও হইয়া থাকে। আমার প্রাণাধিকা ভবানীর বিবাহে আমি এ নিষ্ঠুর প্রথা উঠাইব;—নিমন্ত্রিত অনিমন্ত্রিত, কাঙ্গালী ভিখারী সকলকে সমানভাবে খাওয়াইব। মা-জগদম্বা কি আমার এ সাধ পূরাইবেন না? বিশেষ ভবানী নিজে কাঙ্গাল-গরীবকে প্রাণের সমান ভালবাসে; তার বিবাহে, তার ভালবাসার জনকে, আদর করিয়া খাওয়াইব না?”

তাই এই পৰ্ব্বতপ্রমাণ খাণ্ড-সামগ্রীর আয়োজন;—তাই তাহার পর্য্যবেক্ষণে এই সুন্দর বিধি-ব্যবস্থা।

গোপকুল ঝাঁকে ঝাঁকে দুগ্ধ-দধি-ছানা-ক্ষীর লইয়া আসিতে লাগিল। বিশ পঁচিশটা বড় বড় দীঘিতে বড় বড় মাছ ‘নাকাল’ দিয়া রাখা হইল। বস্তা বস্তা কলা-পাত ওড়িয়া পুঁছিল। লুচির উনানে মণে মণে লুচি-ভাজার সুরু হইল। ভিয়ানশালা



এক অপূর্ব শোভা ধারণ করিল । আর দিন নাই,—শুভ বিবাহ সম্মুখবর্তী । -

এদিকে আয়ারামের অন্তঃপুর সুন্দরীমণ্ডলে পরিপূর্ণ । নিকট-কুটুম্ব, দূর-কুটুম্ব, কুটুম্বের কুটুম্ব, তম্ব কুটুম্ব ;—মামার-শালার পিস্তুতো ভায়ের পত্নী,—তদীয়া গুরু-পত্নী ; সইয়ের-বোয়ের বকুল-কুল ; ববুল-ফুলের মালতী ; মালতীর গোলাপ ; গোলাপের গন্ধরাজ ; গন্ধরাজের দ্যাখন-হাসি ; দ্যাখন-হাসির মকর ; মকরের বেহান ; বেহানের বোন-কি ; বোন-কির বিধবা ভাসুর-কণ্ঠা ; বিধবা ভাসুর-কণ্ঠার ভিক্ষাপুলের পত্নী ; সেই ভিক্ষাপুলের পত্নীর একটি আইবুড় - কুলীনের ঘরের ডাগর বোন ;—এইরূপ তম্বার তম্বা—শতাধিক সুন্দরীতে সেই বহু পুরী পরিপূর্ণ । কোন সুন্দরী ব্যাসনে গা ঘসিতেছেন ; কোন সুন্দরী পান খাইয়া দর্পণে লাল-ঠোঁট দেখিতেছেন ; কোন সুন্দরী পারে আলতা পরিতেছেন ;—আর কোন সুন্দরী বা মুখ ভেঙ্গাইয়া অশান্ত ছেলে ঠেঙ্গাইতেছেন । কোথাও খোস্গল্প, কোথাও রঙ্গরস-রসিকতা,—কোথাও বা উচ্চ হাসির রোল । কোথাও দেখিবে, কোন ঐশ্বর্যগর্ভিতা যুবতী, গায়ে এক-গা গহনা পরিয়া, মিহি কাপড়ের বাহার দিয়া, আপন ঐশ্বর্য গরিমা দেখাইবার উদ্দেশে, প্রয়োজনে অপ্রয়োজনে, এস্থান হইতে ও-স্থানে,—ও-স্থান হইতে সে-স্থানে, গজেন্দ্রগমনে বেড়াইয়া বেড়াইতেছেন । তাঁহার সর্বান্তে আতরের গন্ধ ; বুড়া-আঙ্গুল বাদে হাতের চার আঙ্গুলে চার হীরার আংটি ;—মধ্যে মধ্যে যেন কি দুর্গন্ধ পাইয়া এক একবার নাকে হাত দিতেছেন ;—আর সেই সুযোগে অঙ্গুলিহ অঙ্গুরীয় সকলের দৃষ্টিপথে পতিত হইতেছে ;—

তাহার উজ্জ্বল আভা সকলের মনোযোগ আকর্ষণ করিতেছে । একজন অর্ধবয়সী পরিচারিকা, একটি কারুকার্য-খচিত সুবর্ণ-মণ্ডিত পানের ডিপা লইয়া তাঁহার পশ্চাৎ পশ্চাৎ ফিরিতেছে । যুবতীর দৃষ্টি, যেন এ ধরাধামে থাকিয়াও নাই । মাটিতে দাঁড়াইয়া থাকিলেও মনে হয় না যে, তাঁহার পা ভূমি স্পর্শ করিয়া আছে ।—এমনিভাবে কোথাও বা ত্রৈশ্বর্গ্যের আদিক্য প্রদর্শন,—আর কোথাও বা তার তীর সমালোচনা ।—“ওরে বাপ্‌রে ! ছ-আনী জমীদারীর ত্রৈশ্বর্গ্য এত ! দশ-আনী হলে ত দেখ্‌চি হাতে মাথা কাট্‌ত ।” “সত্যি ব'লেছিস ভাই,—ঠেকারে যেন মাটিতে পা পড়ে না ।—তবু যদি গায়ের রংটা আমাদের রঙ্গিনীর মত হ'তো !” “তা যদি ব'লে, ত শুধু গায়ের রংটা কেন,—কপাল একটু উঁচু, চোখের কোল একটু বসা, ভুরু তেমন জোড়া নয়, নীচের ঠোঁটটা একটু পুরু,—ভালটা আবার কোন্ জায়গায় ?” আর একজন বলিলেন,—“আর গায়ের গহনা—ভাই বা এমনি কি ? আমার বড় বোনুঝির এর চেয়েও ভাল বাউটা-সুটের গহনা আছে । এমন জানলে তাকে শ্বশুর-বাড়ী থেকে আন'তেম ।” এইরূপ, আবার কোথাও দেখিবে, সারিগাথা সম্ভবতঃ সুন্দরীবৃন্দ মাথার চুল এলাইয়া, চুলের দড়ী লইয়া খোপা বাঁধিতে আরম্ভ করিয়াছেন । খোপা বাঁধিতে বাঁধিতে কত হাসি, কত গল্প, কত শ্লোক আবৃত্তি । মধ্যে মধ্যে এক একটা হাসির কথা উঠে,—আর সেই বিস্তৃত কক্ষ ধ্বনিত হয় । হাসিতে হাসিতে, এ উহার ঘাড়ে, সে তাহার ঘাড়ে পড়িয়া যায়—অর্ধ-বিউনি চুল সর্ব্বাঙ্গে এলাইয়া পড়ে ;—পুনরায় চুলবাঁধা আরম্ভ হয় । এইরূপ কেশবিষ্ঠাস, বেশবিষ্ঠাস,

খিড়কীর ঘাটে গা-ধোয়া, চর্ক-চুষা-লেখ-পেয়রূপে উপাদেয়  
আহার,—গৌরীর বিবাহে সুন্দরীবৃন্দের সহিত পুরা যেন হাসিতে  
লাগিল ।

অন্দের শোভা যেরূপ, সদরের শোভাও আর এক অংশে,  
এতদনুরূপ । দেশ দেশান্তর হইতে নিমন্ত্রিত ব্রাহ্মণপণ্ডিত ও  
অধ্যাপক-মণ্ডলী বিদায় লইতে আসিয়াছেন ; দূরদেশস্থ কুটম্ব  
নিমন্ত্রিতগণ ও দূর-সম্পর্কীয় জামাতৃগণ চারিদিকে বাহার দিয়া  
বসিয়াছেন । ইতর ভদ্র সকলেই হৃষ্টমনে চারিদিক্ দেখিয়া  
শুনিয়া বেড়াইতেছে । কেবলই আনন্দসূচক ‘দীপ্ততাং  
ভূজ্যতাং’-রব চলিতেছে । এইরূপ সদরবাড়ী, দুর্গাবাড়ী,  
অন্নপূর্ণার বাড়ী, দেবশালা, অতিথিশালা, টোল, চতুপাঠী—  
সর্বত্রই লোকারণ্য । লোকের সেই কল্কলা ও হল্হলা ভাবে,  
যেন সজীব ও মূর্ত্তিমান্ আনন্দ বিরাজ করিতেছে । আনন্দের  
হাটে সকলেই যেন আনন্দ লুটিতেছে ।

সেই একদিন, আর এই এক দিন । সেই আট বৎসর পূর্বে,  
গৌরীর জন্মদিনে,—মায়ের মহাষ্টমী তিথিতে,—উৎসবের আসরে  
সেই এক আনন্দের হাট বসিয়াছিল ;—আর আজ গৌরীর  
শুভ বিবাহ-বাসরে সেই আনন্দোৎসব জমাট বাঁধিতে চলিল ।

মধুমাস । মধুর বসন্ত সমাগমে প্রকৃতি নবসাজে সজ্জিত  
হইয়াছে । বৃক্ষে বৃক্ষে নব পত্রোদগম ; গোঠে মাঠে নব  
তৃণাকুর ; চারিদিকে আশ্রমুকুল-গন্ধ ; পশু-পক্ষী আনন্দে  
উৎফুল্ল ; কোকিলের কুহস্বরে ও পাপিয়া-দোয়েলের মধুর তানে  
দিক্ পূর্ণ ; শীতের সে কম্পন ও জড়সড় ভাব আর নাই ;  
প্রাণ-সঞ্জীবন চিত্ত-বিমোহন মধুর-মলয়-হাওয়ার—জীবকুল

সজীবিত ও আনন্দময় ; কৃষককুল বর্ষব্যাপী পরিশ্রমে আত্ম-শোণিততুল্য শস্য গোলাজাত করিয়া, হাসিমুখে ও মনের সুখে অবস্থিত ;—কাহারো কোন কষ্ট নাই ;—এমান শান্তিময় পবিএ সময়ে,—শুভ ফাল্গুনের সন্ধিস্থলে,—মানবের আশা, উৎসাহ ও আনন্দের পূর্ণমিলন-কালে,—বারেন্দ্র-কুলোজ্জনা, হিন্দু-কুললক্ষ্মী, দেবীকৃপিনী গৌরীর শুভ বিবাহ ।

বিবাহের আর দুই দিন বাকী । ছাতিন গ্রাম যেন নন্দন-কানন হইয়াছে ।

আনন্দময়ী মধু-বাণিনী । মধুর মলয় বায়ু বিবু বিবু বহিতেছে । মধুর পুষ্প-গন্ধ দিক আমোদিত করিতেছে । মধুর আলাপ-আপ্যায়নে পরস্পর পরস্পরকে প্রীতি-সূত্রে বাধিতেছে । চারিদিকে আলো আর হাসি,—গান আর বাণী । বাণীতে ঝিঁঝিট, খাঘাজ, চৌড়ী, বেহাগ আলাপ চলিতেছে,—চারিদিকে যেন সুধা-বৃষ্টি হইতেছে ।

বরযাত্রীদের বাসা-বাটাতে শত শত আলোকদাম জ্বলিতেছে ; পথের দুই পাশেও তারা-হারের মত আলোকমালা হাসিতেছে । তবে এ আলোক সম্পূর্ণ আলোক নহে,—এ আলোক বিবাহের আলোকের মহলা বা নমুনা মাত্র । কণ্ঠা-কর্তার বাটাতেও এ নমুনা প্রদর্শিত হইয়াছে । আলোকে সদর অন্দর—দুই-ই হাসিতেছে ।

কিন্তু যাহার আলোকে সবাই হাসিতেছে, সবাই গাহিতেছে,—সেই আত্মারাম চৌধুরী আজ এত নিরানন্দ ও বিষণ্ণ কেন ? জলস্রোতের মত অজস্র অর্থ ব্যয় করিয়া, যিনি এই মহা সমারোহ ব্যাপারের আয়োজন করিলেন, তিনি আজ অমন

বিষণ-গম্ভীর-ভাবে অবস্থিত কেন ? শাস্ত্রজ্ঞ ব্রাহ্মণ-পণ্ডিতগণকে লইয়া যিনি শাস্ত্রের নিগূঢ় অর্থ উপলব্ধি করিতে ভালবাসেন,— আজ তিনি, সেই দেশদেশান্তর-আগত শত শত ব্রাহ্মণ-পণ্ডিতে পরিবেষ্টিত থাকিয়াও, শাস্ত্রীয় বিচারে উদাসীন কেন ? কর্মচারিবৃন্দ, কেহ কোন কথা জানিতে চাহিলেও, আত্মারাম ভাল করিয়া উত্তর দিতেছেন না,—পরন্তু যেন একটু বিরক্তির ভাবও দেখাইতেছেন ।—কেন ? এ কারণ কি ?

“কণ্ঠাদায় বড় গুরুতর দায় ; শুভকার্য্য নির্ব্বিঘ্নে সুসম্পন্ন না হইলে বিশ্বাস নাই”—এই ভাবিয়া কি আত্মারাম আপন দায়িত্বের গুরুত্ব উপলব্ধি করিয়া, আজ এমন উন্নয়ন আছেন ?

না ।—তাঁহার মনে জাগিতেছে, সেই গৌরীর জন্ম,—সেই মায়ের মহাষ্টমী পূজা,—সেই বাড়ীতে সহস্র সহস্র লোক-সমাবেশ,—সেই উৎসবের হাটে আর এক অভিনব উৎসবের জমাট ;—তার পর সেই জ্যোতির্বিদের গণনা, সেই কোষ্ঠী প্রণয়ন, সেই কোষ্ঠীফল দেখিয়া আশুনে কোষ্ঠি ভঙ্গীভূতকরণ ;—তার পর সেই কণ্ঠার ‘বিধবা’-কথার অর্থ উপলব্ধি করিবার জিদ,—তাঁহার মুখ দিয়া ঐ প্রাণঘাতিনী বাণীর নিষ্ঠুর প্রশ্ন,—সেই সহসা গ্রহের দীপ নির্বাণ,—সেই গৃহিণীর হস্তস্থিত কঙ্কণঘাতে আকস্মিক রক্তপাত,—এইরূপ শত দিনের শতরূপ চিন্তা আত্মারামের মনোমধ্যে উদ্ভিত হইয়াছে,—তাই তিনি অন্তরের অন্তরে গম্ভীর ভাবনায় আচ্ছন্ন ;—ভাবনা-সমুদ্রের তলদেশে যেন তিনি ডুবিয়া গিয়াছেন । মনের ভাব মুখে প্রকাশ পাইয়াছে,—তাই আত্মারাম—আনন্দরহিত গম্ভীর-বিষণ-ভাবে দর্শকের চক্ষে প্রতীয়মান হইতেছেন ।

মনের এ অবস্থায় আর অধিকক্ষণ সদরে অবস্থিতি করা উচিত নয় বিবেচনা করিয়া, আত্মারাম ধীরে ধীরে অন্দরাভিমুখে চলিলেন । তখন রাত্রিও অধিক হইয়াছে ;—অন্দরের আনন্দ-কোলাহল অনেকটা মন্দীভূত হইয়াছে ।

ধীরে ধীরে আত্মারাম এক নিৰ্জনকক্ষে প্রবিষ্ট হইলেন ;—ধীরে ধীরে সেই কক্ষের দ্বারও রুদ্ধ করিয়া দিলেন ।

আত্মারাম গৃহের এক কোণে বসিয়া আকাশ-পাতাল ভাবিতে লাগিলেন ।—ভাবনার উদ্বেগ আরও বৃদ্ধি পাইল । কি ভাবিয়া আত্মারাম অন্তঃপুর হইতে বহির্গত হইলেন । কোঁচার খুঁটটিমাত্র গায়ে দিয়া, শূন্যপদে, মায়ের মন্দিরাভিমুখে চলিলেন ।

তখন অন্নপূর্ণার আরতি ও শীতল আদি সব হইয়া গিয়াছে । একটিমাত্র আলোক মার মন্দির মধ্যে মিট-মিট করিয়া জ্বলিতেছে । মন্দির জনশূন্য হইয়াছে । পূজকব্রাহ্মণ মন্দির-দ্বার রুদ্ধ করিবার উপক্রম করিতেছিলেন,—আত্মারাম গিয়া উপস্থিত হইলেন । বলিলেন, “ঠাকুর, তুমি যাও,—আজ আমি মার মন্দির অবরুদ্ধ করিব ।”

পূজক ।—আপনি ?

আত্মারাম ।—হাঁ, আমি ।—তুমি যাও,—আমার একটু প্রয়োজন আছে ।

পূজক ব্রাহ্মণ আর দ্বিকল্পিত করিতে সাহসী হইলেন না ;—ধীরে ধীরে স্বস্থানে প্রস্থান করিলেন ।

আত্মারাম মন্দির মধ্যে প্রবিষ্ট হইয়া, ভিতর হইতে মন্দির-দ্বার রুদ্ধ করিলেন । পরে প্রতিমা-সন্মুখে নতজানু হইয়া, কৃষ্ণাঞ্জলিপুটে, গদগদকণ্ঠে বলিতে লাগিলেন,—

“মাগো, অন্তর্যামিনি ! আজ যাহা বলিতে আসিয়াছি, তাহা তুমি অবগত আছ। নূতন কথা কিছু নয় মা,—আজ আট বৎসর ধরিয়া যে কান্না তোমার চরণে কাঁদিয়া আসিতেছি, আজিও সেই কান্না কাঁদিব। কাঁদিয়া, এ পার্থিব কামনা, জনের মত বিসর্জন দিব।—মা, ভাবনীর আমার কি করিলে?—আর দুই দিন পরে তাহার বিবাহ;—পুরবাসী আনন্দনীরে নিমগ্ন; দেশ ছাড়িয়া আনন্দোৎসব প্রবাহিত; অগী প্রত্যগী—আহুত অনাহুত প্রাণ তরিয়া ভবানীকে আশীর্বাদ করিতেছে;—মা, এত আশীর্বাদ, এত শান্তি-স্বস্তয়ন, এত ব্রাহ্মণের পদবুলি,—সকলই কি পণ্ড হইবে? জগজ্জননি ! দয়া করিবে না কি?—মুখ তুলিয়া চাহিবে না কি? মাগো, কায়মনঃপ্রাণে এতদিন তোমার পূজা করিয়া আসিয়াছি;—তাহার কিছু ফল ফলিবে না কি? দয়াময়ি, দয়া কর ! শিবে, সর্বার্থদাতাকে, প্রসন্ন হও,—আমার ভবানীর মঙ্গল কর;—তার বাল-বৈধব্য হ’তে তাকে রক্ষা কর !”

“তাহাই হইবে,—ভবানীর বাল-বৈধব্য ঘটিবে না।”

জীমুতমন্ত্রস্বরে, সমগ্র মন্দির প্রতিধ্বনিত করিয়া, আশ্চার্যের কর্ণকুহরে এই মাতৃবাণী প্রবেশ করিল;—আশ্চার্য চমকিত হইলেন। তাহার দেহ কণ্টকিত ও সর্বশরীর রোমাঞ্চিত হইয়া উঠিল।

বিস্ময়ে, ভয়ে, মোহে আশ্চার্য পুনরায় বলিলেন,—“মা, মা, যদি দয়া করিলে, তবে তাহার নিষ্ঠুর বৈধব্যযোগ এককালে বিদূরিত করিয়া দাও,—সে যেন স্বামীর পায়ে মাথা রাখিয়া মরিতে পায়।”



সহস্রা মন্দিরের আলোক নির্দীপিত হইল। মন্দির-অভ্যন্তর যেন অমাবস্যার সূচীভেদে নিবিড় অন্ধকারে আচ্ছন্ন হইল। মন্দির মধ্যে হো-হো-হো-রবে ঘোর অটুহাস্য উঠিল। যেন শত যোগিনী এককালে ভীষণ অটুহাস্যে আত্মারামকে গ্রাস করিতে আসিল।

আত্মারাম ভয়ে আড়ষ্ট ও অভিভূত হইয়া পড়িলেও, একে-বারে সঙ্কল্পচ্যুত হইলেন না :- কাপিতে কাপিতে অর্দ্ধশুটঘরে ঝাঁপলেন,—“মা, চণ্ডিকে ! যত ভয় বা বিভীষিকা দেখাও,—আমি এখান হইতে উঠিব না। তোমার পায়ে মাথা রাখিয়া, আমি ইহলোক হইতে বিদায়-গ্রহণ করিব।”

আত্মারাম মুখ গুঁজিয়া, মায়ের পাদপদ্ম জাঁকড়িয়া ধরিয়া, পড়িয়া রহিলেন। মুহূর্ত্তকাল এই ভাবে অতিবাহিত হইল।

পরমুহূর্ত্তে মন্দিরমধ্যে অপূর্ণ আলোক-রশ্মি বিকসিত হইল। শান্তিময় স্নিগ্ধ উষার কনক-রেখা যে ভাবে পূর্ণগগনে পরিদৃষ্ট হয় ; উদীয়মান বাল-রবির ঘোর রক্তাক্ত কলেবর, পবিত্র ব্রাহ্ম মুহূর্ত্তে, যে ভাবে প্রাচী-গগন আলোকিত করে ;—মায়ের মন্দিরমধ্যে সহস্রা সেই ভাবের অপূর্ণ আলোক-রশ্মি বিকসিত হইল। বরাভয়দায়িনী জননী অতি মধুর কোমল কণ্ঠে ভক্তকে কহিলেন,—

“ভয় নাই বাঁছা, চক্ষু মেলিয়া দেখ,—তোমার মোহ অপসারিত হইবে। দেখ দেখি, তোমার ভবানী কে,—আর আমি কে ? আমিই কারাময়ী হইয়া তোমার আত্মজারূপে তোমার গৃহে অবস্থিত। জীবে স্বহস্তে পরিতোষ পূর্ণক অন্তদান করিব, বড় সাধ। সেই সাধ খিটাইবার জন্ত, আমি



ভবানীরূপে অবনীতে অবতীর্ণা ।—আমার লীলায় আমি বিধবা হইব ;—সংসারের সকল দুঃখ-শোক ভোগ করিব,—তোমার অশুশোচনা করার কোন ফল নাই ।”

আত্মারাম চক্ষু উন্মীলন করিয়া কৃতাজলিপুটে চাহিয়া রহিলেন ; দেখিলেন—মা-অন্নপূর্ণা সত্যসত্যই তাঁহার কণ্ঠারূপে আবিভূতা । দেখিলেন, মন্দির মধ্যে এককালে যেন সহস্র চন্দ্রের উদয় হইয়াছে ।—কি নিষ্ক অপরূপ সে রশ্মি ! স্বর্গীয় সুগন্ধে মন্দির ভরিয়া গিয়াছে। আত্মারাম যেন কেবলমাত্র আত্মাতে অবস্থিতি করিয়া, এই অদ্ভুত দেবী-লীলা দেখিতে লাগিলেন । তাঁহার বাক্শক্তি লোপ পাইয়াছে,—তিনি যেন একেবারে মূক হইয়া গিয়াছেন ।

ভক্তকে তদবস্থায় দেখিয়া, জননী পুনরায় কহিলেন,—

“যাও বৎস, গৃহে যাও,—তুমি যা প্রার্থনা করিয়াছিলে, তাহা হইয়াছে, - তোমার ভবানী বাল-বিধবা হইবে না । জীবের দৈব-বল অপেক্ষা আর উচ্চ-বল নাই,—এ কথায় স্থির-বিশ্বাস রাখিও । তুমি একান্ত মনে দৈব-আরাধনা করিয়াছিলে, তাই তোমার কণ্ঠার বাল-বৈধব্য,—বাসর-বৈধব্য বিদূরিত হইল ;—কিন্তু প্রাক্তন-ফল এককালে খণ্ডিত হইবার নয়,—তাই তোমার কণ্ঠা যৌবনে বিধবা হইবে। বিধবা হইয়া যোগিনীর ঞ্চার ব্রহ্মচর্য্য-ব্রত পালন করিবে ;—জীবের তাহাতে অশেষ কল্যাণ হইবে ;—জগৎ তাহাতে উচ্চশিক্ষা লাভ করিবে ।—যাও, গৃহে যাও,—আমার বরে তুমি দিব্যজ্ঞান লাভ করিলে । যাও, এখন হইতে তুমি অনাসক্ত কণ্ঠী ও গৃহী হইয়া, দ্বিগুণ উৎসাহে সংসার-ধর্ম পালন কর ।”

সহসা মন্দিরের সেই আলোক-রশ্মি নিক্রান্ত হইয়া গেল ;—মন্দির স্বাভাবিক অন্ধকারে আচ্ছন্ন হইল ।

আত্মারামের কি আর আত্মবোধ আছে ? তিনি আর কি বলিবেন,—কি বলিতে পারেন ? ভাবিয়া দেখিলেন, সকলই দেবী-মায়া,—সকলই সৰ্ব্বনিয়ন্তার ইচ্ছা ।—আত্মবুদ্ধি বা আত্মচেষ্টায় মানুষ কিছু করিতে পারে না । কৈ, আত্মারাম ত মন্দিরে আসিয়া, মায়ের নিকট প্রার্থনা করিবার সময়ও বলিতে পারিলেন না,—‘আমার কণ্ঠকে চিরসধনা করিও ?’ ‘ভবানীর বাল-বৈধব্য ঘটাইও না’—তিনি কেবল এই প্রার্থনাই করিলেন । যেজন্মই হউক, তাহার মুখ দিয়া যে প্রার্থনা বাহির হইয়াছিল, তাহা সফল হইয়াছে । এখন আর সাংসারিক, ‘হিসাবী’ বুদ্ধিতে—‘ভবানী চির-সধবা হউক’—‘এই প্রার্থনা করিলে ভাল হইত’—এরূপ মনে করিলে চলিবে কেন ? এরূপ অঘটন ঘটন বাহা হয়, তাহা একবারই হয়,—দ্বিতীয়বারে বুদ্ধির মারপেঁচ খেলাইয়া তাহা হয় না ;—অন্ততঃ ভক্তির পথে সে নিয়ম খাটে না ।

আত্মারাম ইহা বুঝিলেন । বুঝিলেন,—“মহামায়ার মায়া, মনুষ্যের সাধ্য কি যে, ভেদ করে !—মা! আমার আত্মবুদ্ধির গরিমা, অনেকদিন হইল খাটো হইয়াছে ; যাহা ছিল, আজ তাহাও গেল । এখন সার বুঝলাম,—তোমাতেই শরণ লওয়া জীবের শেষলক্ষ্য । শরণে ও নির্ভরে, তোমারও পূর্ণতৃপ্তি । মা, আর আমায় লক্ষ্যভ্রষ্ট ও বঞ্চিত করিও না ।”

আত্মারাম ধীরে ধীরে মন্দির হইতে নিষ্ক্রান্ত হইয়া, মন্দির-দ্বার রুদ্ধ করিয়া, গৃহে গেলেন ।

রাত্রি প্রায় তৃতীয়প্রহরে, মন্দির বাহিরে, কে গাহিতেছিল,—


( সিক্কু-কাফি—৫৭ । )

( ওমা ) কত খেলা জান তুমি,  
তোমার খেলা কে বুঝতে পারে !  
যে বলে বুঝেছি আমি,  
পদে পদে সেই যা হারে ॥

( আখার ) বন্ধির মুখে দিয়ে যা ছাই,  
ঘুচা ও বহু আপদ বানাই,  
বন্ধি ধ'রে যেই চ'লে যাই,  
পাঁচ ভূতে যা বেঁধে যারে ॥

( আর ) মার খেতে পারি না তারা,  
পারে রাখ মা শিব-দারা,  
ত'য়েছি নে দিশেহারা,  
মুক্তি দে এ কারাগারে ॥





## পঞ্চদশ পরিচ্ছেদ ।

আজ শুভদিন ; আজ গোরীর শুভ বিবাহ । পুরবাসিনী  
রমণীগণ মনের সাধে ক'নে সাজাইতে আসিল ।

যে ক'নে, তাহাকে আর সাজাইতে হয় না ;—প্রকৃতি  
তাহাকে মনের সাধে সাজাইয়া সংসারে পাঠাইয়াছে ।

তবুও ভক্ত প্রতিমা সাজায় । তাহার আপন মনের সাধ ও  
তৃপ্তি অনুসারে, সে, প্রতিমার গায় অলঙ্কার দেয় । চরণ-নখর  
হইতে মাথার কেশ পর্য্যন্ত, যেখানে যেটি যে ভাবে সাজে,  
সেখানে সেটি সেইভাবে দিয়া মনের মত করিয়া সাজায় ।—  
তবুও কিন্তু মনের সাধ মিটে না,—কি-যেন-কি আকাঙ্ক্ষা অতৃপ্ত  
রহিয়া যায় । ভক্তের চোখে তখন জল আসে । সেই রুদ্ধজলে  
অন্তরের অন্তরে, ভক্ত তখন আপন অব্যক্ত মনোবাসনা পরিতৃপ্ত  
করিয়া থাকে । ভক্তের বাসনা—ভাবরূপ অব্যক্ত ।

‘ভাবরূপ অব্যক্ত’—সে কেমন ?—ভক্ত নিজেই তাহা মনে  
মনে উপলব্ধি করিতে পারে,—মুখ ফুটিয়া অপরকে বলিতে বা  
বুঝাইতে পারে না ।

প্রতিমা-সেবক প্রকৃত ভক্ত, প্রকৃতই যাকে সগ্যক্রমে

সাজাইয়াও পরিতৃপ্ত হইতে পারে না । আর যে কি চাই,—  
কোন অলঙ্কারের যে আর প্রয়োজন,—মুখ কুটিয়া সে কথা সে  
কাহাকে বুঝাইতেও পারে না, —নিজেও বুঝিয়া উঠিতে পারে  
না ।—তখন কান্না ভিন্ন আর গতি কি ?

ভক্তের কথা দূরে থাক্—আমরা যে ঘোর বিধয়াসক্ত,—  
সংসারের কুমি-কীট ;—আমরাও কি অন্তরের প্রকৃত অভাব—  
ঠিক সুনিশ্চিতরূপে কাহাকে বলিয়া বুঝাইতে পারি ? হলপ  
করিয়া কি কেহ বলিতে পারেন, স্বয়ং বিধাতাপুরুষ তাঁহার সম্মুখে  
আসিয়া বরদানে উদ্বৃত্ত হইলে, তিনি জীবনের ঠিক অভাবটি  
সেই কল্পতরুর নিকট প্রকাশ করিয়া ঈশ্বিত ফললাভে কৃতার্থ  
হইতে পারিবেন ? না, তা হয় না,—বাসনা অনন্ত ;—সেই  
অনন্ত বাসনা হইতেই আমরা অনন্ত অভাবের সৃষ্টি করিয়া থাকি ।  
মূলে, জীব বড় দুঃখী ।

সোনামুখী গৌরী-প্রতিমাকে স্বর্ণ ও রত্ন-অলঙ্কারে সাজাইতে,  
পুরবাসিনী রমণীগণ সকলেই আসিল,—সকলেই সযতনে একটু  
আধটু করিয়া সাজ-সজ্জার আয়োজন করিয়া দিল ; কেহ বা  
মুখে দুই একটা পরামর্শ দিয়া, আপন আপন পছন্দের কথা  
বলিয়া যাইতে লাগিল ;—কিন্তু কৈ, কাহারো মনের বাসনা ত  
পূরিল না ? অলঙ্ক-রাগ-রঞ্জিত পদ দু'খানি হইতে মাথার  
কেশাগ্রভাগ পর্যন্ত—মণিমুক্তা-রত্নালঙ্কার দ্বারা সজ্জিত হইল ;—  
কিন্তু তাহাতেই কি সকলের মন উঠিল ? যে প্রকৃত সৌন্দর্য্য  
অনুভবে সক্ষম ও সহৃদয়,—যে গৌরীকে প্রকৃতই ভালবাসে,  
সে এই ক'নে-সজ্জা দেখিয়া সন্তুষ্ট হইতে পারিল না,—তাহার  
মনে হইল,—আবার সব খুলিয়া, সব ধুইয়া-মুছিয়া, নূতন করিয়া

এ প্রতিমা সাজাইয়া দিই ।” এমনই হয়,—এমনি হওয়াই স্বাভাবিক । ক’নে সাজান-কার্যে যে রমণী গ্রামের অধিতীয়া বলিয়া প্রসিদ্ধা, তিনিই অবশ্য আপন পছন্দ ও দশের পরামর্শ লইয়া গৌরীকে সাজাইলেন ;—কিন্তু তিনিও কি সম্পূর্ণরূপে পরিতৃপ্ত হইতে পারিলেন ? না, এমন অবস্থায় কেহ পরিতৃপ্ত হয় না ;—রূপের প্রতিমাকে সাজাইয়া কেহ মনের সাধ মিটাইতে পারে না ।—সেই প্রস্তুতি চম্পকদলতুল্য সুগঠিত কপোলে সুবাসিত চন্দন-তিলক শোভিত হইল ;—সুকুঞ্চিত সুবাসিত ঘনকৃষ্ণ কেশদামে যেন ভ্রমর নৃত্য করিতে লাগিল ;—ক’নের সর্বাঙ্গ দিয়া, রত্ন-অলঙ্কার ভেদ করিয়া, যেন চন্দ্রমা-রশ্মি ফুটিয়া বাহির হইতে লাগিল ;—গৌরী যেন সত্যই গিরিরাজ-সুতা গৌরী-রূপেই সকলের চক্ষে বিরাজ করিল ;—কিন্তু এত যে শোভা, এত যে সৌন্দর্য্য, এত যে সাজ-সজ্জা,—তাঁহা দেখিয়া, প্রকৃত সৌন্দর্য্যধ্যানরতার মন উঠিল কি ?—‘যেন আরো কিছু হইলে ভাল হইত ; যেন আরো কোনরূপে সাজাইলে এ প্রতিমা মানাইত ।’—এই রকম একটা ভাব তাঁহার মনে উদয় হইতে লাগিল ।

এই সৌন্দর্য্যধ্যানরতার মধ্যে সর্বপ্রধানা,—গৌরীর সেই পিসী । যিনি গৌরীকে প্রাণের সমান ভাল বাসেন,—সেই পিসী । যাঁহাকে বিধবা জানিতে পারিয়া, সেই বিধবা-কথার অর্থ উপলব্ধি করিতে, গৌরীর একদিন বড়ই আগ্রহ হইয়াছিল,—সেই সজ্জদয়া মেহ-পরায়ণা পিসী । বিধবা হইলেও, পিসীর সৌন্দর্য্যানুভবশক্তি প্রবলা ছিল । এ সৌন্দর্য্য-বোধ, কুৎসিত পার্থিব-চিন্তা হইতে নহে,—পারমাত্মিক ও পারত্রিক-চিন্তা হইতে এই সৌন্দর্য্যানুভব উদ্ভূত হইয়াছিল ।

সেই পিসী দেখিলেন, এই সজীব প্রতিমার সব সাজ একরূপ সাজান হইয়াছে,—কিন্তু একটি সাজ এখনো বাকী আছে,— প্রতিমার পদে পদ্য নাই !

আত্মবিহ্বল। পিসী, অন্তঃপুরস্থ পুষ্পোদ্যান হইতে দুটি প্রফুল্লিত পদ্য আনিয়া, নির্বিকার চিত্তে, সেই সজীব প্রতিমার পায়ে দিতে গেলেন ।

নিকটে গোরী-জননী জয়দুর্গা দাঁড়াইয়া ছিলেন,—পিসীর এই কার্যে তাঁহার দৃষ্টি পড়িল । তিনি অতি ব্যগ্রতার সহিত পিসীকে বলিয়া উঠিলেন,—“দিদি, ও কর কি,—কর কি ? এতে যে গোরীর অকল্যাণ হ'বে ?”

“এঁয়া, অকল্যাণ হ'বে ? তাই ত, আমি কোথায় পদ্য দিতে, কোথায় দিতে যাচ্ছিলুম ?—মা, পদ্য দুটি হাতে নাও,— দু'হাতে এ দুটি ধ'রে থাক ;—আমি তোমায় দেখি !”

বিধবার দুই চক্ষু বাহিয়া দুই ফোঁটা জল পড়িল । কিন্তু তাঁহার চমক ভাঙ্গিয়াছে ;—তিনি সপ্রতিভ হইয়াছেন । তাঁহার ভক্তিপূর্ণ গলগ্নবাস,—লোকলজ্জাতয়ে তাঁহার আর মাথা নোয়াইতে দিল না,—সেই বাস গলদেশ হইতে খুলিয়া পড়িল ;—তিনি তাহাতে তাঁহার চক্ষু দুটি মুছিলেন ।—গোরী-জননী জয়দুর্গার এ দৃশ্য বেন বড় ভাল লাগিল না ;—তিনি মুখ ফিরাইয়া পশ্চাদ্ধিকে দৃষ্টিক্ষেপ করিলেন ।

বুদ্ধিমতী গোরী এই ভাবটি লক্ষ্য করিল । পিসীর ও মায়ের—দুইজনের বিভিন্ন দুইটি ভাব লক্ষ্য করিল । মনে মনে সে সকলই বুঝিল,—কিন্তু মুখে কিছু বলিল না । বিয়ের ক'নে,—আর কয়দণ্ড পরেই বিবাহ ; এমনত অবস্থায় কোন

কথা বলা উচিত নয় বলিয়া, কিছু বলিল না । বিশেষ, একদিকে মা,—আর দিকে মাতৃস্থানীয়া পিসী ।—এমত অবস্থায় বালিকা কি বলিবে,—কি বলিতে পারে ? তনে পিসীর প্রদত্ত উপহার—সেই দুটি রাঙা পদ্ম পাইয়া যে, সে বড় সন্তুষ্ট হইয়াছে, তাহা পিসীকে অতি কোমল করুণাপূর্ণ মধুবর্ষিনী কথায় জানাইল । বলিল,—

“পিসী মা, আমিও মনে করিতেছিলাম, চুপি-চুপি বাগানে গিয়ে দুটি পদ্ম তুলে আনব । তা তুমি সত্যই আমায় প্রাণের সমান ভালবাস কিনা,—তাই আমার মনের সাধ, তুমি আপন মন দিয়ে বুঝেছ,—আর আমি না চাহিতেই, আমার হাতে ফুল দুটি এনে দিয়েছ ।—এখন দেখ পিসী মা, তোমার কুল হাতে নিয়ে আমি এই দাড়িয়ে আছি ।”

পিসী ।—দেখি মা, তোমায় দেখি ।—হাঁ, তু’ হাতে ঐ দুটি ফুল নিয়ে, অমনি ক’রে দাড়াও,—আমি প্রাণ ভরিয়া তোমায় দেখি ! তোমায় মা, এ মূর্তিতে দেখিতে, আমার বড় ভাল লাগে ।—বউ, তুইও দেখ,—তোমার বড় সাধের গোরীর কি শোভা হ’য়েছে,—দেখ ।

আবার পিসীর চোখ ছন্ ছন্ করিতে লাগিল । সেই ছন্ ছন্ চোখে এক ফোঁটা জল গড়াইয়া আসিল ;—পিসী কৌশলে সেই জল ফোঁটাটি মুছিয়া ফেলিলেন ।

গোরী বলিল,—“পিসী মা, তুমি আমায় বড় ভালবাস কিনা,—তাই অমন ক’রে আমায় দেখ্চ । না ?”

পিসী । তোমায়, আমি ভালবাসি ?—শুধু আমি কেন মা,—পথের পথিকও তোমায় দেখলে ভাল না বেসে থাকতে



পারে না ।—আমরা পিসী-মাসী,—আমরা যে জোয়ার ভাল-বাস্ব,—এ আর বেশী কথা কি ?—এখন যাও মা, ত্রৈ বারান্দায় গিয়ে একটু ব'সো । সমস্ত দিন দাঁড়িয়ে থাকলে ; পা ব্যথা করবে ।

মনে মনে বলিলেন,—“আহা, বাছারে ! তুই আর-জন্মে আমার কে ছিলি, জানি না । সত্য বল্চি, তোকে দেখলে আমার চোখে জল পড়ে । তোর মুখে, কি ত্রৈ মাখানো আছে মা,—যা দেখলে আমি সংসার ভুলি, সম্পর্ক ভুলি,—আমার আপনাকেও আমি ভুলে যাই । জানি না মা, তুই জগতের-মা, উমা কিনা ?—নহিলে, তোর প্রতি আমার মন এমনভাবে টানে কেন ?”

পিসী আবার আপন অঞ্চল দিয়া চোখের জল মুছিলেন । একবার মনে হইল, সেই অঞ্চল দিয়া, মনের সাথে গৌরীর রান্ধা পা ছ'খানি মুছাইয়া দেন,—পরক্ষণে চমক ভাঙ্গিয়া যাওয়ায় ভাবিলেন,—“না, ক্রমেই বড় বাড়াবাড়ি হ'য়ে প'ড়্চে দেখ্ছি ;—মনের এমন অবস্থায় আমার আর এখানে থাকা উচিত নয় ।”

পিসী, গৃহ-কার্য্য-ব্যপদেশে, কক্ষান্তরে প্রবেশ করিলেন ।

গৌরী ভাবিল,—“এই পিসী, এ আমার আপনার হ'তেও আপনার ।—আমায় বড় ভালবাসে ।—প্রাণের সমান দেখে ।—ইহার ভাল করিতে হইবে । পিসীই আমার জীবনে প্রথমে সুখদুঃখের তরঙ্গ উঠাইয়াছিলেন ।—পিসী বিধবা ; বিধবার বড় কষ্ট ;—আহা ! সব থাকিয়াও কেউ নাই ।—হাঁ, বড় কষ্ট ।—এই পিসী আমায় আপনার মত দেখিয়াছে ;—আমিও

পিসীকে, ঠিক পিসীর মত হ'য়ে দেখিব।—কিন্তু সে দিনের বিলম্ব আছে।--দূর হোক, আজ আর ও-সব কথা ভাবিব না।—আজ নাকি ও-সব কথা ভাবতেও নেই। বিশেষ, মা জানতে পারলে রাগ ক'রবেন ; পিসীকেও হয়ত, ব্যথা দেবেন।—এঁয়া! আমার জন্তে পিসী ব্যথা পাবেন? -না, তা হবে না,—মাকে ধুসী ক'রতে হবে।”

এমন সময় গৃহস্বামী আশ্চার্য্য অস্তুরে আসিলেন। পুরনারীগণ কণ্ঠকে কিরূপ সাঙাইলেন, দেখিতে আসিলেন। তাঁহাকে দেখিয়া স্ত্রীলোকগণ একটু জড়সড় হইলেন, তৎক্ষণাৎ সে স্থান ত্যাগ করিয়া আপন আপন কার্য্যে চলিয়া গেলেন।

পিতাকে দেখিয়া গৌরী ভূমিষ্ঠ হইয়া প্রণাম করিল। আশ্চার্য্য কন্যার প্রণাম লইবেন কি,—অস্তুরের অস্তুরে, অজ্ঞাতসারে, নিজেই সেই রূপের প্রতিমাকে প্রণাম করিয়া ফেলিলেন। তাঁহার হৃদয়-পদ্মের সহস্রদলে জাগিয়া উঠিল,—যেন তাঁহার চিরারাধ্যা দেবী—চিন্ময়ী—কুলকুণ্ডলিনী-মূর্ত্তি!—যুহূর্ত্তকাল আশ্চার্য্য অনিমেষ নয়নে চাহিয়া রহিলেন।

এমন সময় গৌরী-জননী—রত্নগর্ভা জয়দুর্গা সেখানে আসিলেন। স্বামীকে তদবস্থায় দাঁড়াইয়া থাকিতে দেখিয়া, ঈষৎ হাসি হাসি মুখে বলিলেন,—“মেয়ের মুখের পানে চাহিয়া, দাঁড়াইয়া, ও দেখিতেছ কি?”

আশ্চার্য্য অতি ধীরে একটি নিখাস ফেলিয়া মনে মনে বলিলেন,—“কি দেখিতেছি, তাহা কেমন করিয়া তোমায় বুঝাইব? যাহা দেখিলে চোখে রূপ ধ'রে না,—রূপ উছলিয়া পড়ে,—আমি সেই অপরূপ রূপ দেখিতেছি! হায় মা তারা!

এ রূপেরও আবার—না, ও কথা আর ভাবিব না।—জননি, ক্ষমা কর ।”

প্রকাণ্ডে বলিলেন,—“দেখিতেছি, যাকে কেমন মানাইয়াছে । তা মানায়েছে বেশ ।—যিনি ক’নে সাজায়েছেন, তাঁর সাজানোর বাহাদুরী আছে ।”

জয়দুর্গা । ঠিক মা-গৌরীর মত আমার সোণার গৌরীকে মানিয়েছে কি না বল ?

আত্মারাম । বলিয়াছি ত, ক’নে সাজানোর বাহাদুরী আছে ।—কিন্তু মা ভবানী কাল থেকে আমাদের ‘পর’ হ’য়ে যাবে ।

গৌরী । সে কি বাবা, আমি তোমাদের পর হবো ?—তা হ’লে আর আমার আপনার হ’বে কে ?

আত্মারাম । মারে, বিয়ের আগে, সকল মেয়েই অমন ব’লে থাকে,—তারপর বাপ-মায়ের কথা বড়-একটা মনে রাখে না ।

গৌরী । তা বাবা, আর সকলের সঙ্গে আমার কথা ধরো ?—আমি যে বাবা তোমা ছাড়া একদণ্ডও থাকি না ?

জননী জয়দুর্গা এবার হাসি-হাসি মুখে, কণ্ঠার চিবুক স্পর্শ করিয়া, মেহপরিপ্লুতস্বরে বলিলেন, “এর পর থাকবে মা,—এর পর থাকবে । তা তাই থেকে মা,—তাই থেকে ।—জন্ম-জন্ম মাথায় সিঁদূর দিয়ে স্বামীর-ঘরেই থেকে ।”

মুহূর্তের অন্ত গৌরী মাথাটি একটু হেঁট করিয়া, চক্ষু দু’টি ভূমিপানে গুস্ত করিল ।

পিতা বলিলেন, “ভবানী, তোমার গঙ্গাজলের বাড়ী থেকে কি তত্ত্ব এয়েছে, আমায় দেখালে না ?”

গৌরী । তুমি দেখনি বাবা ? হাঁ মা, বাবাকে তুমি আমার ‘গঙ্গাজলের’ তত্ত্ব দেখাও নি ?

জয়হুর্গা ।—তব্বের অন্য উপকরণ উনি সব দেখেছেন,— কেবল তোমার গঙ্গাজলের নিজের তৈয়েরী মাটির খেলনা দেখেন নি ।—তুমি, তা আসবামাত্র শোবার ঘরে নিয়ে গেছিলে ।

গৌরী ।—হাঁ, তাই বটে ।—তা বাবা, আমি সেট খেলনা এনে দেখাচ্ছি ।

গৌরী, খেলনা আনিতে কক্ষান্তরে প্রবেশ করিল ।

জয়হুর্গা স্বামীকে বলিলেন,—“তা, মাকে তুমি আজিকের দিনেও ভবানী বলবে ?”

আম্মারাম ।—আজ কি, আর কাল কি, ভবানীকে চিরদিনই আমি ভবানী বলিব ।

জয়হুর্গা ।—আচ্ছা, কেন তোমার এ জেদ্ ? ভবানী নামটা কেমন বুড়ুটে-বুড়ুটে পানা নয় ? আহা, অমন সোণার-টাঁপা মেয়ে,—সাক্ষাৎ ভগবতীর মত রূপ,—অমন মেয়েকে ‘গৌরী’ না ব’লে, তুমি এই বিয়ের দিনেও ঐ বুড়ুটে নামে ডাকবে ?

আম্মারাম মনের ভাব মনে রাখিয়া, একটু শুকহাসি হাসিলেন,—কোন উত্তর দিলেন না ।

জয়হুর্গা পুনরায় যেন একটু কাতরতার সহিত বলিলেন,— “দেখ, ঠিক আট বছরে গৌরীর-আমার বিয়ে হোচ্ছে । লোকে কথায় বলে, ‘আট বছরে মেয়ের বিয়ে দিলে গৌরীদানের ফল হয়’ ; আমাদের এ সত্যিকের গৌরী,—রূপে গুণে যেন গৌরী-প্রতিমা,—বয়সেও আট ;—আমাদের সত্য সত্যই গৌরী-দানের ফল হবে ।—তবে তুমি মেয়েকে ঐ বুড়ুটে নামে ডাকবে কেন ?”

আশ্চার্য্য প্রকৃত মনের কথা না ভাবিয়া বলিলেন, “আর না ডেকে উপায় নাই,—ঐ নামে মেয়ের বিয়ের লগ্ন-পত্র অবধি হ’য়ে গেছে ।”

জয়দুর্গা ।—তা হ’রে থাকে হ’য়েচে,—সম্প্রদান তুমি ‘গৌরী’ নামে ক’রো ।—দেখতে শুনতে—সব রকমে মানাবে ভাল ।—চূপ ক’রে রইলে যে ?

আশ্চার্য্য ।—তা আর হয় না ।

জয়দুর্গা ।—হয় না কেন ?—তুমি মনে ক’লেই হয় ।

আশ্চার্য্য ।—উঁহুঁ ।

এবার জয়দুর্গা কিছু দুঃখিতভাবে বলিলেন,—“দেখ, তুমি স্বামী. আমার ইষ্টদেবতা,—বার বার তোমার অমতে চলা আমার ভাল দেখায় না ;—কিন্তু মার আমার ঐ গৌরী নামই খেন মানার ভাল ।”

আশ্চার্য্য ।—মানায় যে ভাল, তা আমিও জানি । কিন্তু তুমি দুঃখিত হইও না । কোন বিশেষ কারণে, আমি কণ্ঠ্য এই ভবানী নাম রাখিয়াছি,—আর সেই নামেই তাকে সম্প্রদান করিতে চাহিতেছি, জানিও ।

এবার আর জয়দুর্গা দ্বিকল্পিত করিলেন না । বুঝিলেন, স্বামীর এই ইচ্ছার মূলে, তবে সুনিশ্চিতই কোন গূঢ় অর্থ আছে । তিনি বলিলেন—“তা তুমি যখন অমন কথা বলিলে, তখন আর আমি এমন ইচ্ছা করিব না । তুমি ঐ ভবানী নামেই কণ্ঠ্য-সম্প্রদান ক’রো ।—আমিও গৌরীকে ঐ নামে ডাকিব কি ?”

আশ্চার্য্য ।—সে তোমার ইচ্ছা ।—না, তুমি গৌরী নামেই সম্বোধন করিও ।

অদূরে কণ্ঠাকে দেখিয়া, জননী আনন্দ-গদগদ-কণ্ঠে বলিয়া উঠিলেন,—“দেখ দেখ, মা আমার ঠিক গৌরীপ্রতিমার মতই এই দিকে আসছে ।”

আত্মারাম দেখিলেন,—প্রতিমাই বটে ! সচল অনূর্ণা মূর্তি,—জাগ্রৎ প্রতিমা ! কিন্তু, ও কি, ও ! প্রতিমার পশ্চাতে, ঐ পূসর ধূমাবতী মূর্তির মত, ও কে ও,—চকিতের গায়, দেখা দিয়া অন্তর্হিত হইল ? না, বুঝি দৃষ্টিভ্রম ? হাঁ, ঐ যে লুকাইল,—ঐ যে স্পষ্ট দেখা দিল !—একি, আবার ?

মুহূর্তের জগ্ন আত্মারাম চক্ষু নিম্নীলিত করিলেন ;—অণুরের অন্তরে ‘তারা’-নাম জপ করিতে করিতে প্রকৃতিহু হইলেন ।

গৌরী নিকটে আসিয়া ছল্ ছল্ চোখে মাকে বলিল,—“মা, আমার কাজলনতা কোথায় গেল ?”

“এঁয়া ! সে কি !”

জননী চমকিতা,—যেন একটু ভীতা হইলেন । বলিলেন,—“এঁয়া ! সে কি, মা ! তোমার কাজলনতা ত তোমার সঙ্গেই ছিল ?”

“এখন আর দেখতে পাচ্ছি না ।”

“সে কি মা ! কোথায় গেল ?”

জননী জয়দুর্গা অতিমাত্র ব্যাকুলা হইয়া, মুহূর্তমধ্যে এই কথা সকলকে জিজ্ঞাসা করিলেন । সকলে উদ্বিগ্নহৃদয়ে—“সেকি, সেকি” বলিয়া, একই রকমের উত্তর দিল ।—“তবে কি হ’বে মা” বলিয়া জয়দুর্গা, সেই শত শত নিমন্ত্রিতা রমণীর সহানুভূতি-শীতল সাধনাবাগীর উপর যেন কণ্ঠার মঙ্গলামঙ্গলের নিভর করিতে লাগিলেন । কেননা, তাঁহার সংস্কার, বিয়ের আগে এই

মাঙ্গলিক-চিহ্ন হারাইয়া যাওয়া ঘোর দুর্লক্ষণ । এমত অবস্থায় জননী'র মনের অবস্থা যে কিরূপ হইল, তাহা জননীই বুঝিলেন ।

আর আত্মারাম ? সবিশেষ দেখিয়া শুনিয়া, তিনি একরূপ 'পরমহংস-বিশেষ' হইয়া গিয়াছেন । বিপদ সম্পদ—এ দু'য়েই যেন তিনি আর বড় একটা নূতন কিছু দেখেন না । তাই ধীর ও প্রশান্তভাবে পত্নীকে বুঝাইলেন,—

“ছি, সামান্যের জ্ঞান, ও কর কি ? তোমার বাড়ীতে আজ এই শত শত আত্মীয়-কুটুম্বের সমাবেশ, — বাহিরে লোকে লোকারণ্য,—আর কয় দণ্ড পরেই কণ্ঠার শুভবিবাহ,—এমন সময় সামান্য একখানা 'কাজলনতা' হারানো উপলক্ষে, তোমার এ আকুলি-ব্যাকুলি ভাব কি শোভা পায় ? ইহাতে যে সকলকে একরূপ অমর্যাদা করা হয় ? মনে মনে অনেকে, এজ্ঞে যে কুণ্ঠিতও হইতে পারেন ? মঙ্গল বা অমঙ্গল—সে ত ভগবানের হাত ;—তা সে জন্য তুমি অমন অস্থির হও কেন ? মা' মঙ্গল-চণ্ডীকে স্মরণ কর,—সকল দুর্ভাবনা দূর হ'বে ।”

পরে একটি নিখাস ফেলিয়া মনে মনে বলিলেন, “মা ভবানী ! ইহাই তোমার প্রাক্তন-ফল ! ঐ ধূসর ধূমাবতী মূর্ত্তি অলক্ষ্যে থাকিয়া, নিশ্চয়ই তোমার মাঙ্গলিক চিহ্ন লুকাইয়াছে । আমার মন স্পষ্টই এ কথা বলিতেছে । বুঝিলাম, দৈবের ছলনা ! জননি, অয়পূর্ণে ! সূচনাতেই সব প্রকাশ করিলে ?”

সকলের মুখের ভাব-গতিক দেখিয়া, এবার গৌরী বড় কাঁদ-কাঁদ মুখে মাকে ডাকিল,—“মা !”

জননী স্নেহবিগলিত হৃদয়ে কণ্ঠকে বুকে ধরিয়া বলিলেন, “কি মা,—কেন মা ?”

“মা, তবে কি হবে ?”

“কি আর হবে মা,—তোমার সোনার কাজলনতা গিয়েছে,—হীরের কাজলনতা হবে।”—আগ্নারাম উৎসাহ সহকারে এই কথা বলিয়া, কণ্ঠ্য চিবুক স্পর্শ করিলেন ।

মনে মনে বলিলেন,—“মা, এমনি যে একটা কিছু হইবে, তাহা আমি জানিতাম । সেই জন্মই তোমার মেহময়ী গৌরী নামের পবিবর্ত্তে, ভক্তিময়ী ভবানী নাম আমি রেখেছি ।—মা, এই নামই তোমার সর্বাংশে মানাইবে জানিয়া, আমার অনুরাগে তোমার এই নাম রাখিয়া দিয়াছে ।—আমি পরের কথা শুনিব কেন ?—এখন যাও মা ভবানী, এই অখণ্ডনীয় প্রাক্তন ও জন্মার্জিত উচ্চ তপস্যা লইয়া, রাজ-গৃহে বিরাজিতা হও জননি !—তোমার কল্যাণে তোমার শ্বশু-কুল উজ্জ্বল হইবে ; হিন্দুসমাজ পবিত্র হইবে ;—সমগ্র বঙ্গদেশ ধন্য হইবে ।—পিতার এ আশীর্ব্বাদ ব্যর্থ হইবে না মা !”

ধর্ম্মায়া পিতার শুভ আশীর্ব্বাদ মস্তকে লইয়া, তবে যাও ভবানী ! নাটোর-রাজ-পরিবারে মিশিয়। যাও ! তবে যাও লক্ষ্মী-স্বরূপিণী ! বঙ্গের ঘরে ঘরে সতী-ধর্ম্মের মাহাত্ম্য দেখাইয়া, ধরার অমরী হইতে যাও ! তবে যাও অন্নপূর্ণা-রূপিণী ! জননীর হৃদয় লইয়া তুমি জন্মগ্রহণ করিয়াছ ;—কোটি কোটি জীবে অন্ন-জলদানে স্নানাতন কর ;—তোমার পুণ্যে ধরার ভার লাঘব হউক,—করুণার জয় হউক,—সর্ব্বজীবের মঙ্গল হউক ;—ইহলোকে তুমি অতুল যশস্বিনী ও পরলোকে অক্ষয় পুণ্যসঞ্চয়-কারিণী দেবী হইয়া, জাতিবর্ণনির্বিশেষে পূজা পাইতে থাক ।—তোমার শিশু-আশীর্ব্বাদ ব্যর্থ হইবার নহে ।





## ষোড়শ পরিচ্ছেদ ।



ইন্দ্রপুরী তুল্য বিবাহ-আসর সজ্জিত হইরাছে । কন্দর্প-  
তুল্য বর—বরের আসনে শোভা পাইতেছে । চারি-  
দিকে পাত্র মিত্র অমাত্য আত্মীয়বর্গ বেষ্টিত রহিয়াছে । সহস্র  
সহস্র লোক বরকে দেখিতে উদ্‌গ্ৰীব হইয়াছে । পুরাঙ্গনাগণ  
গবাক্ষের ফাঁক দিয়া, কেহ সঁবিয়ানার ছিদ্র দিয়া, আর কেহ বা  
সূক্ষ্ম চিকের কাণী সরাইয়া, বরকে দেখিতে লাগিলেন । কোন  
কোন অতি কোতূহলাক্রান্তা রমণী, এ উপায়েও সাধ মিটাইতে  
না পারিয়া, ছদ্মবেশিনী হইয়া দাসীমহলে মিশিলেন, এবং অতি  
কষ্টে, কোনও রকমে পুরুষের ভিড় কাটাইয়া, অপেক্ষাকৃত একটু  
নির্জন স্থানে দাড়াইয়া, একটু হুন্ডী খাইয়া, বরের মুখ ধানি  
দেখিয়া লইলেন, এবং তদবস্থায় সেইখানে দাড়াইয়াই, সঙ্গিনীর  
সহিত তাহার সাদা-মাটা এক-প্রস্ত সমালোচনা করিয়া  
লইলেন ।

বর বিবাহ-সভায় আসিলে, শঙ্খ ও হুন্ডনি এক-দফা হইয়া  
গিয়াছে,—বিপুল বাগ্‌ভাণ্ডও বুঝি তাহার নিকট পরাভব মানিয়া  
গিয়াছিল ; বাহাদিগের সে ধ্বনি শুনিবার সোভাগ্য ঘটিয়া উঠে

নাই,—তঁাহারা এইবার তাহা গুনিয়া লউন,—অনেক দিন তাহা মনে থাকিবে ।

দ্বী-আচারের সময় হইয়াছে,—বরকে যথারীতি পরম সমাদরে অন্তঃপুরে লইয়া যাওয়া হইল ।—প্রকাশ্য ভাবে ঢাক-ঢোল বাজাইয়া, পরের অন্তরে বর মহাশয়ই ঘাইতে পান,—তাহাতে সমাজ বা রাজ-শাসনের এমন একটিও বিধি নাই যে, তাহা কেহ রোধ করিতে পারে । বরং এই অন্তর-গমনে কোন কারণে বর মহাশয় গরুরাজী হইলে, অন্তরস্বামীই তঁাহাকে সমাজ ও রাজশাসনের অধীনে আনিতে পারেন ।—বিবাহের দিন বরের এত খাতির ও এত মাগু !—সে দিন তিনি ‘বর’ কিনা ?—তাই এত আদর-আপ্যায়ন পান ।

পরন্তু, এই বরের পাছু ধরিয়া,—ভাই, বোনাই, বা এমনি একটা কিছু পরিচয় দিয়া, গুপ্তভাবে অন্তর-প্রবেশ করিতে গিয়া, সময় সময় কোন কোন বেয়াড়া বদ্রসিক,—রীতিমত উত্তম মধ্যম খাইতে খাইতেও রহিয়া যান,—কখন কীলটা চড়টা কাণমলাটা অবধিও বেমানুম হজম করেন,—কখন বা তাহারও অধিক ঘটয়া থাকে,—কীল, লাথি হইতে জুতা, ঝাঁটা পর্যন্ত পিঠে দমাদম পড়িয়া যায় ;—বেহায়াদের তখন হঁস হয় যে, ভদ্রলোকের অন্তরে ঢুকিয়া প্রকৃতই বড় অণ্ডায় করিয়াছিল । হঁস হয় এই জন্ত যে, কি কন্যাপক্ষ আর কি বরপক্ষ,—কাহারো নিকট আদৌ সহানুভূতি পায় না,—পরন্তু যথেষ্ট লাঞ্ছনা ও ধিকারলাভ হয় ।—এই শ্রেণীর একদল জীব, আজিও সমাজ-শরীরে বড় প্রচ্ছন্নভাবে মিশিয়া আছে বলিয়া, কথাটা এমনভাবে এখানে পাড়িলাম ।

তা এ শ্রেণীর ছুচুন্দর জাতীয় জীব জুতা-কাঁটা খাইয়া যতই নিগ্রহ ভোগ করুক,—বর মহাশয়ের কিন্তু আজ আদর-আপ্যায়নের চরম আয়োজন ।—এক সুন্দরীতে রক্ষা নাই,—আজ শত সুন্দরী তাঁহাকে ঘেরিয়া আছেন,—আদর-সোহাগ-স্নেহপূর্ণ মিষ্টকথা এবং মধুর হইতেও মধুরতর—মধুরতম সম্ভাষণ—যা তিনি কখন স্নেহেও ভাবেন নাই,—আজ বিনা আয়াসে, বিনা ইচ্ছায় লাভ করিতেছেন । তবে মধ্যে মধ্যে এক আধটা উগ্র-মধুর কর্ণমর্দনের পালা আছে বটে । তা সেটাও, সুন্দরি-করপদনিঃসৃত ভাবিয়া উপেক্ষা করিলেও করা যাইতে পারে ।

‘বর’ কিনা—যিনি সকলের শ্রেষ্ঠ । বিবাহের বর, ঐ বিবাহের দিনেই শ্রেষ্ঠ ;—অন্য দিন আর নয় । সেদিন তাঁহার আসন শ্রেষ্ঠ, বসন শ্রেষ্ঠ, ভূষণ শ্রেষ্ঠ, আদর শ্রেষ্ঠ, আপ্যায়ন শ্রেষ্ঠ,—সম্বন্ধ আবার শ্রেষ্ঠ হইতেও শ্রেষ্ঠতর ;—সেদিন তাঁহার সহিত কাহারো তুলনা হইতেই পারে না । সে দিন তাঁহার তুলনা—তিনি । কেননা, তিনি ‘বর’ ।

বরের এত মান্য—এত আদর কেন, জানো ? সম্পূর্ণ অপরিচিত ও খুব দূর-পরকে,—বিন্দুমাত্রও রক্তের সম্পর্ক না থাকে,—এমন পরকে,—প্রাণের সমান ভালবাসিয়া, এবং প্রাণাধিক সন্তানের তুল্য বিশ্বাস করিয়া,—আপন স্নেহের নিধি—বুকের ধন—কন্যারহকে জন্মের মত সঁপিয়া দিতে হয় বলিয়া । ভগবানের হস্তে আপন অদৃষ্টের—মানুষের যতটা নির্ভর ও বিশ্বাস,—একটা পরের পর—তম্ব পর—ব্যক্তিকে কন্যাদান, তাহা অপেক্ষা কম নির্ভর ও বিশ্বাসের কাজ বলিয়া, আমার মনে হয় না । ব্যাপার বড় সহজ মনে করিবেন না ।—অন্য ধর্মের

পক্ষে যাহাই হউক, আমাদের সনাতন হিন্দুধর্ম, কন্যাশ্রম তুল্য গুরুতর দায়িত্ব, গৃহীর আর নাই । ভাবুন, একটা সম্পূর্ণ অজ্ঞাত জীবনের সহিত—সেই অজ্ঞাত জীবনের অদৃষ্ট-সূত্রের সহিত,— একরূপ চোক-কাণ বুজাইয়া, বুক ঠুকিয়া, প্রাণাধিকা হুহিতার জীবন-সূত্র গ্রথিত করিয়া দিতে হইবে । অর্থাৎ যাহার হাতে কন্যাকে সঁপিয়া দিবে, তাহার সুখ দুঃখ, পাপ পুণ্য, জীবন মরণের সহিত কন্যার ঐ গুণি সম্পূর্ণরূপে নির্ভর করিতেছে ।— ব্যাপার কি গুরুতর, ভাবিয়া দেখুন ।

অপর পক্ষে যিনি ধর্ম সাক্ষী করিয়া কন্যা গ্রহণ করিলেন, তাঁহার দায়িত্ব আরও গুরুতর । সে গুরুবোধ সকলেই অল্প-বিস্তর করিয়া থাকেন । সূত্রান্ত সে সন্দেহে বেণী কিছু বলার প্রয়োজন দেখি না ।

তা এমন যে বর, তাহাকে সন্মাত্রে প্রাধান্য দেওয়া হইবে না ? বিশেষ এই একটি দিনের জন্য,—দণ্ড কয়েক সময়ের নিমিত্ত । যে, আজীবনের জন্য অত বড় একটা দায়িত্ব মাথায় করিয়া লইল,—আজিকার দিনে, সে সর্ব্বরূপে প্রাধান্য পাইবে না ত, আর কে পাইবে বা পাইতে পারে,—অথবা কার পাওয়া উচিত ?

সাধাণ্য এক দিনের এই হাসি, বাশী, গল্প, গাথা, অথবা গান শুনিয়া, —এক দিনের এই একটুখানি আদর, আপ্যায়ন, মেহ, ভাব, মাধুরী স্মরণ করিয়া, যাহাকে আজীবন সংসারের কঠিন রূপে যুক্তিতে হইবে, সেই যদি না বর অর্থাৎ প্রধান হইবে এবং সর্ব্বপ্রকারে তার দাবী-দাওয়া না অধিক হইবে, ত' আর কাহার প্রাধান্য বা দাবী দাওয়া সম্ভবে ? শিকারী যেমন মধুর মোহন-

স্বরে বাঁশী-বাজাইয়া, মুগ্ধ হরিণশিশুকে জালবদ্ধ করে, তেমনি সমাজও এক হিসাবে—সরল, শান্ত, সাংসারিক-আলায়শ্চর্যহীন যুবাকে ‘বর’ সাজাইয়া,—বিপুল বাদ্যভাণ্ড সহ সমারোহ ব্যাপারের অবতারণা করিয়া,—চাক্চিক্যময় মহা আড়ম্বরের আবরণে তাহাকে ভুলাইয়া আপন জালে ফেলিয়া, গৃহী করিয়া লয়।—এ হেন বরের এই এক দিনের প্রাধান্য টুকুও যে সহিতে না পারে, তাহার লোকালয় ছাড়িয়া বনে বাস করাই উচিত। আর যে সেই বরের দণ্ডকের—সুন্দরী সখীরূপের প্রতি পাপদৃষ্টিতে চায়, তাহার চোখ দুটা উপাড়িয়া দেওয়া কর্তব্য।

স্ত্রী-আচার-কার্য সম্পন্ন হইলে, বর রূপী—পরম রূপবান্ রাজকুমার রামকান্ত, বিবাহের মন্ত্রপাঠ করিতে, পুরোহিতসম্মুখে, আসনোপরি উপবিষ্ট হইলেন। কিন্তু তাঁহার মনে তখনও জাগিতেছিল—সেই—শুভদৃষ্টি। কি পুণ্য-পবিত্রতা শাস্তি-সরলতাময়—সে দৃষ্টি! যেন হৃদয়ের একটা ঘন আবরণ চিরদিনের মত উন্মুক্ত হইয়া গেল;—যেন দূর অতীতের লুপ্তপ্রায় একটি সোনার স্বপ্ন সম্মুখে জাগ্রতবৎ প্রতীয়মান হইতে লাগিল;—যেন অলকায় মন্দাকিনীতীরে কোন দেববালার সহিত অপরূপ শৈশব-খেলা খেলিতে খেলিতে, কাহার ছলনায় পথ ভুলিয়া, তিনি এ সংসার-প্রান্তরে আসিয়া পঁহুঁছিয়াছেন,—আবার সেই দেববালার সহিত সন্মিলন হইল,—এমনই একটা মধুর স্মৃতি তাঁহার মনে উদ্ভাসিত হইতে লাগিল। সেই বাল্য যেন তাঁহার হৃদয়-দ্বারে দাঁড়াইয়া, বড় মধুর হাসি হাসিতে হাসিতে বলিল,—“দেখ দেখি আমি কে?—আর আমাকে ভুলিয়া যাইবে?”—এমনই যেন একটা প্রাণময়ী আনন্দদায়িনী স্মৃতি—সেই শুভ-

দৃষ্টির মধ্যে দীপ্যমান হইয়া উঠিয়াছিল,—আর সেই স্মৃতির মোহিনী শক্তিতে, মনে মনে তিনি অপার আনন্দ অনুভব করিতেছিলেন। পবিত্র স্ত্রীআচারের মুখ্য লক্ষ্য,—বর-কণ্ঠার এই শুভদৃষ্টি। পরন্তু এই পুণ্যদৃষ্টিতে, যে পামর-পামরী অলঙ্কিত-ভাবে, কোনরূপে বাদ সাধিবার চেষ্টা পার, তাহার সেই পরামণিকের—সেই উদ্দেশে তীক্ষ্ণ ক্ষুরধার তুল্য গালাগালি ও অভিসম্পাত প্রকৃতই ণায়া-প্রাপ্য বটে।

রামকান্ত মন্ত্রপাঠ করিতে আসনে উপবিষ্ট হইলেন। সম্মুখে স্বয়ং নারায়ণ—শালগ্রাম শিলা। তাহার সম্মুখেই মন্ত্রপাঠ করিতে হইবে। পুরোহিত যথারীতি মন্ত্রপাঠ আরম্ভ করিলেন।

অন্যদিকে বিচিত্র পটুবস্ত্রমণ্ডিতা, রত্নালঙ্কারভূষিতা, করুণাময়ী, সোনার গোরী সমাবিষ্টা। সে অপরূপ রূপপ্রভায় শত শত উজ্জল দীপালোকও বৃষ্টি স্নান হইয়াছে। আশ্চর্য্যাম নিজেই কণ্ঠা-সম্প্রদান করিতে বসিয়াছেন।—কণ্ঠা না প্রতিমা? ভাগ্যবান্ রাজকুমার এ প্রতিমা লাভ করিবেন।

প্রতিমার মনে তখন উদয় হইতেছিল,—“এই বিবাহ? এই বিবাহেই নারীধর্ম্মের প্রতিষ্ঠা হয়? এই আমার বর? আহা, কি জ্যোতির্ম্ময় মনোহর রূপ! মা বলিয়া দিয়াছেন,—আজ হইতে ইনিই আমার স্বামী, ইষ্টদেবতা, ইহকাল-পরকালের সহায়, প্রত্যক্ষ ঈশ্বর। আজ হইতে আমার ইহঁার সেবিকা—দাসী হইতে হইবে।—পাচ-অর্থ্য দিয়া নিত্য ইহঁার চরণ পূজা করিতে হইবে।—মা, তোমার আশীর্ব্বাদই যেন সফল হয়;—আমি যেন জীবনে মরণে, কায়মনঃপ্রাণে, এই স্বামি-পদ সারি করিতে পারি।”

পুরোহিত মন্ত্র পড়াইয়া যাইতেছেন, আত্মারাম ভক্তিগদগদ-  
কণ্ঠে, সেই মন্ত্র উচ্চারণ করিতেছেন,—মধ্যে মধ্যে রোমাঞ্চিত  
কলেবরে, একবার প্রাণাধিকা কণ্ঠার পানে, আরবার নব-  
জামাতার পানে, চাহিয়া দেখিতে লাগিলেন । মনে মনে বলি-  
লেন, “মা জগজ্জননি ! যেন এ মণি-কাঞ্চন-যোগ সার্থক হয় ।  
জগদম্বা, মুখ রেখো ।—আমার ভবানীকে ভা-গ্য-ব-তী ক’রো ।”

আবার সেই ‘ভাগ্যবতী’ কথা ; আবার এই কথা উচ্চারণের  
সঙ্গে সেইরূপ স্বর-কম্পন । আত্মারাম একটি নিশ্বাস ফেলিলেন ।

যথানিয়মে, নির্কিঞ্জে মন্ত্রপাঠাদি কার্য্য সম্পন্ন হইল । কিন্তু  
সহসা বড় একটা অশুভ ঘটনা সংঘটিত হইল ।

বরকন্যা আসন হইতে উঠিয়া দাঁড়াইয়াছেন, এমন সময়  
হঠাৎ, পার্শ্বস্থ আলোকধারীর বর্তিকালোক হইতে একটু অগ্নি-  
ক্ষুন্নিষ্ক, কন্যার পরিধেয় বস্ত্রে সংস্পৃষ্ট হইল । তাহাতে সেই সূক্ষ্ম  
পটুবস্ত্র নিমেষ মধ্যে অনেকটা পুড়িয়া গেল ।

“হায়, একি !” বলিয়া পুরোহিত সেট অগ্নি নির্ক্ষাণ  
করিলেন ।

অন্যে যত না হউক,—আত্মারাম এই বিষয়টি নিবিষ্টচিত্তে  
লক্ষ্য করিলেন । কিন্তু তখন আর তাঁহার নূতন কোন উদ্বেগ  
বা আশঙ্কা আসিল না ।—তখন তিনি এ দু’য়ের অতীত হইয়া  
গিয়াছেন । তাই মনে মনে “তারা, তারা” বলিতে বলিতে,  
তিনি একটু হাসিলেন । বিধাতার অব্যর্থ বিধান দেখিয়া হাসি-  
লেন । কন্যার জন্মদিনেও এমনি একটু হাসি—তিনি হাসিয়া-  
ছিলেন, — আজিও সেইরূপ হাসিলেন । অবশ্য বর না বরপক্ষীয়-  
গণ—অথবা আর কেহ তাহা বুঝিতে পারিল না ।



আত্মারাম মনে বলিলেন, —“মাগো, এইরূপেই তুমি তোমার ইচ্ছা পূর্ণ করিরা থাক ? বীজ রোপণের সঙ্গে সঙ্গেই তাহার পরিণতি ও ফল—ঠিক করিয়া রাখ ? তবে আর জীব—কি ? তারের-পুতুল ছাড়া,—আর কি ? তাকে তুমি যেমন নাচাও, সে তেমনি নাচে মাত্র ।—মাগো, আমাকে আর নাচাইও না,— আমাকে ডাকিয়া লও মা,—আমার মনুষ্য-জন্মের সাধ মিটিয়াছে ।”

এবার ভক্তের চক্ষু কোণে এক বিন্দু জল দেখা দিল ।— “চোখে বুঝি কি পড়িল” বলিয়া, তিনি কৌশলপূর্বক সেই জলটুকু মুছিয়া ফেলিলেন,—তাহাকেও কিছু বুঝিতে দিলেন না ।

বিবাহ হইয়া গেল । ঘোর রোলে বাস্ততাও বাজিয়া উঠিল । পুরাঙ্গনাগণ হাসিমুখে, মনের সুখে বর-ক’নে লইয়া বাসর-ঘরে গেলেন । বাসরের শোভা অতুলনীয় ; কিন্তু তাহা বর্ণনার স্থান ইহা নহে । সৌন্দর্য্যও আনন্দ যেন মূর্ত্তিমান হইয়া, ধরাবক্ষে বিরাজ করিতে লাগিল । দিকে দিকে আনন্দের স্রোত প্রবাহিত হইল ।

বৈবাহিকে বৈবাহিকে কোলাকুলি হইল ; বরযাত্রী-কন্যা-যাত্রীদের মধ্যে এবার সম্বন্ধ ধরিয়া, নানারূপ মিষ্টকটু-কষায় আলাপ-পরিচয় চলিল ; বারোয়ারী-গ্রামভাটীর পাণ্ডাগণ বর-কর্ত্তার নিকট ‘ধন্য’ দিয়া পড়িয়াছিল ; এখন সেই ধন্যের পর্য্যাপ্ত পুরস্কার পাইল । ভোক্তা সকল মিষ্টান্নশ্রোতে হাবুডুবু খাইতে লাগিল ।—চারিদিকে হৈ হৈ রৈ রৈ রব পড়িয়া গেল ।

যে সময়ে ভবানীর বিবাহ হইয়া গেল, সেই সময়ে আত্মারামের পুরোহিত-বাড়ীতে শিবানীর বিবাহও নির্বিঘ্নে সুসম্পন্ন হইল । পুরোহিত-কন্যার বিবাহের যাবদীয় ব্যয় আত্মারাম



দিয়াছিলেন । একই সময়ে, একই লগ্নে দুই কন্যার শুভ বিবাহ নিশ্চিত হইয়াছিল । দুইজনের বিবাহও যথানিয়মে হইয়া গেল । কিন্তু কি জানি, কাহার ইচ্ছায়, কোন্ কারণে, দুইজনের অদৃষ্টে দুই বিভিন্ন ফলের সূচনা হইল । কার কতদূর কপাল-জোর, তাহা সেই ফল দেখিরা বুঝা যাইবে ।

এখন, ভবানি ! তোমার বড় সাধের 'গৌরী'-নাম আজ হইতে ঘুচিল । তোমার পিতা, তোমায় যে নামে সম্প্রদান করিলেন এবং তুমি যে নামে রাজসংসারে পরিচিতা হইলে,— এখন হইতে আমরা তোমাকে সেই নামেই অভিহিত করিব ।

তবে যাও, রাজকুললক্ষ্মী ! পতি-গৃহ গিয়া উজ্জ্বল কর ! এত-দিন তোমায় বালিকারূপিণী দেবমূর্তিতে দেখিয়া জীবন সার্থক করিলাম,—এইবার তোমায় আদর্শগৃহলক্ষ্মী-মূর্তিতে দেখিব, মানস করিয়াছি । যাগো, মনের মানস তুমিই পূর্ণ করিও ।

সেই দিন অতি প্রত্যুষে, অন্নপূর্ণার মন্দিরে, কে গাহিতেছিল,—

( ভৈরবী—১৭ । )

( ওমা ) পারি না আর বইতে বোঝা,  
আমার মনের মানস কেড়ে নে ।

ছেড়ে দে মা কেঁদে বাঁচি,

দে মা আমায় ছুটি দে ॥

ঘরের ছেলে ঘরে যাই মা,

আর বিঘ্নেতে কাজনি শ্রামা,

যারা চায় তাদের দেনা,

আমার গরব বাড়ে যে ॥

আর বাড়িয়ো না পায়ে পড়ি,  
 খাওয়াবে কে বিষের বাড়ি,  
 কেউ দেওয়াবে হাতে দাড়ি  
 তখন তাদের খ্যাকায় কে ॥

দশ-হাতেই ঢের দিয়েছ,  
 দু'-হাতে আর দিবে কত,  
 গুটিয়েছ হাত, বেশ ক'রেছ,


( এখন ) ভালর ভালর পালাই গে ॥

আর লোভ দেখাস্ নে তার।  
 আবার হ'বো আপনা হারা,  
 দেহাই তোরা—সারাংসারা—  
 আর যেন না আসে সে ॥

( ওমা ) পারি না আর বহিতে বোঝা,  
 আমার মনের মানস কেড়ে নে ॥

ইতি প্রথম খণ্ড ।





## দ্বিতীয় খণ্ড ।

### কিশোরী—রাজলক্ষ্মী ।

#### প্রথম পরিচ্ছেদ ।

নব-নির্মিত নাটোর-রাজপ্রাসাদ । প্রাসাদের উচ্চচূড়া শিল্পকার্য্য-সংযুক্ত । অতি উর্ধ্বে, গগন ভেদ করিয়া, সে সৌধ-চূড়া বিরাজিত । প্রাসাদের চতুষ্পাশ্ব বেড়িয়া গভীর খাদ । সেকালের গড়বন্দী বাড়ী । সেই বাড়ীর চারিদিকে শ্রেণীবদ্ধ মন্দির ও দেবালয় সংস্থিত । মধ্যস্থলে সুদৃশ্য, সুগঠিত, মনোহর রাজ-অস্তঃপুর । রাজ-অস্তঃপুর বিবিধ বিচিত্র সজ্জায় সুসজ্জিত । এই শোভান্বিত রাজ-অস্তঃপুর,—রাজলক্ষ্মী ভবানীর পাদস্পর্শে পবিত্র ও গৌরবান্বিত হইয়াছে ।

কমলার আবির্ভাবে, যেমন দিক্ প্রকুল্ল ও গ্রহগণ সুপ্রসন্ন হয় ; সৰ্ব্বকার্য্য সুশৃঙ্খলে ও সুনির্বিঘ্নে সমাধা হইয়া, সৰ্ব্ববিষয়ই যেমন সুপ্রতুল ও সুমঙ্গলের আধার হয় ; সকলের দ্বেষহিংসা-

বজ্জিত সদানন্দময় হাসিমুখ যেমন সকলের সহানুভূতি ও শুভ-  
দৃষ্টিলাভে কৃতার্থ হইয়া থাকে ;—তেমনি লক্ষ্মীস্বরূপা ভবানীর  
আগমনের সঙ্গে সঙ্গে,—বিপুল রাজ-পরিবারে শ্রী, শোভা,  
সম্পদ, শ্রীতি, প্রসন্নতা, শান্তি—যেন পূর্ণমাত্রায় বিরাজ করিতে  
লাগিল । ভবানীর সে পুণ্যময়ী দেবীমূর্তি দেখিলে, কাহারও  
মনে আর কোনরূপ খল-কপটতা বা পাপ-হিংসার আবির্ভাব  
হয় না । এই হিসাবে, মহারাজ রামজীবনের সংসার,—পরম  
পুণ্যের সংসার বলিতে পারা যায় । এবং এই হিসাবে, নবাগতা  
রাজবধূকে ‘রাজলক্ষ্মী’ নামে অভিহিত করা যাইতে পারে ।  
নহিলে, ভবানীর বিবাহের পূর্ব হইতেই, রাজপরিবারের মধ্যে  
যে কলহ, আত্মদ্রোহ ও বিদ্বেষণি ঠিকি ঠিকি জ্বলিতেছিল,—  
কিন্তু সে কথা বলিবার পূর্বে ভবানীর শান্তিময় সংসার-ধর্মের  
দুই একটি কথা বলিব ।

বিবাহের পর ছয় বৎসর অতিবাহিত হইয়া গিয়াছে,—  
ভবানীর সে সোনার শৈশব আর নাই,—এখন সুখদুঃখময়  
কৈশোর অবস্থা । কিশোরী রাজলক্ষ্মীর সে অপরূপ রূপ,—এখন  
ষোলকলার পূর্ণ ।—যেন মূর্তিমতী ভগবতী,—সৌন্দর্য্য, মাধুর্য্য ও  
আনন্দ লইয়া, পতিগৃহে বিরাজ করিতেছেন ।

পতি রামকান্ত, ভবানীকে প্রাণের সমান ভালবাসিতেন ।  
কিশোরীর রূপ দেখিয়া যে ভালবাসা, সে ভালবাসা নহে,—  
পতিপ্রাণা ভক্তিমতীর হৃদয় আকর্ষণে যে পুণ্যময় অনুরাগ  
জন্মে,—সেই অনুরাগ-গুণে তিনি ভালবাসিতেন । সে ভাল-  
বাসায়, দুইজন দুইজনকে প্রেমডোরে বাধিয়া রাখিলেন ।  
এ পবিত্র বন্ধন, ইহজীবনে বিচ্ছিন্ন হইবার নহে ।

কিন্তু, এই ইহজীবন হইলেই কি সব হইল ? অনন্তকালের ভুলনায়, ইহজীবন কতটুকু ? রামকান্ত মনে মনে বলিতেন,— “জগদীশ ! যেন জন্ম জন্ম এ পুণ্য-প্রতিমা বৃকে ধরিতে পারি ।” ভবানী ভাবিতেন,— “এই স্বামী,—এই আমার ইহকাল-পরকাল,—এই আমার মূর্ত্তিমান্ ঈশ্বর ! এই ঈশ্বর-চরণ যেন আমার জীবনে মরণে সম্বল হয় ;—যেন এই চরণবলে আমার নারীজন্ম সার্থক করিতে পারি !”

কেবল মনে মনে এইরূপে বন্দনা করিয়াই ভবানী ক্ষান্ত মন,—প্রতিদিন প্রাতঃসন্ধ্যায় তিনি সচন্দন পুষ্পদলে স্বামি-পদ পূজা করিতেন । তন্ত্র যেমন আরাধ্য দেবতাকে তদাতচিন্তে পূজা করে, সেই ভাবে তিনি পতি-দেবের চরণে পুষ্পাঞ্জলি দিতেন । মনে মনে বলিতেন,— “হে দেবদেব ! হে প্রাণেশ্বর ! নিঃশুণে যাহাকে দাসী বলিয়া গ্রহণ করিয়াছ, তাহাকে জন্ম জন্ম দাসী বলিয়াই মনে রাখিও,—ইহার অধিক প্রার্থনা আমার আর নাই ।”

রামকান্ত ভাবিতেন,— “এই দেবীহূল্য রূপ, এই অপরাধিতা তন্ত্রি, এই অলৌকিক পাতিব্রত্য,—ভগবন্ ! এ পুণ্য-প্রতিমা কি অধিকদিন এ পৃথিবীতে থাকিবে ?”

রামকান্তের চক্ষে তখন টস্ টস্ করিয়া জল পড়িত । পণ্ডীর পূজা সমাপনান্তে, তিনি আবার প্রকৃতিহু হইতেন ।

পতিব্রতা ভবানী তখন হাসি-হাসি মুখে স্বামীর পদরেণু লইয়া মাথায় দিয়া বলিতেন,— “প্রাণেশ্বর ! দাসীর মনের বাসনা সফল হইবে ত ? বল প্রভু ! আমার পূজা তুমি গ্রহণ করিয়াছ ত ?”

রামকান্ত স্নেহভরে পত্নীর হাত ধরিয়া উঠাইয়া পত্নীকে বামে বসাইয়া, প্রেম-গদগদ কণ্ঠে উত্তর দিতেন,—“প্রাণাধিকে, সত্যই বলিতেছি, আমি আজিও বুঝিয়া উঠিতে পারিলাম না,—তুমি কে ? তুমি যেই হও, আমি পরম ভাগ্যবান্ যে, তোমাকে প্রিয়তমা পত্নীরূপে লাভ করিতে পারিয়াছি । কিন্তু হৃদয়েশ্বর ! এত সুখ অদৃষ্টে সহিবে ত ?

ভবানী ।—অমন কথা বলিও না নাথ ! আশীর্বাদ করিও, যেন ঐ পাদপদ্মে মাথা রাখিয়া, হাসিতে হাসিতে ইহলোক হইতে বিদায় লইতে পারি ।—রূপা করিয়া দাসীকে চরণে স্থান দিয়াছ. তাই না তাহার এই সম্মান ?

ভবানী পতির পায়ে হাত বুলাইতে লাগিলেন ।

রামকান্ত রোমাঞ্চিত কলেবরে বলিতে লাগিলেন,—“পতিব্রতা সাধ্বীর মুখেই এমন কথা শোভা পায় বটে । গৃহলক্ষ্মী আমার ! তোমার পুণ্যেই আমি পতিতপাবনী সনাতনীকে চিনিয়াছি । আর কি আশীর্বাদ করিব, যেন অচিরে তুমি পুত্রবতী হইয়া, রাজপরিবারস্থ সকলের হৃদয়জাত আশা ও আনন্দের শুভসংযোগ করিতে পার ।”

ব্রীড়াবনতমুখীর পবিত্র মুখ-কমলে রামকান্ত চুম্বন করিলেন ;—লজ্জারাগরঞ্জিত হইয়া সে মুখপদ্ম অপূর্ব শোভা ধারণ করিল । রামকান্ত মুক্লেবে, অনিমেষ নরনে, সে শোভা দেখিতে লাগিলেন ।

এমনই, প্রায় প্রতিদিনই হইত । এমনি আদর ও অনুরাগে এবং ভক্তি ও ভালবাসার সহিত, প্রায় প্রতিদিনই, পতি-পত্নীর হৃদয়-কথা প্রকাশ পাইত ।

বিবাহের পর রামকান্ত পত্নীকে কিছু কিছু লেখাপড়া শিখাইলেন । তীক্ষ্ণবুদ্ধিশালিনী, অসাধারণ প্রতিভাবতী ভবানী, অতি অল্প আয়াসেই, স্বামি-প্রদত্ত শিক্ষা আয়ত্ত করিয়া ফেলিলেন । পরন্তু সেই শিক্ষা অপেক্ষা, জন্মার্জিত সংস্কার ঠাঁহার জীবনে অধিক কার্যকর হইয়াছিল । তাই ঠাঁহার এই শিক্ষার বিষয়, কাহারও বিশেষ মনোযোগ আকর্ষণ করে নাই ।

রাজ-পুল্লবধু হইলেও,—দাস দাসী সদা যোড়-হস্তে দণ্ডায়মান থাকিলেও, স্বামি-পরিচর্যা ও স্বামীর নিত্যপ্রয়োজনীয় কাজ-গুলি, ভবানী নিজহস্তেই করিতেন,—কাহাকেও করিতে দিতেন না । প্রতিদিন স্বামীর পাদোদক, দেব-চরণামৃতবোধে পান করিয়া কৃতার্থ হইতেন । সে সময়ে ঠাঁহার সেই ভক্তি-গাণ্ঠীর্ষ্যময়ী মূর্তি দেখিয়া, রামকান্ত কেমন আকৃষ্ট হইয়া পড়িতেন,—ঠাঁহার মুখে আর বাক্যক্ষুরণ হইত না । তিনি মনে মনে বলিতেন,—“সত্যই কি ভবানী আমার মানবী,—না ছদ্মবেশিনী কোন দেব-বালা—স্ত্রীরূপে আমায় ছলিতে আসিয়াছেন ?”

স্বামীকে যেমন, বৃদ্ধ ঋগুরকেও ভবানী সেইরূপ ভক্তিশ্রদ্ধা করিতেন । মহারাজ রামজীবন পুল্লবধুর সে পরিচর্যা ও সেবা-ব্রত দেখিয়া,—সাংসারিক সকল কার্যে বধুমাতার দূরদৃষ্টি পর্য্যবেক্ষণ করিয়া, অপার আনন্দ-সলিলে নিমগ্ন হইতেন । বিশেষ, পরিবারস্থ সকলকেই ভবানী কি এক স্নেহসূত্রে আবদ্ধ করিয়াছেন,—ঠাঁহার মাতৃভাবপূর্ণ মধুর ব্যবহারে সকলেই কেমন ঠাঁহার প্রতি আকৃষ্ট হইয়া শান্ত ও পবিত্রভাব ধারণ করিয়াছে যে, তাহা দেখিয়া বৃদ্ধের নয়ন-কোণে জল আসিত ।

ভবানীর স্বশ্রীঠাকুরাণী বহুপূর্বে স্বর্গারূঢ় হইয়াছিলেন ; সুতরাং ভবানীকে একরূপ বিয়ের ক'নে হইতেই এই এত বড় একটা বৃহৎ রাজ-সংসারের ভার গহণ করিতে হইয়াছে ;—তথাপি সে সংসার এমন সুশৃঙ্খল, শান্তিপূর্ণ ও পবিত্রতাময় । তাই বৃদ্ধ রামজীবন এত সুখী,—এমন আনন্দময় । এক এক দিন তিনি আপন মনের ভাব, বধুমাতার নিকট প্রকাশ করিয়াও ফেলিতেন । বলিতেন,—


“মা আমার ! শুভক্ষণে তোমায় গৃহে আনিয়াছিলাম, তাই নাটোর-রাজপরিবারের এই সুখৈশ্বর্য্য সার্থক হইল । নহিলে এতদিনে মা কে কোথায় ছড়াইয়া পড়িত,—জমিদারী বাড়ীঘর সব ভাগ-বাটোয়ারা হইয়া গাইত,—কাহারো সহিত কাহারো মনের মিল থাকিত না,—এ পুরী শ্মশানতুল্য হইত ;—মা আমার ! তুমিই করুণাময়ী দেবী-মূর্তিতে আসিয়া সব রক্ষা করিলে । --হায়, গৃহিণী স্বর্গারূঢ়া ;—আমারও দিন কুরাইয়া আসিয়াছে ;—তোমাকেই মা এ সংসার-ধর্ম্ম রাখিতে হইবে । তা মা, তুমিও তা রাখিতে পারিবে ;—রাজলক্ষী দেবীজ্ঞানে তুমি সকলের হৃদয়ে আসন পাইয়াছ ;—তোমার পুণ্য সকলই রক্ষা পাইবে । আশীর্বাদ করি মা, সৎপুলের জননী হইয়া পতিপুত্র লইয়া, চিরায়ুশ্রী হইয়া থাক ।”

স্বপ্নের এইরূপ শুভ আশীর্বাদ, স্বামীর পূর্বোক্তরূপ উচ্চ-ধারণা ও স্নেহ,—কুবেরের ভাণ্ডার তুল্য রাজার সংসার,—সে সংসারের সর্বময়ী কর্ত্রী ;—ভবানীর জীবন মধুময় হইয়া উঠিল ;—পরিপূর্ণ অনুরাগে তিনি সংসার-ধর্ম্ম পালন করিতে লাগিলেন ।





## দ্বিতীয় পরিচ্ছেদ ।



জীবনের এই মধুর প্রভাতে, শান্তিময় এই সুখবসন্তে, আপনার সাথীগণকে লইয়া থাকিতে, সকলেরই সাধ যায় । ভবানী এখন পতিগৃহবাসিনী ; সুতরাং জনক জননী কিংবা পিতৃকুলস্থ আত্মীয়-স্বজনের সহিত সাক্ষাতের বড় একটা সম্ভাবনা ছিল না ; কিন্তু বিধির বিধানে আর এক শুভ সাধে তিনি সফল-মনোরথ হইতে পারিয়াছিলেন । তাঁহার সেই বাল্যের সঙ্গিনী, খেলাধূলার প্রিয়সহচরী, সুখে দুঃখে সমভাগিনী—শিবানীকে মনে করিলেই তিনি দেখিতে পাইতেন । শিবানী এখন রাজ-পুরোহিতের পুত্রবধূ ; রাজবাটীর সন্নিকটেই তাঁহাদের বাস ; সুতরাং ভবানী সেই শৈশবসঙ্গিনীকে, ইচ্ছা করিলেই, আপন বাটীতে আনাইতে পারিতেন । শিবানীও, ভাবী রাজরাণীর সাদর আহ্বানে, শিবিকারোহণে, প্রায়ই সেখানে আসিতেন—আসিয়া সুখী হইতেন ।

বয়সে সমান ও শৈশবের খেলা-ধূলায় এক হইলেও, শিবানী মনে মনে, ভবানীকে বিশেষ ভক্তি করিত,—ভক্তিহেতু মান্যও করিত,—এমন কি সময়বিশেষে একটু ভয়ও করিত ।—ভয়

করিত ? হাঁ, ভয় করিত । উচ্চ মনোবৃত্তির প্রভাব দেখিয়া,—  
সর্বজীবে করুণা, দয়া, বাৎসল্য প্রভৃতি অবলোকন করিয়া,—  
সঙ্গমজনিত মনে মনে একটু ভয়ও করিত বৈ কি ? গুরুকে শিষ্য  
যে ভাবে দেখিয়া থাকে,—প্রণয়ে রঙ্গিণী এবং খেলায় সঙ্গিনী  
হইলেও,—শিবানী, ভবানীকে ঠিক সেই ভাবে দেখিত । বরং  
এখন বয়সের সঙ্গে সঙ্গে, সেই দর্শনজনিত ধারণা বা সংস্কার  
ক্রমশঃ গাঢ় হইয়া আসিতেছিল । শিবানী আসিয়া, ভবানীর  
নিকট হইতে স্বামিভক্তি শিক্ষা করিয়া যাইত । কি করিলে  
স্বামী পশ্চীল ও পুণ্যাত্মা হয় ; কি করিলে স্বামীর মন  
পবিত্র ও প্রক্লম থাকে ; কোন্ উপায়ে স্বামীর পরোপকার-  
প্রবৃত্তি ও আত্মহিত-ইচ্ছা বলবতী হয় ;—স্বামী-সেবাপরায়ণা  
সুশীলা শিবানী—ভবানীর নিকট সেই উপদেশ গ্রহণ করিতে  
আসিত । কারণ শিবানীর স্বামী কালীপদ শর্মা,—লোক বড়  
সুবিধার নন ।

শিবানী । বোন, কি করিলে স্বামী আমার সংস্বভাবাপন্ন হন ?  
কি করিলে গৃহে তাঁহার মন বসে ;—অসৎ-সঙ্গে মিশিতে  
তাঁহার আর প্রবৃত্তি হয় না ;—বোন, ভাল করিয়া তাহা আমায়  
বলিয়া বুঝাইয়া দাও ।—আমি যেন তাঁকে সুখী করিতে পারি ।

ভবানী । ভাই, কেহ কাহাকে শিখাইয়া বা বুঝাইয়া,  
তাঁহার অদৃষ্ট ভাল করিতে পারে না । যে যেমন ভাগ্য লইয়া  
আসিয়াছে, তাকে সেই মত ফল ভোগ করিতে হইবে । তবে  
ভাই, এই কথাটি সর্বদা মনে রাখিবে, পতির বাড়ী মহাগুরু  
স্ত্রীলোকের আর নাই । পতিই দেবতা, পতিই ঈশ্বর,—  
তোমার আমার আর দ্বিতীয় দেবতা কি দ্বিতীয় ঈশ্বর নাই ।—

সই পতিকে' ভাল করিতে হইবে ;—ধর্মশীল, সংযতচেতা, পরোপকারী গৃহী করিতে হইবে ;—বড় কঠিন সমস্যা, সন্দেহ নাই। কিন্তু ভাই গঙ্গাজল ! তুমি অমন আকুলি-ব্যাকুলি করিলে চলিবে না।—ইহা একদিনের কাজ নয়।

শিবানী। একদিনের কাজ নয় তা জানি। কিন্তু বোন, আর কত দিন তাঁর এমন ভাব দেখিব ? পাপমুখে গুরুনিন্দা করিতে নাই, কিন্তু ব্যথার ব্যথী তুমি,—তোমায় বলি,—

ভবানী বাধা দিয়া বলিলেন, “থাক্, আমার আর তাহা বলিও না ;—আমাকে তাহা তোমার বলিতে নাই ;—আমারও তাহা শোনা উচিত নয়।”

শিবানী অবাক হইয়া ভবানীর মুখের পানে চাহিয়া রহিল ; ভবানী বলিতে লাগিলেন,—“স্বামীর এমন অনেক দোষ বা গুণ থাকিতে পারে, যাহা কেবল স্ত্রীই জানে, আর স্ত্রীরও তাহা জানিয়া, মনে মনে রাখা উচিত। স্বামীর সদ্যবহার-জনিত সুখ পাও, মনে মনে ভোগ করিবে ; দুর্ব্যবহার-জনিত দুঃখ পাও, মনে মনে তাহা সহিবে ;—আর কাহাকেও তাহা বলিতে নাই। কথা প্রকাশ হইলে কাজ হয় না,—পদে পদে সে কাজে বিঘ্ন ঘটে।”

শিবানী। তবে কি গঙ্গাজল, তুমি আমার ‘পর’ ?

ভবানী। স্বামীর তুলনায় কতকটা বৈ কি ? তুমি তোমার স্বামীর দোষের কথা আমায় বলিবে, আর আমি কাণ পাতিয়া তাহা শুনিব ?

শিবানী। তোমায় বলিলে আমার বুক অনেকটা হাল্কা হয়, তাই তোমায় বলিয়া জুড়াইতে চাই।

ভবানী । এমন বুক হালুকা করিতে নাই ।—ব্যথা সহিতে অভ্যাস কর ;—ব্যথা সহিতে জানিলে ব্যথাহারীর দয়া পাইবে ।

শিবানী । গঙ্গাজল, নারীধর্ম কি এতই কঠিন ?

ভবানী । সকলের সকল ধর্মই কঠিন । তবে অভ্যাসের সঙ্গে সঙ্গে, কঠিন সহজ হইয়া যায় । তখন কঠিনকে আর কঠিন বলিয়া মনে হয় না । তুমি তোমার স্বামীর মনের গতি বুঝিয়াছ ? তিনি কি চান,—কিসে ভাল থাকেন, ভাল করিয়া ভাবিয়াছ কি ?

শিবানী । ভাবিয়াছি ।—কিন্তু তাঁর মনের মত হইতে গেলে ধর্মকর্ম সব ভাসিয়া যায় ।

ভবানী একটু ভ্রুকুটি করিয়া কহিলেন, “ধর্মকর্ম ? স্বামী ছাড়া তোমার আবার ধর্মকর্ম কি ? তোমার স্বামীই তোমার ধর্ম,—তিনিই তোমার কর্ম ।”

শিবানী কোন উত্তর না দিয়া, ফ্যাল ফ্যাল করিয়া ভবানীর মুখের পানে চাহিয়া রহিল । ভবানী বলিতে লাগিলেন,—

“আমাদের ধর্মকর্ম,—সকলই আমাদের স্বামী । বলিয়াছি ত, স্বামী ছাড়া আমাদের দ্বিতীয় ঈশ্বর নাই ? তবে যে আমরা দেবদেবীর পূজা করি,—জপতপ বারব্রত করি,—তাহা আমাদের নিজের জ্ঞান নয়,—সে আমাদের পতি-দেবতা স্বামীর মঙ্গলের নিমিত্ত । আমাদের মঙ্গলামঙ্গল,—ইহকাল-পরকালের একমাত্র কর্তা—স্বামী । স্বামীর চরণ-পূজাই আমাদের ঈশ্বর-পূজা ।—গঙ্গাজল ! তুমি এই ভাবে, বিকারশূন্য হইয়া, স্বামীকে দেখিতে অভ্যাস কর,—মনে কোন কষ্ট থাকিবে না ।—স্বামীও ক্রমে তোমার মনের মত হইবেন ।”

শৈশব-সঙ্গিনীর মুখে স্বামিতন্ত্রির এই কথা শুনিয়া, শিবানী স্তম্ভিত হইল ; মনে মনে বলিল,—“ইহারই নাম সতী-ধর্ম বটে !—মা আত্মশক্তি, সতি-শিরোমণি ! তুমি মা আমার নারীধর্মের সহায় হইও,—আমি যেন মা, নির্বিকারচিত্তে, এইভাবে, পতিপূজা করিয়া যাইতে পারি !—কিন্তু গঙ্গাজল আমার—দেবী না মানবী ?”

মনের আবেগে শিবানী, সজল নয়নে ভবানীর পদধূলি লইতে গেল ; ভবানী হরিতগতিতে পা সরাইয়া লইয়া, হাসিতে হাসিতে বলিলেন,—“বলি, ও আবার কি হয় ? আমাকে তুমি গুরুঠাকুরণ করিতে চাও নাকি ? অমন করিলে তাই, আমার ‘গঙ্গাজল’ বলা বন্ধ হ’বে ।”

ভবানী শিবানীকে অন্যরূপ মিষ্টকথায় তুষ্ট করিলেন ।

সেই সময় রামকান্ত সেই কক্ষে প্রবিষ্ট হইলেন । তাঁহাকে দেখিয়া শিবানী কক্ষান্তরে গেল, তারপর আপন আলয়ে চলিয়া আসিল ।

পরম রূপবান্ তরুণ যুবক রামকান্ত, তরুণী ভার্য্যা ভবানীর নিকট আসিয়া, বহুমূল্য দুই ছড়া মুক্তার মালা দেখাইয়া, হাসি-মুখে বলিলেন,—“দেখ দেখি, কেমন এ মালা ? এ সুন্দর গঙ্গমতি হার কোন্ কণ্ঠে শোভা পায় বল দেখি ?”

ভবানী সে হার দেখিলেন,—অতি চমৎকার সে হার !—হারের উজ্জ্বল আভায় গৃহ যেন আলোকিত হইয়াছে ।—সেই হার হাতে লইয়া, এতটুকুও ইতস্ততঃ না করিয়া, ভবানী অসঙ্ক-চিত্ত চিত্তে বলিলেন,—“দেবতার কণ্ঠ ছাড়া এ হার আর কোথায় শোভা পাইবে ? মানবীর কণ্ঠ মাংসপিণ্ড মাত্র,—

তাহাতে প্রাণ নাই। সে মৃত জড়-কণ্ঠে এ উৎকৃষ্ট শোভা মানাইবে কেন? স্বামিন্, যদি সাধ করিয়া এ হার আনিয়াছ, তবে জননী-জয়কালীর গলে ইহা উৎসর্গ কর।—আমরা প্রাণ ভরিয়া সে শোভা দেখিয়া জীবন সার্থক করি।”

রামকান্ত । প্রিয়ে, এ দুই ছড়ায় একটু ইতরবিশেষ আছে, দেখিতেছ? এক ছড়া তোমার, আর এক ছড়া দেবীকে দিব মানস করিয়াছি।

বুদ্ধিমতী ভবানী স্বামীর মনোভাব বুঝিলেন। বুঝিলেন যে, উৎকৃষ্ট হার ছড়া, স্বামী তাঁহাকেই দিতে চাহিতেছেন; আর অপেক্ষাকৃত নিকৃষ্ট ছড়া, দেবীকণ্ঠে দিতে ইচ্ছা করিয়াছেন। ভবানী আর স্বামীকে, তাঁহার মুখ ফুটিয়া সে কথা বলিবার অবসরই দিলেন না,—আগ্রহ-সহকারে কহিলেন,—“তা স্বামিন্! তবে আমাদের দুই জনের ইচ্ছাই পূর্ণ হউক—এ দু'ছড়া হারই জননী-জয়কালীর গলে উৎসর্গ করা হউক। মায়ের বৃহৎ মূর্তি,—এ দুই ছড়ায় মানাইবে ভাল।”

তারপর অতি সোহাগভরে স্বামীর গায়ে হাত বুলাইতে বুলাইতে, সেই স্বভাবসজল করুণাপূর্ণ চক্ষু স্বামীর মুখোপরি স্থাপিত করিয়া, মধুর কণ্ঠে বলিলেন,—“তুমি মাতৃকণ্ঠে হার দিয়া পুণ্যসঞ্চয় করিবে, আর আমি বুঝি তাহাতে বঞ্চিত হইব?”

উত্তর শুনিয়া রামকান্ত স্তম্ভিত হইলেন। তাঁহার দেবভক্তির প্রস্রবণ-মূলে, যে এক খণ্ড প্রস্তর পড়িয়া, স্রোত একটু রুদ্ধ হইবার উপক্রম হইতেছিল;—পুণ্যবতী সহধর্মিণীর অমৃতময়ী কথায়, সে পথ পরিষ্কৃত হইল। মুহূর্তের জন্য তিনি চক্ষু

মুদিত করিয়া, অন্তরের অন্তরে মায়ের পাদপদ্ম ধ্যান করিতে লাগিলেন । ধ্যানে দেখিলেন, ভক্তের মনের দুর্বলতা বুঝিয়া, মা মৃদু মৃদু হাসিতেছেন । তখন যেন তাঁহার চৈতন্য হইল । বুঝিলেন, ঠিকই হইয়াছে,—পত্নীর ব্যবস্থাই যুক্তিসঙ্গত হইয়াছে । বুঝিলেন,—“ভবানী আমার প্রকৃতই সহধর্মিণী বটে । ‘পত্নীই পতির ধর্মের সহায়’—এ ক্ষেত্রে ভবানী তাহার প্রত্যক্ষ প্রমাণ দেখাইল । কিন্তু আমি আজিও বুঝিতে পারিলাম না যে, ভবানী দেবী কি মানবী ?—আ মরি মরি ! ঐ দেহে এত রূপ !—আবার ঐ দেহের ভিতর যে অন্তর, তাহাতে এত গুণ ! এখন আমি মুগ্ধ কিসে—ঐ রূপে, না এই গুণে ?”

অনিমেষ নয়নে ধর্মশীল যুবক, পত্নীর সে অনিন্দ্যসুন্দর মুখপানে চাহিয়া রহিলেন । তাঁহার চোখে জল আসিল । তিনি সেই সজল চক্ষে, পুণ্যবতী পত্নীর অমৃতশীতল বক্ষে, মুখ লুকাইলেন ।

আর ভবানী ? তিনি স্বামীর এ সূক্ষ্ম মনোভাব, আপন মন দিয়া বুঝিয়াছিলেন । স্বামীকে তিনি সম্পূর্ণরূপে চিনিতেন ; তাই ঘটনার পারম্পর্য্য ও স্বামীর তৎকালীন মুখের আকৃতি দেখিয়া, তিনি সকলই বুঝিয়াছিলেন । বুঝিয়াছিলেন, ভগবদ্ভক্ত স্বামীর ভক্তির মূলদেশ আবার সরস ও স্বাভাবিক হইয়াছে,—তাঁহার ভুল ভাঙ্গিয়া গিয়াছে,—তাই চোখে এ জল দেখা দিয়াছে । মনে মনে তিনি বিশেষ আনন্দ অনুভব করিলেন । অন্লায়াসে স্বামীর এই ধর্মপথের সহায় হইতে পারিয়াছেন ভাবিয়া, এই আনন্দ অনুভব করিলেন,—সঙ্গে সঙ্গে আপনাকে ভাগ্যবতীও মনে করিলেন । ভক্ত ও নিঃস্বার্থ প্রেমিক, এই ভাবে



আত্মানন্দ উপভোগ ও আত্ম-সৌভাগ্যের নিদান স্থির করিয়া থাকেন ।

তবে যে ভবানী স্বামীকে মুখে বলিলেন,—“তুমি মাতৃকণ্ঠে হার দিয়া পুণ্যসঞ্চয় করিবে, আর আমি বুঝি তাহাতে বঞ্চিত হইব ?”—ওটি একটি সংকার্য্য-সাধনের প্রকৃষ্ট ও উৎকৃষ্টতম কৌশল ! এমত অবস্থায় কৌশল দোষের নয়,—গুণের । ভবানীর তখন মনে হইতেছিল,—“এ সময় যদি আমি স্বামীর ইচ্ছার পোষকতা করিয়া, আপন ব্যবহারের জন্য, ঐ উৎকৃষ্ট হার ছড়া গ্রহণ করি, তাহা হইলে স্বামীর তাহাতে ক্ষণিক পরিতৃপ্তি হইতে পারে বটে, কিন্তু তাঁহার পুণ্যপ্রবৃত্তি, আমা হইতেই মলিন হইল ।—কি, দেবতা আর আমি, এক পর্য্যায়ভুক্ত হইব ?—না, তাহা হইতেও কিছু অধিক !—উৎকৃষ্টটি আমার,—নিকৃষ্টটি দেবতার । ছি, ছি, আমি কি এতই লোভী ও অলঙ্কার-প্রিয় যে, স্বামী আমায় মুক্তার মালা দিয়া তাঁর ধর্ম্মপথ হইতে স্থলিতপদ হইবেন,—আর আমি ধর্ম্মপন্থী হইয়া তাহা দেখিব ?—কি ছার নারী আমি যে, আমার জন্য, আমার ইষ্টদেবতার এ অধোগতি ঘটবে ? না, তা হইতে দিব না ।”

আত্ম গুণ-ইচ্ছায় স্বামীর ইচ্ছা সংক্রামিত করিতে পারিয়া-ছেন বুঝিয়া, ভবানীও তখন পরিপূর্ণ অনুরাগে, সযতনে, বক্ষঃস্থিত স্বামীর কণ্ঠ, আপন বাহুলতায় বেষ্টন করিলেন । মুহূর্ত্তকাল এই ভাবে কাটিয়া গেল, মুহূর্ত্তকাল উভয়ের চক্ষু দিয়া ফোঁটা ফোঁটা জল পড়িতে লাগিল । সে জল কেমন, ভগবন্তুক পরম প্রেমিকই তাহা বলিতে পারেন ।

ভক্তির জয় হইল দেখিয়া, ভক্ত স্বামীকান্তও তখন, সম্পূর্ণ



নির্ঝিকারচিত্তে, সৰ্বাস্তঃকরণে, সেই দুই ছড়া বহুমূল্য যুক্তার মালা—জননী-জয়কালী দেবীর চরণে উৎসর্গ করিলেন ;—মাও যেন প্রসন্ন-অন্তরে, হাসিমুখে, সে মালা গ্রহণ করিলেন ;—সে মালা পরিয়া মন্দির যেন আলোকিত করিয়া রহিলেন ।—সেই বৎসরেই সামান্য একটু ঘটনাসূত্রে, মহারাজ রামজীবন রায়ের জমিদারীর আয় প্রায় লক্ষ টাকা বৃদ্ধি পাইল ।

এমনই হয় । মা-ই সব দেন । তুমি আমি তার কারণ নির্ণয় করিতে গিয়া, চোখে অন্ধকার দেখি মাত্র ।





## তৃতীয় পরিচ্ছেদ ।

কিন্তু, চিরদিন হায়, সমান না যায় ! উথান পতন, বৃদ্ধি  
হ্রাস, জুয়ার ভাটা,—প্রকৃতিরাজ্যের এ চির-নিয়ম ।  
যেমন অলোকে আসে, অমনি অন্ধকার উঁকি মারে ; যেমন  
বসন্তের আবির্ভাব হয়, অমনি সঙ্গে সঙ্গে গ্রীষ্ম ও বর্ষা পর-পর  
প্রস্তুত হইতে থাকে ; যেমন নদীর দু-কূল পরিপূর্ণ করিয়া প্রবল-  
বেগে জুয়ার আসে, অমনি তার গায়ে-গায়ে—বিপরীত দিকে—  
অতি ধীরে ভাটাও পড়িতে থাকে ।—জলের ভিতর কি হই-  
তেছে-না-হইতেছে তাহা কেহ দেখে না,—কিন্তু সঙ্গে সঙ্গেই  
এমনি হয় ;—তারপর ভাটার পূর্ণ আবির্ভাবে সকলে তাহা  
প্রত্যক্ষ করে । জুয়ার-ভাটার এই রহস্য,—শূণ্ণে একটা টিল—  
মাথার সোজাসুজি উপরপানে ছুড়িয়া দিয়াও বুঝা যাইতে পারে ।  
টিলটা ভূমি ছুড়িয়া উপরপানে চাহিয়া দেখ, টিল উপরপানে  
উঠিবার সঙ্গে সঙ্গেই, প্রতি পল—অণুপরিমাণেও নিম্নের দিকে  
নামিয়াছে ।—তবে উথানের দিকে তখন তাহার পূর্ণ গতি ছিল  
বলিয়া, তার ঐ অণুপরিমাণ পতনের দিকে কাহারও দৃষ্টি পতিত  
হয় নাই । টিলের এই উথান-পতন যেমন, নদীর ঐ জুয়া র-ভাটা

যেমন,—আর এক পক্ষে জীবের জীবন-মৃত্যুও তেমনি । যে পরিমাণে যতটুকু বাঁচিয়া আছি, ঠিক সেই পরিমাণে ততটুকুই মরিয়া গিয়াছি ;—এই নিশ্বাস পতনের সঙ্গে সঙ্গেও একটু জীবনক্ষয় হইল ।—এইরূপ জীবন ও মৃত্যু ঠিক গায়ের-গায়ের, এক বৃন্তে দুটি ফুলের মত,—পাশাপাশি জড়াইয়া আছে । সহস্র চেষ্টা কর, আর সহস্র হিসাব-নিকাশ ঠিক রাখ,—সময় হইলেই সব উলুটিয়া যাইবে । কে যেন অলক্ষ্যে, এই সংসার-নাট্যলয়ে,—জড়, প্রকৃতি ও জীব,—এই তিনকে লইয়া অভিনয় করিয়া যাইতেছে । অভিনয়ের বিষয় ও সময়ের ক্রম অনুসারে, আপন আপন প্রারম্ভমত,—কেহ রাজা কেহ প্রজা, কেহ প্রভু কেহ ভৃত্য, কেহ পণ্ডিত কেহ মূর্খ, কেহ সাধু কেহ চোর, কেহ ঋষি কেহ লম্পট, কেহ দেবতা কেহ বানর, কেহ সতী কেহ বেণ্ডার অভিনয় করিয়া যাইতেছে । জন্মার্জিত স্মৃতি-দুষ্কৃতি-অনুসারে, এই অভিনয়ের অংশ লইয়াই আবার পরস্পরের মধ্যে বিবাদ । যে চোর, সে ভাবিতেছে,—“আমি কেন সাধুর অংশ পাইলাম না” ; যে বানর সে ভাবিতেছে,—“আমি কেন দেবতা সাজিয়া বাহাদুরী লাভে বঞ্চিত হইলাম ।” এইরূপ যে বেণ্ডা, সে ভাবিতেছে,—“কি পাপে আমি বেণ্ডা হইলাম ? ভগবান্, একি তোমার অবিচার ?”—এইরূপ সজীব ও অতি-স্বাভাবিক অভিনয়, সংসার-রঙ্গালয়ে প্রতি-নিয়তই চলিতেছে ;—রঙ্গস্বামী নীরবে তাহা দেখিতেছেন ও মনে মনে হাসিতেছেন । বিলাসী নবীন নধর রূপগর্ভিত যুবকের বিলাসসজ্জা দেখিয়া, মহাকাল যম যেমন অলক্ষ্যে দাঁড়াইয়া হাসিয়া থাকেন,—সেইরূপ হাসি হাসিতেছেন । পরকালবিস্মৃত অজর-অমর-জ্ঞানী বিষয়ি-লোকের—ভূমিবিভাগ-বিবাদ দেখিয়া

বসুন্ধরা যেমন মনে মনে হাসেন, সেইরূপ হাসি হাসিতেছেন ।  
 দুষ্টনারীর জারজ-সন্তানকে কোলে লইয়া, আপন সন্তানবোধে  
 সেই সন্তানের স্নেহ মুখচুষন করিয়া, দুর্ভাগা স্বামী যেমন প্রব-  
 ক্ষিত হয় এবং সেই প্রবঞ্চনা-জনিত সুখ উপভোগ করিয়া কল-  
 কিনি ভাষ্যা যেমন মুখ মুচকিয়া মনে মনে হাসিয়া থাকে,—  
 নটগুরু নীরবে যেন ঠিক সেইরূপ হাসি হাসিতেছেন । পরন্তু  
 এই অভিনয়ের মালিকও তিনি,—জীবের জন্ম হইতে মৃত্যু  
 পর্যন্ত তাহার অদৃষ্ট-ছক নির্দেশ করিয়া তিনিই তাহাকে সংসারে  
 পাঠাইয়াছেন ;—নাকে দড়ি দিয়া মনের সাধে তাহাকে নাচাইয়া  
 বেড়াইতেছেন ;—তবুও হায়! সে তার স্বভাব ও সংস্কার ভুলিতে  
 পারে না,—অহঙ্কার ও দান্তিকতার বশে, সর্বদা রেষারেষী ও  
 ঘেষাঘেষী করিয়া জলিয়া মরে । অপিচ, এই সর্বমুলাধার ব্রহ্মাণ্ড-  
 স্বামীর লীলামাহাত্ম্য যে বুঝিতে পারে, সেই ভাগ্যবান্ আপনা  
 হইতেই শান্ত ও সংযত হয়,—তাহার আর লাফালাফি ও দাপা-  
 দাপি বড় একটা থাকে না,—সে সেই অনন্ত শান্তিময়ের শীতল  
 চরণে শরণ লইয়া, নিশ্চিন্তমনে আপন আরক কাজ করিয়া যায় ।  
 কেন না, সে তখন বুঝিতে পারে, ঐ অভিনয়ের অংশের রাজা বা  
 প্রজা কিংবা প্রভু ও ভৃত্য সাজায় বড় একটা বাহাহুরী নাই,—  
 যত বাহাহুরী,—যে অংশ গ্রহণে বাধ্য হইতে হইয়াছে,—শত  
 বাধা সত্ত্বেও, সেই অংশের উপযোগী—ঠিক ও যথাযথ অভিনয়  
 করিয়া যাওয়া । কেন না, তখন সে সম্যক্রূপে বুঝিতে পারে,  
 অভিনয়—অভিনয়,—হৃদয় ভাঁড়ের নাচ মাত্র,—যবনিকা-পাত  
 হইলেই,—বাস্! সব অহঙ্কার!—আর কোথাও কিছু নাই,—  
 সব ভেঁ। ভাঁ।—সুতরাং ইহাতে ক্ষোভ বা আফ্লাদ কি ?

এই জীবের যেমনি, প্রকৃতিরও তেমনি ; অথবা প্রকৃতির  
যে রূপ, জীবেরও তদনুরূপ—কেবলই উলট-পালট, কেবলই  
ভান্সা-গড়া, কেবলই জুয়ার-ভাঁটা,—কেবলই রূপান্তর। সহস্র  
বিঘ্না-বুদ্ধি-সত্ত্বেও, কালের হস্তে কাহারও নিস্তার নাই। কেন  
না, কাল-স্রোত অমোঘ ও অপ্রতিহত। কাল, তাহার অবশ্য-  
স্তাবী প্রবল প্রতাপে, আপন কাজ করিয়া যাইবেই যাইবে।  
যতদিন যার ভোগ, ততদিন সে ভুগিয়া মরে মাত্র। কেহ সুখে  
মরে, কেহ দুঃখে মরে ;—কিন্তু ভোগে দুই জনেই। কে কম,  
কে বেশী, তাহা ভুক্তভোগীই বলিতে পারে।

নাটোরাদিপতি মহারাজ রামজীবন রায়ের এখন সেই  
ভোগের কাল ফুরাইল,—অথবা নূতন ভোগ আরম্ভ হইল।  
সহস্র তদ্বির-চেষ্টা করিয়া, কিংবা বুদ্ধি-ফিকির খাটাইয়াও তিনি  
এই ভোগের হস্ত হইতে পরিত্রাণ পাইলেন না। তাঁহার জীবন-  
নদীতে ভাঁটা ত লাগিয়াই ছিল, এখন তাঁহার বড় সাধের বিষয়-  
নদীতেও ভাঁটা লাগিল। যে ঘরোয়া-বিবাদরূপ বিদ্বেষ-বহ্নি  
তিনি অতি সন্তর্পণে, অতি ভয়ে ভয়ে নিবাইয়া আসিতেছিলেন,  
—সময়গুণে তাঁহার অবসানের সম-সময় হইতেই,—সেই বহ্নি  
আবার দপ্ করিয়া জলিয়া উঠিল। রঙ্গ-স্বামী সংসার-রঙ্গালয়ে,  
এবার তাঁহাকে উপলক্ষ করিয়া, তাঁহার ছায়াশ্রিত পাত্রমিত্র  
পুত্রপরিবারবর্গকে, কোন্ অংশের অভিনয় দিবেন, তাহা কে  
বলিতে পারে ?

রামজীবনের এক ব্রাহ্মপুত্র ছিলেন, তাঁহার নাম রামরতন  
রায়। সেই রামরতনই এই নূতন অভিনয়ের নায়কস্বরূপ  
নিযুক্ত হইলেন। কেন, কি জগৎ, বা কাহার ইচ্ছায়, তাহা ঠিক

করিয়া বলা বড় কঠিন । সময়স্রোতে যেমন ঘটিয়াছিল, আমরা তাহাই বলিয়া যাইব মাত্র ।—দোষ বা গুণ কাহার কত অধিক, পাঠক তাহার বিচার করিবেন ।

রামকান্তকে পোষ্যপুত্র গ্রহণের পূর্বে, কালিকাপ্রসাদ নামে রামজীবনের এক পুত্র ছিলেন । সেই পুত্র উপযুক্ত হইয়া কালগ্রাসে পতিত হন । পিতা-মাতার বৃকের পাঁজর যেন ভাঙ্গিয়া পড়িল । একমাত্র পুত্রের অকাল নিধন,—যে দুইদিন পরে রাজতলে বসিবে,—সেই বংশধর, কুলের শেখর,—সংসার অন্ধকার করিয়া চলিয়া গেল,—বৃদ্ধ রামজীবনের সেই মর্মান্তিক কষ্ট বুঝাইবার নহে । জ্ঞাতি বন্ধু সকলেই ভাবিল,—এইবার রামরতনেরই কপাল খুলিল,—সেই-ই এইবার উত্তরাধিকারি-স্বরূপ, নাটোররাজ্যের বুবারাজরূপে পরিগণিত হইবে । কেন না, রামজীবনেরা তিন সহোদর ছিলেন । তিন জনেই একানবর্তী । স্মৃতরাং নাটোর জমিদারী,—রামজীবনের নামে লিখিত হইলেও,—তাহাদের এজ্জামালি সম্পত্তি । এখন এই এজ্জামালি সম্পত্তি, রামজীবনের অবসানে, তাহার একমাত্র ভ্রাতৃপুত্রই পাইবে,—সকলেই এইরূপ সিদ্ধান্ত করিল ।

কিন্তু রামজীবন, সকলের এ সিদ্ধান্ত ভঙ্গ করিয়া দিলেন । যে কারণেই হউক, তিনি তদানীন্তন এক প্রধানতম কুলীনের ঘর হইতে এক দস্তকপুত্র গ্রহণ করিলেন । এই দস্তকপুত্রই—আমাদের রামকান্ত ।

তা রামকান্ত দস্তকপুত্র হইলেও,—বিद्या, বিনয়, ধর্মনিষ্ঠা প্রভৃতি গুণে, অতি অল্পদিন মধ্যে, রামজীবনের বিশেষ স্নেহভাজন হইয়া উঠিলেন । এমন কি, বৃদ্ধ রামজীবনও যেন, ক্রমে

কুমার কালিকাপ্রসাদের শোক ভুলিয়া, রামকান্তকেই আপন পুত্র বলিয়া মনে করিতে লাগিলেন । কিন্তু সুখ তাঁহার অদৃষ্টে নাই ;—তাই এই সময় তাঁহার পুণ্যবতী সহধর্মিণীও তাঁহাকে ত্যাগ করিয়া গেলেন ।

রামকান্তের প্রতি বৃদ্ধের এতটা স্নেহ-মমতার আধিক্য দেখিয়া, রামরতনের পক্ষীয়গণ মনে করিলেন,—“তবে আর রামরতনের আশা-ভরসা কিছু রহিল না ;—বৃদ্ধের অন্তর্ধানের সঙ্গে সঙ্গে একমাত্র কুমার রামকান্তই নাটোরের সর্বময় কর্তা হইবে ।”

কিন্তু বস্তুতঃ, রামজীবনের তাহা আদৌ ইচ্ছা ছিল না । ভ্রাতৃপুত্র এককালে বঞ্চিত হয়,—ইহা তিনি স্বপ্নেও ভাবেন নাই । তবে কেহ কেহ রামরতন সবেও তাঁহার দস্তক পুত্র গ্রহণ, দোষাবহ মনে করিতেন বটে । যাই হউক, বৃদ্ধ, ভ্রাতৃপুত্র রামরতনকে ছয় আনা, এবং রামকান্তের নামে দশ আনা জমিদারী লিখিয়া চিহ্নিত করিয়া দেন ।

তা এই হইতেই যে অমন অনর্থকর গৃহবিবাদ উঠিবে বা উঠিতে পারে, তাহা তিনি স্বপ্নেও ভাবেন নাই । কিন্তু ভাবিলেই বা কি করিতে পারিতেন ? যাহা হইবার, তাহা ত হওয়া চাই ? অক্ষ-স্বামীর অদৃষ্ট-ছকে সকলকে ত পড়া চাই ?

মধ্যে দুইবার এই বিষয়-বিভাগের কথা উঠে ।—রামকান্তকে দস্তকপুত্র গ্রহণের সময় একবার ; রামকান্তের বিবাহের সময় আর একবার । দুইবারই রামজীবন—ঐ দশ আনা ও ছয় আনার কথাই বলেন । কিন্তু তাহাতে রামরতনের পক্ষীয়গণ সন্তুষ্ট হন নাই । আধা-আধি আট আনা রকমের বলিলেও যে,



তাঁহারা সম্মত হইতেন, এমনও বোধ হয় না। কেন না, তাঁহাদের মনে মনে এই মতলবই ছিল,—“বুড়া মরিলে, এই সমস্ত জমিদারীই রামরতনের একার হইবে,—আধা-আধিই বা কি? আর দত্তকপুল?—উহা অসিদ্ধ প্রমাণ করা যাইবে।”

ফলে, এই সকল অতি-হিতৈষী আত্মীয়গণ, মধ্যে মধ্যে রামজীবনকে বড়ই উত্ত্যক্ত করিয়া তুলিতেন।—তাঁহাদের পারিবারিক সুখশান্তি সকলই নষ্ট করিয়া ফেলিতেন। কখন বা ছুইদলে বাঁধাইয়া দিয়া, ভিতর ভিতর মজাও দেখিতেন। রামকান্তের বিবাহের সময়ও তাঁহারা বিধিমতে বাদ সাধিয়া-ছিলেন। সে পক্ষে কোনওরূপ ক্রটি হয় নাই। কিন্তু ভবিতব্য রোধ করিবার সাধ্য, মানুষের নাই। তাই কুমার রামকান্ত শক্রের মুখ মলিন করিয়া, মহাসমারোহে, লক্ষ্মী-স্বরূপিণী ভবানী দেবীকে বিবাহ করিয়া আনেন।

যে কারণেই হউক, এই বিবাহের পর, কিছুকাল, উত্তর পক্ষের মধ্যে আর কোন বিবাদ-বিসংবাদ হয় নাই,—পারিবারিক সুখশান্তি আবার ফিরিয়া আসিয়াছিল; আবার আত্মদ্রোহ ও আত্মকলহ ঘুচিয়া, রাজপুরী আনন্দের হাসি হাসিয়াছিল।—তাহা ভবানীর পুণ্যবলে, কি বিধাতার ইচ্ছাফলে, তাহা কে বলিবে?

বলিয়াছি ত, রঙ্গস্বামী অলক্ষ্যে থাকিয়া, সমগ্র সংসারটাকে লইয়া প্রতিনিয়তই সজীব অভিনয় করিয়া যাইতেছেন? কেবলই প্রাক্তন ও কালের মাত্রাভেদে,—কেহ রাজা, কেহ প্রজা, কেহ আধীর, কেহ ফকির সাক্ষিয়া বেড়াইতেছে মাত্র। এ হিসাব



কৃতিত্ব বা পৌরুষ কাহারও নাই ;—দোষ বা গুণও কাহারও নাই । যদি থাকে, ত তাহা জন্মার্জিত অভুক্ত কর্মফলের ।

অস্তিম-শয্যায় শায়িত হইয়া, অতুল ঐশ্বর্যপতি মহারাজ রামজীবন রায়, এইরূপ এবং আরও অনেকরূপ কথা ভাবিতে লাগিলেন । ভাবিয়া দেখিয়া বুঝিলেন,—সকলই সেই চক্রধারীর চক্র,—মানুষের হাত কিছুই নাই ।

তথাপি, তিনি বিষয়ী হিসাবে, শেষব্যবস্থাও করিলেন । কুমার রামকান্ত ও প্রধান অমাত্য দয়ারামকে ডাকাইলেন । উভয়ের দুই হাত এক করিয়া সম্মুখে বসাইলেন । বলিলেন,—

“রামকান্ত, তুমি দয়ারামকে কি বলিয়া সম্বোধন কর ?”

রামকান্ত । আপনার আদেশমত ‘দাদা’ বলিয়া ইহাকে ডাকি এবং জ্যেষ্ঠের গায় সম্মান করি ।

রামজীবন । চিরদিন এই ভাব থাকিবে ? রাজতন্ত্রে বসিয়া ইহা ভুলিয়া যাইবে না ?

রামকান্ত । পিতা, কেন আজ সন্তানকে এমন অবিধাসের চক্ষে দেখিতেছেন ? আপনার আদেশ আমার জীবনের শেষ মুহূর্ত্ত পর্যন্ত প্রতিপালিত হইবে ।

পরে বৃদ্ধ, দয়ারামের পানে চাহিয়া বলিলেন, “দয়ারাম, তোমাকে আর অধিক বলিতে হইবে না,—আজ হইতে তুমিই কুমার রামকান্তের একমাত্র অভিভাবক হইলে । রাজ্যপরিচালন সম্বন্ধে তুমি যে পরামর্শ দিবে, কুমার সেইমত কার্য করিবে । বিষয়-বৈভবে শক্র পদে পদে ; তাহা তুমি জান । রামকান্তকে সদা চোখে চোখে রাখিও ।—তোমার ধর্ম তুমি শেষ পর্যন্ত রাখিতে পারিবে বলিয়া আমার বিশ্বাস ।”

দয়ানাম । সে মহারাজের অনুগ্রহ । আপনাকে আমি পিতা বলিয়া জানিয়া আসিয়াছি, কুমারকেও কনিষ্ঠ বলিয়া জানিব । ‘কি ছিলাম আর কি হইয়াছি’—ইহা যখন আমার মনে অনুকম্পা জাগিয়া আছে, তখন আশা করি, মহারাজের আশীর্ব্বাদে, এ রাজ-ভৃত্যে, অকৃতজ্ঞতা ও বিশ্বাসহস্তার, পাপ স্পর্শিবে না ।

রামজীবন । তাহা আমি জানি । জানি বলিয়াই, তোমাকে এই গুরুভার অর্পণ করিলাম ।—রামকান্তকে তোমার হস্তেই সঁপিয়া দিলাম । এখন আমি নিশ্চিত হইয়া মরিতে পারিব ।

কিন্তু, তাই কি ? নিশ্চিত হইয়া তিনি মরিতে পারিলেন কি ? বিষয়ী লোক কেহ নিশ্চিত হইয়া মরে না । যে বিষয়ী নয়, কিন্তু মনে মনে বিষয়ের কামনা করে, সে-ও নিশ্চিত হইয়া মরিতে পারে না ;—মরণকালে বিষয়ের স্বপ্ন দেখে । নিশ্চিত হইয়া মরিতে পারে সে-ই,—যে জীবন ও মৃত্যু একই চক্রে দেখিয়া আসিতে পারিয়াছে । নিশ্চিত হইয়া মরিতে পারে সে-ই,—যে ভগবানে নির্ভর ও পরকালে বিশ্বাস ধ্রুবরূপে করিয়া আসিতে পারিয়াছে । হাসিতে হাসিতে, উদ্বেগহীন অন্তরে, প্রশান্ত হৃদয়ে মরিতে পারে সে-ই,—যে ধর্ম্ম ও সত্যকে জীবন-সম্বল করিতে গিয়া, আজীবন মরণাধিক জালা ও অসহ অভ্যাচার সহিয়া আসিয়াছে । মরণকালে ইহঁারাই চক্ষু মুদিয়া, সেই পরমপদ ধ্যান করিতে করিতে, নিশ্চিত ও সুখসুপ্ত হইয়া থাকেন,—তোমার আমার ভাগ্যে, শতক্রমেও সে সৌভাগ্য ঘটিবে না ।

রামজীবন ত একরূপ বন্দোবস্ত করিয়া দিয়া, কালের

আস্থানে চলিয়া গেলেন ;—এখন সেই বন্দোবস্ত-মত কি তাহার সংসার চলিবে ?


না । অদৃষ্ট, কাল ও পাত্রের যথাযথ যোজনাই হইয়াছে ;—এখনকার অভিনয় অনুরূপ । রামকান্ত ও ভবানীর জীবন-নাটকের নূতন পট উন্মোচিত ;—রঙ্গস্বামী এখন নূতন খেলা খেলাইবেন ।

হায় ! কেমন এ খেলা ? এ খেলার কি অবসান নাই ?

না । বসন্তের পর বর্ষা আছে, জুয়ারের পর ভাঁটা আছে, আলোর পর অন্ধকার আছে,—একভাবে কাহারও দিন চলিতে পারে না ।—সৃষ্টির প্রারম্ভ হইতে এইরূপ উলট-পালট খেলাই চলিয়া আসিতেছে । বৃদ্ধি হ্রাস, উত্থান পতন, ঘাত প্রতিঘাত,—ইহা প্রকৃতির নিয়ম,—কালেরও নিয়ম ।

এখন সেই কাল সমুপস্থিত । অদৃষ্ট চক্রের নিষ্পেষণে, কাল—আধার লইয়া ঘুরিতেছে ;—ক্রিয়ার পর প্রতিক্রিয়া আরম্ভ হইয়াছে ;—ব্যাপ্তের করাল দংশন হইতেও নরদেহ ছিনাইয়া লওয়া সহজ,—তথাপি কালের গ্রাস হইতে জীবকে পৃথক করিয়া-লইবার কিছুমাত্র উপায় নাই । কাল, প্রতিনিয়তই এই জীব-দেহে ঘুরিতেছে, কিন্তু দেখা দেয় না,—সেই জগৎ ভাষায় তাহার নাম অদৃষ্ট । এখন সেই অদৃষ্টের পূর্ণ প্রকোপ প্রকটিত ;—কাহার সাধ্য তাহার গতিরোধ করে ?

তবে, এস রামকান্ত,—এস ভবানি ! তোমরাও কিছুদিন এই কাল-শ্রোতে কূটার মত ভাসিয়া বেড়াও ! তোমাদের জীবন-নাটকের নূতন পট উন্মোচিত ;—এখন রঙ্গস্বামী তোমাদিগকে লইয়া কি খেলা খেলান, আমরা দেখি !



## চতুর্থ পরিচ্ছেদ ।

— :: —

“কি কি !—তাও কি হয় ?—তুমি কি বলিতেছ, আমি  
বুঝিতে পারিতেছি না !”

“ভায়া হে, এ সব কার্যে সাহস চাই,—মরীয়া না হইলে  
এ সব কাজ হয় না ।

“কাজ নাই আমার এমন কাজে !—উঃ ! নরহত্যা ? রক্ত-  
পাত ?—তুমি বল কি ?”

নির্জন এক কক্ষে বসিয়া, দুই ব্যক্তিতে এইরূপ কথোপকথন  
হইতেছিল ।

তখন গভীর নিশীথ-কাল । স্থান—এক নির্জন উদ্যান-বাটা ।  
তাহার চতুর্পার্শ্বে জন-মানবের বসতি নাই । বৃহৎ বাউগাছ  
বায়ুভরে প্রেতঘোনির গায় সাঁ সাঁ শব্দ করিতেছে । দূরে বংশ-  
শ্রেণী হেলিতেছে, হুলিতেছে, পরস্পর সংশ্লিষ্ট হইয়া এক একবার  
ভীতিসূচক ক্যাচ্-কোচ্ শব্দ করিতেছে । শৃগালকুল থাকিয়া  
থাকিয়া ডাকিয়া উঠিতেছে । অমাবস্তার রাত্রি ; অন্ধকার কুপ-  
হুপ করিতেছে । আকাশে কোটি কোটি—অনন্ত কোটি নক্ষত্র

পৃথিবী পানে চাহিয়া রহিয়াছে;—যেন পৃথিবীর অনন্ত পাপ অনন্ত চক্রে দেখিবে বলিয়া ওরূপভাবে চাহিয়া রহিয়াছে । সেই গভীর নিশীথে, সেই উন্মানে বসিয়া একজন অগ্ন্যনকে বলিতেছে,—

“উঃ ! নরহত্যা ? রক্তপাত ? তুমি বল কি ?”

দ্বিতীয় ব্যক্তি উত্তর করিল,—“বলি এই যে, আপন ইষ্ট-সিদ্ধির জন্য, যেরূপে হউক, পথ পরিষ্কার করিতে হইবে ।—তাতে নরহত্যা হইক, আর রক্তপাত হইক !”

প্রথম ব্যক্তি । উঃ ! কি ভীষণ তোমার মন্ত্রণা !

দ্বিতীয় ব্যক্তি । এমন সব বড় কাজ করিতে হইলে, বুকে একটু বলসঞ্চয় করা দরকার ।—এই লও, মায়ের এই মহাপ্রসাদ-টুকু অমৃতবোধে পান কর ;—মাথা খেলিবে ভাল ।

প্রথম ব্যক্তি । না, উটি আমা হইতে হইবে না ।—তোমায় ত আমি কতবার বলিয়াছি যে, মদ আমি জীবনে স্পর্শ করিব না ?—তা তুমি কেন আমার পুনঃপুনঃ এরূপ লোভ দেখাও ?

দ্বিতীয় ব্যক্তি । কি বলিলে,—মদ ? এমন কথা মুখে আর উচ্চারণ করিও না বলিতেছি ।—বল যে, মায়ের প্রসাদ । তা এ প্রসাদ তোমার অদৃষ্টে নাই,—আমি কি করিব ?

এই বলিয়া সেই কৃষ্ণকায়, রক্তবর্ণ ষ্ণিতি-চক্ষু, চুলদাড়ি-নখবিশিষ্ট ভীষণমূর্তি—ভাঙপূর্ণ সুরা ঢক্-ঢক্ করিয়া খানিকটা গিলিয়া ফেলিল ।

প্রথম ব্যক্তি তখন একটু হাসিয়া বলিল,—“কালীপদ, এরি নাম বুঝি তোমার মায়ের মহাপ্রসাদ পান ? বলি, এ কু-অভ্যাসটা ত্যাগ কর না ? ইহাতে লোক-সমাজে ক্রমেই:

যে তোমাদের মাথা-হেঁট হইতেছে ? শেষে কি সকলে জুটিয়া জাত্যন্তর করিয়া বসিবে ?”

দ্বিতীয় ব্যক্তি তখন গলাটা একটু সাড়া দিয়া, স্পর্ধাভরে বলিল,—“হাঁ, জাত্যন্তর অমনি করে সকল বেটাই ? হঁ-হঁ, আমার এ তান্ত্রিক মতের সাধনা;—এর মর্শ্ব তারা বুঝিবে কি ?”

প্রথম ব্যক্তি । তারা না বুঝুক,—ব্রাহ্মণের ছেলে,—গলায় একটা পৈতা র'য়েছে,—এতটা বাড়াবাড়ি করা কি ভাল দেখায় ?

দ্বিতীয় ব্যক্তি তখন যেন একটু রাগিয়া, শ্লেষভরে বলিল,—“আর তুমি রামরতন রায়,—কপালে ঐ রাজটীকে র'য়েছে—তুমি যে এই ঘুটঘুটে অন্ধকার রাতে, এই বাগানে ব'সে, আর পাঁচ-বেটার সঙ্গে মতলব এঁটে, একজনের সর্বনাশের কিকিরে আছ,—এটাও কি ভাল দেখায় ?”

কড়া জবাব পাইয়া, প্রথম ব্যক্তির মুখ একটু শুকাইল । তখন অন্য কথা পাড়িয়া, প্রথম—দ্বিতীয়কে সাহুনা করিল ।

দ্বিতীয় বলিল,—“হাঁ, এই বেশ । ঘেঁটিয়ো না বাবা !”

প্রথম,—রামজীবনের ভ্রাতৃপুত্র—রামরতন । দ্বিতীয়,—রামজীবনের পুরোহিত-পুত্র—কালীপদ । কালীপদ—শিবানীর স্বামী । দিবারাত্র মদ-ভাং খাইয়া, হতভাগা মাথা ধারাপ করিয়া ফেলিয়াছে ।—কাকে কি বলে, ঠিক নাই ।

রামরতনের চক্রান্ত,—নবীন রাজা রামকান্তকে নাটোরের রাজতন্ত্র হইতে সরাইয়া দিয়া, সমগ্র রাজসাহী জমিদারীটা কোশলে হস্তগত করা । তাই এই এত রাতে, এই নির্জনে

তাঁহার অবস্থিতি ।—মন্ত্রণাদাতা হিতৈষিগণ এখনও আসিয়া পঁহুছেন নাই ।

কালীপদ রামরতনের ঠিক মন্ত্রণাদাতা নহে,—তবে সংপ্রতি সঙ্গের সাথী—একরূপ বন্ধু বটে । কেননা, কিছুদিন হইল, কালীপদ—ভরা-গাঙ্গে নৌকা-ডুবি হইতে রামরতনের প্রাণ রক্ষা করিয়াছিল ;—সেই হইতে পরস্পরের মধ্যে মেলা-মেশা । দ্বিতীয়তঃ, রামকান্ত যাহাকে ত্যাগ করিয়াছে,—রামরতনের তাহাকে আপনায় করিতেই হইবে ;—তা সে মদ্যপায়ী পুরোহিত-পুল্লই হউক, আর পথের পথিক বাঙ্গু গলা-কাটা ডাকাতই হউক । জ্ঞাতি-হিংসা এইরূপেই চরিতার্থ করিতে হয় । আপন নাক কাটিয়াও জ্ঞাতির যাত্রাভঙ্গ করিতে হয় ।

রামকান্ত নিষ্ঠাবান্ হিন্দু জমিদার ;—মদ্যপায়ী ব্রাহ্মণকে কুল-পুরোহিত-পদে রাখিতে পারেন না ;—তাই প্রথম প্রথম অনেক ভয়-মৈত্রী দেখাইয়া,—শেষে বহুবিধ শাসনেও সংশোধন করিতে না পারিয়া, তাহাকে ত্যাগ করিতে বাধ্য হইলেন । রাজ-বাটা হইতে জন্মের মত রুটা উঠিল দেখিয়া, কালীপদ, রামকান্তের উপর দাদু তুলিতে সচেষ্ট হইল । শেষে রামরতনের সহিত মিলিত হইয়া, সেই মতলবেই বেড়াইতে লাগিল । রামরতন দেখিলেন, যা-শত্রু-পরে-পরে,—এই অপমানিত প্রতিহিংসা-পরায়ণ লোকটাকে হাতে রাখায় লাভ আছে ;—জ্ঞাতিবাদ সাধিতে, সময়-শিরে, ইহার দ্বারা কোন-না-কোন কাজ হইতে পারিবে । সেই অবধি কালীপদ শর্মা রামরতনের এক জন সহচর হইল । মদ্যপ সহচরের মুখ-আটকানো দায় ; তাই

হতভাগা,—নেশার ঝোঁকে কখন কি বলিয়া বসে, ঠিক নাই ;  
আজও সেইরূপ একটা বেয়াদবি কথা বলিয়া ফেলিল ।

কথাটা রামরতনের মর্মে গিয়া বিঁধিল । কিন্তু তাহা সত্ত্বেও  
তিনি তাহা গায়ে মাখিলেন না । যাহার দ্বারা কাজ লইতে  
হইবে, বিষয়ী লোক তাহার কথায় চটে না । রামরতনও  
চটিলেন না ;—পরন্তু সহচরের মনস্তপ্তির জগু অগু কথা  
পাড়িলেন ।

এই সময় তাঁহার হিতৈষী মন্ত্রিবর্গ কতকগুলি খাতাপত্র ও  
দলিল-দস্তাবেজ লইয়া সেইখানে আসিলেন । এক জন প্রস্তাব  
করিলেন,—“আমি বলি কি, আর অতটা হাঙ্গাম-হুজুতে কাজ  
নেই,—দয়্যারামকে ধ’রে, আধা আধিই রফা ক’রে ফেলা  
যাক ।—কি বলেন আপনি ?”

রামরতন পূর্ব হইতেই এ প্রস্তাবে নিম্নরাজী ছিলেন ; এখন  
সেই ভাব দেখাইতে-না-দেখাইতে, দ্বিতীয় হিতৈষী, প্রথমের  
প্রতি রাগিয়া উঠিয়া, একটা স-ক্রকুটি হুম্বকি দিয়া বলিল,—  
“কি বলিলে তুমি ? আধা-আধি রফা ? কেন, একি ভিন্কা  
নাকি ?—তাই সেই শূদ্ৰটা হাতে তুলে যা দেবে, তাই নিতে  
হবে ? ওতে মেটবার হ’লে, রামজীবন রায় বেঁচে থাকতে-  
থাকতেই মিটতো ।—সলিয়ে-কলিয়ে ধ’লে, বুড়ো ছ-আনার  
উপর আরো দু-আনা উঠতো । তা যখন হয়নি,—তখন, হয়  
এসপার, কি নয় ওসপার ।”

“তৃতীয় । তা বৈ কি ? গায়ে প’ড়ে—মিটুতে গেলেই  
ওরা পেয়ে ব’সবে । ও, মিটাবার নামটিও কেউ মুখে এনো না ।  
চতুর্থ । বটেই ত ! মেটামিটি হয় কার সঙ্গে ? সরিক



ব'লে মানলে ত মেটামিটি ? নিজের হক গণ্ডা,—তার আবার মিটবে কি ?

পঞ্চম । বেঁচে থাকো মোর ভাইরে !—ঠিক ব'লেছ !—  
রামকান্ত যে সরিক্, কিংবা জাত্, অথবা জ্যেষ্ঠার পুষ্টিপুতুর,—  
এ কথা মানলে ত ? ওকে একেবারে আমলেই আনা হ'বে  
না ।—প্রমাণ ক'ন্তে হবে যে, কুমার রামরতনই মৃত রামজীবন  
রায়ের একমাত্র ওয়ারিসন্,—কশ্মিন্কালে তিনি পুষ্টিপুতুর  
কি ধম্মপুতুর—এ সব কিছু নেন্ নি,—ও-সব জাল !

প্রথম । পারবে ?

পঞ্চম । না পারি ত তুমি আমায় কুকুর ব'লে ডেকো ।—  
তবে ( রামরতনের প্রতি লক্ষ্য করিয়া ) বাবাজী না পেচিয়ে  
পড়েন ।

ষোল-আনা বিষয়ের মালিকানা-স্বত্ব,—একরূপ সমগ্র  
রাজসাহী জেলাটার দণ্ডমণ্ডের কর্তা হওয়ার লোভ,—রামরতন  
সংবরণ করিতে পারিলেন না । পঞ্চম হিতৈষীকে লক্ষ্য করিয়া  
বলিলেন,—“আচ্ছা, এ বিষয়ে তুমি কি নজীর সংগ্রহ ক'রেছ,  
আমায় দেখাও দেখি । সম্ভবপর হয়ত, আমি পেচ'পাও নই ।”

পঞ্চম । অসম্ভব আমার কাছে কিছু নেই বাবাজী ! আমায়  
ত তুমি চিনলে না বাপ'ধন !—এই গোটা-দু'স্তিন গঙ্গাজোলে  
—বক্বোলে-গোছের সাক্ষী আমার চাই ।—( সঙ্গীদের প্রতি  
চাহিয়া ) বলি, দানপত্তরটা ত তৈয়েরী ক'ন্তে হবে ?

প্রথম । আচ্ছা, তারপর ?—সেটা ত জাল হ'বে ?

পঞ্চম । ওরে আমার ধম্মপুতুর যুধিষ্ঠির রে ! জাল  
হবে, কি আমার চোদ-পুরুষের উদ্ধার হবে, তা জেনে তোমার

লাভ কি ? বালি, দু-একটা সেকলে বুড়া-হাব্‌ড়ার নাম দস্তখত ক'রে দিতে পার ? সে বিগ্গেটা ত একটু-আধটু শিখেচ ?

প্রথম । ( মাথা চুলকাইতে চুলকাইতে ) তা কার হাতের কি রকম লেখা,—আখর না দেখে কি কোরে বলবো বলো ? আচ্ছা, কার কার নাম—ব'লে যাও দেখি ?

পঞ্চম । এই পইলে ধরো,—বামাপদ পুরুং ;—কেন, তুমি কি তাঁর হাতের লেখা দেখ নি ? দিকি গোট্টা-গোট্টা যুক্তোর-মত হরপ ।—সে তুমি এক আঁচড়েই মেরে দেবে ।—কি, চুপ ক'রে রইলে যে ?

মন্তপারী কালীপদ এতক্ষণ মন্তের নেশায় বুম্ হইয়াছিল । তবে জ্ঞান হারায় নাই,—সকল কথাই কাণ পাতিয়া শুনিতে-ছিল । যাই তার বাপের নাম হইল, অমনি ভাঙ্গা-ভাঙ্গা গলার বলিয়া উঠিল,—“ওকি বাবা ! মরাবাপকে নিয়ে টানাটানি কেন ? নিজে এই সশরীরে এখানে বিরাজমান আছি, এই কাট্‌মার উপর দিয়ে যা ইচ্ছে ক'রে যাও বাবা !”

পঞ্চম হিতৈষী । না হে কালীপদ, এ একটা বড় কাজের কথা হ'চ্ছে,—এখন রঙ্গ ক'রো না ।

কালীপদ । হাঁ হে, হাঁ ! আমি তোমাদের কাজও বুঝি, আর অকাজও-বুঝি । কেন বল, ভালমানুষের ছেলেটাকে নিয়ে নাশ্তানাবুদ কর ?—শেষ মূলে হা-ভাত হবে ? ( রামরতনকে লক্ষ্য করিয়া ) সেই জন্যই বল্‌ছিলেম, অত ফিকির-ফন্দি জাল-যোগসাজে না যেরে, একেবারে কন্ন সাবাড় ক'রে ফেলো—ও পাপ বিদেয় হওয়াই দরকার ।—নাশ্তিকটা কিনা গুরু-পুরুত

ত্যাগ করে ? নিৰ্কংশ হবে, নিৰ্কংশ হবে,—বরায় নিপাত  
যাবে।—কি বাবা, অমন কটমটিয়ে চেয়ে আছ কেন ? কি  
বলুছিলে, ব'লে যাও,—আমি আর তোমাদের কথায় নই। এই  
আমি মুখ বুজুলাম ।

এইবার এক নিখাসেই সেই ভাঙ খালি হইয়া পড়িল ।  
শূন্য ভাঙ ভূমে গড়াইতে লাগিল । তৎসঙ্গে সেই মাতৃপ্রসাদপায়ী  
মহাপুরুষও ভূমে গড়াইলেন ।

প্রথম । ( জনান্তিকে দ্বিতীয়ের প্রতি ) হতভাগা মদেই  
যারা গেল !

দ্বিতীয় । ( রামরতনকে নির্দেশ করিয়া প্রথমের প্রতি )  
আর এখন উনিই বল-বুদ্ধি-ভরসা । উনি না সহায় হ'লে, গরীব  
বামুন এতদিনে সপরিবারে পথে প'ড়ে ম'তো । ও-বাড়ীর  
ত্রিসীমানায় ত এখন যাবার যো নেই ।—তা জান ত ?

প্রথম । জানি সব, তবে ম'রে আছি ।

ইত্যবসরে সেই পঞ্চম হিতৈষী,—সেই সকলের মোড়লটি,—  
কতকগুলো খাতাপত্র হইতে, রামরতনকে কি হিসাব-নিকাশ  
দেখাইল । দুই একটা দলিল-দস্তাবেজ দেখাইয়াও, মাথাযুও  
কি বুঝাইল । শেষ বলিল, “বাবাজী, আমার এ অব্যর্থ সন্ধান !  
এই দেখ, ইহাতে মহারাজ রামজীবন রায়ের শীল-মোহর আছে ।  
এই দেখ, এই স্থানটা একটু শাদাও আছে ।—হঁ হঁ ! আমার  
এ বেড়া-জালে বাছাধনকে পড়তেই হ'বে । এ রাজসাহী  
মুনুকে তোমার একাধিপত্য স্থাপন ক'রে দিয়ে, তবে আমার  
কাজ ! ওঃ ! সেই শূদ্র দয়্যারাম রায় মন্ত্রীত্ব ফলিয়ে হুকুম-জারি  
করবে, আর আমরা এতগুলো বামুনের ছেলে তার পায়ের

তলার জোড়-হাত ক'রে দাঁড়িয়ে থাকবো ? ভগবান্ কি নেই ?  
—এ ঘোর কলিতে, ধন্য কি চার পো থেকে এক-পয়ও দাঁড়িয়ে  
নি ? সব কি গিয়েছে ?—না, তা হ'তেই পারে না ।”

সাক্ষাৎ কলির ধর্ম-পুত্রটি, এই ভাবে ধর্মের ও ভগবানের  
নামের দোহাই দিলেন । তবে রামরতন এই দোহাই-মত  
কাজ করিবেন কিনা, তাহা এখন তাঁর বিবেচনা সাপেক্ষ ।

বলা বাহুল্য, এই গায়ে-পড়া হিতৈশী গুলি,—রামরতনের  
বহু দূর-সম্পর্কীয় ;—নিজির ওজনৈও সহজে সুবাদ মিলে না ।  
যদিও বা সুবাদের একটু গন্ধ মিলে, ত কি বলিয়া যে পরস্পরকে  
সম্বোধন করিবেন, তাহাও নির্দেশ করা কঠিন হইয়া পড়ে ।  
এমত অবস্থায় বয়োজ্যেষ্ঠগণ, ভবিষ্যতের অনেক আশা রাখিয়া,  
রাজসাহী জমিদারীর ‘হক্ মালিককে’,—স্নেহসূচক বাবা,  
বাবাজী, বাবাজীবন, দাদা, ভাই, ভায়া,—এই সব মোলায়েম  
মিঠা-বোলে সম্বোধন করিতেন । ইহাতে আর কিছু না হউক,  
এই তোষামোদকারী কলির জীবদের তোষামোদের পথটি বেশ  
খোলসা হইত । স্নেহাস্পদ আত্মীয়ের মুখ হইতে হঠাৎ কিছু  
অপমানসূচক কড়া-কথা শুনিলেও, তাহা গায়ে না মাথার পক্ষে  
একটু সুবিধা হইত বৈকি ?—তখন, বার দুই চার বাৎসল্য-  
ভাবব্যঞ্জক ‘বাবা’ ‘দাদা’ সম্বোধন করিয়া, বাহিরের আর দশটি  
ভীক্ষ-চক্ষু এড়াইয়া, সেই স্নেহাস্পদের গায়ে-মাথায় হাত  
বুলাইতে বুলাইতে, সহজে ও স্বল্পায়সে, ইহঁারা স্বকার্য সাধন  
করিয়া লইতে পারিতেন ।

এই শ্রেণীর গায়ে-পড়া পঞ্চম হিতৈশীটি, দস্ত করিয়া পুনরায়  
বলিলেন,—

“বাবাজীবন ! আমি এই বড়-গলা করিয়া বলিতেছি, আজ হইতে তিনমাসের মধ্যে, তোমাকে নাটোর-রাজ্যের একমাত্র উত্তরাধিকারী প্রমাণ করাইয়া, রাজ-গদিতে বসাইব,— আর কুপোষ্য রামকান্ত রায়কে সপরিবারে পথে দাড়া করাইব,— তবে আমার নাম দিগম্বর ভাড়াই !—মহারাজ রামজীবন রায়ের দত্তক পুত্র ? শাস্ত্রবিহিত পিণ্ডাধিকারী ? মিথ্যা কথা ! দায়ভাগ মতে দত্তকপুত্র অসিদ্ধ প্রমাণ করাইব ।—পালিতপুত্র বলিয়া বড়-জোর খোর-পোস্ পাইতে পারিবে । নবাব-দরবারে গিয়া, কে উহার পক্ষে সাক্ষ্য দিবে ? যে দিবে, তাহাকে ঘুস-খোর—জালিয়াৎ প্রমাণ করাইব । —বাবাজী, তুমি পিছাইও না,—এই অনুরোধ ।”

মণ্ডপায়ী হতভাগা কালীপদটা এতক্ষণ অবধি চুপ করিয়া পড়িয়াছিল । এইবার উঠিয়া বসিল । চক্ষু রগড়াইতে-রগড়াইতে বলিল,—“সব ত হইল, এখন বিড়ালের গলায় ধষ্ঠা বাধে কে বাবা ?”

রামরতন এইবার হাসিয়া ফেলিলেন । হাসিতে হাসিতে বলিলেন,—“ব’লেছ বটে একটা কথা !—তা তুমি এখনো জেগে আছ ?”

কালীপদ । হাঁ,—জেগে জেগে সব শুন্ছিলেম । তা ভাড়াই খুড়োর মতলব মন্দ নয়,—তবে বড়শীতে মাছ বিধলে হয় ।

“সে বিহুবার ভার আমার উপর রহিল ।”—পঞ্চম হিতৈষী বুক ফুলাইয়া, এই কথা বলিয়া, তাঁহার বক্তৃতা বন্ধ করিলেন ।

সেদিনকার মত সভা ভঙ্গ হইল । রাত্রি তখন তৃতীয় প্রহর ।



## পঞ্চম পরিচ্ছেদ ।

—: \* :—

এখন, রামরতন রায় দো-টানার পড়িয়া ঘোর হাবুড়বু খাইতে রহিলেন । কুচক্রীদের কুমন্ত্রণায়,—লোভ ও হুরাকাঙ্ক্ষা বিলক্ষণরূপেই জাগিয়াছে ;—তার উপর জাতিহিংসার স্বাভাবিক বাদ-সাধাও খানিকটা আছে ; পরন্তু অন্যপক্ষে, 'বেশা আশা করিতে গিয়া যদি সর্বস্বই খোঁওয়াইতে হয়'—এই ভাবনাও সঙ্গে সঙ্গে মিশিয়া তাঁহাকে ব্যতিব্যস্ত করিয়া ফেলিয়াছে । আজ কয়দিন হইতে আহা-নিদ্রা তিনি একরূপ ত্যাগই করিয়াছেন । থাকিয়া থাকিয়া আপনা আপনি চমকিয়া উঠেন ; কখন বা দৃঢ়তার সহিত দুই একটা কথাও বলিয়া ফেলেন । আজ আপন আবাস-বাটীর অন্তঃপুরস্থ একটি কক্ষে বসিয়া ঐরূপ চিন্তামগ্ন আছেন । চিন্তায় তাঁহার মুখে কালি পড়িয়াছে, চক্ষু কোটরগত হইয়াছে, কণ্ঠের হাড় যেন বাহির হইয়া পড়িয়াছে । মর্শ্চন্দকর একটি তপ্তশ্বাস ফেলিয়া তিনি ভাবিতে লাগিলেন,—

“এখন কি করি ?—কোন পথ অবলম্বন করি ?—দয়্যারাম রায়ের শরণাপন্ন হইব ? নবীন রাজা রামকান্তের নিকট বিচারপ্রার্থী হইয়া দাড়াইব ? না, প্রাণ থাকিতে তাহা পারিব

না । পোষ্যপুত্র,—পরের ছেলে, তাহাকে ভাই বলিয়া আনিগ্নন করিতে পারিব না । সে কোথাকার কে,—উড়িয়া আসিয়া জুড়িয়া বসিল,—আমার পৈত্রিক বিষয়ের ষোলআনা মালিক হইল,—আমার মুখের গ্রাস কাড়িয়া লইল, তাহাকে আমি 'ভাই' বলিয়া স্বীকার করিব ? আমার গোত্র নয়, জাতি নয়, সুবাদে কেউ নয়,—রক্তের সম্পর্ক মাত্র নাই,—সেই পরের-পর—তত্ত্ব পর—তার ছায়ায় আমি বাঁচিয়া থাকিব ? কেন, প্রাণ কি এতই প্রিয় ? দিন যেমন যাইতেছে, এমনি যাইবে,—সে-ও ভাল,—তথাপি দীনতা অবলম্বন করিয়া শত্রুর রূপার্থী হইতে পারিব না ।—না, কিছুতেই নয় । সেই আমার ভৃত্য দয়্যারাম যাহা চিহ্নিত করিয়া দিবে,—হাতে তুলিয়া যাহা ভিক্ষা-স্বরূপ দিবে, তাহাই লইয়া আমাকে সন্তুষ্ট থাকিতে হইবে ? আর অন্তদিকে,—নবীন রাজা রামকান্ত,—রাজচ্ছত্র মাথায় দিয়া, রাজদণ্ড হাতে লইয়া, রাজাসনে বসিয়া থাকিবে,—সহস্র সহস্র লোক তাহাকে 'জয় মহারাজ পৃথ্বীপতি' বলিয়া সংবর্দ্ধনা করিবে, আর আমি চক্ষু মেলিয়া তাহা দেখিব ? না, কখনই নয়,—প্রাণ থাকিতে নয় ! শত্রুর নিকট কখন মাথা নোয়াইব না !

“কিন্তু অদৃষ্টদোষে যদি হিতে বিপরীত হয় ? তাহাকে বঞ্চিত করিতে গিয়া যদি নিজে বঞ্চিত হই ? ষোল-আনার আশা করিতে গিয়া যদি ছ-আনাও ধোয়াইয়া ফেলি ?—তখন ? তখন ভূণের ন্যায় শ্রোতে ভাসিয়া বেড়াইতে হইবে ।—স্ত্রী-পুত্রের হাত ধরিয়া পথে পথে ঘুরিতে হইবে । লজ্জায় ও অপ-মানে মরমে মরিয়া থাকিতে হইবে ।—মুখ তুলিয়া কাহারো পানে চাহিতেও তখন পারিব না ।—তখন, উপায় ?

“দূর হউক,—এ সব দুশ্চিন্তা মনে স্থান দিই কেন ? অমন অমঙ্গল ভাবনার মন মলিন করি কেন ? সুখের জাগ্রত দশায় সাধ করিয়া এ দুঃস্বপ্ন দেখি কেন ? ‘উদ্যোগী পুরুষঃ সিংহঃ’—এও ত একটা কথা আছে ? তবে এ ধোঁয়া-ধোঁয়া অদৃষ্ট ছাড়িয়া, একবার জলন্ত পুরুষকারের আশ্রয় লই না কেন ? এতকাল ধৈর্য্য ধরিয়া রহিলাম ; এত ক্রমা-ঘৃণা-উপেক্ষা করিলাম,—অভিমান ও মনঃকষ্টে সে ছ-আনারও অংশ লইলাম না ;—সে সকলই কি বৃথা হইবে ?—না, কাল পূর্ণ হইয়াছে ;—সুযোগ, সহায় ও সময় উপস্থিত হইয়াছে ;—ভাদুড়ী প্রভৃতি পুরাতন কর্মচারীরাও আমার পক্ষ অবলম্বন করিয়াছে ;—এইবার একবার শেষচেষ্টা করিয়া দেখি !

“বিশেষ, সংবাদ পাইলাম, অনেক রাষ্ট্রবিপ্লবের পর, অনেক ঘরোয়া-বিবাদ অন্তে, নবাব আলিবর্দী খাঁ এখন বাঙ্গালার মসনদে উপবিষ্ট । তিনি নূতন নবাব ;—তাই এখনো সকল বিষয়ের বন্দোবস্ত করিয়া উঠিতে পারেন নাই । গুনিলাম, রাজধানী মুরশিদাবাদে নাকি এখন সকল বিষয়েই বিশৃঙ্খলা ।—কর-আদায়ে নূতন নূতন লোক নিযুক্ত হইতেছে ;—বাকী-খাজনার নিলামে একের জমিদারী অন্যের হস্তগত হইতেছে ;—নবাবসরকারে কেবলই নাকি ‘দেহি দেহি’ রব,—টাকার বড় অনাটন ;—এই সময় একবার কল-কাটা চালিয়া ভাগ্যটা পরীক্ষা করিয়া দেখিলে হয় না ? দস্তকপুল, অসিদ্ধ-প্রমাণ করিতে নাও পারি,—দেড়া কি ছনো খাজনা স্বীকার করিয়াও ষোল-আনা রাজসাহীটার মালিকানা-স্বত্ব লইতে পারিব না ? টাকার লোভ—বড় লোভ ।—তারপর গুনিয়াছি, নবাবেরা



নাকি বড় কান-পাতলা ;—বাগালী মুন্সীরা তাঁহাদিগকে যেমন শুনায়, তাঁহারা তেমনি শুনেন।—ভালমন্দের বিচার শক্তি তাঁহাদের বড় একটা নাই । কোনরূপে সন সন খাজনাটা পাইলেই তাঁহাদের হইল । তবে একবার উঠিয়া পড়িয়া লাগিয়া দেখি । রামকান্তের বিরুদ্ধে বিধিমতে লাগাইব ভাগাইব ; সমগ্র রাজসাহী একরূপ অরাজক হইয়া পড়িয়াছে,—প্রমাণ করিব ;—মৃত রামজীবন রায়ের ভূসম্পত্তির আমিই একমাত্র উত্তরাধিকারী ও মালিক—সাব্যস্ত করিব ; আর তারপর আমার নগদ যাহা কিছু আছে, সমস্তই কুড়াইয়া-কাড়াইয়া নবাব-সরকারে গিয়া নজর দিব ;—সরকার হইতে আমার ‘রাজ-সনদ’ মিলিবে না ? এককালে লাখ্ লাখ্ টাকার সোনা-রূপা মণি-যুক্তা-হীরা,—নজরের একরূপ আড়ম্বর দেখিলে, আর কাহারও কি আমার মালিকানা-স্বত্বের উপর সন্দেহ জন্মিতে পারিবে ?—কখনই না।—তখন নিশ্চয়ই আমার ‘রাজ-সনদ’ মিলিবে !

“কিন্তু ঘরে বসিয়া, কালনিমের লক্ষ্যভাগের ন্যায়,—এ সকল বিষয় কেবল মনে মনে কল্পনা করিলে চলিবে না । কার্য্য চাই । মস্তকের সাধন ও শরীর পাতন করিয়া কার্য্য চাই । এখন কিছুদিনের মত গৃহ-মমতা ত্যাগ করিয়া, ঐ ধ্যান ঐ জ্ঞান করিয়া বিদেশবাস করিতে হইবে । রাজধানীতে গিয়া, নবাব-সরকারের লোকজনেদের সহিত ভাব করিয়া, তাহাদিগকে হাত করিতে হইবে । আর জমিদারী-সেরেস্তার কাগজ-পত্র ঠিক রাখিতে, ভাহুড়ীর মত আরো দুই চারি জন মাথালো-মাথালো লোক জোগাড় করিতে হইবে । কি জানি, কোন্ লাঠীতে সাপ মরে !

এইরূপ সব দিক্ আট-ঘাট বাধিয়া দেখি,—তারপর কুল আর কপাল !”

এইরূপ, এবং আরও অনেকরূপ ভাবনা ভাবিতে ভাবিতে, রামরতন যেন বাহুজ্ঞানশূন্য হইয়া পড়িল ।

ঠিক সেই সময় তাঁহার পতিব্রতা সহধর্মিণী সুনীলা দেবী সেই কক্ষে প্রবেশ করিলেন । স্বামীকে ঐরূপ অবস্থায় দেখিয়া, সতী সহানুভূতিসূচক শীতলকণ্ঠে জিজ্ঞাসিলেন,—“অমন করিয়া একমনে বসিয়া, ও কি ভাবিতেছ,—আমায় বলনা ?”

রামরতন তখন সম্পূর্ণ অগ্ৰমনস্ক ;—এ কথা কণ্ঠেই স্থান পাইল না । কেবল একটি গভীর দীর্ঘনিশ্বাস ফেলিয়া বলিলেন—“হঁ ।”

সুনীলা আরও নিকটে গিয়া, পুনরায় সেইরূপ ভাবে কহিলেন,—“কিছু অসুখ-বিসুখ হ'লো নাকি ?—একি, তোমার গা-মাথা যে গরম ?”

রামরতন এবার অতি বিরক্তির সহিত স্ত্রীর হাত ছুড়িয়া, যেন অত্যন্ত কাতর-ভাব প্রকাশ করিলেন,—“আঃ !”

সুনীলা । কি অসুখ করিতেছে, আমায় বল না ?

এতকণ্ঠে যেন রামরতনের চমক ভাঙ্গিল । ঈষৎ শুষ্ক-হাসি হাসিয়া বলিলেন,—“অসুখ ? কৈ, আমার ত কোন অসুখ করে নাই,—আমি ত বেশ আছি ?”

সুনীলা । মা কালী তাই করুন ।—কিন্তু তোমার চেহারা বড় ধারাপ হ'য়ে গেছে ;—আর আজ কিছু দিন থেকে তোমায় কেমন অগ্ৰমনস্ক-অগ্ৰমনস্ক দেখছি ।—রাত দিন ও কি ভাব ?

রামরতন । ভাবিব আবার কি ?—ও কিছু নয় ।—তোমার পূজাহিক হ'য়ে গেছে ?

সুশীলা । হয়েছে ।—সত্য বল, তুমি কি ভাব ? দেখ, আমি স্ত্রী,—আমার কাছে লুকাইও না ;—আমার কাছে তোমার কোন কথা লুকাইতে নাই ।—বল, কি ভাব ?

রামরতন । কি আবার ভাবিব ? তুমি কেবল আমাকে ভাবিতেই দেখ !

সুশীলা । ভাবিতে দেখি ?—ভাবিতেই দেখি ! সত্য বলিতেছি, তোমার ভাবনা দেখিয়া, আমার বড় ভয় হইয়াছে । আহারে তোমার রুচি নাই,—কি আহার করিতে কি আহার করিয়া ফেল । তোমার চক্ষে নিদ্রা নাই,—রাত্রে যখনই শয্যায়ে দেখি,—দেখি, তুমি জাগিয়া আছ ও এ-পাশ ও পাশ করিতেছ । যদি বা কখন একটু ঘুমাও, ত ঘুমাইতে ঘুমাইতে কি বলিয়া উঠ ।—কখন যেন কাহাকে ভয় দেখাও,—কখন বা যেন নিজে ভয় পাইয়া মাথা নাড়িতে থাক ।—এ সব কি দুর্ভাবনার লক্ষণ নয় ?

এই কথার মধ্যে রামরতন একবার অগ্ৰমনস্ক ভাবে 'হু' বলিয়া ফেলিলেন । কিন্তু তখনই তাহা সামলাইয়া লইয়া বলিলেন, “তার পর ? বলিয়া যাও,—খামিলে কেন ?”

পতিব্রতা হুঃখিতভাবে উত্তর করিলেন, “দেখ, তুমি বল আর না বল, আমি তোমার মুখ দেখিয়াই বুঝিতেছি, কোন উৎকট দুশ্চিন্তায় তুমি আছন্ন হইয়াছ । বল, তোমার এ দুশ্চিন্তা—কি ? আমি স্ত্রী, তোমার সুখদুঃখে সমভাগিনী, বল, কি দুর্ভাবনার তুমি উৎপীড়িত হইয়াছ ? তোমার কথা এলোমেলো,

এক কথায় আর জবাব দাও,—সব কথা কাণেই প্রবেশ করে না,—কি হইয়াছে, দুটি পায়ে পড়ি, আমার সব খুলিয়া বল ।”

এবার রামরতন উত্তর দিলেন,—“কি আর হইবে ? যাও, ঘরের কাজ-কর্ম দেখ গে । স্ত্রীলোকের সকল কথা শুনিতে নাই ।”

সুশীলা । শুনিতে নাই ? কেন নাই ? স্বামীর মনের কথা স্ত্রী শুনিবে না ত কে শুনিবে ? স্ত্রী কি কেবল স্বামীর বিলাস-বাসনার সঙ্গিনী ? স্বামীর দুর্ভাবনা কি মনের কথা শুনিবার অধিকার কি তাহার নাই ? তবে স্ত্রী, ‘অঙ্কাস্ত্রিনী ও ধর্ম-পত্নী’— তাহার এ আখ্যা কেন ?

রামরতন । মনের কথা তোমরা গোপন করিতে পার না, তাহাতে অনেক সময় অনেক অনিষ্ট হইতে পারে ।

সুশীলা । স্ত্রীজাতির ঐ নিন্দা কি চিরকাল শুনিয়া আসিব ? কবে কোন্ কথা আমার বলিয়াছ যে, তাহা গোপন রাখিতে পারি নাই,— আর তাহাতে তোমার অনিষ্ট হইয়াছে ? যে স্ত্রী মরণাধিক প্রসব-বেদনা সহ করিয়া হাসিমুখে স্বামীর কোলে সন্তান দিতে পারে, সেই স্ত্রী কি স্বামীর একটি গোপনীয় কথা মনে রাখিতে পারে না ?

রামরতন । তোমাকে লক্ষ্য করিয়া আমি বলি নাই,— সাধারণতঃ স্ত্রী-জাতি সম্বন্ধে আমার ধারণা এইরূপ ।

সুশীলা । তা সে ধারণা সম্বন্ধে পুরুষই তার দায়ী । সরলা কুলবালাকে পুরুষই সংসারের কুটিলতা শিক্ষা দেয় । যেখানেই লুকোচুরি বা ছাপাছাপি, সেই খানেই কু । কু, মেয়ে-মানুষের সয় না ;—তাই সে পেটে কথা রাখিতে পারে না ।—এখন সে কথা যাক । তুমি কেন আমার তোমার দুশ্চিন্তার অংশ দিবে

না, তা আমায় বল ? এই আশীতে দেখ, তোমার সোনার দেহ কি হইয়া গিয়াছে ! আমি তোমার আশ্রিতা, অনুগতা, শিষ্যা ও দাসী ; —আমায় তোমার মনের কথা বলিবে না ? যদি এ বিশ্বাস তোমার না হয়, তবে আমার পত্নীত্বে—অথবা সতীত্বে তোমার কি বিশ্বাস রহিল ?—পায়ে ধরি, বল, তোমার মনঃকষ্ট কি ?

রামরতনের অন্তর এবার গলিল । কিন্তু তথাপি তিনি সঙ্গল্পচ্যুত হইলেন না । বলিলেন, “সতি, আমায় ক্ষমা কর । যাহা অনুমান করিয়াছ, সত্য । আমার মনের কথা তোমার ঞ্চায় স্বাধী-রমণীর শুনিবার যোগ্য নহে,—তাই বলিলাম না । বিষয়ের কথা,—বিষয়ি-লোকেই শুনিবে ;—আমার মনোদুঃখ তোমায় বলিয়া কোন ফল নাই,—তাই বলিলাম না । দুঃখিত হইও না ।—ও কি, চক্কর ঐ জল মুছিয়া ফেল । যদি কালী কূল দেন, তখন শুনিও । আমি এখন অকূলে ভাসিলাম । কিছুদিন আমায় দেশত্যাগী হইতে হইবে । কোথায় যাইব, জিজ্ঞাসা করিও না । আমার অদৃষ্ট আমায় আস্থান করিতেছে ।”

ঘারে ভৃত্য আসিয়া প্রভুকে সংবাদদিল,—বাহিরে দুইটি লোক তাঁহার অপেক্ষা করিতেছে ।

দুশ্চিন্তাপীড়িত রামরতন, শয্যা ত্যাগ করিয়া উঠিলেন,—ভৃত্যের সহিত বহির্কাটাতে গেলেন ।

তখন সেই স্বামীর স্মৃথে দুঃখে চিরসঙ্গিনী,—স্বামীর নিত্য শুভাকাঙ্ক্ষিণী সাধী,—সজলনয়নে, যোড়হস্তে, উর্ধ্বে দৃষ্টিপাত করিয়া কম্পিতকণ্ঠে কহিলেন,—

“হে অনাধনাথ, হে বিপদভঞ্জন ! স্বামীর আমার যেন কোন

অমঙ্গল না হয় !—তাঁহাকে দেখিও,—সৎপথে তাঁহার মতিগতি স্থির রাখিও ।—এ রক্তশোষণী দারুণ দুশ্চিন্তা, যেন কোন অসৎ-কার্যের প্রসূতি না হয়, দয়াময় !”

পরে একটু ভাবিয়া মনে মনে বলিলেন,—“বিষয়ের কথা ? বিষয়ীর চিন্তা ?—কি এ বিষয় ? বলিলেন,—‘কিছুদিন আমার দেশত্যাগী হইতে হইবে ।’—তবে কি, যে গৃহ-বিবাদ এতদিন নিভ-নিভ হইয়া আসিয়াছিল, তাহাই আবার কুচক্রীর কুমন্ত্রণায় জ্বলিয়া উঠিল ? ভগবন্ ! যেন আমার এ অনুমান মিথ্যা হয় ;—যেন আমার শান্তিময় সংসার-ধন্য বজায় থাকে !”





## ষষ্ঠ পরিচ্ছেদ ।

যাহা হইবার, তাহা হয় ; যাহা ঘটবার, তাহা ঘটে ।—

নারিকেল-ফলে জল-প্রবেশের ঞায়, লক্ষীর আগম এবং  
গজভুক্ত-কপিথবৎ তাহার নিগম,—মনুষ্যবুদ্ধির অতীত ।

নবীন রাজা রামকান্ত, বিচক্ষণ মন্ত্রী দয়্যারাম রায়ের  
সুমন্ত্রণায়,—সুশীলা, সুবুদ্ধিদায়িনী, লক্ষ্মীস্বরূপা, ভার্য্যা-ভবানীর  
সুপরামর্শে,—‘অর্দ্ধবঙ্গব্যাপী’ বিশাল রাজসাহীরাজ্য শাসন ও  
সংরক্ষণ করিতেছিলেন ; সন সন নবাব-সরকারে নির্দিষ্ট কর  
দিয়া, পুত্র-বাৎসল্যে প্রজাপালন করিয়া আসিতেছিলেন ;—  
সৎপন্থায় জমিদারীর আয় বাড়াইয়া, লোকহিতের প্রতি সমধিক  
দৃষ্টি রাখিয়া, রাজকোষ পরিপূর্ণ করিয়া যাইতেছিলেন ;—হঠাৎ  
সব উলট-পালট হইয়া গেল । নিম্নল আকাশ মেঘশূন্য পরিষ্কার ;—  
ধরতাপে রবি-কিরণ বিকীর্ণ হইতেছে ;—পরিপূর্ণ উৎসাহে  
ও জলস্ত উদ্গমে, লোক কৰ্মক্ষেত্রে প্রবেশ করিতেছে ;—হিমা-  
নীর তুষার বা বর্ষার ঝাঝবায়ু কোথাও কিছু নাই ;—কিন্তু হঠাৎ  
একি ?—প্রকৃতির এ কি বিপর্যয় ঘটিল ? দেখিতে দেখিতে,  
সেই অনন্ত গগন ঘোর অন্ধকারে আচ্ছন্ন হইল,—মুহমূর্ছ বিহ্যৎ

চমকিল,—জলস্থলব্যোম প্রতিধ্বনিত করিয়া বজ্রপাত হইতে লাগিল ;—সূর্য্য যেন সতয়ে কোথার লুকাইল ;—সূর্য্যের সেই জ্বালাময় তীব্র-কিরণ যেন সহসা যাদুমন্ত্রে নিবিয়া গেল ;—লোকের সেই জলন্ত উত্তম ও উৎসাহ যেন ঐন্দ্রজালিকের মন্ত্রপুত দণ্ডস্পর্শে চকিতে অবশ, অকর্ষণ্য ও নির্ধীর্য্য হইয়া পড়িল ;—এবং তার পর সেই ঝড়, বৃষ্টি ও ঝঞ্জাবাত তিনের পূর্ণ-সংযোগে, ধরাবক্ষে যেন পিশাচযুদ্ধ হইতে লাগিল ।—প্রকৃতি যেন সংহার মূর্ত্তি ধারণ করিলেন ।

রাজা রামকান্ত ও রাণী ভবানীর জীবনে তাঁহাদের অলক্ষ্যে, যে কাল মেঘের সঞ্চার হইয়াছিল, এখন কাল পূর্ণ হওয়ার, সেই অদৃষ্ট-মেঘ সহসা ভীষণ ঝড়-বৃষ্টি-ঝঞ্জাবাতে পরিণত হইল ;—তাঁহারা সেই নিরাশ্রয় জীবন রক্ষা করিবার জন্য, সুদূর পর-গৃহে গিয়া মাথা ফেলিয়া দাঁড়াইতে বাধ্য হইলেন,—অথবা রঙ্গস্বামী তাঁহাদিগকে লইয়া এই নূতন খেলা আরম্ভ করিলেন ।

কুমন্ত্রণা-দীক্ষিত, ঈর্ষাজ্বালা-জর্জরিত রামরতন পূর্ণ-মাত্রায় জ্ঞাতিবাদ সাধিবার জন্য,—সত্য সত্যই নবাব-দরবারে গিয়া, বিশেষ চতুরতা সহকারে, আপনাকেই মৃত-রাজা রামজীবন রায়ের একমাত্র উত্তরাধিকারী সাব্যস্ত করিলেন,—এবং ‘সমগ্র রাজসাহী এখন অরক্ষিত,—রাজকর আদায়ের কোনরূপ বন্দোবস্ত নাই’—এইরূপ বুঝাইয়া, অতি অল্প সময়ের মধ্যে, সুকৌশলে ‘রাজমনন্দ’ গ্রহণ পূর্ব্বক, নবাব-সাহায্যে, চির-অভীপ্সিত রাজসাহী রাজ্য ও রাজপুরী অধিকার পূর্ব্বক, রাজা রামকান্ত ও রাণী ভবানীকে, কিছুদিনের জন্য, সত্য সত্যই আশ্রয়হীন করিয়া ফেলিলেন । গ্রহ-বৈগুণ্যে,—কার্য্যক্রম, সুবুদ্ধিসম্পন্ন, প্রভু-



পরায়ণ দয়্যারাম রায়ও সে সময় স্থানান্তরে,—কার্যব্যাপদেশে নিযুক্ত ছিলেন । যখন এ সংবাদ তাঁহার কর্ণগোচর হইল, তখন প্রভুকে রক্ষা করিবার ক্রমতা তাঁহার ছিল না । \*

পত্রপুষ্পে সুশোভিত ও শাখাকাণ্ডে সমুন্নত সহস্র সহস্র জীবের আশ্রয়দাতা মহাবৃক্ষ,—হঠাৎ ভূমিসাৎ হইল । অমৃত-মধুর ফলদানে ও সুমিষ্ট ছায়া-প্রদানে, যে বৃক্ষ এক দিন লক্ষ লক্ষ মরনারীর জীবনাবলম্বন-স্বরূপ ছিল,—কি জানি, কাহার ইচ্ছায়, আজি হঠাৎ সে বৃক্ষ সে স্থান হইতে অপসারিত হইল ;—আর তাহার স্থানে একটি ফুল-ফল-ছায়া-বিহীন বিটপী মাথা তুলিয়া দাঁড়াইল । সে বৃক্ষে বসিয়া সঙ্গীতপ্রাণ পক্ষী আর মধুস্বরে গান গাহে না ;—শ্রান্ত-ক্রান্ত-পিপাসিত পথিক, দূর হইতে আর সে

\* এই বিষয় লইয়া ইতিহাস-লেখকগণের মধ্যে বিশেষ মতভেদ আছে। অধিকাংশ লেখক, এই দয়্যারাম রায়কেই. রামকান্তের রাজ্যভ্রষ্টের একমাত্র কারণ নির্দেশ করিয়াছেন । কিন্তু প্রসিদ্ধ ঐতিহাসিক শ্রীযুক্ত অক্ষয়কুমার মৈত্রেয় মহাশয়, বিশেষ প্রমাণপ্রয়োগ সহকারে প্রতিপন্ন করিয়াছেন যে, এ বিষয়ে দয়্যারামের কোন হাত ছিল না ;—অপিচ জাতিবাদই এই বিষয় অনর্থের মূল কারণ । সমীচীন ও সন্তুষ্টবপর বোধ করিয়া, আমরা মৈত্রেয় মহাশয়ের মতটাই গ্রহণ করিয়াছি । তবে তিনি যাঁহাকে লক্ষ্য করিয়া এই জাতিবাদের কথা বলিয়াছেন, আমরা সেই জাতিটিকে এই বড়যন্ত্রের নায়করূপে নির্ণয় করি নাই । বাহাইহোক, অক্ষয় বাবুর এই মতগ্রহণে, আমাদের এই কাব্যচিত্রের একটু সুবিধা হইয়াছে ; তজ্জন্য আমরা তাঁহার নিকট কৃতজ্ঞ । এইরূপ আরও কোন কোন স্থল, সঙ্গত ও সমীচীন বোধ করিয়া, আমরা এই মৈত্র মহাশয়েরই ঐতিহাসিক তত্ত্ব গ্রহণে বাধ্য হইয়াছি । ফলতঃ শ্রীযুক্ত অক্ষয়কুমার মৈত্রেয় মহাশয়ের তর্ক, যুক্তি ও অনুসন্ধান,—ইতিহাসলেখকগণের ভাবিবার বিষয় ।

বৃক্ষের পানে আশাপূর্ণ নেত্রে চাহিয়া দেখেনা ;—সাধক বা সন্ন্যাসী সে বৃক্ষের তলে আসিয়া আর ইষ্টদেবতার নামগ্রহণে অভিলাষী হয় না ;—সে বৃক্ষ যেন আপনায় আপনি মস্তক উত্তোলিত করিয়া অবস্থিত ।—সকলকে ঘৃণা ও অবজ্ঞার চক্ষে দেখিতেই যেন সে সদাই সমুৎসুক ;—কাহারও সহানুভূতি বা শুভাশীর্ষাদের প্রার্থী যেন সে নয় ।—যাহার ইচ্ছা হয়—যেন সে আসিয়া তাহার পাদদেশে লুটাইয়া পড়ুক ;—‘আমার তুল্য আর দ্বিতীয় কে আছে, অতএব এ ব্রহ্মাণ্ডে আমিই একমাত্র কল্পতরু’—এমনি,—কি.ইহারও অধিক,—একটা গর্ভ ও অহমিকাপূর্ণ তীব্র দৃষ্টিতে, অতি ঘৃণার চক্ষে, সে সকলকে দেখিতে লাগিল । তরু উন্নত বটে, কিন্তু তাহার সকল অঙ্গ—সকল শাখা-প্রশাখাই এমনি নীরস, ককর্ষ ও মাধুর্যহীন দেখিয়া, মনে মনে সকলেই তাহার উচ্ছেদকামনা করিতে লাগিল, এবং সেই স্থানে—পূর্বের সেই শ্রামশোভা-সমাকীর্ণ, পত্র-পুষ্প-ফলামৃত-পূর্ণ, আরামদায়ী স্নিগ্ধ ছায়াশ্রয়ময় মহারক্ষের পুনঃ আবির্ভাব জন্য অবিরাম দেবতার দুয়ারে সহস্র সহস্র কণ্ঠের মঙ্গল-প্রার্থনা ধ্বনিত হইতে লাগিল ।


কিন্তু মঙ্গল প্রার্থনাই হউক, আর উচ্ছেদ-কামনাই চলুক,—যার যতদিন ভোগ, তাহা ত হওয়া চাই ?—তাই নব রাজ্যেশ্বর, নবীন রাজচক্রবর্তী, সৌভাগ্যশালী-পুরুষ—রামরতন রায়,—দোর্দণ্ডপ্রতাপে রাজ্যাশাসন ও প্রজাপালন করিতে লাগিলেন ;—আর তাই সহস্র সহস্র দীন-দুঃখী অনাথ-আতুরের আন্তরিক শুভ আশীর্ষাদ অহর্নিশ মস্তক পাতিয়া লইয়াও, দরিদ্রের পিতা-মাতা স্বরূপ—চির পুণ্যপ্রাণ মহারাজ রামকান্ত ও মহারাণী

ভবানী—পথের বাহির হইয়া, অন্যের আশ্রয় অন্বেষণে বাধ্য হইলেন ।

রাজলক্ষ্মী আজ রাজপুরী ছাড়িয়া চলিলেন । চারিদিক্ হইতে পাষণ্ডভেদী মা-মা রব উঠিল ;—সহস্র সহস্র চক্ষু বাষ্পা-কুললোচনে চাহিয়া রহিল ;—হাহাকাারে দিম্বাগুল কম্পিত হইল ;—কিন্তু কে, কেহ কি সে করুণদৃগের গতিরোধ করিতে পারিল ?

না, পারিল না । এক্ষেত্রে, ইহাই বিধির বিধান !

গ্রহের ভোগ বল, আর নিয়তির লিখন বল,—সংসারে প্রতি-নিয়তই এমনি হইতেছে । ইহাদের ভাগ্যেও তাই এইরূপ হইল । সুতরাং ইহাতে বিশ্বয় বা ক্লোভ বিশেষ নাই,—রক্তস্বামী এইরূপেই সংসার-রক্ত দেখাইয়া থাকেন । বলিয়াছি ত, ইহা একটা প্রকাণ্ড ও বিরাট সজীব অভিনয় !





## সপ্তম পরিচ্ছেদ ।

বিশাল নদীগর্ভে একখানি অর্দ্ধসজ্জিত তরী । সেই তরীতে আরোহণ করিয়া, ‘অর্দ্ধবঙ্গ-অধিপতি’ মহারাজ রামকান্ত ও মহারানী ভবানী, আজ সম্পূর্ণ নিকুপায় হইয়া, পরের দুয়ারে আশ্রয় লইতে চলিয়াছেন ।

নৌকা ধীরে ধীরে চলিতে লাগিল । নৌকার দাঁড়ে ও জলের তোড়ে, একরূপ শব্দ হইতে লাগিল । কূল ছাড়িয়া নৌকা মাঝখানে গেলে, সে শব্দ বড় আরামপ্রদ বোধ হয় । উপরে অনন্ত আকাশ, সম্মুখে অগাধ জলরাশি, চারিদিক নিস্তরু,—চক্ষু বুজিয়া সেই শব্দ শুনিতে শুনিতে, অতীতের অনেক সুখদুঃখের স্মৃতি বড় মধুরভাবে মন-মাঝে জাগিয়া উঠে । স্মৃতি সহস্র দুঃখময়ী হইলেও, স্থানমাহাত্ম্যে, তাহা হইতে কেমন একটা প্রশান্ত মধুরতা উপলব্ধ হয় ।

সর্বস্ব হারাইয়া, রাজ-দম্পতী সেই নৌকারোহণে চলিয়াছেন । দুইজনে দুই পাশে শুইয়া আছেন । দুইজনেই নীরব,—কাহারও মুখে কোন কথা নাই । নৌকা সেইরূপ ধীরে ধীরে চলিতেছে । নৌকার দাঁড় সেইরূপ জল কাটিয়া তালে তালে চলিয়াছে ।

সূর্য্যাকিরণ জলে প্রতিবিম্বিত হইয়া কেমন একটা বিচিত্র শোভা জলে আঁকিয়া যাইতেছে । নদীর জলে কেমন একটা কল্কল ছলছল শব্দ হইতেছে । - তাহাতে কেমন যেন এক স্বপ্নময় আবেশ ও মধুরতা মিশানো আছে । সেই মধুরতাময় আবেশে ঘুম আসে,—কিন্তু ঠিক ঘুম হয় না ;—ঘুমের ঘোরে যেন জাগ্রত সংসারের সমগ্র ঘটনাবলী চোখের সামনে ভাসিয়া বেড়ায় ।

রাজদম্পতীও আজ সেইরূপ চক্ষু বুজিয়া, অর্ধ নিদ্রাচ্ছন্ন— অর্ধ জাগরিত অবস্থায়,—সেই ভাব উপলব্ধি করিতে লাগিলেন । স্বপ্ন ও জাগরণের অতীত যে অবস্থা, যেন সেই আনন্দময়ভাবে তাঁহাদের হৃদয় পরিপূর্ণ হইয়া উঠিল । বস্তুতই, এমনি অবস্থায় একটা আনন্দ আসে । এ আনন্দে তীব্রতার লেশমাত্র নাই,—অপিচ এ আনন্দ অতি স্নিগ্ধ, অতি মধুর, অতি পবিত্র । অন্তরের অন্তরে অনুভব না করিলে, এ আনন্দ বুঝানো যায় না ।

বহুকণ নীরব থাকিয়া, জীবনতোষিণী পত্নী অগ্রে কথা কহিলেন । অমৃতমধুর স্নিগ্ধকণ্ঠে বলিলেন,—“স্বামিন্ ! ঘুমাইলে কি ? মনে এখন কি ভাবের উদয় হইতেছে বল দেখি ?

জাগ্রতে তদ্রূপিত রামকান্ত, জোরে একটি নিখাস ফেলিয়া, চক্ষু উন্মীলন করিয়া বলিলেন,—“প্রিয়তমে, এ জীবন যেন সকলই স্বপ্ন বলিয়া মনে হয় । কোথায় ছিলাম,—ঘটনা-স্রোতে ভাসিতে ভাসিতে কোথায় আসিলাম,—আবার সময়ের আবর্তে কোথায় গিয়া পঁহুছিব,—এই সকল কথাই এখন মনে উদয় হইতেছে । মনে হয়, অনন্ত-বিস্তৃত কাল-সমুদ্রে কেবলই সাঁতার দিয়া বেড়াইতেছি,—জীবনের সমস্ত শক্তি নিয়োজিত করিয়া যেন কেবলই তরঙ্গের পর তরঙ্গ ঠেলিয়া চলিয়াছি ;—

কবে, কোন্ জন্মে যে এ সম্ভরণের অবদান হইবে,—কবে যে কুল পাইব,—আদৌ পাইব কিনা,—তাহা কে বলিতে পারে ?—তোমার কি কোন কষ্ট হইতেছে ?”

ভবানী । তুমি সঙ্গে আছ,—আমার আবার কষ্ট কি ? বৈকুণ্ঠ কেমন, তা জানি না ; কিন্তু মনে হয়, তুমি সঙ্গে থাকিলে এ সংসার ছাড়িয়া, আমি সে বৈকুণ্ঠও কামনা করি না ।—জন্ম জন্ম যেন তোমার সঙ্গেই থাকিতে পাই ।

রামকান্ত সম্মেহে পত্নীর চিবুক ধরিয়া প্রেমপরিপ্লুত হৃদয়ে বলিলেন, “প্রাণাধিকে.! এমনি পতিব্রতা পুণ্যবতী তুমি ! তোমার পুণ্যে, আমি সকল অবস্থাতেই সুখী । গ্রহবৈগুণ্যে এই যে রাজ্যনাশ ও বিদেশবাস সংঘটিত হইতে চলিল, এজন্মও আমি দুঃখিত নহি ;—কেন না জীবনসঙ্গিনী—প্রাণের আনন্দদায়িনী তুমি,—তুমি ছায়ার গায় আমার সঙ্গে আছ ।”

ভবানী । স্বামীর এমন সোহাগ ও ভালবাসা যে রমণী পায়, তার বাড়া ভাগ্যবতী আর কে ? জন্মদুঃখিনী সীতা বিনাদোষে বনবাসিনী হইয়াও ভাগ্যবতী ছিলেন ;—কেন না তিনি জানিতেন, তাঁহার স্বামী তাঁহাকে ভালবাসেন । শ্রীরামচন্দ্রের অশ্বমেধ যজ্ঞে সীতার সুবর্ণময়ী প্রতিমূর্তিই তাহার প্রমাণ ।—স্বামিন্, এ ভাগ্য কি আমার চিরদিন থাকিবে ?—আমি কি আমরণ এমন ভাগ্যবতী থাকিতে পারিব ?

সেই স্বভাবসজল করুণাপূর্ণ চক্ষু স্বামীর মুখপানে গুস্ত করিয়া, অতি আশাপূর্ণহৃদয়ে, বড় কোমলকণ্ঠে সতী বলিলেন,—

স্বামিন্ ! আমি কি আমরণ এমন ভাগ্যবতী থাকিতে পারিব ? তোমার পায়ে মাথা রাখিয়া, এমনি অনিমেষ নয়নে, তোমার এ

মোহনমূর্তি দেখিতে দেখিতে, চলিয়া যাইতে পারিব ? যদি তাহা পারি, তবেই ভাগ্যবতী বটে । নহিলে, রাজ্যেশ্বরীই হই, আর পথের ভিখারিণী হই,—আমার জীবন্তে সমাধি !”

সেই মমতাপূর্ণ চক্ষু হইতে টপ্ টপ্ করিয়া দুই ফোঁটা জল রামকান্তের হাতের উপর পড়িল । তাহাতে তাঁহার সর্কশরীর রোমাঞ্চিত হইয়া উঠিল । অতি যত্নে, বড় আদরে, পত্নীর সে চোখের জল মুছাইয়া দিয়া, রামকান্ত স্মিতমুখে কহিলেন,—“চির আদরিণী,—আমার জীবনের সকল সাধ তুমি ;—বড় ভালবাসি বলিয়া কি, এমনি করিয়া সে স্নেহের প্রতিদান দিবে ? ভাগ্য অভাগ্য কার কি, জানি না ;—তবে তোমা হারা হইলে, আমিই কি এ সংসারে অধিক দিন থাকিতে পারিব মনে কর ? তা ও-কথা এখন কেন প্রিয়তমে ? ভবিষ্যতের ঐ অন্ধকার ছবি কল্পনারও যে দুঃখ আনে ?—সাধ করিয়া এ দুঃখের আবাহন কেন কর সুভাষিণি ?—এখন এই বর্তমানের অবস্থা কি, ভাব দেখি ?”

ভবানী । ভাবিয়াছি,—দুঃসর্কস্ব, রাজ্যনাশ, পরাশ্রয়-গ্রহণোদ্দেশ্যে আপাতত এই নৌকায় বাস ;—কিন্তু একন্ম আমার এতটুকুও দুঃখ হয় না প্রিয়তম ! কেন না, তুমি আমার সঙ্গে আছ,—আর আমি তোমার চরণ-পূজা করিতে পাইতেছি । কিন্তু যেদিন আমি এই সৌভাগ্যে বঞ্চিত হইব,—আশীর্বাদ করিও নাথ, সেইদিন যেন আমার আয়ুঃশেষ হয় ।

রামকান্ত । জগন্মাতা জগদীশ্বরীই তোমার এই পবিত্র পাতিব্রত্যধর্মের সহায় হউন ;—তোমার মনস্কামনা পূর্ণ হউক । —এখন কি হইবে বল দেখি ? কুচক্রী রামরতনের করালগ্রাস



হইতে কি এ নষ্ট-সম্পত্তির উদ্ধার করিতে পারিব ? নবাব-দরবারে কি আমার অভিযোগ গ্রাহ্য হইবে ? হায়, সময়গুণে দয়ারাম দাদাও সঙ্গে নাই !

ভবানী । তা এ সংবাদ তিনি এতক্ষণ পাইয়াছেন নিশ্চয় । সংবাদ পাইয়া তিনি কখনই নিশ্চিন্ত থাকিবেন না । আমরাও মুরশিদাবাদে পঁহুছিব,—সঙ্গে সঙ্গে তিনিও দেখা দিবেন ।—এখন ত বরাবর শেঠ-ভবনেই উঠিতে হইবে ?

রামকান্ত । তা বৈ কি ? মহামতি জগৎ শেঠের আশাই আমার শেষ-আশা । ধনকুবের শেঠ-পরিবারেরা মনে করিলে, রাজসাহীর মত দুইটা জমিদারী আখ্যাদের হইতে পারিবে । স্বর্গীয় কর্তাদের সহিত শেঠদিগের বিশেষ ঘনিষ্ঠতা ছিল । মহারাজ রামজীবন রায়ের পুত্র ও পুত্রবধু, দুর্জয়কতুক সর্কস্ব-হার হইয়া তাঁহার গৃহে অতিথি হইলে কি সেই লক্ষ্মীর বরপুত্র—জগৎশেঠ নিশ্চিন্ত থাকিতে পারিবেন ?—যে রূপে হউক, তিনি আমার রাজসাহী, আমায় ফিরাইয়া দিতে পারিবেন । সেই ভরসাতেই ত এমন বিপদেও নিশ্চিন্ত আছি । তবে বলিতে পারি না,—গ্রহবৈশুণ্যের সময়, অতি-আত্মীয়ও পর হয় ।—হয়ত ঐ জগৎশেঠই এখন রামরতনের পক্ষ অবলম্বন করিবেন ।

ভবানী । না স্বামিন্, কমলা যঁার প্রতি চির-সদয়া,—তাঁর অমন দুর্বুদ্ধি হয় না । ষড়যন্ত্রকারী ও প্রবঞ্চকের পক্ষগ্রহণ করিয়া, তিনি যে জানিয়া-গুনিয়া আমাদের সর্বনাশ করিবেন, ইহা কোনমতেই সম্ভবপর নহে । আমার বোধ হয়, সরলবুদ্ধি নুতন নবাব আলিবর্দী, সরলবিখ্যাসেই এ কাজ



করিয়াছেন । তাঁহার সেই ভ্রম ভাঙ্গিয়া দিলেই, তিনি আমাদের সম্পত্তি আবার আমাদের ফিরাইয়া দিবেন ।

রামকান্ত । কিন্তু বলিহারি রামরতনের চতুরতা ! সহসা যেন যাদুমন্ত্রে নবাবকে বশ করিয়া রাজ-সনন্দ গ্রহণ করিল !—আমরা ইহার বিন্দুবাষ্প কিছুই জানিতে পারিলাম না ।

ভবানী । দুষ্টলোকের রীতিই এই । অতি সংগোপনে, সে পাপে লিপ্ত হয় । সময় গুণে, তারি যোগ্য সহচর-অনুচরও কোথা হইতে আসিয়া জুটে । সেই সকলের সমবেত চেষ্টায় এমনি সব কাজ হয় ।—এ ক্ষেত্রেও তাহাই হইয়াছে মনে হয় ।

রামকান্ত । খুবই সম্ভব । চল ত, এখন জগদম্বার নাম লইয়া নির্ঝিল্লি মহিমাপুরে —শেঠ-ভবনে পৌছি ;—তারপর সেই শেঠদিগের রূপায় সকল রহস্যই অবগত হইতে পারিব ।

ভবানী মনে মনে অভয়ার পাদপদ্ম ধ্যান করিয়া বলিলেন, “হে মা সর্কমঙ্গলে ! স্বামীর মঙ্গল্য আবার ফিরাইয়া দাও । এ উৎকর্থা ও উদ্বেগের হস্ত হইতে স্বামীকে আমার উদ্ধার কর জননি !”

নৌকা চলিয়াছে । কত গ্রাম, কত অরণ্য, কত নগর অতিক্রম করিয়া অবিশ্রান্ত চলিয়াছে । ধর্ম্মপ্রাণ রাজদম্পতী মনে মনে কত ভাঙ্গা-গড়ার কল্পনা করিতে করিতে,—অবস্থা-চক্র-পরিচালিত—ভূত-ভবিষ্যৎ-বর্তমানের কত কথা ভাবিতে ভাবিতে চলিয়াছেন ;—এমন সময় পশ্চাদিক হইতে একটা উৎসাহ-উল্লাস-সূচক চীৎকার-ধ্বনি শুনিতে পাইলেন । নৌকার গবাক্ষে মুখ বাড়াইয়া তাঁহারা দেখিলেন,—আর একখানি ক্ষুদ্র নৌকা, আট দশজন দাঁড়ীর দাঁড়ক্লেপ সাহায্যে, তীরবেগে

ছুটিয়া আসিতেছে। সেই নৌকার ছাদে বসিয়া একজন উৎসাহীল অর্ধ-রক্ত, মাঝিদিগকে বিপুল উৎসাহ দান করিতেছেন।—রামকান্ত সেই নৌকারোহী ব্যক্তিকে দেখিবামাত্র চিনিলেন ;—তাঁহার “দয়ারাম দাদা” না? পরম পুলকিতচিত্তে তিনি মাঝিদিগকে আপন নৌকা থামাইতে বলিলেন :—পশ্চাৎবর্তী নৌকা অবিলম্বে আসিয়; পূর্ববর্তী নৌকা ধরিল। রামকান্ত সাক্ষাৎ বলিয়া উঠিলেন,—“এই যে, দয়া দাদা! আসিয়াছ? আঃ! ঠাচাইলে!”

দয়ারাম। আমি তোমার পত্র পাইবামাত্র এই দণ-দাড়ীর নৌকা করিয়া আসিয়াছি। অনেক কষ্টে তোমাদের ধরিতে পারিয়াছি।—হায়! রাজলক্ষী বধুমাতা আজ এই দশায়? প্রাণ ধরিয়া এ বৃদ্ধকে আজ এদৃশ্য দেখিতে হইল?

রামকান্ত। দয়া দাদা, এ জন্ত দুঃখিত হইও না। এ সকলই ভবিষ্যৎ,—দৈবের ছলনা। যাই হউক, যখন তুমি আসিয়া পহুঁছিয়াছ, তখন মনে হইতেছে, আবার আমাদের সুপ্রভাত হইবে,—এ দুর্দশা আর আমাদের থাকিবে না।

দয়ারাম। তাই রামকান্ত, স্বর্গীয় মহারাজ যে আমার তোমাকে হাতে হাতে সঁপিয়া দিয়া গিয়াছিলেন,—আমি তাহার কি করিলাম?

রামকান্ত। দয়া দাদা, কাঁদিও না।—কি করিবে বল,—আমাদের অদৃষ্টে এইরূপ ছিল। এখন তোমার বুদ্ধিবল ও জগৎশেষের অনুকম্পাই আমার একমাত্র সম্বল। চল, সর্বাগ্রে সেই শেঠ-ভবনে উপনীত হই।

দয়ারাম। আমারও বিবেচনা তাই। নবাব-সরকারে

শেঠদিগের প্রবল প্রতিপত্তি । ধর্ম্মাশ্রমী জগৎ শেঠ সকল কথা বুঝাইয়া বলিলে, নবাব আলিবর্দী সকল রহস্যই বুঝিতে পারিবেন ।—উঃ ! পাপিষ্ঠদের কি ভয়ানক বড়বড় ও কূট-কৌশল !

উভয়ের অনেক কথা, অনেক পরামর্শ হইল । নিদিষ্টদিনে, তাঁহারা মহিমাপূরে—শেঠদিগের আবাস-বাটীতে পহঁছিলেন । জগৎশেঠ সপরিবারে, পরম সমাদরে রাজা রামকান্ত ও রাণী ভবানীকে গৃহে তুলিলেন । বিধিমতে তাঁহাদিগকে আতিথ্য-সৎকারে সুখী করিলেন । এবং সময়োচিত সাঙ্ঘনা-বাক্যে তাঁহাদের নষ্টসম্পত্তি উদ্ধার করিয়া দিতে প্রতিশ্রুত হইলেন ।

যথাদিনে দয়ারামকে সঙ্গে লইয়া, মহামতি জগৎ শেঠ নবাব দরবারে উপস্থিত হইলেন এবং মহারাজ রামকান্তের সর্বিশেষ পরিচয় দিয়া, তাঁহার বর্তমান দুর্ব্বস্থার কথা সকলই জ্ঞাপন করিয়া, রামরতন ও তৎপক্ষীয়গণের দুঃসাহস ও দুঃশীলতার বিষয় আত্মোপাস্ত বিবৃত করিলেন ।

শুনিয়া আলিবর্দীর যেন চমক ভাঙ্গিল । বাঙ্গালা-বিহার-উড়িষ্যার নবাব তিনি,—তাঁহার চক্ষে এক হিন্দু-ভূম্যধিকারী ধূলি দিয়া পলাইয়াছে !—তখনই তিনি মহারাজ রামজীবনের প্রকৃত পিণ্ডাধিকারী, শাস্ত্রসিদ্ধ দত্তকপুল রামকান্তকে, তাঁহার প্রাপ্য জমিদারী ফিরাইয়া দিলেন,—এবং রাজসনন্দ এবং রাজকুমতী প্রভৃতি সকলই তাঁহাকে প্রত্যর্পণ করিয়া, বিশেষ আশ্বাস প্রদান পূর্ব্বক, সৈন্যসামন্ত সমভিব্যাহারে পুনরায় তাঁহাকে নাটোর রাজধানীতে পাঠাইলেন । আর বলা বাহুল্য, দত্ত-স্বরূপ, আলিবর্দী, রামরতনকে তাহার শাস্ত্র-প্রাপ্য সম্পত্তি

হইতেও, জন্মের মত বঞ্চিত করিয়া, সেই সম্পত্তি রামকান্তকেই অর্পণ করিলেন ।

ধর্মের মহিমায় এমনই হয় । ধর্ম, প্রথম প্রথম একটু-আধটু কষ্ট দিয়া, এমনই কোশলে ধার্মিকের মান রক্ষা করিয়া থাকেন ।  
—এটি ধর্মের পরীক্ষা মাত্র ।

রামকান্ত সেই মহাপরীক্ষায় উত্তীর্ণ হইয়া, আবার পূর্ণোৎসাহে ও পরমসুখে, রাজ্যশাসন ও প্রজাপালন করিতে লাগিলেন । আবার সেই পত্রপুষ্প-শোভিত, শ্রামশোভা-সমাকীর্ণ সেই মহাবৃক্ষ ষথাস্থানে বিরাজিত হইল । আবার সকলের আনন্দ, আশা ও উৎসাহ,—মঙ্গলধ্বনিতে মিশিয়া দিগ্বাণ্ডল মুখরিত করিয়া তুলিল । আবার সকলে রামসীতার উচ্চ আদর্শে, রাজা রামকান্ত ও রাণী ভবানীর গুণগানে প্রবৃত্ত হইল ।

ধর্মের জয় ও অধর্মের ক্ষয় দেখিয়া, মানবের সহিত প্রকৃতিও যেন এবার হাসিলেন । আর সে ঘোর ঘনঘটাপূর্ণ ঝড়-বৃষ্টি-ঝঞ্জাবাত এখন নাই ;—এখন দিগ্বাণ্ডল ধর-রবিতাপে উজ্জ্বল ও পরিষ্কার হইয়া গিয়াছে ।

এমনই হইয়া থাকে ——প্রকৃতিরও যা, মানবেরও তাই ।





## অষ্টম পরিচ্ছেদ ।

উক্ৰ ঘুরিয়াছে, এবার পরিপূর্ণ মাত্রায় সংসার-সুখ ভোগ হইবে ।

সংসার-সুখ কি এতদিন অপূর্ণ ছিল ? রামকান্ত ও ভবানীর জীবনে কি কোন দুঃখ ছিল ? হাঁ, ছিল বৈ কি ? যাহা লইয়া গৃহীর প্রধান সুখ,—যাহাতে গৃহীর সাধ-আহ্লাদের চরম সফুর্তি, সে জিনিস তাঁহাদের ছিল না ;—তাঁহাদের সন্তানাди ছিল না । গৃহের সার শোভা, নয়নের অতুল্য আনন্দ, প্রাণের প্রিয়তম প্রতিবিম্ব, জন্মান্তরীণ উপস্থার মোহন বিকাশ—শিশুমুখদর্শনে তাঁহারা বঞ্চিত ছিলেন । সে অমিয়-নিছান মায়া-পুতলি এতদিন তাঁহাদের ক্রোড়দেশ আলোকিত করে নাই ;—সংসার-সরোবরে সে সোনার কমল এতদিন প্রস্ফুটিত হয় নাই ;—দাম্পত্য-জীবনের একটা মহা অভাব—একটা অসীম শূন্যতা,—এতদিন তাঁহারা অনুভব করিতেছিলেন ; বিধাতার ইচ্ছায় সে সে অভাব ও সে শূন্যতা আর তাঁহাদের রহিল না ;—জীবনের সকল সাধ পূর্ণ করিয়া, অতৃপ্ত আকাঙ্ক্ষার পূর্ণতৃপ্তি দিয়া, সংসার-নন্দন-কাননে এতদিনে স্বর্গের পারিজাত ফুটিল ! পারিজাতের

সে সৌরভ ও শোভায় গৃহ পবিত্র, কুল রক্ষা, পিতামাতার জীবন ধন্য হইল । রাজপুরীতে উৎসব ও আনন্দের স্রোত বহিতে লাগিল ।

রাজলক্ষী কিশোরী, পরিপূর্ণ যৌবনে, সম্ভান-প্রসূতি প্রসন্নময়ী জননী হইলেন । জননীর হৃদয় জন্মাবধিই ছিল ; এইবার সেই হৃদয়ে প্রত্যক্ষ অন্নপূর্ণা-মূর্তি দেখাইবার জন্ম, প্রকৃতি সম্পূর্ণরূপে তাঁহাকে প্রস্তুত করিয়া রাখিলেন ।

পুত্রমুখ দেখিয়া রাজা রামকান্তের আর আনন্দের সীমা রহিল না । রাজ্যনাশ হইতে রাজ্য উদ্ধার, তৎপরে এই প্রাণাধিক পুত্রমুখ দর্শন,—জন্মাক্ষের চক্ষু লাভ হইতেও অধিকতর আনন্দ তাঁহাকে প্রদান করিল । ভবানীকে পূর্ক্কাবধিই তিনি প্রাণের সমান ভাল বাসিতেন ;—এখন সেই ভালবাসার সহিত প্রগাঢ় সম্মানবোধ আসিল । পুত্রবতী সহধর্মিণীকে, এখন হইতে তিনি বিশেষ সম্মানের চক্রে দেখিতে লাগিলেন । জীবন মধুময় ও সংসার তাঁহার নিকট বড়ই সুখের স্থান বলিয়া বোধ হইল ।

আর ভবানী ?—এখন হইতে প্রকৃতই তিনি পতিকে সাক্ষাৎ ঈশ্বর বলিয়া বোধ করিতে লাগিলেন । পতি-দেবের চরণে, সম্পূর্ণরূপে তিনি আপনাকে উৎসর্গ করিলেন । কেননা, এই পতির কৃপায় তিনি এই অমূল্য রত্নের অধিকারিণী হইয়াছেন !

মাতার বিশ্বপ্রসারী অপরাজিত মেহে, ভবানী পুত্রধনকে ডুবাইয়া রাখিলেন । সে মেহ অনন্ত, অক্ষয়, অপরিমেয় । সে মেহ আকাশের ণায় উদার,—সমুদ্রের ণায় গভীর । সেই গভীরতা হইতে রত্ন আহরণ করিয়া তিনি স্বামীর ক্রোড়ে দিয়াছেন ;—আজ তাঁহার ন্যায় ভাগ্যবতী আর কে ? পতি-

পত্নী দিবাশিখা মুখোমুখি হইয়া, আনমেঘ-নয়নে সে স্বর্গ-শোভা উপভোগ করিতে লাগিলেন ।

রামকান্ত বলিলেন,—“প্রিয়তমে, তোমার কল্যাণেই এ পুরী পবিত্র, জীবন ধন্য হইল । এইবার প্রকৃতই তোমার রাজ-রাজেশ্বরী মূর্তি মানাইয়াছে । জীবিতেশ্বরী ! ঐ অমৃতধার নয়ন-কমলে, এমনি করুণা-ছাতি খেলাইয়া, বাপ-ধনকে কোলে লইয়া, আমার সম্মুখে একবার দাঁড়াও দেখি ! আ মরি ! এত রূপ ? এত শোভা ? - জগদীশ্বর ! এত সুখ অদৃষ্টে সহিবে ত ?”

এবার ভবানী স্বামীর ক্রোড়ে শিশুকে দিয়া, সুস্থিতবদনে ঈষৎ দূরে দাঁড়াইয়া, সে শোভা দেখিতে লাগিলেন । দেখিতে দেখিতে চোখ জলে ভরিয়া উঠিল । শিশু-মাতা গজেন্দ্রগমনে স্বামীর নিকটে আসিলেন । গলগলিতবাসে ভূমিষ্ঠ হইয়া স্বামীকে প্রণাম করিলেন । ভক্তিভরে স্বামীর পদ-রেণু মাথায় লইয়া জীবন সফলবোধ করিলেন । গদগদকণ্ঠে বলিলেন, “স্বামিন্ ! তোমার রূপায় তোমার ধন তোমার কোলে দিয়াছি ;—আজ আমার বাড়া ভাগ্যবতী আর কে ? কিন্তু তুমিই আমার ভাগ্য, তুমিই আমার শোভা ;—জীবনবল্লভ ! যেন শেষ পর্য্যন্ত এ শোভা, এ ভাগ্য থাকে !—আর কি বলিব ?”

যথাদিনে মহাসমারোহে রাজপুত্রের শুভ অন্তপ্রাশন ক্রিয়াদি সম্পন্ন হইল । দেশ ব্যাপিয়া উৎসব ও দীর্ঘতাং ভূজ্যতাং রব উঠিল । সহস্র সহস্র ব্রাহ্মণের পদবুলিতে পুরী পবিত্র ও দীন-দুঃখীর আনন্দ-কোলাহলে চারিদিক্ উৎফুল্ল হইল । রাজকুমারের

নাম হইল—কালীকাণ্ড । রাজদম্পতী, কালীকান্তকে লইয়া কিছুদিন অপার আনন্দসাগরে নিমজ্জিত হইলেন । সুখ যেন উপচিয়া পড়িল । পৃথিবী তাঁহাদের চক্ষে বড় শোভাময়ী বোধ হইতে লাগিল ।

কিন্তু হায় ! এত শোভা, এত সুখ, এত সাধ, এত আনন্দ তাঁহাদের ভাগ্যে সহিল না,—তাই বৎসর পূর্ণ হইতে-না-হইতে সেই স্বর্গভ্রষ্ট সোনার শিশু, সংসার অন্ধকার করিয়া চলিয়া গেল । পিতামাতার বুকে শোক-শেল দিয়া, আত্মীয়-স্বজনের মুখ মলিন করিয়া, আশ্রিত-অর্থীর আশা-ভরসা-আলোক নিবাইয়া, সে মায়ার পুতুলী মহামায়ার ক্রোড়ে চিরবিশ্রাম লাভ করিল ! নবশোকপ্রাপ্ত রাজদম্পতী হতাশ-নয়নে শূন্যপানে চাহিলেন,— জীবন শূন্যময় বোধ হইল । বুকে হাত দিয়া দেখিলেন, তথায় যেন কি নাই !—কে যেন তাঁহাদের বুকের ধন বুক ছিনাইয়া কাড়িয়া লইয়া গিয়াছে ! ভগ্নহৃদয়ে কাঁচরকণ্ঠে পিতামাতা ডাকিলেন,—“যাহু আমার ! কোথায় তুমি ?”—শূন্যে প্রতিধ্বনি হইল,—‘কোথায় তুমি ?’

আর পৃথিবী ? পৃথিবীর বুকে আর যেন সে শোভা, সে মাধুরী, সে কোমলতা কিছুই নাই,—এখন যেন সকলই নীরস, ককর্ষ ও অতি-পুরাতন কুৎসিত বলিয়া বোধ হইল ।—রাজদম্পতী বুঝিলেন, তাঁহাদের হাসি-মুখ মলিন হইবার সঙ্গে সঙ্গেই, পৃথিবীরও যেন এই পরিবর্তন ঘটিয়াছে । নীরবে, সজলনয়নে, মর্মচ্ছেদকর গভীর নিশ্বাস ফেলিতে ফেলিতে, তাঁহাদের দিন কাটিতে লাগিল ।

কিন্তু, এ দিনেরও অবসান হইল । তাঁহাদের বুকের ক্ষত



একটু একটু করিয়া শুকাইতে লাগিল । আবার যেন সেই ভাঙ্গা-বুক জোড়া দিয়া, তাঁহারা সংসার-ধর্ম করিতে লাগিলেন । আবার চিরন্তন নিয়ম অনুসারে, দেতোর-হাসি হাসিয়া, সকলের সহিত তাঁহাদের মিলিতে-মিশিতে হইল ।

দিনের পর দিন চলিল, বৎসরের পর বৎসর গেল, আবার নববর্ষের অভ্যুদয় হইল,—প্রকৃতি-রাজ্যের সহিত জীব-রাজ্যেরও কত ছুয়ার-ভাটা খেলিয়া গেল ;—ঈশ্বরেচ্ছায় আবার রাজদম্পতী একটি নবকুমার লাভ করিলেন ।—আবার দিনকত সেইরূপ আনন্দোৎসব চলিল ;—আবার দীর্ঘতাং ভূজ্যতাং রবে আকাশ-মেদিনী প্রতিধ্বনিত হইল ;—কিন্তু এবার আর পিতামাতার মনে তেমন উৎসাহ, তেমন আনন্দ, বা তেমন আশা নাই ;—থাকিয়া থাকিয়া ক্ষণে ক্ষণে যেন তাঁহারা শিহরিয়া উঠেন ;—আবার নিষ্ঠুর কাল কবে বা এ আলোক নিবাইয়া দিয়া তাঁহাদের হৃদয় অন্ধকার করিয়া ফেলে !


সত্য,—তাহাই হইল ! আঘাতপ্রাপ্ত পিতামাতার মনের সন্দেহ কার্যো পরিণত হইল ।—এবার অন্নপ্রাশনের পূর্বেই, দ্বিতীয় রাজকুমারও জ্যেষ্ঠের অনুসরণ করিল । রাজ-দম্পতীর বুক এবার যেন শ্মশান হইয়া গেল ।

কিন্তু কিছুদিন পরে, প্রকৃতির নিয়ম অনুসারে, শ্মশানেও বিদ্যুৎ খেলিল । আবার রাণী ভবানী গভবতী হইলেন । যথাদিনে এক অলোকসামান্য সৌন্দর্যময়ী কন্যা প্রসব করিলেন । মায়ের যোগ্য মেয়ে !—কণ্ঠার রূপে সূতিকাগৃহ আলোকিত হইয়া রহিল । রাজদম্পতী কিছুদিনের জন্য জুড়াইলেন । তাঁহাদের বুকের ঘা যেন একটু একটু করিয়া শুকাইয়া আসিতে

লাগিল । আবার প্রকৃত যেন হাসলেন ;—সেই সঙ্গে তাঁহারাও হাসিতে বাধ্য হইলেন ।

অমাবস্তা রাত্রির অসংখ্য তারা-হারের শোভাকেও ম্লান করিয়া, কন্যার রূপরাশি ফুটিতে লাগিল । সে শোভা দেখিয়া পিতামাতা মুগ্ধ হইলেন । দুই বংশধর নয়নমণি হারাইয়াও, এই কন্যাকে লইয়া তাঁহারা সংসারে যুক্তিতে লাগিলেন । কিন্তু হায় ! জন্মের মত তাঁহাদের বুক যেন ভাঙ্গিয়া রহিল ;—বুকের যেন দুই ধানি হাড়, জন্মের মত কে খসাইয়া লইয়াছে !—সে হাড়ের আর পূরণ হইবে না ।

তারা-হারের শোভাকেও লাঞ্ছনা দিল,—এই জন্য রাজদম্পতী বড় সাধে, বড় আশাপূর্ণ হৃদয়ে, কন্যার নাম রাখিলেন,—তারাসুন্দরী । এই তারাসুন্দরী বা তারাই তাঁহাদের নয়নতারা হইয়া রহিল ।—নয়নের আলো, জীবনের আলো, পৃথিবীর আলো,—যেন এই তারার আলোকেই তাঁহারা দেখিতে লাগিলেন । অধিক কি, তারা-মায়ের ভক্তসন্তান রাজদম্পতী, এই তারার রূপেই যেন সেই ত্রিতাপহরা গ্রামা-মায়ের স্বরূপ-নির্ণয়ে সক্ষম হইলেন ।—আর সন্তানসন্ততির সৌভাগ্য তাঁহাদের হয় নাই । একমাত্র তারাই রাজপুরীর শোভা, সম্পদ, শ্রী ও গৌরব আধিকার করিয়া রহিল । কন্যা হইয়াও পুত্রের অধিক সমাদরে, তাহার সোনার শৈশব কাটিতে লাগিল ।





## নবম পরিচ্ছেদ ।

ভবানীর সেই শৈশব-সঙ্গিনী শিবানীর সংবাদ কি ? দুর্জন স্বামীর হস্তে পড়িয়া তাহার সংসার-সুখ যে কতদূর ষটিয়াছিল, তাহা ত সহজেই উপলব্ধি হইয়াছে ;— এখন তাহার জীবনের নূতন সংবাদ কি, তাহাই জানিতে হইবে ।

নূতন সংবাদ আর কি ? কালীপদ শর্মা, মায়ের প্রসাদ বলিয়া, যে কলস কলস সুরা নিঃশেষ করিতে লাগিলেন, তাহার ফলে ঘোর আচারভ্রষ্ট হওয়ার, রাজবাড়ীর পৌরোহিত্য পদটি তাঁহার গিয়াছিল । তার পর দিনকত রামরতনের সহিত মিলিত হইয়া, বিধিমতে তিনি রাজা রামকান্তের অনিষ্টসাধন চেষ্টায় ফিরিয়াছিলেন । পাঠক পাঠিকা এই পর্য্যন্ত অবগত আছেন ;— বাকী কথা এখন অবগত হউন ।

যেদিন নবাবের হুকুমে, নাটোর রাজপ্রাসাদ হইতে রামরতন বিতাড়িত হইলেন, সেই দিন হইতে কালীপদ শর্মারও দুর্দশার একশেষ হইল । পেটে ভাত না থাকিলে ত আর শুধু মদ মারা চলে না ? আর সেই মদ জুটিবেই বা কোথা হইতে ?

তখন গুণধর, অনন্যোপায় হইয়া, সুশীলা পত্নীর পুণ্যদৃষ্টি আকর্ষণে মনোযোগী হইলেন। তাহাকে বুঝাইয়া-পড়াইয়া বলিলেন,—“তুমি গিয়া রাণীর নিকট কাঁদিয়া কাটিয়া প’ড়,—বল যে, আমার পৌরহিত্যটি আমায় ফিরাইয়া দেন। রাণী মত্ করিলে রাজা মত্ না দিয়া পারিবেন না,—তখন দুই বেলা আঁচাইবার পথ হইবে ;—কিন্তু এখন যে এক-বেলাও সে পথ বন্ধ হয় ! আর ঐ মায়ের প্রসাদ,—তা ওতে যদি তাঁদের এত আপত্তি,—তোমারও এত বিরক্তি হয়, তা আমি না হয় উহা আর নাই খাইলাম ? বুঝিলে কি ?—কথাটা বুঝাইয়া বলিতে পারিবে কি ?”

মনে মনে বলিলেন, “তা না হয় একটু আধটু লুকাইয়া-চুরাইয়া খাইলাম ? কে আর দেখিতে যাইতেছে ? অভ্যাসটা ত একেবারে ত্যাগ করা যায় না ?—মাগো, শশানেধরি ! সকলি তোমারি ইচ্ছা।—কি বলিব, রামরতনটা যে হতচ্ছাড়া হইয়া গেল ? অমন পোড়া কপাল জানিলে কি আর আমি তার সঙ্গ লই ?”

স্বামীর কষ্ট, সংসারের নিতান্ত অসচ্ছলতা,—সাক্ষী শিবানী স্বামীর মনোভাব অবগত হইবামাত্র, আর দ্বিকল্পি না করিয়া, বাল্য-সঙ্গিনীর সহিত সাক্ষাৎ করিতে যাইবেন, স্থির করিলেন।

ভবানী, শিবানীকে চিরদিন সমানভাবে ভাল বাসিতেন। তাহার স্বামী মস্তপায়ী ও অনাচারী হওয়ায় এবং কিছুতেই সে স্বভাব ত্যাগ করিতে না পারায়, বাধ্য হইয়া তাহার কাগীপদকে পৌরোহিত্য-পদ হইতে অপসারিত করিয়াছিলেন। বটে, কিন্তু শিবানীর যাহাতে কোনরূপ কষ্ট না হয়,—অন্ততঃ গ্রাসাচ্ছাদনের

অভাব যাহাতে তাঁহাদের ভোগ করিতে না হয়, ভবানী স্বামীকে বলিয়া তাহার বিহিত ব্যবস্থা করিয়া দিয়াছিলেন । কিন্তু দুর্নতি কালীপদ শর্মা—ভবানীর সে দান অগ্রাহ করিয়া, তেজের বশে, পিতৃসঞ্চিত অর্থে দিনযাপন করিতে থাকে । পরে কিছুদিনের জন্য রামরতনেরও সঙ্গ লয় । এখন সেই রামরতনই একরূপ নিঃশ্ব ও নির্কাসিত,—কালীপদের পিতৃসঞ্চিত অর্থও নিঃশেষিত,—সুতরাং পুনরায় রাজ-অনুগ্রহ লাভ ভিন্ন, শর্মার আর উপায় কি ? তাই পত্নীকে বলিয়া, শর্মা এখন সেই উপেক্ষিত দান সাধিয়া গ্রহণ করিতে প্রস্তুত হইলেন ।—পেটের দায় যে বড় দায় !

শিবানী গিয়া ভবানীর নিকট ছল ছল চক্ষে সকল কথা জানাইল ;—শুনিয়া দয়ার্দ্রহৃদয়া রাণী গলিয়া গেলেন । গদগদস্বরে বলিলেন,—“গঙ্গাজল, তোমার এমন কষ্ট ? আগে কেন জানাও নাই ভাই ?”

শিবানী । কোন্ মুখে আর জানাইব বল বোন ? স্বামীর স্বভাবের কথা ত সকলই অবগত হইয়াছ,—এমত অবস্থায় তোমার নিকট আর কি জানাইতে পারি ? বিশেষ তুমিই আমাকে শিক্ষা দিয়াছ,—‘স্বামীর বিরুদ্ধে কোন কথা কাহাকে বলিতে নাই,—মনের ব্যথা মনেই চাপা উচিত ।’—গঙ্গাজল ! এখন স্বামী আমার অনুতপ্ত হইয়াছেন,—সংসারেরও বড় কষ্ট হইয়াছে, তাই তাঁহার ইচ্ছাক্রমে, তোমাকে এ কথা জানাইতে আসিয়াছি ।

ভবানী । তা বেশ,—আমার কর্তব্য আমি আজ হইতেই করিব । তোমার যাহাতে কোন কষ্ট না হয়, তাহার বিহিত

ব্যবস্থা হইবে। তুমি গিয়া তোমার স্বামীকে নিশ্চিত হইতে বল।—কেমন, এমন অবস্থায়ও স্বামীর প্রতি শ্রদ্ধা সমভাবে রাখিতে পারিয়াছ ত ?

শিবানী । তাহা আর পাপ মুখে কেমন করিয়া বলিব বোন্ ? তবে তোমার শিষ্যা আমি,—ইহা হইতে যাহা বুঝিয়া লও ।

শিবানীর স্বর আর্দ্র হইল । ছল ছল চক্ষে সাধবী বলিলেন, “গঙ্গাজল ! তাঁহাকে যদি এইরূপ ভাল দেখিয়া যাই, তবে বড় সুখে আমি মরিতে পারি ।”

“সে কি” বলিয়া, অতি সঙ্গদয়তার সহিত, ভবানী, শিবানীর হাত ধরিলেন । তাহার চক্ষের জল মুছাইয়া দিয়া বলিলেন, “অমন কথা কেন বল বোন্ ? সময় হইলেই সকলকেই যাইতে হইবে,—তবে সাধ করিয়া ও-নাম কেন কর গঙ্গাজল ?”

শিবানী । সাধ করিয়া আমি এ নাম করি নাই বোন্ । সত্যই আমার দিন ফুরাইয়া আসিয়াছে । আমি বেশ বুঝিতেছি, রমণীজন্মের একটা সাধ—আমি পূরাইয়া যাইতে পারিব । আর সে দিন অতি—সন্নিকট । হায় ! এই সময়ও যদি তাঁহাকে ভাল দেখিয়া যাই ?

খুক্ খুক্ করিয়া শিবানী একটু কাশিল ; সেই কাশির সহিত একটু রক্ত বাহির হইল ।—“ও কি” বলিয়া ভবানী শিহরিয়া উঠিলেন ।

শিবানী একটু হাসিল । দিবালােকে, ছিন্ন মেঘের কোলে, বিজলী যেমন কীণ হাসি হাসে, সেইরূপ একটু হাসিল । হাসিয়া বলিল,—“বোন্, দেখ আর কি ? শিবের অসাধ্য এ ব্যাধি । কয়কাল তোমার গঙ্গাজলকে ধরিয়াছে ।”

ভবানী । সে কি ? কত দিন ? কৈ, এ সংবাদ ত কিছুই জানি না ?

শিবানী । জানিবে আর কিরূপে ? মনের ব্যথা মনে চাপিয়াই আমার এ রোগ । তাই জোর করিয়া বলিতেছিলাম, রমণীজন্মের একটা সাধ—সর্কশ্রেষ্ঠ সাধটা হয়ত মিটাইয়া যাইতে পারিব । হায়, এখনো যদি তাঁহাকে ভাল দেখি !

সাক্ষীর চক্ষু আবার অশ্রুপূর্ণ হইল । সেই অশ্রু কোঁটা কোঁটা পড়িয়া ধরাতল নিষিক্ত করিতে লাগিল ।

ভবানী সবিশেষ না জানিলেও, অল্পেই বুঝিলেন, কি দুঃসহ মনঃকষ্টে তাঁহার শৈশব-সঙ্গিনী মৃতকরা হইয়াছে ! বুঝিলেন, মনঃকষ্টেই শিবানীর এই রোগ, আর সেই রোগই তাহার কাল-স্বরূপ হইয়াছে ।

যতদূর সম্ভব, সহানুভূতিহৃৎক সাধনা-বাক্যে ভবানী শিবানীকে আশস্ত করিয়া গৃহে পাঠাইলেন । তাহার চিকিৎসার জন্য উপযুক্ত রাজ-বৈদ্য নিযুক্ত করিয়া, ঔষধ-পত্রের সমুচিত ব্যবস্থা করিয়া দিলেন । এবং স্বামীকে বলিয়া শিবানীর স্বামীকে সেই-দিন হইতেই পর্যাপ্ত পরিমাণে সিধা প্রকৃতির সবিশেষ বন্দোবস্ত করিয়া দিলেন । তবে শাস্ত্রের নিষেধ,—তাই সুরাপায়ী ব্রাহ্মণকে পৌরোহিত্য-পদে পুনরায় বরণ করিতে পারিলেন না । এ বিষয়ে স্বামীর সহিত তিনিও একমত হইলেন । ভাবিলেন,—“প্রণয় হউক আর যাহাই হউক, শাস্ত্রবিরুদ্ধ কার্য্য আশা হইতে হইবে না ।”

এ দিকে, সতীর পুণ্যফলেই হইক, আর প্রকৃতির নিদেশানু-সারেই হউক,—অথবা দারিদ্র্যের কশাঘাতজনিত শিকাতাই

হউক,—কালীপদ শর্ম্মার স্বভাব সত্য সত্যই অনেকটা সংশোধিত হইল। এতদিনে তিনি পুণ্যবতী সহধর্ম্মিণীর মর্যাদা বুঝিতে পারিলেন। বুঝিতে পারিলেন, তাঁহার কুস্বভাবে কাতর হইয়া, প্রবল মনঃকষ্টে, সতী কঠিন ক্ষয়রোগে আক্রান্ত হইয়াছে। বুঝিতে পারিলেন,—তিনিই পত্নীর এই ভীষণ ব্যাধির মূল কারণ। এত দিনে যেন তাঁহার চৈতন্য হইল; এত দিনে যেন তিনি আপন ভ্রম বুঝিতে পারিলেন। কিন্তু বহু বিলম্ব হইয়া গিয়াছে। এখন যে তিনি সেই ভ্রম সংশোধন করিয়া কিছু করিতে পারেন, এমন বোধ হয় না।

শিবানী সত্যই বলিয়াছিল,—‘শিবের অসাধ্য এ ব্যাধি।’ ভবানীর বিশেষ ব্যবস্থা সত্ত্বেও, রাজবৈদ্য শিবানীকে আরোগ্য করিতে পারিল না,—বরং রোগ ক্রমেই অতি কঠিন হইয়া দাঁড়াইল,—বৈদ্যগণ সরিয়া দাঁড়াইলেন।

তখন কঙ্কালসার শিবানী, উত্থানশক্তি রহিত হইয়া, অস্তিম-শয্যায় শুইয়া, নিজের ব্যবস্থা নিজেই করিলেন। স্বামীর পাদোদক পান ও চরণ-ধূলিই তাঁহার একমাত্র ঔষধ হইল। সেই মহৌষধি মাত্র সার করিয়া, শেষের কয়দিন, পরম পুলকিত চিত্তে তিনি অতিবাহিত করিলেন। স্বামীকে এক দণ্ডও তিনি চক্ষের অন্তরাল হইতে দেন না; কালীপদও অনন্তকর্ম্মা হইয়া, অমৃতপ্ত হৃদয়ে পত্নীর শিয়রে উপবিষ্ট রহিলেন। এই সময়ে তিনি মস্তক-যুগল পূর্বক, আপন দুষ্কৃতির যথাবিহিত প্রায়শ্চিত্ত করিলেন।

প্রাতঃসন্ধ্যায় কালীপদ চণ্ডীপাঠ করিয়া পত্নীকে শুনাইতেন; শিবানী একাগ্রমনে তাহা শুনিত;—ভক্তিভরে তাহার সর্বশরীর রোমাঞ্চিত হইয়া উঠিত। চক্ষু কোটর-প্রবিষ্ট; তবুও এখনো



তাহাতে পাতিব্রতের স্নিগ্ধদৃষ্টি বিরাজিত। সে মাধুর্য্যপূর্ণ অনি-  
মেধ দৃষ্টি, যেন তাহার অন্তরের অন্তর প্রকাশ করিয়া দেখাই-  
তেছে। সে দৃষ্টি যেন প্রতি-পলে পতিকে লক্ষ্য করিয়া বলি-  
তেছে,—“আমার জীবন-সর্ব্বম্ব প্রাণাধিক তুমি,—তুমি ভাল  
হইয়াছ,—ধর্ম্মশীল, পবিত্রচেতা, আচারবান্ গৃহী হইয়াছ,—আর  
আমার দুঃখ নাই,—এখন আমি সুখে নিশ্চিন্ত হইয়া মরিতে  
পারিব।”

এমনি অবস্থায় ধীরে ধীরে সতীর পরমাণু ক্ষয় হইতে  
লাগিল। এমনি অবস্থায় কালীপদ নিবিষ্টচিত্তে সতীমাহাত্ম্য  
হৃদয়ঙ্গম করিতে লাগিলেন। আর এমনি অবস্থায় স্বয়ং ভবানীও  
শৈশব-সঙ্গিনীকে মধ্যে মধ্যে দেখিয়া গিয়া, তাহার কাহিনী  
আছোপান্ত স্মরণ করিয়া, বিরলে অশ্রুবিসর্জন করিতে লাগি-  
লেন।

ক্রমে সেই শেষদিন উপস্থিত হইল। দীপ নির্বাণের অগ্রে  
যেমন একবার উজ্জ্বলরূপে জলিয়া উঠে, তেমনি শিবানীর সেই  
স্নান পাংশুবর্ণ মুখ, আজ অনেক দিনের পর যেন হাস্যময় হইয়া  
উঠিল। সে হাসি—মমতা, সরলতা ও পবিত্রতা মাখা ; তথাপি  
কি জানি কেন, কালীপদ আজ সে হাসি দেখিয়া কাঁদিয়া  
উঠিল। কাঁদিতে কাঁদিতে বলিল, “সতি, গৃহলক্ষ্মী আমার !  
আমাকে ফেলিয়া তুমি কোথায় যাইবে ?”

অতি কোমল ও মধুমাখা-কণ্ঠে শিবানী উত্তর করিল,  
“স্বামিন্, প্রভু, প্রাণেশ্বর ! অমন করিয়া চক্কের জল কেলিও  
না,—উহাতে আমার অকল্যাণ হইবে। আজিকের এই আনন্দ-  
দিনে হাসিমুখে আমায় বিদায় দাও। আমি এতদিন কায়মনো-

বাক্যে, যে প্রার্থনা করিয়া আসিয়াছিলাম, পতিতপাবনী আমার সে সাধ মিটাইয়াছেন,—ইহার বাড়া আমার আর সৌভাগ্য কি ?”

উচ্চস্বরে, মুক্তকণ্ঠে কালীপদ বলিল,—“কি তোমার প্রার্থনা, পতিব্রতে ?”

শিবানী । তোমার পায় মাথা রাখিয়া মরিব, আর—  
কালীপদ । ‘আর’ কি প্রাণাধিকে ?

শিবানী । আর তোমাকে ভাল দেখিয়া মরিব ।—তা আমার এ দুই সাধই পূর্ণ হইয়াছে ।—আজ আমার তুল্য ভাগ্যবতী ও গরবিনী আর কে ? এমন দিনে আমার প্রাণ ভরিয়া আশীর্বাদ না করিয়া তুমি কাঁদিতে বসিলে ? ব’স প্রাণেশ্বর,—আমার সম্মুখে একবার স্থির হইয়া বসিয়া থাক,—আমি প্রাণ ভরিয়া তোমায় দেখি !—ওকি, চঞ্চল হও কেন ? মুখ অমন মলিন কর কেন ?—আজিকের দিনে আমার অনুরোধ রাখ,—স্থির হইয়া ব’স ।

কালীপদ আবার উচ্চস্বরে কাঁদিয়া উঠিল । সেইরূপ কাঁদিতে কাঁদিতে বলিল,—“গৃহলক্ষ্মী আমার ! আমাকে কাহার কাছে রাখিয়া যাইবে ? এ সংসারে আমি একক,—ঘৃণিত, পরিত্যক্ত, সকলের উপেক্ষিত ;—স্বামীকে এমন অবস্থায় ত্যাগ করা উচিত হয় না প্রাণেশ্বর ! অভিমানিনি, আমি দাঁত থাকিতে দাঁতের মর্ষ্যাদা বুঝি নাই বলিয়া কি, তুমি সেই প্রতিশোধ দিয়া যাইতেছ ?”

শিবানী । ছি, অমন কথা বলিও না, প্রিয়তম ! তোমার উপর কি আমি অভিমান করিতে পারি ? দেবতার উপর কি

অভিমান সাজে ? আর সেই অভিমানে কি আমার প্রতিশোধ লওয়া সম্ভবে ? না প্রাণাধিক !—আমার দিন ফুরাইয়াছে, তাই আমি যাইতেছি । এখন প্রার্থনা এই, যে লোকে আমি যাইতেছি, সেই লোক হইতে পূজা পাঠাইলে, পদাশ্রিতা দাসীজ্ঞানে, তাহা গ্রহণ করিও । হায়, ইহজীবনে আমার পতিপূজা অসম্পূর্ণ রহিয়া গেল !

কালীপদ । তোমার পূজা অসম্পূর্ণ ? না সতি !—আমাকেই তুমি মহাপাতকী করিয়া গেল ।—আমিই তোমার এই অকাল-মৃত্যুর কারণ হইলাম ।

শিবানী । না-না-না, অমন কথা আর মুখে আনিও না । দোহাই তোমার, সুখের এ শেষদশায় আর আমার অকল্যাণ-সাধন করিও না । আমার গঙ্গাজল আমাকে সার বুঝাইয়াছে ; —তুমিই আমার ঈশ্বর, তুমিই আমার পরকাল । জীবনবল্লভ ! আবার জন্মান্তরে যেন ও-চরণে স্থান পাই !

এবার সতীর চক্ষু অশ্রুপূর্ণ হইল । কিন্তু হায় ! সে অশ্রু বহিবার পথ আর নাই,—সে পথ রুদ্ধ ! চক্ষু-কোর্টরে সে জল নিবদ্ধ হইয়া রহিল । কালীপদ আপন বস্ত্রাঞ্চলে, সযত্নে সতীর চক্ষের সে জল মুছাইয়া দিল ।

এবার সতী পতির হাতখানি দুই হাতে ধরিলেন । মধুরকণ্ঠে বলিলেন, “আর একটি কথা ।”

কালীপদ আগ্রহভাবে বলিল, “কি, বল ? তোমার কোন্ কাজ করিতে হইবে, নিঃসঙ্কোচে বল,—আমি প্রাণ দিয়াও তাহা সমাধা করিব ।—বল কি কথা ?”

শিবানী । সাহস দাও,—কোন অপরাধ লইবে না ?

কালীপদ । তোমার আবার অপরাধ ?—বিশেষ এই সময় ?

শিবানী । তুমি আবার বিবাহ করিয়া নূতন সংসার পাতিও ।

কালীপদ । নিষ্ঠুর, পাষণ ! এই তোমার কথা ? তোমার পিতামাতা তোমার শিবানী নাম না রাখিয়া, পাষণী নাম রাখেন নাই কেন ? তাহা হইলেই বোধ হয় ঠিক মানাইত !

শিবানী । তোমার বড় কষ্ট হইবে, তাই—

কালীপদ । আবার ?

শিবানী । তবে আমার পূজা লইও ? যেমন ভাবে যেখানে থাক, আমার মানস-পূজা গ্রহণ করিও ?

অনুভব কালীপদ, অন্তরে শতবৃশ্চিক-দংশনের আলা অনুভব করিয়া নীরবে কাঁদিতে লাগিলেন ।

এই সময় ভবানী, শৈশব-সঙ্গিনীকে শেষ-দেখা দেখিতে আসিলেন । শিবানী শ্রিতমুখে তাঁহাকে সম্মুখে বসিতে ইঙ্গিত করিলেন । কিছুক্ষণ দুইজনেই নীরব । দুইজনের চক্ষুই বাষ্পপূর্ণ ।

শিবানী ধীরে ধীরে ভবানীর হাতখানি ধরিলেন । ধীরে ধীরে আপন হাত হইতে, নোঙা-গাছটি উন্মোচন করিলেন । ধীরে ধীরে সেই নোঙা-গাছটি—সেই সধবার মাজলিক নিদর্শনটি, —শৈশব-সঙ্গিনী—রাজরাণীর হস্তে পরাইয়া দিলেন ।

ভবানী যেন একটু বিস্মিতা, একটু কুণ্ঠিতা হইয়া বলিলেন, “একি ! এ কি হইল ? তোমার হাতের ‘নো’ আমার হাতে দিলে যে ?”

হাসি-হাসি মুখে শিবানী উত্তর দিল,—“ঐটি আমার গুরু-দক্ষিণা । শিষ্যকে স্বামিতত্ত্বি সম্বন্ধে অনেক শিক্ষা দিয়াছ,—

চিরদিন তাহাকে স্বামিসহ প্রতিপালন করিয়া আসিয়াছ,—  
তোমার ঋণ অপরিশোধনীয় ।—তাই এই অন্তিমকালে, শিষ্যা  
তার জীবন-সম্বল, কোটি মুদ্রা হইতেও মূল্যবান্—এই অমূল্য  
অলঙ্কার—তার ভালবাসার জনকে স্বহস্তে পরাইয়া দিয়া গেল ।  
তাই গঙ্গাজল ! চিরদিন এটি, আদরে এই হাতে রাখিও ।  
তোমার এই মণি-মুক্তাময় হীরক-বলয়ের পাশে,—রত্নমণ্ডিত  
ঐ ‘নো’র ধারে,—এটি না মানাইলেও, রাখিও । মার মুখে  
শুনেছি, এর ফল নাকি বড় শুভ ।”

ভবানী আনন্দে, বিষয়ে, ভয়-ভক্তি-ভালবাসার আবেশে,  
এবং পক্ষান্তরে শৈশব-সঙ্গিনীর চিরবিচ্ছেদ আশঙ্কায়, কেমন  
একরূপ অপরূপ কণ্ঠে বলিয়া উঠিলেন,—“কিন্তু আমার এমন  
জোর-কপাল হইবে কি ? সাধিব ! তোমার ঞায় এইরূপে স্বামীর  
পায়ে মাথা রাখিয়া যাইবার সৌভাগ্য আমার ঘটিবে কি ?  
সধবা রমণীর হাতের এই নোঙা সত্যই অমূল্য ; তুমি স্বেচ্ছায়  
আজ শৈশবসঙ্গিনীর হাতে তাহা পরাইয়া দিয়া গেলে!—আমিই  
তোমার নিকট চিরঋণী রহিলাম । এখন তুমি যে লোকে  
যাইতেছ, সেই লোক হইতে আশীর্বাদ করিও, যেন তোমার  
এই চির স্নেহাভিলাষিণীও, এই ভাবে তোমার অনুসরণ করিতে  
সমর্থ হয় । তুমি পথ দেখাইয়া গেলে,—এ অংশে আমিই  
তোমার শিষ্যা—ভাগ্যবতি ! তোমার মত ভাগ্য কি আমারও  
হইবে ?”

শিবানী এবার বড় পবিত্র মধুর হাসি হাসিয়া, ভবানীর  
কর-পল্লবে একটি চুম্বন করিল । ভবানীও সেই চুম্বনের প্রতি-  
চুম্বন দিয়া, স্নেহভরে শিবানীর চিবুক ধারণ করিলেন । শিবানী


বলিল, “জন্মান্তরে যেন তোমার মত স্নেহময়ী সঙ্গিনী লাভ করিয়া জীবন মধুময় করিতে পারি !”

ভবানী বলিলেন, “সাধি ! আমি যেন ইহজন্মেই তোমার মত এইরূপে, পতির পায়ে মাথা রাখিয়া বাইতে পাই ।”

ক্ষয়রোগ ;—সজ্ঞানে, কথা কহিতে কহিতে, শিবানী মহাকালের কুক্ষিগত হইতে চলিল। মহাকালের মহা আকর্ষণের সকল লক্ষণ ক্রমশঃ প্রকাশ পাইল। সুবর্ণ দীপ নিভ-নিভ হইয়া আসিল ;

এইবার শিবানী কি ইঙ্গিত করিল, ভবানী শয্যা ত্যাগ করিয়া উঠিয়া দাঁড়াইলেন। অদূরে কালীপদ মন্ত্রমুগ্ধের গায় দাঁড়াইয়া এই করুণ-দৃশ্য দেখিতেছিল,—পত্নীর ইঙ্গিত বুঝিয়া নিকটে আসিল। শিবানী স্বামীর পাদপদ্মে মস্তক স্পর্শ করিলেন। তার পর যেন আরও হাসি-হাসি মুখে, পরিপূর্ণ দৃষ্টিতে, স্বামীর পানে চাহিয়া দেখিলেন। কিন্তু হায় ! সেই দৃষ্টিই তাঁর শেষদৃষ্টি হইল,—সে দৃষ্টিতে আর পলক পড়িল না ! সতী নিমেষে নরলোক ছাড়িয়া গেলেন।

“হরিবোল—হরি” বলিতে বলিতে, কালীপদ, শবদেহ আচ্ছাদিত করিল,—ভবানীও আশায় ও নিরাশায় তুল্যরূপে আন্দোলিত হইতে হইতে, শত কথা ভাবিতে ভাবিতে, শিবিকা-রোহণে, সজলনয়নে গৃহে ফিরিলেন। তাঁহার সঙ্গে পরিচারিকা, দ্বারবান্ প্রভৃতি আসিয়াছিল ; তাহাদের দুই একজনকে শিবানীর অন্ত্যেষ্টিক্রিয়ার সমুদয় বন্দোবস্ত করিয়া দিতে আদেশ দিয়া, তিনি চলিয়া গেলেন।





## দশম পরিচ্ছেদ ।

—:~\*~:—

শিব-সঙ্গিনী শিবানী, স্বামীকে রাখিয়া, সধবাদশায়  
কালের মুখে ডঙ্কা মারিয়া চলিয়া গেলেন,—  
সেই দিন হইতে ভবানীর মনে কেমন একটা ভাবাস্তর  
হইল । তিনি সদাই আপন মনে ভাবিতে লাগিলেন,—

“আমারও কি এই সৌভাগ্য হইবে না ? আমিও কি এইরূপে  
পতি-দেবের পাদ-পদ্মে মাথা রাখিয়া যাইতে পারিব না ?  
শুনিয়াছি, সধবা সীমস্তিনীর হাতের এই নোঙা বড় সুলক্ষণযুক্ত ;  
—এই নোঙা হাতে থাকিলে তার আর বৈধব্য-দশার ভয় থাকে  
না ;—গঙ্গাজল আমার বড় আদরে তার সেই মঙ্গলিক-চিহ্ন,  
স্বহস্তে আমার হাতে পরাইয়া গেল ;—তবে আমিও কি আমার  
জীবন-সর্বস্ব প্রাণের প্রাণ—প্রত্যক্ষ ঈশ্বর—স্বামিরহকে রাখিয়া,  
হাসিমুখে তাঁহার নিকট বিদায় লইতে পারিব না ? কি পুণ্য  
করিলে এ সৌভাগ্যের সঞ্চার হয় ? কোন্ উৎকট তপস্যা করিলে  
রমণী-জন্মের এ সর্বসার সাধ মিটে ? হায় ! কে আমাকে এ গুঢ়  
রহস্য বলিয়া দিবে ? কার নিকট আমি এ মহামন্ত্র গ্রহণ করিব ?  
হে শিব, হে সর্বমঙ্গলনিদান ! বলিয়া দাও, আমার ইষ্টপূজা সফল

হইবে কিনা ?—আমার মনের বাসনা পূরিবে কিনা ? কিন্তু, আমার প্রাণ, থাকিয়া থাকিয়া একরূপ কাঁদিয়া উঠে কেন ? জাগ্রতে আমি এমন হৃৎস্বপ্ন দেখি কেন ? কি জানি, অদৃষ্টে কি আছে !”

পতিব্রতা, সাক্ষাৎ লক্ষ্মী ভবানীর মনে, কি জানি কেন, সহসা এ তরঙ্গ উঠিল । দিনের পর দিন গেল, মাসের পর মাস গেল, এক ঋতুর পর আর এক ঋতুর আবির্ভাব হইল,—তথাপি এ তরঙ্গের নিবৃত্তি হইল না,—তরঙ্গের সহিত ক্রমে প্রবল তুফানের সন্মিলন ঘটিল ;—ভাবনার সহিত ভয় মিশিয়া, সতীকে কেমন বিপর্যস্ত করিয়া ফেলিল ।

এক একটা দুর্ভাবনা, সত্য সত্যই কেমন ফলিয়া যায় ।—ভবানীর ভাগ্যেও বা তাই ফলে ?

কোথাও কিছু নাই,—আকাশে বড় ঘন মেঘ উঠিল । দেখিতে দেখিতে সেই মেঘ চারিদিক্ ছাইয়া ফেলিল । অন্ধকারে আকাশ-মেদিনী এক হইয়া গেল । কিন্তু সে ঘনাক্ষকারে বিদ্যুৎ চমকিল না । ভবানী দেখিলেন, এ তাঁহারই হৃদয়ের প্রতিকৃতি । মহাঝড়ের পূর্বে, প্রকৃতি এইরূপ ভাষণা মূর্তি ধারণ করিয়া থাকে ।—তাঁহারই ভাগ্যে বা এই মহাঝড় উত্থিত হয় ?

কোথাও কিছু নাই,—রামকান্তের নবীন নধর দেবকান্তি দেহে একটু জ্বর আসিল । সামান্য একটুকু বৃষ্টিসে মাত্র জ্বর ;—কিন্তু হায় ! কে জানিত যে, সেই জ্বরই তাঁহার কাল-জ্বর হইবে ? কে জানিত যে, প্রদীপ্ত মধ্যাহ্ন-সূর্য্য, মধ্যাহ্ন-গগনে থাকিতে থাকিতেই, চির-অস্তমিত হইয়া যাইবে ?

সতী-কুললক্ষ্মী ভবানী কিন্তু অস্তরের অস্তরে তাহা অনুভব করিতে পারিয়াছিলেন । বহুদিন-সঞ্চিত মনের দুর্ভাবনাই যেন



তাঁহাকে বলিয়া দিল,—“এইবার জনের মত তোমার কপাল  
পুড়িবে ;—রাজরাজেশ্বরী—রাজকুললক্ষ্মী হইলেও, ভাগ্যবতী  
নামে তোমার আর অধিকার থাকিবে না !”

প্রাণঘাতিনী এই অশুভচিন্তা, শেলসম হৃদয়ে বিদ্ধ হইলেও,  
সেই মূর্ত্তিমতী সহিষ্ণুতা,—সেই অপূৰ্ব সতীপ্রতিমা,—চিরমাধুর্য্য-  
ময়ী গম্ভীরা মূর্ত্তিতে, স্বামীর শিরেরে আসিয়া বসিলেন । স্বামীর  
মস্তকে পদহস্ত সঞ্চালন করিতে করিতে, মধুমাধা কণ্ঠে বলিলেন,  
—“মাথায় কি বড় ব্যথা বোধ হইতেছে ?”

রামকান্ত । প্রাণেশ্বরী, তোমার ঐ মনোহারিণী পুণ্যময়ী  
মূর্ত্তি দেখিলে, আমার কোন অশুখ থাকে না ।—তুমি ওখান  
হইতে আমার সন্মুখে আসিয়া ব’স প্রিয়তমে !—আমি তোমায়  
দেখি ।

ভবানী, স্বামীর পদতলে আসিয়া উপবেশন করিলেন ।  
সেখানে বসিয়া স্বামীর পদসেবা করিতে লাগিলেন । কি অপূৰ্ব  
সে শোভা !—যেন ক্ষীরোদ-সমুদ্রে অনন্তশয্যায়-শায়িত—  
নারায়ণের পদতলে বসিয়া, স্বয়ং নারায়ণী—মহালক্ষ্মী—স্বামিপদ-  
সেবায় নিরতা হইয়াছেন ! সত্যই মহারাজ রামকান্ত রোগযজ্ঞা  
ভুলিয়া গিয়া, অনিমেঘনয়নে, সে সতী-প্রতিমার পানে চাহিয়া  
বহিলেন ;—মুহূর্ত্তকালের জন্য বুকি সে চোখের পলক পড়িল না ।

আর ভবানী ?—সাক্ষাৎ করুণারূপিণী সে মূর্ত্তি ;—আজ  
যেন সে মূর্ত্তিতে, কি একটা অপরূপ গাম্ভীর্য্য মিশিয়া, সুখহুঃখের  
অতীত অবস্থায় তাঁহাকে রাখিয়া দিয়াছে । হঠাৎ কিন্তু, প্রতি-  
মার সে স্বভাব-সজল নয়নকমলে এক বিন্দু জল দেখা দিল ।

সেই জলবিন্দু দেখিবামাত্র, পীড়িত রামকান্ত, যেন হৃদয়ে

বড় বেদনা পাইয়া, উঠিয়া বসিলেন । পল্লীর মুখের নিকট মুখ লইয়া গিয়া, বড় মমতাপূর্ণ কণ্ঠে বলিলেন,—“প্রাণাধিকে ! কাঁদ কেন ? তোমার এই অপরূপ করুণাপূর্ণ চক্ষু আমি বড় ভাল-বাসি বটে, কিন্তু এই চক্ষে ঐ জলবিন্দু দেখিলে, বড় ব্যথা পাই ;—সংসার আমার চক্ষে অন্ধকার বোধ হয় ! ভয় কি ?—আমার এ সামান্য অসুখ ;—দুই দিনেই আরোগ্য হইবে ।—হাঁ, তুমি ঐরূপ স্থিরভাবে, নিশ্চল প্রতিমার মত, আমার সম্মুখে বস—আমি তোমার দেখি !”

পুণ্য-প্রতিমা ভবানী, স্বামীর মনোভিলাষ বুঝিয়া, মনের ব্যথা মনে চাপিয়া, আবার চিরানন্দময়ী মূর্তিতে, স্বামীর সম্মুখে বসিলেন ;—রামকান্ত অনিমেষ দৃষ্টিতে, সে শোভা দেখিতে লাগিলেন । এইবার বালিকা তারা আসিয়া, মার কোল আলো করিয়া বসিল । সে-ও মায়ের দেখাদেখি, কচি-হাতে, তার পিতার পায়ে হাত বুলাইতে লাগিল ।

হঠাৎ, সেই একদিনেই অর বাড়িয়া উঠিল । দ্বিতীয় দিনে আরও বৃদ্ধি হইল,—চোখ মুখ সব লাল হইয়া উঠিল । তৃতীয় দিনে আরও বাড়াবাড়ি ;—রাজবৈদ্যগণ মনে মনে প্রমাদ গণিলেন । ভয়ে তাঁহাদের মুখ শুকাইয়া গেল ; ইঙ্গিতে পরস্পর পরস্পরকে সে কথা বলাবলিও করিলেন । জনান্তিকে, তাঁহাদের মধ্যে, চরক, সুশ্রুত, নিদানের অনেক কথা আলোচিত হইল,—কিন্তু কোন ফল হইল না ।—রাজপুরীতে ভয়-বিভীষিকা-আতঙ্কের করাল-ছায়া নিপতিত হইল । সকলেই বিশেষ উৎকণ্ঠিত-চিত্তে, প্রতিপলে, যেন সেই মহাবিপদের—সেই মহা সর্বনাশের আশঙ্কা করিতে লাগিল ।

কিসে যে কি হয়,—কোন্ সূত্রে যে কি ঘটে, কে তাহার নিদান নির্ণয় করিবে ? অদৃষ্ট ছাড়া পথ নাই,—ইহাই ঠিক । জীভাতির সংস্কার যে, মৃত্যু এরোর হাতের নোঙা হাতে দিতে পারিলে, সে ভাগ্যবতীও এরো-দশায়—স্বামীকে রাখিয়া যাইতে পারে । প্রবাদ বল, আর কুসংস্কার বল, —হিন্দুসমাজে আবহমান কাল হইতে, এইরূপ এবং আরও অনেকরূপ প্রথা চলিয়া আসিতেছে । অদৃষ্ট গুণে কাহারও ফল ফলে, কাহারও বা বিফল হয় । ভবানীর ভাগ্যে তাহা বিফল হইল । বৈধব্য-লগ্নে তাঁহার জন্ম ; সেই লগ্ন বা ক্রণের ফল ত. ফলা চাই ? দৈবের রূপায়, বাল্যে না হইয়া যৌবনে তাঁহার সেই দশা হইল,—ইহাই তাঁহার পরম পুণ্য ;—তাঁহার পিতামাতার পরম তপস্কার ফল ।

তৃতীয় দিনে ঘোর বিকারে, রামকান্ত একবার চক্ষু উন্মোলন করিলেন । ক্রণেকের জন্ম তাঁহার একটু জ্ঞান আসিল । রক্তবর্ণ চক্ষু একবার ইতস্ততঃ বিক্ষিপ্ত করিয়া, কাহাকে যেন তিনি অন্বেষণ করিলেন । যাহাকে তিনি অন্বেষণ করিলেন, সেই সতী-প্রতিমা সহধর্মিণী, আহারনিদ্রা ত্যাগ করিয়া, প্রস্তরমূর্তির ন্যায়, নিশ্চলভাবে তাঁহার শিররে বসিয়া আছেন ।

এইবার একটি মর্ম্মচ্ছেদকর দীর্ঘনিশ্বাস ফেলিয়া, ভবানী স্বামীর সন্মুখে আসিয়া বসিলেন । নিশ্বাসের সে তপ্ত-বায়ু রামকান্তের শরীর স্পর্শ করিল । তিনি বুঝিলেন, কি দুর্ভাগ্য যজ্ঞা, সাধ্বী নীরবে সহ করিতেছেন ! কিন্তু হায়, ইহা অপেক্ষাও শতগুণ যজ্ঞা এখন আছে ;—আমরণ সুদীর্ঘকাল সে যজ্ঞা নীরবে সহিতে হইবে ! সহিষ্ণুতার অবতাররূপিণী রমণীরই তাহা সম্ভবে । ভবানী সেই রমণী-শিরোমণি হইয়া, দেবীমূর্তিতে

তাহা সহিবেন। আমরা তাঁহার সে মহিমময়ী মূর্তি দেখিয়া  
ধন্য হইব।

রামকান্ত ধীরে ধীরে চাহিলেন, ভবানী ধীরে ধীরে স্বামীর  
সম্মুখে গিয়া, স্বামীর সেই নীরব দৃষ্টিতে দৃষ্টি মিলাইলেন।  
চারিটি চক্ষুই বাষ্পপূর্ণ হইল। কি বলি-বলি করিয়া, উভয়েরই  
ওষ্ঠ কাঁপিতে লাগিল,—কিন্তু কিছুক্ষণ কেহই কোন কথা বলিতে  
পারিলেন না—অনিমেষ নয়নে উভয়ে উভয়ের মৃথপানে চাহিয়া  
রহিলেন।

এইবার ভবানীর গণ্ডস্থল বহিয়া অশ্রুধারা পড়িতে লাগিল।  
কিন্তু তদবস্থায়ও তিনি নীরব রহিলেন। বুকের অসহ যন্ত্রণা  
বুকে চাপিয়া সাধ্বী জন্মশোধ স্বামীকে দেখিয়া লইতে লাগি-  
লেন।—হায়! পরক্ষণে ত এমন দেখা আর দেখিতে পাই-  
বেন না?

রামকান্ত, পতিব্রতীর এ মর্মান্তিক কষ্ট অনুভব করিলেন।  
নিজেরও শেষ-অবস্থা বুঝিতে পারিলেন। ধীরে ধীরে তিনি  
পত্নীর হাতখানি আপন বক্ষে রাখিলেন। তার পর ধীরে ধীরে  
বলিলেন, “সতি, কাঁদিও না। সংসারে তোমাকে আরও সহিতে  
হইবে। সহিতে তুমি আসিয়াছ, সহিয়াই যাইবে।”

ভবানী এবার কাঁদিয়া ফেলিলেন। কাঁদিতে কাঁদিতে বলি-  
লেন,—“প্রভু, আরও সহিব? আর সহিবার বাকী কি?”

রামকান্ত। বাকী আছে বৈ কি? আমি যেন দিব্যচক্ষে  
দেখিতেছি, অনেক পরীক্ষা তোমার উপর আছে,—তোমাকে  
“অনেক সহিতে হইবে। সহিষ্ণুতার পরীক্ষা দিতেই যেন তুমি  
সংসারে আসিয়াছ। প্রিয়তমে, তজ্জন্য প্রস্তুত হইয়া থাক।”

ভবানী, হস্তে মুখ আবৃত করিয়া, নীরবে কাঁদিতে লাগিলেন ।  
রামকান্ত পুনরায় বলিলেন, “প্রাণাধিকে, কাঁদিও না ।  
ভাবিয়া দেখ, এ সংসারে যে সহিতে পারে, সে-ই ধন্য । ধূপ  
আগুনে পুড়ে, পুড়িয়াও সৌরভ দেয় । সতলক্ষী সীতা আজীবন  
সহিয়া—পুড়িয়া গিয়াছিলেন ; তাই তাঁহার মহিমা-সৌরভে  
জগৎ আমোদিত !”

এবার ভবানী, কি ভাবিয়া, মুখ তুলিলেন । একটি দীর্ঘ-  
নিশ্বাস ফেলিয়া, স্বামীর মুখের পানে, নীরবে চাহিয়া রহিলেন ।

রামকান্ত বলিতে লাগিলেন,—“প্রিয়তমে, শোকে হৃৎথে  
বিপদে—সহিষ্ণুতাই জীবনের সার করিও ।—যে সয়, সে অনেক  
কাজ করিয়া যায় । তুমিও অনেক কাজ করিয়া যাইবে ।”

রুদ্ধকণ্ঠে ভবানী এবার বলিলেন,—“প্রভু, তোমা হারা  
হইয়া আমার আর কি কাজ আছে ? কৈ, সে কাজ ত আমার  
কেহ শিখায় নাই ? তোমার সঙ্গে এ দেহেরও অবসান,—ইহাই  
জানিয়া আসিয়াছি ।”

রামকান্ত । না, সহমরণে তোমার অধিকার নাই । অস্ততঃ,  
আমার সেরূপ ইচ্ছা নয় । পবিত্র ব্রহ্মচর্য্য-ব্রত তোমায় অব-  
লম্বন করিতে হইবে । যাহারা তাহা না পারে, তাহাদের পক্ষেই  
সহমরণ বিধি বটে । কিন্তু তুমি তাহা পারিবে,—সে সৌভাগ্য  
তোমার আছে । বহুদিন পরে তুমিই আবার এ পুণ্যভূমি  
ভারতে, নিষ্কামধর্ম্মের মাহাত্ম্য দেখাইবে । পরসেবাব্রত গ্রহণ  
করিয়া, “দীনজননী দয়াময়ী ভবানী” নামে তুমি অভিহিত  
হইবে,—ইহাই যেন আমি দিব্যচক্ষে দেখিতে পাইতেছি ।—  
প্রিয়ে, দেবলোকে আবার আমরা মিলিত হইব ।

ভবানী এবার কাঁদিতে কাঁদিতে বলিলেন, “নর-দেব, আমার প্রত্যক্ষ ঈশ্বর ! তুমি ভিন্ন আমি যে আর নূতন কোন ধর্ম জানিনা ?—কে আমায় সে ধর্ম শিখাইবে ? কিরূপে আমি সে ধর্ম পালন করিব ?”

রামকান্ত । তোমার সর্বতোমুখী ধর্মবুদ্ধিই তোমার সাধন-ব্রতের সহায় । বিপুল ধন-সম্পদ ও ভূ-সম্পত্তি রহিল ;—তোমার যথা ইচ্ছা—ধর্ম-কর্ম করিয়া যাইও ।—তারার আশা তুমি অধিক করিও না ;—এই কল্যাণ তোমায় সুখী করিতে পারিবে না ।—সুখ-শান্তি তোমার-আমার সেই নিত্যধামে ।

ভবানী এবার স্বামীর পদদ্বয়ে মুখ লুকাইয়া কাতরকণ্ঠে বলিলেন, “জীবনবল্লভ ! তুমিই আমার সুখ, তুমিই আমার শান্তি । তুমি থাকিলে, এই সংসারেই আমি নিত্যধাম রচনা করিতে পারিতাম ।—হায় ! আমার ইহজন্মের পতি-পূজা সাক্ষ হইল না !”

রামকান্ত । সেজন্য খেদ নাই,—পূজা পাঠাইও,—আমি গ্রহণ করিব । আমার দিন ফুরাইয়াছে,—আমি চলিলাম । ইহজন্মের মত চলিলাম । যে পথে গিয়া কেহ কখন আর ফিরে না, সেই পথে চলিলাম । প্রিয়তমে, হাসি-মুখে আমার বিদায় দাও ।—ঐ দেখ, বিমান-পথে দেববালাগণ আমার জন্ম অপেক্ষা করিতেছেন । ঐ শুন, কি মধুর শব্দধ্বনি হইতেছে ! এই দেখ,—পুষ্পবৃষ্টি ; ঐ দেখ,—পুষ্পক রথ !—দাঁড়াও, আমি যাই,—যাই ।

ভবানী এইবার যেন পরিষ্কার বুদ্ধিতে পারিলেন, তাঁহার বহুদিন-সঞ্চিত দুশ্চিন্তা এইবার কার্য্যে পরিণত হয়,—এবং সেই

সঙ্গে তাঁহার বড় সাধের আশালতাও চিরদিনের মত হাঁছন্নমুলা হইয়া যায় !

তাহাই হইল ।—সেই দিন অপরাহ্নে, শান্ত-স্নিগ্ধ-গোধূলির সম-সময়ে, পরম প্রীতিপ্রদ পুণ্যময় মুহূর্ত্তে,—হায় ! সব ফুরাইল !

মণিহারা ফণিনীর ঞায়, দিগ্বিদিক্ জ্ঞানশূন্যা হইয়া, চক্রে অককার দেখিয়া, ভবানী ভূমে আছাড়িয়া পড়িলেন । তাঁহার সংজ্ঞা বিলুপ্ত হইয়া আসিল । তিনি এক অদ্ভুত স্বপ্ন দেখিলেন ।

সেই বাল্যের সেই মাধুর্য্যময় স্বপ্ন । এবারও যেন জননী, সেই স্নেহময়ী অনপূর্ণা-মূর্ত্তিতে তাঁহার শিররে সমুপস্থিত । হাসি-হাসি মুখে মা বলিতেছেন,—

“মা, আবার আত্মবিস্মৃতা হইলে ? মোহ দূর কর, জ্ঞান-নেত্রে চাও,—দেখ, আমি কে ? এইবার সেই মহাব্রত গ্রহণ কর,—জীবে অন্ন দাও, জননী-অনপূর্ণা নামে অভিহিতা হও । কার জন্ম শোক কর ? এই দেখ, তোমার পতি-পুত্র আমার ক্রোড়ে । এই দেখ, তোমার সাধের শিবানীও এইখানে ! তুমিও সময় হইলে এখানে আসিবে । এখন কাজ কর । তোমার অনেক কাজ আজিও বাকী । কাজ শেষ না করিলে ছুটি পাইবে না । কাজ শেষ করিয়া এস মা ! আমিও তোমার জন্য কাতর ।”

বহুকালের পর ভবানীর সংজ্ঞা আসিল । তিনি উঠিয়া বসিলেন । দেখিলেন, পুরমহিলা ও পরিচারিকাগণ তাঁহার গুপ্তশায় নিযুক্ত । তখন প্রায় চারি-দণ্ড রাত্রি হইয়াছে । উন্মুক্ত গবাক্ষ-পথ দিয়া বিমল জ্যোৎস্নালোক গৃহমধ্যে প্রবেশ করিয়াছে । ভবানী দেখিলেন, সে গৃহের সব আছে,—কেবল একটি জিনিস নাই । এই কিছুক্ষণ পূর্বে, যাহাকে দেখিয়া, তিনি জন্ম-জন্মা-



স্তরের দর্শন-পিপাসা মিটাইতেছিলেন,—কেবল সেই অর্নন্দ-সুন্দর দেবমূর্তিটি সেখানে নাই । এই একটু আগে যাহার অমৃত-ময়ী কথা শুনিয়া প্রাণের প্রাণ ; -জুড়াইতেছিলেন,—দেখিলেন, হায় ! শয্যা শূন্য ;—তাহাতে সেই অমিয়নিছান যধুর-মনোহর মুখখানি নাই । তাঁহার মুচ্ছিত দশায়,—সেই মুখ, সেই দেব-হুল্লভ মূর্তি, তাঁহার আত্মীয়-স্বজন চিত্তানলে ভস্মীভূত করিতে লইয়া গিয়াছে !

সকলের ক্রন্দন দেখিয়া, বালিকা তারাও কাঁদিতেছিল । এবার বড় মমতাপূর্ণ কোমলকণ্ঠে, সে, জননীকে জিজ্ঞাসা করিল,—“মা, বাবা কোথায় ?”

ভবানী কোন উত্তর দিতে না পারিয়া, একটি দীর্ঘনিশ্বাস ফেলিয়া, উর্ধ্বে অঙ্গুলি নির্দেশ করিলেন ।

বালিকা বলিল,—“ও যে আকাশ । অত দূরে বাবা কেমন ক’রে গেল ? হাঁ মা, বাবা আবার আসবে ?—ও কি, তুমি কাঁদচ কেন মা ?”

একজন পুর-মহিলা তারাকে কোলে লইয়া, সেখান হইতে চলিয়া গেলেন । বালিকা পুনরায় জিজ্ঞাসা করিল,—“আমার বাবা কোথায় ?”

“তিনি স্বর্গে । চল, আমরা স্বর্গ দেখিগে ।”

পুরমহিলা বহু চেষ্টায়, বালিকাকে ভুলাইয়া অন্যমনস্ক করিলেন ।

ভবানী ভাবিলেন,—“এই বালিকাকে মার্শ্ব করিতে হইবে । ইহার রক্ষা ও পালনের ভার আমার উপর ।—মা দয়াময়ি, পরমেশ্বর ! তুমিই সব দেখিও ।”



তখন একে একে সকল কথাই ভবানীর মনে পড়িতে লাগিল । সেই সোনার শৈশব, সেই স্নেহময়ী শিবানী, সেই সাধের খেলা-ধূলা, সেই পিতামাতার অপরাজিত স্নেহ, সেই পিসীর সতর্কিত করুণা, সেই পিতৃপ্রতিষ্ঠিত অন্নপূর্ণার মন্দির, সেই আতুরাশ্রম, সেই অতিথিশালা, সেই বিবাহ—সকলই তাঁহার সুদীর্ঘ স্বপ্ন বলিয়া মনে হইল । তার পর রাজগৃহে আগমন, স্বামীর সহিত পবিত্র প্রণয় বন্ধন, রাজ্যনাশ, রাজ্যোদ্ধার, দুই পুত্রের অকাল নিধন, শিবানীর মৃত্যু,—তাহার সেই মাস্তুলিক উপহার,—উপহার গ্রহণাবদি নানা চিন্তা,—শেষ এই আকস্মিক মহাসর্বনাশ,—সুদীর্ঘ সময়ের বিবিধ ঘটনাপুঞ্জ যেন চিত্রপটাক্তিত প্রতিকৃতির ন্যায় তাঁহার চক্ষের সম্মুখে ভাসিতে লাগিল । কোথা দিয়া কি ভাবে যে, এমন সব ঘটনা ঘটয়া গেল, তাহা তিনি ভালরূপ ভাবিয়াও উঠিতে পারিলেন না । অথচ প্রকৃতই এই সব ঘটনা ঘটয়া গিয়াছে ভাবিয়া, ভবানী মনে মনে বলিলেন,—

“হায় রে ! এই জীবন ? ছায়াময় জীবনের এই অভিনয় ? এই আছে, এই নাই,—ইহারই জন্য এত ? এই ছায়াবাজীতে এত দিন বিভোর ছিলাম ? জীবনের এ সুদীর্ঘকাল মধ্যে, কি করিলাম ? কোন্ অভীষ্ট সিদ্ধ হইল ? বাঁহাকে প্রাণের প্রাণ—হৃদয়ের আরাধ্য-দেবতা ভাবিয়া, এত দিন পূজা করিলাম,—সময়ে তিনিও বাম হইলেন ;—এ দুস্তরে আমায় একাকিনী ফেলিয়া চলিয়া গেলেন ! তবে, আর কার জন্য আশা ? কার জন্য আমার বন্ধন ? সুকুমারী তারা ? তা তার প্রতিও বৈশী আশা করিতে, তিনি আমায় নিবেদন করিয়া গেলেন ।—তবে তারাও আমায় কঁাকি দিয়া যাইবে ! কিংবা——যাক্, সে চিন্তা


আর করিব না । কিন্তু এ দুঃখের সংসারে, তবে সত্য সত্যই আমি একক হইব ? হায় ! আমার সেই পুণ্যপ্রাণ পিতৃদেব, পুণ্যবতী মাতৃদেবী,—তঁাহারাই বা আজ সব কোথায় ? তনয়ার এ দশা দেখিবার অগ্রেই, তাঁরা ইহ-সংসার হইতে বিদায় লইয়া-ছেন ! তবে, আমার আপনার বলিতে আর কেহ রহিল না ? হায় ! আমি কাঁদিতেও পারিতেছি না,—আমার শোক ক্রন্দনেরও অতীত হইয়া গিয়াছে ! এ হৃদয় শ্মশান ; এত দিনে আমি অন্তরে বাহিরে পাষণ হইয়া রহিলাম । তবুও এই পাষণে নিৰ্ঝরিণী বহাইতে হইবে ।—ইহা তাঁহারও আদেশ,—জননী অন্তর্পূর্ণাও প্রত্যাদেশ । ভাল, তাহাই হইবে । আমি পাষণে বুক বাঁধিলাম ।—এখন, লও দেব ! দাসীর মানসিক পাণ্ড-অর্ঘ্য লও ! জননি, অন্তর্পূর্ণে ! তাপিতা তনয়াকে রূপা কর । আর আমার এ রাণীগিরিতে কাজ নাই ;—আজ হইতে আমি তপ-শ্চারিণী—বিধবা । বিধবা,—সধবার দাসীর যোগ্যাও নয়,—সে বড় দুর্ভাগ্যবতী । হায়, পিসিমা ! তুমি এখন স্বর্গে ;—আজ তোমার সেই ‘বিধবা’ কথার অর্থ, মর্মে মর্মে উপলব্ধি করিতেছি !”

এমন সময় দূরে-কে গান গাহিল । স্বর যেন পরিচিত ; কিন্তু ভাল করিয়া ঠাওরিয়া বুঝা যাইতেছে না,—গায়ক—কে ? ভবানী সেই শীতল হর্ষাতলে শয়ন করিয়া, একাগ্রমনে, রোমাঞ্চিত-কলেবরে শুনিতে লাগিলেন, কে যেন গাহিতেছে,—

( মেঘ—একতারা । )

এই ত মা দিন এসেছে তোমার,  
বৈধব্য-জীবন ব্যথা সহিবার,

ব্যথা পেয়ে ব্যথা বুচাবে ধরার,—  
 এ সৌভাগ্য কার হয় গো জননি !  
 যা করেন বিধি মঙ্গল-কারণ,  
 ছেনো পতিব্রতে, মনে অনুরাগ,  
 বিধবা বলিয়ে ভেবনা কখন,  
 পাষণ তোমার হ'য়েছে পরাণী ।  
 ব্রহ্মচর্য্য-ব্রতে দেবত্ব দেখাবে,  
 দানে ধ্যানে পুণ্যে ভারত মাতাবে,  
 অন্ন পেয়ে লোকে উচ্চ-কণ্ঠে গাবে,  
 অন্নপূর্ণা নামে 'জয় মা ভবানী !'  
 উন্নত-প্রথায় কর লোক-হিত,  
 মাতৃস্নেহে কেহ না হবে বঞ্চিত,  
 সমগ্র জগৎ হবে মা স্তুতিত,  
 করুণায় তব, করুণারূপিণি !  
 শৈশবে এঁকেছ' যে করুণা-ছবি,  
 হৃদয়ে রেখেছ' যে প্রতিভা-রবি,  
 বর্ণিতে না পারে কোন ভক্ত কবি,  
 এমনি মা তুমি মানসমোহিনী ।  
 ত্যজ' ধরাসন, মেল মা নয়ন,  
 কে বলে তোমার নিষ্ফল জীবন,  
 দয়া-ধর্ম্মে কর ব্রত উদ্বাপন,—  
 হে শুভে, সাধিকে, সূব্রত-ধারিণি !

  
 ইতি দ্বিতীয় খণ্ড ।



## তৃতীয় খণ্ড ।

### জননী—অন্নপূর্ণা ।

#### প্রথম পরিচ্ছেদ ।

রাজরাণী ভবানীর এখন ব্রহ্মচারিণীর বেশ ।—মণি-মুক্তা-  
রত্নালঙ্কারের লেশমাত্রও অঙ্গে নাই,—পটুবাস পরি-  
ধান, রুক্ষ কেশ, রুক্ষ দেহ, হবিষ্যন্ন আহার,—তথাপি সে  
দেহের লাবণ্যে দিক্ আলোকিত । তপ্ত কাঞ্চনপ্রভ উজ্জ্বল  
গৌরবরণ, প্রশান্ত গম্ভীর বদন, নয়নের মাধুর্য্যময়ী দীপ্তি, সর্ব-  
বিষয়ে অনাসক্তির ভাব,—সে মূর্ত্তি দেখিলে মনে ভক্তির সঞ্চার  
হয় । সদাই জপ তপ, সদাই পূজাহ্নিক, সদাই ধ্যান-ধারণা,  
সদাই শাস্ত্রালাপ ও পুরাণ-পাঠ শ্রবণ,—কুশাসন-উপবিষ্টা, নিমী-  
লিতা নয়না সে যোগিনী মূর্ত্তি দেখিলে মনে হয়, যেন সাক্ষাৎ  
বৈরাগ্য ও মুক্তি,—রাজগৃহে বিরাজ করিতেছেন ।

অধিষ্ঠিত-অভ্যাগত ও পোষ্য-পরিজন সকলকে বিবিধ উপা-  
দানে পরিতোষ পূর্বক ভোজন করাইয়া,—বেলা আড়াই প্রহর  
গতে স্বহস্তে হবিষ্যন্ন পাক,—প্রতিদিন ছাদশটি ব্রাহ্মণকে  
আপন হাতে রন্ধন করিয়া খাওয়ান,—নিজের সেই একবার মাত্র  
অতি সামান্য আহার,—‘অর্দ্ধবন্ধেশ্বরী’ মহারাণী ভবানী,—সর্ব-  
বিধ বিলাস ও ভোগ, জন্মের-মত বর্জন করিয়া, এই ভাবে হিন্দু-  
বিধবার দৈনিক নিয়ম পালন করিতে লাগিলেন । অন্যান্য দেড়  
কোটি টাকা ষাঁহার জমিদারীর আয়,—ষাঁহার অধিকার-ভূমি  
পরিভ্রমণ করিতে পঁয়ত্রিশ দিন সময় লাগে,—( তদানীন্তন রাজ-  
সাহী জেলা এত বড় বিস্তৃত ছিল ) ষাঁহার মুখের ‘রা’ শুনিবার  
জন্য অসংখ্য দাসদাসী প্রতিনিয়ত ঘোড়হস্তে দণ্ডায়মান, তাঁহার  
এই দৈহিক কষ্ট-সহিষ্ণুতা,—এই কঠোর ব্রহ্মচর্য্যপালন ! আর  
মানসিক কষ্ট ?—তাহা সেই সতীসাক্ষী অন্তরের অন্তরে উপলব্ধি  
করিতেছেন !—সুরপতি ইন্দ্রের ন্যায় স্বামি-বিয়োগ, দুই-দুই  
পুত্রের বিয়োগে চিরদিনের মত বংশলোপ,—অতুল ধনসম্পদ-  
ভোগের লোকাভাব,—হিন্দু-বিধবার পক্ষে এ কষ্ট ‘ভূষানলদহন  
তুল্য । পরন্তু এ দহনও, সেই সতী-লক্ষ্মী অগ্নানবদনে সহিতে  
লাগিলেন । সহমরণে একবার মাত্র পুড়িতে হইত ; বাঁচিয়া  
থাকিয়া, জ্বালাময়ী স্মৃতি লইয়া,রহিয়া-রহিয়া তিনি পুড়িতেছেন ;  
—ক্রমে তাহাও সহিয়া গেল । কেন না, তাঁহার পতিদেব অস্তিম-  
শয্যায় উপদেশ দিয়া গিয়াছেন,— তাঁহাকে আরও সহিতে হইবে,  
—সহিয়া—পুড়িয়াও তাঁহাকে সৌরভ বিলাইতে হইবে !—বেদ-  
বাক্যের ঞ্চায়, স্বামীর সে উপদেশ সতীর অন্তরে জাগরুক আছে ।

এখন ভবানী শাস্ত্রবিহিত পুণ্যকর্মেই অর্থের সদ্যবহার

করিতে লাগিলেন । বঙ্গের নানাস্থানে জলাশয় খনন, পুষ্করিণী ও বৃক্ষ-প্রতিষ্ঠা, অতিথিশালা ও দেবমন্দির নির্মাণ, সাধু-সন্ন্যাসী ও মহাস্তম্ভগণের জন্য ধর্মশালা স্থাপন, অনাথ ও পীড়িত ব্যক্তিগণের জন্য আশ্রম নির্দেশ,—তাহাদের চিকিৎসা, পথ্য ও ভরণ-পোষণের যাবতীয় ব্যয়—এইরূপ নানাবিধ মান্বনিক কার্যে তিনি যুক্তহস্ত হইলেন । ইহা ব্যতীত পথ-ঘাট প্রস্তুত, ব্রাহ্মণ-পণ্ডিতগণকে বৃত্তি ও ভূসম্পত্তি দান, সংস্কৃত শিক্ষার্থীগণের অধ্যাপনার বন্দোবস্ত, দায়গ্রস্ত ব্যক্তিদিগের দায়োদ্ধার, অক্ষম ও দুঃস্থ গৃহস্থপরিবারবর্গকে নিয়মিত সাহায্য,—এইরূপ এবং আরও অনেকরূপ পুণ্যকর্মে, তাঁহার লক্ষ লক্ষ টাকা ব্যয়িত হইতে লাগিল ।

জাতিবর্ণ-নির্বিশেষে,—ইতর-ভদ্র সকলকেই, ভবানী দুই হস্তে দান করিতেন । তাঁহার নিজ অধিকারে বা অধিকারের বাহিরে, কাহারও কোনরূপ অভাব, ক্লেশ বা দুঃখ-দৈন্যের কথা কাণে শুনিলে তাঁহার প্রাণ কাঁদিয়া উঠিত,—স্বতঃপ্রবৃত্ত হইয়া অবিলম্বে তিনি তাহা মোচন করিয়া দিতেন । তিনি একবার যে দানের কথা মুখ ফুটিয়া বলিতেন, তহবিলে টাকা না থাকিলে ঋণ করিয়া—এমন কি, সময়বিশেষে আপন অলঙ্কারাদি বিক্রয় করিয়াও, তাহা সম্পন্ন করিতেন । কেননা, তিনি জানিতেন, কাহাকেও একবার আশা দিয়া,—যে কোন কারণে হউক, সেই আশ্বাসিত ব্যক্তিকে নিরাশ করিলে, মহাপাতক হয়,—সেই দুর্ভাগার নীরব নিখাস ও অন্তর্নিহিত কষ্টের ফলভোগ,—কোন-না-কোন প্রকারে, কখন-না-কখন, তাঁহাকে করিতেই হইবে । এমন ভাবে পর-ব্যথা-বোধ ও আত্মপ্রসাদের অনুভূতি ষাঁহার

থাকে, নরলোকে তিনিই দেব-পদবাচ্য হন। রাণী ভবানীও তাই, মানবী হইয়াও দেবী-পদে অভিহিত হইয়া গিয়াছেন।

দিবা-রজনী অধিকাংশ কাল দেবার্চনা ও জপ-তপ প্রভৃতিতে আপনাকে নিযুক্ত থাকিতে হয়,—এমত অবস্থায় পাছে কোন অর্থী বা অভাজন, অথবা কোন দায়গ্রস্ত ব্যক্তির বিলম্বহেতু কষ্ট বা কার্যের ক্ষতি হয়, এই জন্য পরদুঃখকাতরা দয়াময়ী ভবানী দানের বড় একটি সুন্দর ব্যবস্থা করিয়া দিয়াছিলেন। দান-ভাণ্ডার একের হস্তে ন্যস্ত না করিয়া, পদ ও যোগ্যতা অনুযায়ী, ভিন্ন ভিন্ন কর্মচারীকে তিনি এই দৈনিক দানের প্রতিভূ নিযুক্ত করিয়াছিলেন। পোদ্ধার, তহবিলদার, নায়েব ও দেওয়ান,—পর্যায়ক্রমে এই চারিজনের হস্তে তিনি এই ক্ষমতা দিয়াছিলেন। উক্ত কর্মচারী চতুষ্টয় স্বাধীনভাবে এই ক্ষমতা পরিচালনা করিতে পারিতেন। ভিক্ষা বা প্রার্থনা করিতে আসিয়া,—সে ব্যক্তি যেই হউক, মনঃস্কুপ হইয়া ফিরিয়া না যায়, ইহাই রাণীর বিশেষ আদেশ ছিল। এই আদেশ অনুযায়ী এক টাকা হইতে একশত টাকা পর্য্যন্ত দান চলিতে পারিত। যে কোনও ব্যক্তিকে,—পোদ্ধার ইচ্ছা করিলে এক টাকা,—তহবিলদার পাঁচ টাকা,—নায়েব দশ টাকা,—এবং দেওয়ান একশত টাকা পর্য্যন্ত দান করিতে পারিতেন। এজন্য আর রাণীর স্বতন্ত্র অনুমতি লইবার আবশ্যক ছিল না। পরন্তু ইহার অধিক কাহাকে দিবার প্রয়োজন হইলে, কর্তার আদেশ অপেক্ষা করিতে হইত। বলা বাহুল্য, সে আদেশও তাঁহার কর্ণগোচর সাপেক্ষ মাত্র—কানে শুনিয়া তিনি কাহাকে ‘না’ বলিতেন না।—বুঝুন, দানের ব্যাপার!

ইহা ব্যতীত পর্ক ও পূজার দানের ব্যবস্থা স্বতন্ত্র। তখন

একেবারে অব্যাহত দ্বার। দেশ দেশান্তর হইতে শত শত লোক, শত শত প্রকার অভাব ও অভিযোগের কথা বলিয়া, ‘জয় মা ভবানী’ বলিয়া তাঁহার শরণাপন্ন হইত,—আর তদুত্তরে তাহাদের সেই প্রার্থনা পূর্ণ হইয়া যাইত। সদাব্রত-অন্নসত্রের ব্যবস্থা সর্বত্র থাকিলেও, কাঙ্গালী-ভিখারিগণের এ সময়ে আর আনন্দের সীমা থাকিত না। সহস্র সহস্র অনাথ ও আতুর, সুস্বাদু মিষ্টানে উদরপূর্নি করিয়া, নববস্ত্রে ভূষিত হইয়া, রক্ত মুদ্রালাভে আনন্দে নৃত্য করিতে করিতে, দুই বাছ তুলিয়া, উচ্চৈশ্বরে—“জয় মা ভবানী অন্নপূর্ণা” বলিয়া, আকাশ-মেদিনী কম্পিত করিয়া তুলিত, আর সে দৃশ্য দেখিয়া—সে প্রাণস্পর্শিনী মা মা ধ্বনি শুনিয়া, দীন-জননী দয়াময়ীর সর্বশরীর রোমাঞ্চিত হইয়া উঠিত,—তাঁহার চক্ষে অমৃত-বারি বিগলিত হইতে থাকিত। তখন তিনি মনে মনে বলিতেন,—“এই আমার স্বর্গ, এই আমার তপস্যা। প্রাণবল্লভ! তুমি ঐ নিত্যধাম হইতে আমার এই নয়ন-বারি দেখ,—আমার মানস পূজা লইয়া আমাকে ঋণমুক্ত কর দয়াময়!”

দীন দুঃখীকে যেমন দয়া, জীব-জন্তুর প্রতিও করুণাময়ী রাণীর সেইরূপ স্নেহের টান্। সেই বাল্যের সেই খেলা-ধুলার বয়সে—যেমন সেই পিপীলিকা গর্তে শর্করা ও মিষ্টান্ন দান,—চড়ুই পারাবত প্রভৃতি পক্ষিকুলকে তণ্ডুল-ছোলা-জল দান,—রাজ্যেশ্বরী হইয়া—এই প্রৌঢ়েও তাঁহার—জীবজন্তুর প্রতি সেইরূপ স্নেহানুরক্তি। গবাদি পশু ও বিভিন্ন জাতীয় পক্ষিগণের জন্য, ভিন্ন ভিন্ন আহার—তিনি ভিন্ন ভিন্ন রূপে বিতরিত করিবার ব্যবস্থা করিয়া দিতেন। এইরূপ ক্ষুদ্র কীট-পতঙ্গটি



পর্যন্ত তাঁহার এই মাতুলিক ব্যবস্থায় বঞ্চিত হইত না । এ সকলের যথাযোগ্য দৈনিক আহার তিনি যোগাইতেন । জীবের আহার যোগাইয়া, মহা মাতৃভাবময়ী, অন্নপূর্ণারূপিণী ভবানী ভাবিতেন,—

“ঈশ্বরের রাজ্যে সকল জীবই সমান । সকলকেই অন্নজল-দানে সমান ভাবে শীতল করিতে হইবে । মা-অন্নপূর্ণার রাজ্যে, আমার জ্ঞাতসারে, কোন জীব না অভুক্ত থাকে,—আহারাতাবে মৃতকল্প না হয়,—আমার জীবনের এ বড় সাধ । মা শক্তিরূপিণি শুভঙ্করি ! তুমিই আমার প্রাণের এ সাধ পূর্ণ করিও ।—মাগো, তোমার তহবিল-ভাণ্ডার আমার জিন্মায় রাখিয়াছ মাত্র,—আমি যেন ইহাতে কোনরূপে তঞ্চকতা না করি ;—এ গচ্ছিত ধনে আমার যেন লোভ না আসে মা !—তোমার তহবিল যেন তোমার কার্য্যেই খরচ করিয়া যাইতে পারি ;—আমায় এই আশীর্বাদ কর জননি ! এই রাজ্য, রাজসম্পদ,—এই ধন-দৌলৎ—কিছুই আমার নয়,—সকলই তোমার ;—এই ধারণা ৷ বিঞ্চাস যেন চিরদিন অক্ষুণ্ণ থাকে ব্রহ্মময়ি !—তাহা হইলেই এ কারাগারে মুক্তি পাইব বোধ হয়,—কেমন মা ?”

এই ভাবেই রাণীর চিন্তা ও আত্ম-নিবেদন ;—সর্ব্বাস্তুর্য্যামিনী চিন্ময়ীর চরণে এই ভাবেই সতী আপন মনোভাব প্রকাশ করিয়া থাকেন ।

ভবানী নিজে বিধবা হইয়াছেন, আর অতি শৈশবেই সেই বিধবা পিসীর দুঃখে আন্তরিক দুঃখিত হইয়া এককাল পর্য্যন্ত সেই ভাব অতি যত্নে হৃদয়ে পোষণ করিয়া আসিতেছেন,—সুতরাং বিধবাদের প্রতি এক্ষণে তাঁহার মনোভাব কিরূপ, তাহা

সহজেই অনুমেয় ।—পতিহীনা সতীনারী তাঁহার চক্ষে দেবীসমা  
গরীয়সী । তাই যেখানে যত বিধবা ছিলেন, মধ্য মধ্য তাঁহা-  
দিগকে নিমন্ত্রণ করিয়া আপন পুরীতে আনাইতেন, এবং সমাদর  
করিয়া স্বহস্তে তাঁহাদিগকে খাওয়াইতেন,—তাঁহাদের সুখ-দুঃখ  
অভাব-অনাটনের কথা স্নেহসূচক কণ্ঠে খুঁটিয়া-খুঁটিয়া—জিজ্ঞাসা  
করিতেন ;—অপিচ সৰ্বভ্যাগিনী ও অন্তরের অন্তরে প্রকৃত  
সন্ন্যাসিনী দেখিলে, তাঁহার গলা ধরিয়া কাঁদিতেন !—এ সংসারে  
প্রাণের সহানুভূতি নাকি বড় বিরল, তাই সেই সম-অবস্থাপন্ন  
বিধবাও, রাণীর সহিত নীরবে অশ্রুবিসর্জন করিতেন ।

ভবানীর রূপায় এই সকল বিধবাকে কখন কোনরূপ আর্থিক  
কষ্ট ভোগ করিতে হইত না । সচ্ছলে বাহাতে তাঁহাদের ভরণ-  
পোষণ হয়, এবং তৎসঙ্গে তাঁহাদের ইচ্ছামত ধর্মকর্ম ও তীর্থ-  
দর্শন প্রভৃতির সুবিধা হইতে পারে,—পরহিতব্রতা রাণী তাহার  
সমুচিত ব্যবস্থা করিয়া দিতেন । পক্ষান্তরে যে সকল রমণী  
সহমরণের পক্ষপাতিনী ছিলেন, যাঁহারা—স্বৈচ্ছায় জলন্ত চিতায়  
আরোহণ করিয়া মৃতপতির অনুগমন করিতেন, তাঁহাদিগকেও  
ভবানী অন্তরের সহিত ভক্তি করিতেন । সহমরণে গমনোত্তম  
সতীসাক্ষীর পদধূলি তিনি মস্তক পাতিয়া লইতেন । আবশ্যক  
হইলে, সেই সতীর শ্রাদ্ধশাস্তি প্রভৃতি, সমারোহে সম্পন্ন করিতেন  
এবং তাঁহার বংশাবলীর মধ্যে যদি কোন অক্ষয় স্ত্রী বা পুরুষ  
 থাকিত, তাহাদের জন্ম উপযুক্ত পরিমাণে বৃত্তি বা মাসহারার  
বন্দোবস্ত করিয়া দিতেন । এইরূপ সহানুভূতিসূচক কল্যাণকর  
কার্য্যে,—বিধবাগণের দুর্দহ জীবন-ভার কথঞ্চিৎ লাঘব করিতে  
সমর্থ হইয়াছেন ভাবিয়া, ভবানী মনে একটু শান্তি পাইতেন এবং

তখন সেই পিসীকে স্বরণ করিয়া, তাঁহার স্বর্গীয় আত্মার চির-  
মুক্তি কামনা করিতে করিতে, নীরবে কোঁটা কোঁটা অশ্রুজল  
ফেলিতেন । মনে মনে বলিতেন,—

“পিসী মা, তুমি চির-জীবন কি কষ্ট সহিয়া আসিয়াছিলে,  
তাহা আমি পূর্বেও বুঝিয়াছি,—আর এখন তাহা সম্যক্রূপে  
বুঝিতে পারিতেছি । তুমিই আমার জীবনে প্রথম এই দুঃখের  
ছবি অঙ্কিত করিয়া দিয়াছিলে ;—সহিয়া-সহিয়া আমি মানুষ  
হইয়াছি,—তাই দুঃখকে এখন ভালবাসিতে শিখিয়াছি ;—এবং  
সেই জন্মই তোমার পুণ্যেই এ কঠিন ব্রত পালন করিতে এখন  
আর আমার কষ্ট হয় না । তোমার জন্ম আমি আর কি মঙ্গল-  
কামনা করিব পিসী মা ?—কেবল এই প্রার্থনা করি, আর যেন  
তোমায় জন্মগ্রহণ করিতে না হয়,—পতিসনে অনন্তকাল যেন  
তুমি ঐ বৈকুণ্ঠে স্থান পাও !—আর তোমার সহিত, আমিও যেন  
মা. এই পরমা গতি লাভ করিতে পারি ।”

পক্ষান্তরে, সধবা ও কুমারীগণের প্রতিও ভবানীর অচলা  
নিষ্ঠা । সধবা—পতির অর্দ্ধাঙ্গী ; আর কুমারী—ভাবী পতির  
গৃহলক্ষ্মী । এক সময়ে তিনি যেরূপ আদরিণী ও স্নেহানন্দদায়িনী  
ছিলেন,—এই ভাগ্যবতীগণও এক্ষণে সেইরূপ । এমন যার  
ভাগ্য ও লক্ষণ, তাহাকে পূজা করিতে হয় । বিশেষ শাস্ত্রের  
উক্তি,—সধবা ও কুমারী-পূজায় জন্মান্তরে অশেষ পুণ্যসঞ্চয় হয়,  
—তাহাকে আর তুষানলদহন তুল্য বৈধব্য-যন্ত্রণা ভোগ করিতে  
হয় না । তাই সতীলক্ষ্মী ভবানী, পর্বে ও নির্দিষ্ট দিনে, আন্তরিক  
অনুরাগ ও শ্রদ্ধাবুদ্ধি-সহকারে, শত সহস্র সধবা ও কুমারীকে  
পূজা করিয়া, অক্ষয় পুণ্যসঞ্চয় করিতে লাগিলেন । সহস্র

সহস্র পটুবন্ধ, শঙ্খ-বলয় ও সুবর্ণ-নখ সধবাগণের মধ্যে বিতর্কিত হইত,—আর প্রতি দুর্গোৎসবের সময়ে, প্রতিপদ হইতে নবমী তিথি পর্য্যন্ত, একশত কুমারীকে স্বর্ণালঙ্কারে ভূষিত করিয়া, সর্বাঙ্গঃকরণে—কায়মনোবাক্যে তিনি পূজা করিতেন। পূজা সমাপনাতে, মৃতপতির উদ্দেশে, সতী বলিতেন,—“প্রাণবল্লভ ! এ জন্মে ত এ জীবন শ্মশান হইয়া আছে ; -এ ছাই-ভরা বুকে কি তুমি আবার বসিবে ? আবার কি হায় ! এ শ্মশানে ঐ সোনার পারিজাত ফুটিবে ?”

অশ্রুজলে বুক প্রাণিত হইয়া যাইত ;—সতী ধীরে ধীরে আসন ত্যাগ করিয়া উঠিতেন। পরে কার্য্যান্তরে ব্যাপ্ত হইয়া, এ মর্শাস্তিক জ্বালা একটুকু উপশম করিতে চেষ্টা পাইতেন।





## দ্বিতীয় পরিচ্ছেদ ।

এত পারমাত্মিকী চিন্তা ও এত পূজার্চনার মধ্যেও ভবানী কেমন একটু সময় করিয়া, বৈষয়িক কার্যাদিও নির্বিঘ্নে সুসম্পন্ন করিয়া লইতে পারিতেন । ব্যাপার বড় সাধারণ নয়,— তদানীন্তন রাজসাহী জেলার মত অত বড় একটা জমিদারী,— বার্ষিক আয় যার দেড় কোটি টাকা,—সেই জমিদারীর কার্য— তাহার হিসাব-নিকাশ, আয়-ব্যয় ঠিক করা,—সন-সন নবাব-সরকারে নির্দিষ্ট কর দেওয়া,—কোন কৰ্মচারীকে কি কার্যের ভার দিলে সহজে হইতে পারিবে, তাহা নিরূপণ করা,—কোন সংপত্তা অবলম্বন করিলে জমিদারীরও আয় বাড়ে, প্রজারও হিত হয়,—দেওয়ান-গোমস্তাদিগকে সেই সব পরামর্শ দেওয়া,— ইত্যাকার এবং আরও অনেক প্রকার শূন্য বৈষয়িক কার্য তিনি অতি অল্প সময়ে অনায়াসে সমাধা করিতে পারিতেন । ইহা ব্যতীত প্রজাগণের বিবাদ-নিষ্পত্তি, সালিসী করিয়া দুই পক্ষের বিবাদ মিটাইয়া দেওয়া, অপরাধীর বিচার ও গায়-অগায় অবধারণ করা,—সকল কার্যেই ভবানীর অমানুষী প্রতিভা ও অসাধারণ শূন্যবুদ্ধির পরিচয় পাওয়া যাইত । তাবিলে আবাক হইতে হয়

যে, একজন অস্তঃপুরবাসিনী, অমন কোমল-প্রকৃতি ও ধর্মময়-জীবন হিন্দুবিধবার এমন অসামান্য বিষয়-বুদ্ধি থাকিতে পারে ! স্ত্রীলোক ত স্ত্রীলোক,—অনেক কূটবুদ্ধি পুরুষও তাঁহার নিকট বৈষয়িক নীতি শিখিয়া মানুষ হইতে পারে । অগ্রে পরে কা কথা,—সেই পাকা-হাড় বুনো বুড়া দয়ারাম রায়ও এক এক সময়, তাঁহার নিকট হারি মানিতেন । অথচ সমগ্র দিবসের মধ্যে চারি পাঁচ দণ্ডের অধিক সময় রাণী এজ্ঞ ব্যয় করিতেন না । তাহাও আবার সম্পূর্ণ অনাসক্তির ভাবে । যেন বাহ্মমন্ত্রে তিনি বৈষয়িক বিচার-বুদ্ধির উদ্ভাবন করিতেন, আর মন ও লক্ষ্য থাকিত তাঁহার পারমাত্মিক বিষয়ে ।—তাঁহার গায় ধর্মব্রতা সর্বত্যাগিনী ব্রহ্মচারিণীর যেমন বিষয়ে লক্ষ্য থাকা সম্ভবে, সেই বিষয়েই লক্ষ্য থাকিত । একাধারে এইরূপ দুইটি বিরোধী ভাবের সমন্বয়, - ধর্ম ও বিষয়-বুদ্ধির একত্র সমাবেশ, যে একজন পুর-মহিলা হিন্দুবিধবায় সম্ভবে, তাহা হঠাৎ কাহারও কাহারও অসম্ভববোধ হইতে পারে ।—বস্তুতঃ একই আধারে এরূপ কোমলতা ও কঠোরতার সম্মিলন,—এরূপ নারী ও পুরুষোচিত ভাব কচিৎ দেখিতে পাওয়া যায় । বিষয়ের মধ্যে আকর্ষণ নিমজ্জিত থাকিয়াও নির্লিপ্তভাবে থাকা,—তদবস্থায় সাধন-পথে অগ্রসর হওয়া,—ক্ষুদ্র কীর্টীগু হইতে মানব-মানবীকে পর্য্যন্ত প্রীতি-নেত্রে দর্শন করা,—ঈশ্বরজানিত মহাপুরুষ ভিন্ন, অগ্রে পক্ষে এরূপ অসম্ভবই বটে ।—রাজর্ষি জনকের কথা শুনিয়াছি, আর এই প্রাতঃস্মরণীয়া রাণী ভবানীর পুণ্য চরিত্রে তাহা দেখিতেছি, কাহার প্রাধান্য অধিক, নিরূপণ করা কঠিন ।

... দিবা আড়াই প্রহরের পর, সেই একাহার হবিষ্যার সেবন

হইলে, ভবানী দেওয়ান-দপ্তরের একাংশে গিয়া, এক নির্দিষ্ট কুশাসনে উপবিষ্ট হইতেন। সে স্থানটি অর্ধ-অন্দর—অর্ধ-সদর—এমনিভাবে গঠিত। রাণীর আসনের সম্মুখে, আবরণ-স্বরূপ একটি পর্দা থাকিত। বাহিরের লোকজনের সহিত কথাবার্তার প্রয়োজন হইলে, ভবানী সেই পর্দার অন্তরাল হইতে একজন লোককে খাড়া রাখিয়া কথাবার্তা করিতেন। আর দয়ারাম প্রভৃতি প্রাচীন ও পুরাতন কন্মচারিগণ রাণীর সম্মুখে গিয়াই বৈষয়িক কাগজ-পত্র বুঝাইয়া দিতেন। ভবানী প্রতিদিনের কার্য প্রতিদিনই সম্পন্ন করিতেন—‘কাল হইবে’ বলিয়া কোন কাজ ফেলিয়া রাখিতেন না। যে দিনের যে ব্যয়, মুন্সী তাহা পাঠ করিয়া শুনাইলে, ভবানী তাহা মঞ্জুর-স্বরূপ, স্বয়ং স্বাক্ষর করিয়া দিতেন। দেবসেবাই হউক আর অতিথিসেবাই হউক, নিত্য-নৈমিত্তিক ক্রিয়াই হউক আর ভৃত্যাদির বখ্‌সিস বা বেতনাদির ব্যবস্থাই হউক,—তাঁহার অনুমতি লইয়া প্রধান অমাত্যকেও চলিতে হইত,—নিয়কন্মচারিগণের ত কথাই নাই। তবে, কার্যের সুবিধার জন্য, তিনি কতক কন্মচারীকে, কতকগুলি নির্দিষ্টকার্যের ভার ও ক্ষমতা দিয়া রাখিয়াছিলেন বটে।—যেমন পোদ্দার হইতে দেওয়ান পর্য্যন্ত তাঁহার বিনা অনুমতিতে,—এক হইতে একশত টাকা পর্য্যন্ত লোককে দান করিতে পারিতেন। অবশ্য সেই সকল বিষয়ের হিসাবাদি, তিনি একটি দিন নির্দিষ্ট করিয়া, বুঝিয়া-পড়িয়া লইতেন। তৎপরে, কোন্ দিন ও আগামী দিন কি কি করিতে হইবে,—তিনি বলিয়া যাইতেন, একজন মুহুরী তাহা লিখিয়া লইত। রাণী যাহাকে যে কার্যের ভার দিতেন, তাহাকেই সেই কার্য করিতে হইত,—সে আর



অন্যের প্রতি মেজন্য হুকুমজারী করতে পারিত না। তজ্জন্য কোন বিষয়ে কোনরূপ গোলযোগ বা বিশৃঙ্খলা ঘটিত না ;— অত বড় রাজ্যটা যেন কলে চলিয়া যাইত।

ভবানীর বিচার-পদ্ধতি বড় সুন্দর ছিল। তদানীন্তন রাজা ও প্রধান প্রধান জমিদারগণ, আপন অধিকারস্থ ব্যক্তিবর্গের অভিযোগের বিচার, আপনাই করিতেন। অপরাধীকে সমুচিত দণ্ড দিয়া এবং নিরপরাধের মনঃকষ্ট দূর করিয়া, তাঁহাই আপন আপন অধিকারের শান্তি ও সম্ভ্রম রক্ষা করিতেন। সৰ্বদর্শিনী—অপূর্বতময়ী ভবানী, এই বিচার-কার্যেও একটু অপূর্বত দেখাইতেন।—তাহাতে অনেকের অনেক শিক্ষা হইত, দেশের প্রকৃত উপকার হইত,—লোকে বিশ্বাসে, পুলকে, ভক্তিতে অভিভূত হইয়া, উদ্দেশে তাঁহার চরণে প্রণাম করিত। এইরূপ অভিনব বিচার-প্রণালীর একটি ঘটনা এখানে উল্লেখ করিতেছি।

এক সময়ে একযোগে তিনটি লোক অপরাধী সাব্যস্ত হইয়া, রাণীর দরবারে আনীত হয়। প্রথমটির অপরাধ—বাতিচার ; দ্বিতীয়টির অপরাধ—দাঙ্গা ; তৃতীয়টির অপরাধ—চুরী। দয়ারাম রায় এই মর্শ্বের এক লিখিত বর্ণনা-পত্র রাণীকে পাঠ করিয়া শুনাইলেন। সেই বর্ণনা-পত্রে অভিযোক্তার নাম, বংশ-পরিচয়, অপরাধের বিস্তৃত বিবরণ, সাক্ষী প্রভৃতির সবিশেষ কথা উল্লিখিত ছিল। পদানশীন রাণী,—অথচ তাঁহার বিচার-দরবার। রাণী সেই পর্দার অন্তরালে অবস্থিত, কিন্তু তাঁহার আহ্বানক্রমে, সেই দিন দেশের গণ্যমান্য ব্যক্তিবর্গ সেই বিচার-মণ্ডপে উপস্থিত। এই শ্রেণীর বিশেষ অপরাধের বিচারে, রাণী সকলকে আহ্বান করিতেন ;—তাই আজ অনেকগুলি সম্ভ্রান্ত ব্যক্তি ওধায়



সমবেত হইয়াছেন । দয়ারামের লিখিত বিবরণীতে রাণী সকল কথা অবগত হইলেন । পরে দয়ারাম সেই সমবেত দর্শক ও শ্রোতৃবৃন্দকেও সকল কথা শুনাইলেন । অপরাধিত্রয় যোড়করে, অবনত মুখে দাঁড়াইলেন ;—দাক্ষী-সাবুদ প্রমাণ প্রভৃতি চূড়ান্ত-রূপ হইয়া গিয়াছে দেখিয়া, তাহারাও কিছু অস্বীকার করিতে পারিল না,—ভাল-মানুষটির মত, স্নানমুখে আপন আপন অপরাধস্বীকারে বাধ্য হইল ।

তখন তীক্ষ্ণদর্শিনী ভবানী, সেই যবনিকা-অস্তরাল হইতে, নিমেষমধ্যে একবার সেই অপরাধী ত্রয়ের আপাদমস্তক নিরীক্ষণ করিয়া লইলেন । সেইরূপ চকিত দৃষ্টিমাত্রেই, চোখ-মুখের ভঙ্গি দেখিয়া, তিনি মানুষ চিনিতে পারিতেন । তাই অপরাধিত্রয়কে সেই চকিতে দেখিয়াই, তিনি তাহাদের প্রকৃতি বুঝিয়া লইলেন, এবং সেই প্রকৃতি অনুযায়ী, প্রত্যেককে ভিন্নরূপ দণ্ড দিতে, মনস্থ করিলেন ।

প্রথম অপরাধী,—যে, ব্যভিচার অপরাধে আনীত, সে একজন সম্ভ্রান্ত ব্যক্তির পুত্র ; কুলীন কায়স্থ-সমাজে তাহার পিতৃ-পিতামহের যথেষ্ট সম্ভ্রম আছে, নিজের একটু জমিদারীও আছে, ক্রিয়া-কলাপ ও করণ-কারণে ঘরাণা-ঘরে তাহাদের বিশেষ একটু নামও আছে,—এ-হেন ঘরের ছেলে ব্যভিচার-অপরাধে অপরাধী সাব্যস্ত হইল,—দেশের গণ্য-মাণ্য সকল ব্যক্তির নিকট তাহাদের বংশাবলীর মাথা হেঁট হইল ;—প্রথর অস্তদৃষ্টিশালিনী রাণী ভবানী সেই ব্যক্তির মনের তদানীন্তন ভাব যেন নখদর্পণে দেখিতে পাইলেন ; —তাই তাহার প্রতি কোনরূপ কায়িক বা আর্থিক শাস্তির ব্যবস্থা না করিয়া, দয়ারামের দ্বারা কেবলমাত্র

একটু শাসাইয়া দিয়া, ভবিষ্যতের জন্য তাহাকে সতর্ক হইতে বলিয়া দিলেন । পরন্তু সেই সঙ্গে তাহার পিতৃ-পিতামহের নাম ও বংশের মান-সন্ত্রমের উল্লেখ করিয়া, রাণীর আদেশমত, মন্ত্রী দয়ারাম রায়, সেই দশের মাঝে বলিতে লাগিলেন,—“ছি, বাপু, ছি ! অমন বাপের বেটা হইয়া, তোমার এই কাজ ! যাও, রাণী-মার আদেশ,—গৃহে গিয়া, একটি সংব্রাহ্মণের ব্যবস্থা লইয়া, রীতিমত একটি প্রায়শ্চিত্ত করিয়া, শুদ্ধ হও গিয়া ।”

এইবার দ্বিতীয় অপরাধীর বিচারের পালা । সে ব্যক্তি দাঙ্গার আসামী ;—মার-পিট করিয়া একজনের মাথা ফাটাইয়া দিয়াছে ।—এক বিবাহে বরযাত্রী ও কন্যাযাত্রীদের মধ্যে বিবাদ হয়, বিবাদ শেষে দাঙ্গার পরিণত হয় ; এই ব্যক্তি মধ্যস্থ হইতে গিয়া, নিজের দলস্থ এক লোকেরই মাথা ফাটাইয়া দেন ! সে বেচারীর অপরাধ,—ইহার “আঁক্ আঁক্” চীৎকার শুনিয়া, ইহাকে ষাঁড় বলিয়াছিল ! এই ষাঁড় মহাশয় জাতিতে ব্রাহ্মণ ; —একজন নামজাদা অধ্যাপক-পণ্ডিতের সন্তান ;—তাহার বাপের টোলে স্মৃতি-শাস্ত্র-দর্শন পড়িয়া কত লোক মানুষ হইয়া গিয়াছে, কিন্তু সে হতভাগা কিছুই করিতে পারে নাই,—কেবল পৈত্রিক রাগ টুকু স্তম্ভমেৎ ষোল আনা দখল করিয়া বসিয়াছে ; —তাহার ফলে এই কীর্টি ! রাণী এই ব্যক্তির প্রতিও বিশেষ দণ্ড বিধান করিলেন না,—ইহাকেও ঐ প্রথম অপরাধীর শাস্ত, দয়ারামের দ্বারা, তীব্র-মধুর ভৎসনা করিয়া, ভবিষ্যতের জন্য বিশেষ সতর্ক হইতে বলিয়া দিলেন । বলিয়া দিলেন,—“বাপু হে, ব্রাহ্মণের কুলে জন্মিয়াছ,—অত বড় ভট্টাচার্য্য-অধ্যাপকের সন্তান,—তা এমনি করিয়া কি পিতৃকীর্টি বজায় রাখিবে ?—

রাগের বশে একেবারে একজনের মাথা ফাটাইয়া বসিলে ? রাগ যে চণ্ডাল ! এমন চণ্ডালকেও প্রশ্রয় দেয় ? যাও,—কিছুদিন বনে গিয়া, ফল মূল খাইয়া, এ দুরন্ত রিপুকে বশ কর,—উপস্থিত তোমার আর লোকালয়ে থাকা সাজে না !”

অধ্যাপক-পুত্র, সেই দশের মাঝে, একেবারে মরমে মরিয়া গেল । ধিকার ও অনুশোচনায় সে যেন কেমন হইয়া গেল ।

এইবার তৃতীয় অপরাধীর পালা । এ অপরাধীটি—চোর । নাপিতের ছেলে, নেশাটা-ভাংটা করে,—পয়সার অভাব হইলেই লোকের ঘটিটা-বাটিটা চুরী করিয়া বেড়ায় । তাহার উপদ্রবে গৃহস্থগণ অতি উত্থল,—কাহারও স্বস্তি পাইবার যো নাই । —রাণী তার আত্মস্ত বিবরণ শুনিয়া, এবং তার আকার-প্রকার ভাব-ভঙ্গি দেখিয়া, লুকুম দিলেন,—ছয় মাস তাহাকে কারাদণ্ড ভোগ করিতে হইবে !

ছয়-ছয় মাস এই কঠিন দণ্ডভোগের কথা শুনিয়া, নাপিত-পুত্র একেবারে হাপুস-নয়নে হাউ-হাউ করিয়া কাঁদিতে লাগিল । হতভাগা, একবার দয়ারাম রায়ের পা দুটা জড়াইয়া ধরে,—এক বার মাতব্বর দর্শকগণের নিকট গিয়া, ‘হে বাপ্ সকলেরা রক্ষা কর’ বলিয়া ধড়াস্ করিয়া পড়ে,—আর-বার বা বিকটকণ্ঠে “দোহাই রাণী-মা গো” বলিয়া তাঁহার বস্ত্রাচ্ছাদিত মণ্ডপ বেঁসিয়া দাড়ায় ।—বলা বাহুল্য যে, সে মণ্ডপের দুই পার্শ্বে দুইজন খাড়া-পাহারা ভোজপুরী, অমনি —‘তফাৎ যাও বদমাস্’ বলিয়া হুকী দিয়া উঠে, আর দুই থাকায় নাপিত-পো চিট্ হয় ।—তার এই বজ্জাতি-বুদ্ধি দেখিয়া, রাণী দয়ারামকে দিয়া দৃঢ়তার সহিত বলা-ইলেন, —“যদি পুনরায় এখানে একরূপ বেয়াদবি ভাব দেখাও,

তবে ছ-মাসের জায়গায় পূরা-পুরি এক বৎসরকাল এ কঠিন দণ্ড ভোগ করিতে হইবে । . সাবধান,—স্থির হইয়া দাঁড়াইয়া থাক ।” পরে দয়ারাম, রাণীর আদেশমত, কারা-রক্ষীকে আহ্বান করিয়া, তাহার হস্তে এই তৃতীয় অপরাধীকে সঁপিয়া দিলেন ;—রাণীর হুকুম তাহাকে জানাইলেন । কারারক্ষীও অমনি—“ধো হুকুম মহারাণী” বলিয়া, অভিবাদন করিতে করিতে, উৎসাহভরে নাপিত-খুলকে হাত-কড়ি পরাইয়া লইয়া গেল । রক্ষী, এর আগে নবাবের কয়েদখানায় কাঙ্ক করিত ; সুতরাং এ সকল বিষয়ের কায়দা-কানুন তার বেশ জানা ছিল ।

তিন ব্যক্তির বিচার সাঙ্গ করিয়া, রাণী সেদিনকার মত দরবার ভঙ্গ করিতে, দয়ারামকে আদেশ দিলেন ।

এখন ভবানীর—এই বিচার-ফল লইয়া, সমাগত সভ্যবৃন্দের মধ্যে একটু কানা-ঘুসা—একটু ফুসফাস আলোচনা চলিল । একজন বলিলেন, “তা যদি সত্যি কথা বল, ত বলি,—পরামাণিকের পোটিকেও অমনি ঐ সঙ্গে ধমক-ধামক দিয়ে ছেড়ে দিলে হ’তো,—এ যেন কেমন এক-যাত্রায় পৃথক ফল হ’লো ।”

( চোর পরামাণিকটি, এই সভ্যেরই পার আছাড় খাইয়া পড়িয়াছিলেন । )

দ্বিতীয় ব্যক্তি উত্তর করিলেন, “হাঁ, আমারও কতকটা ঐ মত্ বটে । তবে রাণী মার হুকুম,—অবশ্য উনি ভালই বুঝে থাকবেন ।”

তৃতীয় ।—হাঁ, তা বল্চ বটে, তবে কি জানো—যতই হোক, উনি স্ত্রীলোক,—বিচারের স্তম্ভ মীমাংসা,—ও নিজের ওজন,—পুরুষ নইলে ঠিক রাখিতে পারে না ।

চতুর্থ ।—ঠিক ব'লেছ । এই দেখ না,—এক বেটা লম্পট, আর একটা খুনে,—তাদের কিনা 'মিষ্ট-মুখে তুষ্টকরা-গোছ' ছোটো কাঁকা নীতি-উপদেশ দিয়েই বিদায় ক'রে দিলেন,—আর নাপ্তের ছেলেটা ভেউ-ভেউ ক'রে কেঁদে ভাসিয়ে দিলে,—কি একটা কার ঘটা না বাটা নিয়েছিল,—তা তার কিনা হ'লো ছ-ছমাস শ্রীঘর-বাস !—তা ভাই যাই বল,—রাণী-মাকে আমি দেবতার মত ভক্তি করিলেও এ বিষয়ে তাঁর প্রশংসা করতে পার্লেম না ।

পঞ্চম ।—হাঁ, এ সব ফৌজদরী-ফেরেকাবাজী মামলা ;—রাণীমার এ সকল ভার, আর কারো হাতে দেওয়াই ভাল । এতে গুঁর মাথা তেমন খেলে না । যতই হোক, স্ত্রীলোক ত ? এ রকম মামলা, গেল-মাসেও একটা হ'য়ে গেছে । সেই যে, জান না ? -যে মার খাইল, সে দু-ঘণ্টা কয়েদখানায় আটক থাকিল ; আর একশত টাকা মুচলেখা লিখিয়া দিল ;—আর সেই পাগ্লাটা,—যে ডিল ছুড়িয়া মারিয়া কপাল ফাটাইল,—সে কিনা রাজার হালে সরকারী-খরচে খাইয়া-মাথিয়া বেড়াই-তেছে ;—আবার রাণী-মা সেইদিন থেকে তার পিছনে একজন পাহারাও মোতায়েন্ ক'রে দিয়েছেন ।—বুঝ, ব্যাপারখানা !

(ঘটনাটি এই :—এক পুলশোকাতুর অর্ধ ক্ষিপ্তকে পুনঃ পুনঃ ক্ষেপাইয়া এক ব্যক্তি মজা দেখিত, আর তার দেখাদেখি আর দশজনও সেই কার্যে প্রশ্রয় পাইত ;—তার ফলেই সেই দুর্ভাগা অর্ধ-ক্ষিপ্তটি, শীঘ্রই পূর্ণক্ষিপ্ত হইয়া উঠিল ;—তখন সে, কে জানে ইট আর কে জানে পাথর, যা পায়, ছুড়িয়া মারে ;—সেই মারু খাইয়া, সেই মজা-দেখা লোকটি রাণীর দরবারে

অভিযোগ করে ;—বিচারে ভবানী সবিশেষ তদন্ত লইয়া, প্রকৃত তথ্য অবগত হইয়া, অভিযোগকারীকেই দণ্ড দেন,—আর দয়া ও সহানুভূতিবশতঃ, পাগলকে প্রকৃতিস্থ করিবার উদ্দেশ্যে, তিনি পূর্বোক্তরূপ সাধু ব্যবস্থা করেন । তাহার ফলে, সেই পুত্র-শোকাতুর অর্দ্ধক্ষিপ্তি, প্রায় সম্পূর্ণ প্রকৃতিস্থ হইয়া আসিয়াছে ।)

যাহা হউক, অঘকার ঘটনাটিতে যখন অধিকাংশ সত্য এক-মত হইলেন, এবং বিচক্ষণ দয়ারাম রায়ের গুপ্ত চরও যখন সে সংবাদ গিয়া তাঁহার মনিবকে জানাইল, তখন দয়ারামের মনেও কেমন একটু খটকা লাগিল । খটকাটা আগেই লাগিয়াছিল, তবে ভবানীর প্রতি প্রগাঢ় শ্রদ্ধাবশতঃ তাহা বেশীক্ষণ মনে বসিতে পারি নাই ; পরন্তু এখন যখন তাঁহার সেই গুপ্তচর আসিয়াও আর পাঁচজনের মনের একইরূপ ভাব তাঁহাকে জানাইল, তখন তাঁহার সেই লুপ্তপ্রায় খটকাটি আবার মনোমধ্যে জাগিয়া উঠিল ;—এবার যেন সেটি একটু জিনিয়া বসিল । দয়ারাম মনে মনে বলিলেন,—“না, এক বিষয়ে এত লোকের কখনই এমন ভুল হইতে পারে না,—আজিকার বিচারে রাণীমাই তবে ভুলিয়া থাকিবেন ;—ঐ দুটো লোককে একে-বারে ছাড়িয়া দেওয়াটা ভাল হয় নাই ;—আর ঐ ছিঁচ্কে-চোরটার ওরূপ কান্না-কাণী সবেও, ছ-ছমাস কারাদণ্ড দেওয়াটাও যেন কেমন-কেমন হইয়াছে ।—তা রাণী-মাকে, আমি সাহস করিয়া এ কথা বলিতে পারিব । তিনি আজিও এ বুড়াকে ভৃত্য বলিয়া মনে করেন না ।”

পরদিন যথাসময়ে ভবানী সেই দেওয়ান দপ্তরে আসিয়া যথাভাবে বসিলে, দয়ারাম আপন সঙ্কল্পমত, তাঁহাকে বিনীত-

ভাবে এ কথা জানাইলেন । শুনিয়া রাণী একটু হাসিয়া বলিলেন,—“এখন এ কথার উত্তর আমি দিব না, সময়ে তোমরা বুঝিবে,—আমার এ বিচার ঠিক ণায়মতই হইয়াছে ।”

দয়ারাম আর দ্বিভুক্তি করিলেন না, ভাবিলেন, “মা আমার যখন এরূপ বলিলেন, তখন অবশ্যই সুবিচার হইয়াছে ।—আমি রুদ্ধ, কি বুঝিতে কি বুঝিয়াছি । আর সত্যগণও মার আমার অন্তরের কথা ধরিতে পারেন নাই ।”

ছয় মাস অতীত হইয়া গিয়াছে,—এ কথা সকলে ভুলিয়া গিয়াছে,—রাণী ভবানী একদিন সেই দেওয়ান-দপ্তরে বসিয়া, কি ভাবিয়া, দয়ারামকে ডাকিয়া পাঠাইলেন ; তিনি আসিলে বলিলেন,—“এইবার একবার সেই অপরাধী তিনজনের সন্ধান লও দেখি ? তাহারা কে কি ভাবে আছে, একবার খবরটা আনিয়া আমায় দাও দেখি ?”

দয়ারাম ।—কোন্ অপরাধী মা ?

ভবানী তখন সেই পূর্বোল্লিখিত অপরাধিত্রয়ের কথা, দয়ারামকে সবিণেষে স্মরণ করাইয়া দিলেন ।

দয়ারামের আদেশক্রমে তখনই তিন চারিজন লোক ছুটিল । তাহারা সেইদিন রাত্রেই যে সংবাদ আনিয়া দিল, তাহা শুনিয়া দয়ারাম স্তম্ভিত হইলেন । যাই হউক, পুনরায় তিনি ঐ সংবাদের সত্যতা সম্বন্ধে নিঃসন্দেহ হইবার জন্ত, আরও দুইজন বিশেষ বিশ্বস্ত চর নিযুক্ত করিলেন,—তাহারাও সবিণেষ সন্ধান লইয়া, ঐ একই সংবাদ জানাইল । তখন যেন দয়ারামের চমক ভাঙ্গিল এবং সম্পূর্ণ চৈতন্য আসিল । তিনি ভাবিলেন,—“ছি, ছি, আমি এ কি নির্কোথের ণায় কাজ করিয়াছিলাম ?



অমন মায়ের বিচারের উপরও আমার সন্দেহ জন্মিয়াছিল ? কিন্তু রাণী ভবানী, এ কি অদ্ভুত শক্তি ধারণ করেন ? সত্যই কি ইনি অস্তুর্যামিনী ?—তাই মান্নুষের মন বুঝিয়া একরূপ ব্যবস্থা দেন ?”

পরদিন আবার ভবানী যথাসময়ে সেই দেওয়ান-দপ্তরে আসিয়া উপবেশন করিলে, দয়ারাম যেন অতি অপরাধীর গায়, আবেগভরে ছুটিয়া আসিয়া, ভবানীর পায়ের কাছে গিয়া পড়িলেন, এবং নতজানু হইয়া কৃতাঞ্জলিপুটে গদগদকণ্ঠে বলিতে লাগিলেন, “মা, মা, তুমি কে মা ? সত্যই তুমি রাজকুল-লক্ষ্মী !”

তার পর মনে মনে বলিলেন, “হায় হায় ! এমন মহালক্ষ্মীর কপালেও এমন হইয়া গেল ? মা আমার জন্মের মত সিঁথীর সিঁদূর মুছিয়া ব্রহ্মচারিণী হইয়া রহিলেন ?—হা ঈশ্বর !”

দয়ারামকে তদবস্থায় দেখিয়া, ভবানী যেন কিছু বিব্রত হইয়া, অতি স্নেহকণ্ঠে বলিয়া উঠিলেন,—“একি ! কি হইয়াছে ? তুমি এমন অবস্থায় কেন ?—কৈ, সে অপরাধী তিনজনের সংবাদ আমায় আনিয়া দিলে না ?”

“মা, তাই বলিতেই আমি আসিয়াছি । আমি একেবারে মূক হইয়া গিয়াছি । কি বলিয়া তোমায় সন্তোষন করিব, তাবিয়া উঠিতে পারিতেছি না ।”

দয়ারাম বলিতে লাগিলেন,—“মা, সত্যই আমি কিছুতেই বুঝিয়া উঠিতে পারিতেছি না,—তুমি কিরূপে এমনভাবে মান্নুষের মনের ভিতর প্রবেশ করিতে পার ? মা বলিব কি, তোমার কি হৃদয় স্মবিচার,—সেই দুইজন অপরাধীকে,—যাদের প্রতি তুমি কোন দণ্ডবিধান না করিয়াই ছাড়িয়া দিয়াছিলে,—



আর আমরা মূৰ্খতা-প্রযুক্ত যেজন্য তোমার প্রতি মনে মনে অনু-  
যোগ করিয়াছিলাম,—তাদের একজন—সেই প্রথম আসামী,—  
আহা, সেই জমিদার-পুত্রটি,—কাহাকে আর যুথ না দেখা-  
ইয়াই,—সেই দিন রাত্রেই, অপমানে ও স্বর্ণায় আত্মহত্যা করিয়া  
জালা জুড়াইয়াছে!—আর সেই দ্বিতীয় আসামী—সেই  
অধ্যাপক পুত্রটি, সেই বিচারের দিন হইতেই কেমন হইয়া  
গেল ;—তাহার মনে কেমন একটা দিক্কার জন্মিল,—সে আর  
গৃহমুখী হইল না,—বিবাগী হইয়া কোথায় চলিয়া গেল ;—এখন  
শুনিতে পাই, সেই অতি বড় ক্রোধী—যেন ঋষিতুল্য শাস্ত্র-  
শিষ্ট ও সাধুস্বভাব হইয়াছে ;—সে ব্যক্তি এখন তার পিতার  
নিকট অতি সংযতভাবে, শাস্ত্রাধ্যয়ন করিতেছে । তাই বলিতে-  
ছিলাম, মা, তুমি দর্পণে প্রতিবিম্ব দর্শনের ঞ্চায়, লোকের  
মনের ভিতর এমন প্রবেশ কর কিরূপে ?—অপরাধীর প্রকৃতি  
বুঝিয়া, তাহাকে তদনুযায়ী শাস্তি দাও কেমন করিয়া ?”

এই সময় অদূরে কি একটা কোলাহল উত্থিত হইল । দয়া-  
রাম পশ্চাৎ ফিরিয়া চাহিয়া দেখিলেন, একটা লোককে চার  
পাঁচজনে পড়িয়া, পিছ-মোড়া করিয়া বাধিয়া লইয়া আনি-  
তেছে,—আর তার পিছনেও কতকগুলি লোক হৈ হৈ করি-  
তেছে । দয়ারাম একটু ইঙ্গিত করিবারাত্র, সেই গোলমাল  
ধামিয়া গেল ;—বাজে লোকও সব সরিয়া পড়িল ;—কেবল  
দুইজন রক্ষী,—সেই বন্ধনদশাগ্রস্ত লোককে সেখানে আনিয়া  
হাজির করিল । একজন রক্ষী, দয়ারামকে লক্ষ্য করিয়া বলিল,—  
“ধর্মাবতার ! এই ছিঁচ্কে চোরটার উৎপাতে পল্লীর লোক-  
সকল ভিত্তিতে পারিতেছে না,—এর যা হয় একটা ব্যবস্থা আপ-

নারা করুন। এইবার লইয়া পাঁচ-পাঁচবার এর চুরী ধরা পড়িল ;—আর কতবার যে কত রকমে চুরী-চামারি করিয়া, ধরা না পড়িয়া, এ সাধু সাজিয়াছে,—তার সংখ্যা নাই। গৃহস্থের ষার যে জিনিস চুরী যায়, এরি উপর সকলে সন্দেহ করে। হুজুর! বলিব কি, তে-রাত্রি পেরোর নি,—হতভাগা এই ছ-ছমাস কয়েদ খেটে গেছে,—আবার এরি মধ্যে এই চুরী!—এই দেখুন হুজুর, ও পাড়ার ময়রাদের একটি ছ-বছরের ছেলের গলা টিপে এই হেঁসো নিয়ে পালাচ্ছিল।”

রাণা সেই যবনিকার অন্তরাল হইতে এই দৃশ্যটি আগ্রস্ত দেখিলেন, এবং রক্ষীর মুখেও সকল কথা শুনিলেন ;—এইবার সেই চোরকে নির্দেশ করিয়া, জনান্তিকে দয়ারামকে বলিলেন,—“দেখ দেখি, এই লোকটি কে?—ইহাকে চিনিতে পার কি?”

বৃদ্ধ দয়ারাম, চোরের দিকে একটু অগ্রসর হইয়া, কটমট করিয়া খানিকটা দেখিয়া, যেন বিশেষ হর্ষোৎফুল্ল হইয়া বলিয়া উঠিলেন,—“হাঁ মা, এ যে সেই পুরোগো পাপী—নাপ্তে বেটা? হাঁ, তাই ত?—বেটা বদ্‌ম্যেস, চোর! উঃ! তোমার এই ধড়িবাঙ্গী? সেবার না ছ-মাসের কয়েদ-দণ্ড শুনে, কেঁদে ফুটি-ফাটা হয়েছিলে?—মার বেটাকে!”

রক্ষিদয় আবার প্রহারের উপক্রম করিল, রাণী অঙ্গুলি-সঙ্কেতে নিষেধ করিলেন। তৎপরে হুকুম দিলেন,—আজ এ অপরাধীকে হাজতে রাখ,—কাল এর বিচার হইবে।

চোরকে লইয়া রক্ষিগণ চলিয়া গেল।

দয়ারাম স্তম্ভিত হইয়া রাণার মুখপানে চাহিয়া রহিলেন।

রাণী জিজ্ঞাসিলেন,—“কি, দেখ কি ?”

দয়্যারাম । মা, তোমার সম্মুখে দাড়াইয়া আর কথা কহি-  
বার সাহস হয় না ! এমন অপরূপ বিচার দেখিয়াও আবার  
আমাদের মনে দ্বিধা বোধ হইয়াছিল ? এই মহাপাপিষ্ঠের মায়া-  
কান্নায় ভুলিয়া, আমরা এর শাস্তি কঠিন হইয়াছিল বুঝিয়া-  
ছিলাম ? মা, সত্যই তুমি বলিয়াছিলে,—‘সময়ে তোমরা বুঝিবে,  
—আমার বিচার ঠিক ণায়বিচার হইয়াছে ।’ সত্যই মা, ণায়-  
বিচার হইয়াছে । তা তুমি যে মা, ণায় ও ধর্মের অবতার-  
রূপিণী !—তোমার কাছে কি কখন অবিচার হয় ?

“হাঁ, তা হয় বৈ কি ?”

অতি কোমল-করুণ-কান্নার-স্বরে ভবানী বলিলেন, “হাঁ,  
তা হয় বৈ কি ? হায়, কেন আমি সেই প্রথম অপরাধীকে  
কায়িক কোন দণ্ড দিলাম না ? তার প্রতি সেই মিষ্ট ভৎসনাই  
বোধ করি অতি গুরুতর দণ্ড হইয়াছিল ;—সেই দুঃখেই বুঝি  
বা সেই হতভাগ্য আত্মঘাতী হইয়াছে !”

দয়্যারাম উত্তর করিলেন,—“তা মা, তাহাকে কি কোন  
কায়িক দণ্ড দিলেই সে বাঁচিত মনে কর ? না মা, তা নয়,—  
তার দিন ফুরাইয়াছে,—ঐ ভাবেই সে যাইবে ;—তোমার সাধ্য  
কি যে, তা নয় কর !”

ভবানী মনে মনে বলিলেন,—“সে কথা শতবার ! জন্ম,  
মৃত্যু, বিবাহ,—ইহা ‘নয়’ করিতে দেবতাদেরও বেগ পাইতে  
হয়,—মানুষ কোন্ ছার ! তবে ব্যবহারিক হিসাবে, একটা  
কথা থাকিয়া যায় বটে ।”

দয়্যারাম পুনরায় বলিলেন, “যা হোক মা, তোমার এই

অভিনব বিচার-পদ্ধতি, দেশাধিপতি নবাবের—এমন কি, স্বয়ং দিল্লীখবেরও অনুকরণীয় ।”

ভবানী । অন্নের অনুকরণীয় কিনা জানি না, তবে আমার মনে হয়, সকল স্থলে এক নিয়মের বশবর্তী হইয়া, দণ্ডবিধি পরিচালনা করাটা ঠিক নয় । পাত্র এবং প্রকৃতিভেদে—বিচার-ভেদের একটু ব্যবস্থা করিলে, আমার বোধ হয়, ভাল হয় । কেন না, এমন অনেক লোক আছে যে, তাহাদিগকে ধরিয়া মারিলেও লজ্জা বা অপমান বোধ করে না ;—আবার এমনও অনেক আছে যে, একটু চক্ষু রাঙ্গাইয়া, ঘৃণা ও অবজ্ঞাসূচক একটু দৃষ্টি করিলেই, যথেষ্ট হয় ।—মারা ত দূরের কথা,—মুখে কোন কথা বলারও প্রয়োজন হয় না ।—তাহাতেই তাহারা মরমে মরিয়া যায় । এমন স্থলে কার্যিক কি আর্থিক দণ্ডও, আমার মতে ঠিক নয় ।

দয়্যারাম । তা ত মা, তোমার এই বিচার-ফল হইতেই সম্যক্ উপলব্ধি করিলাম? বলিবে, একজন আশ্রবাতী হইয়াছে ; কিন্তু তৎসঙ্গে একথা বলিয়াও ত গৌরব করিতে পারি যে, আর একজন সদ্ব্রাহ্মণ-সন্তান, দস্যু-গুণ্ডা-চোর-ধড়িবাজের সঙ্গে একত্রে বাস না ক’রে, জন্মের মত জাহান্নবে না গিয়ে,—চিরদিনের মত ভদ্র ও সাধু হইয়া গেল !—মা, বিচারকের পক্ষে এ কি কম পুণ্য ?

ভবানী অল্প কথা পাড়িবার উপক্রম করিলেন,—দয়্যারাম তথাপি বলিতে লাগিলেন,—“আর মা, এই নাপ্তেটার ছ-মাস কারাদণ্ড দেওয়া যে অতি ঠিক হইয়াছিল, এখন যেন তাহা আমরা পরিষ্কাররূপে বুঝিতে পারিতেছি । ও হতভাগা স্বভাব-চোর,—ওর সাত-পুরুষ ঐ ক’রে কাটালে,—ওর কি ও-রকম

মিষ্ট-ভাঙ্গনায় কোন ফল হ'তো ? এই দেখ না, কয়েদ-খেটে  
বেরিয়েই, হতভাগা আবার চুরী ক'রেছে ! চুরীই ওর পেশা ;  
—ওর ঐ রকম শাস্তিই ঠিক ।—মা, তোমার কথাই সার ;—  
প্রকৃতিভেদে দণ্ডভেদই প্রশস্ত ।”

ভবানী মনে মনে বলিলেন, —“কি যে প্রশস্ত, আর কি যে  
নয়,—তা ত বড়ই বুঝি !—মুখে আগুন এ বুঝা-পড়ার !—  
নহিলে ঐ চোরই বা কে, আর আমিই বা কে, এটা ভাবিতাম  
না ? দূর হউক, এ রাণীগিরি চাকরি খুচিলেই বাঁচি !—আর  
কতদিনে এ আপদ দূর হবে মা ? কতদিনে এ মায়ায় বন্ধন  
সমূলে কটিয়া, আমার ছুটি দিবে জননি ?”

ভবানী মনে মনে তখন—শৈশবের সেই গানটি আবৃত্তি  
করিলেন ;—

“মাগো, আর কত কাল এ ভব-যন্ত্রণা ।

যাতায়াত-ক্লেশ,

হ'বে নাকি শেষ,

জনমে জনমে আর যে পারি না ॥”

চোখে একটু জল আসিল,—‘তারা’ ‘তারা’ বলিতে বলিতে,  
তিনি উঠিয়া পড়িলেন । সেদিন আর জমিদারীর কাজকর্ম কিছু  
দেখা হইল না ।

এমন ঘটনা মধ্যে মধ্যে দুই একদিন হইত । তাই ইতঃপূর্বে  
একস্থানে বলিয়া আসিয়াছি যে, অমন আত্মচিন্তানিরতা রমণী-  
কুললক্ষ্মীর,—কুট বৈষয়িক-নীতি আরম্ভ হইয়াছিল কিরূপে ?

বলিয়াছি ত, রাজর্ষি জনক ও রাণী ভবানীকে পাশাপাশি  
রাখিয়া দেখিতে ইচ্ছা হয় ? তবে, মধ্যে দুই যুগ বহিয়া গিয়াছে,  
—ভবানী চোখের সামনে,—ইহাই যা বল !



## তৃতীয় পরিচ্ছেদ ।

—:—

রাজকুমারী তারা, আঁধার-ঘরের মাণিকস্বরূপ, একলাই রাজগৃহে বিরাজ করিতে লাগিল। দুই-দুই ভাই গিয়াছে, মাত জপ-তপ দান-ধ্যান পূজা-আহিক লইয়াই আছেন ;— এক বেলা একমুষ্টি হবিষ্যাঃ আহার,—এই তাঁর প্রাণধারণার্থে ব্যয়,—দু’দিন বাদে এত বড় রাজ্যটা সূতরাং তারার বরাতেই আসিবে ;—তারাই তার ভোগ-দখল করিবে ।—তা এতটা ভাগ্য, এতটা জন্মান্তরীণ তপস্যা, তারার আছে কি ? কি জানি, তারার পুণ্যবল কেমন ?

পূর্ণিমার শশিকলা যেমন দিনে দিনে বাড়ে, বালিকা তারাও সেইরূপ বাড়িতে লাগিল । চন্দ্রমারশ্মিসমুদ্ভাসিত ফুটন্ত মল্লিকার মত রূপ,— সে বালিকা-দেহে যেন উথলিয়া পড়িল । নবনীত-কোমল শরীর যেন খুল-খুল্ দুল্-দুল্ করিয়া নাচিয়া বেড়াইতে লাগিল । মায়ের যোগ্য মেয়ে বটে । বাপ সুন্দর, মা সুন্দর—দুই সৌন্দর্যের রাসায়নিক সংযোগে, কোন্ অদ্বিতীয় কারিকর, যেন ইচ্ছামাত্রেই, এ অপূর্ব সৌন্দর্য্য-প্রতিমা সৃজন করিয়াছেন । প্রতিমার অলোক-সামান্য শোভা ও শ্রী দেখিয়া, সকলে মুগ্ধ হইয়া গেল ।

বিজন-বনে বনদেবীর মত, ভবানীর হৃদয়-শ্মশানে এ প্রতিমা আলো করিয়া রহিল । রাজা বিহনে, রাজকুমারদ্বয়ের চির অন্তর্ধানে রাজপুরীর শোক-মলিন ভাব—বালিকা তারাই যেন মধুর হাসি হাসিয়া বিদুরিত করিয়া দিল । আলোকে যেমন অন্ধকার নাশ করে, রূপের স্নেহময়ী মূর্তিতে তেমনি নূতন আনন্দ আনিয়া দেয় । আনন্দের সহিত আশাও ধীরে ধীরে আসিয়া থাকে । স্বামী গেল, পুত্র গেল, প্রকৃত উত্তরাধিকারী অভাবে রাজ্যপাট যেন নীরবে—বিষাদিত মনে কাঁদিতে লাগিল,—ভবানী অন্তরের অন্তরে এ ছবি অবলোকন করিতে লাগিলেন ;—তেমন বিষম অবস্থায় একমাত্র কুমারী তারাই ভবানীর একটুকু মাত্র সাধনার স্থল হইল । অপরূপ রূপের সহিত তারার সেই ফুটন্ত হাসি, যেমন সেই বিষাদ-নীরব রাজপুরীকে জাগাইয়া তুলিল,—তেমনি সেই সঙ্গে বিধবা রাণীর সেই শোক-দন্ধ অন্তর, আশার স্নিগ্ধ হিরোলো, একটু একটু সরস হইয়া আসিতে লাগিল । তবে এ সরসতায় তেমন প্রাণপোরা উৎসাহ, উল্লাস, কিংবা সজীবতা নাই । এবং এ আশাও অতি ক্ষীণ ;—শিবরাত্রির একটি সলিতা মাত্র ।—তৈলাভাবে এ সলিতাটিও না পুড়িয়া যায় !—মায়ের প্রাণ এই ভাবেই থাকিয়া থাকিয়া কাঁপিয়া উঠে । এমন অবস্থায় ভবানীর হৃদয়ে সুখ কি দুঃখ, উৎসাহ কি অবসাদ—কোন ভাবের তরঙ্গ উঠিতে পারে, তাহা একটু ভাবিয়া দেখিলেই বুঝা যায় । না ভাবিয়া, ভুক্তভোগী হইয়াও বুঝা যাইতে পারে ।

যাই হউক, পরম সমাদরে—আদরের পূর্ণ মাত্রায়, তারা লালিত-পালিত হইতে লাগিল । ‘একলা ঘরের ছাণ্ডালা’ হইয়া, —কণ্ঠা হইয়াও পুত্রের অধিক সমাদরে, তাহার সোণার শৈশব



কাটিতে লাগিল । একে সেই অনিন্দ্যসুন্দর অতুল্য রূপ, তার উপর অসীম ঐশ্বর্য্যসম্পদ,—শোণের বা ভাগের আর দ্বিতীয় জন নাই, সুতরাং যতদূর সম্ভবে,—আদরে, আনন্দে ও গৌরবে তারা বর্দ্ধিত হইতে লাগিল । মায়ের বুক-ভাঙ্গা প্রাণের স্নেহ খুব গভীর হইলেও, বাহিরে তাহার বড় বেশী বিকাশ ছিল না ; না থাকুক,—পোষ্য-পরিজনের আশা, আকাঙ্ক্ষা ও সহৃদয়তার সম্যক স্নেহানুরাগে, নয়নানন্দময় তারাফুল, আপন গৌরবে আপনি ফুটিয়া উঠিতে লাগিল । ফুলের সৌরভ, শোভা ও সৌন্দর্য্যে সকলে মুগ্ধ হইল । ভবানী মনে মনে বলিলেন,—  
“ভগবান্ ! এ শোভা সার্থক হইবে কি ? এ ফুল যোগ্যতর স্থানে গিয়া, সৌরভে ও গৌরবে, সংসার চির আমোদিত করিয়া রাখিতে পারিবে কি ? এ অভাগীর অদৃষ্ট বড় মন্দ ; তাই সূচনাতেই এ আশঙ্কা হয় প্রভু !”

পাঁচ বৎসর বয়স হইতেই, ভবানী কণ্ঠকে শিক্ষা দিতে লাগিলেন । রাজকণ্ঠার যেরূপ শিক্ষা শোভনীয়, সেইরূপ শিক্ষাই তারা পাইতে লাগিল । মোটামুটি বর্ণ পরিচয়াদি শিক্ষা দিয়াই, ভবানী যোগ্যতর শিক্ষক নিযুক্ত করিয়া প্রাচীন আদর্শে, কণ্ঠকে চিত্র, শিল্প, সঙ্গীত—এই সব কলা-বিদ্যাও একটু আধটু শিখাইলেন । পুরুষ অপেক্ষা স্ত্রীজাতির ধারণাশক্তি অধিক কিনা, ঠিক জানিনা,—তবে রাজকুমারী তারা, দুই বৎসর মধ্যেই এই সকল বিদ্যা, দিব্য একটু-আধটু আয়ত্ত করিল । ভবানী-সুতা তারা ; মায়ের ধার ত একটু পাইবে বটে ?

সাত বৎসর বয়সেই তারার রূপে, রাজপুরী যেন নৃত্য করিতে লাগিল । এই অপরূপ রূপের সহিত আবার চিত্তরঞ্জিনী কলা-



বিচার সংযোগ ;—একাধারে যেন মণিকাঞ্চন মিলন হইল ।  
কি-জানি-কেন, এইবার যেন ভবানীর বড় আনন্দ হইল ।  
নির্ঝাপিত সুখ সাধ, আশা আকঙ্কা—যেন পূর্ণমাত্রায় জাগিয়া  
উঠিল । বহু দিন বন্ধের পর, যেন কোন পুরাতন বনিয়াদী  
বাড়ীতে, পুনরায় দুর্গোৎসবের আনন্দ-বাজনা বাজিয়া উঠিল ।  
ভবানী সজল নয়নে গদগদ কণ্ঠে বলিতে লাগিলেন,—  
“এ সময় কোথায় তুমি প্রাণের প্রাণ জীবনবল্লভ ! এ শোভা  
তুমি দেখিলে না ? তোমার প্রাণাধিকা তারার এ হস্ত লাবণ্য-  
ময়ীমূর্তি, আমায় এক-চক্ষে দেখিতে হইল ?”

এক চক্ষু ! অর্দ্ধাঙ্গিনী সতীলক্ষ্মী পতি-দেবকে হারাইয়া  
এক-চক্ষুই হন বটে ! ভবানী মনে মনে বলিলেন, “তারা আমার  
সাথে পা দিয়াছে,—এইবার মার আমার দুই-হাত এক করিয়া  
মাকে পরের করিয়া দিয়া আমি বিদায় লই । আমার এ ভাঙ্গা  
বরাৎ ;—বাছাকে পরের করিয়া দিলে যদি বাঁচিয়া থাকে !  
অন্য পক্ষে,—তারার জন্যে আমার পরকালের কাজও হই-  
তেছে না ।—গঙ্গাহীন নাটোরে বসিয়া, আমার তীর্থধর্ম সব  
লোপ পাইতে বসিয়াছে । না, আর এ বন্ধনে থাকিতে সাধ  
নাই । যা অন্তর্যামিনি ! তনয়ার সাধ পূর্ণ কর ;—তারার-  
আমার একটি যোগ্য বর মিলাইয়া দাও ;—আমি বিদায় লই ।”

সপ্তম, অষ্টম ও নবম—এই বয়সে কন্যার বিবাহ দেওয়া,  
তখনকার রীতি ছিল । ‘গৌরীদানের ফল’ হিন্দু অন্তরের  
অন্তরে বিশ্বাস করিতেন । ‘করিতেন’ বলিতেছি কেন,—  
এখনও প্রকৃত আহাবান্ হিন্দুতে করেন ;—তবে নানাকারণে  
কার্য্যে পারিয়া উঠেন না ।

হিন্দুকুললক্ষ্মী রাণী ভবানী, বিজোড়-বৎসরে—সাথেই কণ্ঠকে পাত্ৰস্থ করিতে মনস্থ করিলেন। পাত্ৰের অনুসন্ধানে ঘটককুল চারিদিকে ছুটিল। নাটোর-রাজদুহিতার বিবাহ ;—নাটোর-রাজসম্পত্তির ভাবী অধিকারিণী,—তার উপর একাধারে অত রূপ ও গুণ ;—বড় সোজা ব্যাপার নয়। যে ভাগ্যবান এই কণ্ঠারহ লাভ করিবেন, তাঁর কত বড় জোর-কপাল হওয়া চাই, একটু ভাবিতে হইবে। যাই হউক, পাত্ৰ মিলিল। রাজসাহী জেলার অধীন খাজুরা গ্রাম নিবাসী লাহিড়ী বংশোদ্ভব এক সম্ভ্রান্তব্যক্তির পরম রূপবান্ তরুণ পুত্রের সহিত শ্রীশ্রীমতী তারাসুন্দরীর বিবাহ-কথা ধার্য হইল।

নাটোরে মহাসমারোহ পড়িয়া গেল। সমারোহে পথ ঘাট, হাট মাঠ নৃত্য করিতে লাগিল। রাজবাড়ী ইন্দ্রপুরী তুল্য শোভা ধারণ করিল। ভবানী বড় আশাসে, মহা মহোৎসাহে, শুভদিনে, বিশেষ সাবধানে, কণ্ঠার শুভবিবাহ-কার্য সম্পাদন করিলেন। কিন্তু হায়, তিনি জানিতেন না যে, তাঁহার এই বড় আশার উপর, অদৃষ্ট অলক্ষ্যে থাকিয়া, বড় নিষ্ঠুর হাসি হাসিতেছিল।

বিবাহ নির্কিল্বে হইয়া গেল ; বরকণ্ঠা বিদায়ের দিনে, ভবানী প্রচুর ভূসম্পত্তি সহ মণি-মুক্তা-হীরা-জহরৎ এবং বহু স্বর্ণমুদ্রাসম্ভার জামাতাকে যৌতুক দিলেন। কাঁদিতে কাঁদিতে বলিলেন,—“বাবা, আশীর্বাদ করি, চিরজীবী ও চিরসুখী হইয়া ধর্মপথে থাক। তোমার হস্তে এই রাজ্যভার অর্পণ করিয়া, যেন আমি সম্ভ্রান্তে গঙ্গালাভ করিতে পারি।”

অন্তঃপর কণ্ঠাকে কহিলেন,—“মা আমার ! তোমায় আর

কি আশীর্বাদ করিব,—যেন তুমি চির-এয়োদশী থাকিয়া, পতিপুত্র রাখিয়া, নির্বিঘ্নে চলিয়া যাইতে পার ;—ইহার বাড়া আশীর্বাদ আমি আর জানি না ।”

অদূরে সুবর্ণমণ্ডিত শিবিকা সজ্জিত ছিল । সকল মাস্তুলিক কার্য যথাবিধি সুসম্পন্ন হইয়া গেল । বরকণ্ঠা বিদায় হইবার জন্ত উঠিয়া দাঁড়াইলেন ।

এইবার ভবানী মনে মনে বলিলেন,—“নাথ ! আজ তোমার বড় আদরের তারা—স্বামীর-ঘর করিতে যাইতেছে ;—উপর হইতে একবার দেখ,—তাহাকে আশীর্বাদ কর,—সে যেন চির-ভাগ্যবতী হইয়া, জন্ম জন্ম এই ঘর করিতে পায় !”

টিক্-টিক্-টিক্,—মাথার উপরে একটা শব্দ হইল । ভবানী উর্ধ্বদৃষ্টি করিতে-না-করিতে—ও কি ও ! একটা হাঁচিও যে পড়িল না ? কম্পিত-বক্ষে ভবানী বলিয়া উঠিলেন,—“একি, আবার !”

মর্শ্চছেদকর একটা নিশ্বাস ফেলিয়া, ভবানী সজলনয়নে, সজলনয়না তারার মুখপানে চাহিয়া দেখিলেন ;—শিবিকা-রোহণোত্ততা—স্বয়ং তারাই সে হাঁচি হাঁচিয়াছে !

কি জানি কেন, হঠাৎ তারা বড় হৃৎকের কান্না কাঁদিতে কাঁদিতে বলিল,—“মা, আমার আর কোথাও যাইতে ইচ্ছা নাই,—আমি তোমার কাছেই থাকিব ।”

ভবানী, কণ্ঠার চিবুক ধরিয়া, স্নেহচুষন করিয়া, বাষ্পরুদ্ধকণ্ঠে বলিলেন,—“ছি মা, অমন কথা কি বলিতে আছে ? ঘরের লক্ষ্মী ঘরে যাও মা,—স্বামীর ঘর গিয়া উজ্জ্বল কর ।”

মুহূর্ত্তকালের জন্ত ভবানী যেন কেমন হইয়া গেলেন । পরে

সে ভাব সামলাইয়া, কণ্ঠা ও জামাতাকে, ধীরভাবে বলিলেন,—  
“একটু বসিয়া যাও ।”

বর-কণ্ঠা পুনরায় পালঙ্কোপরি উপবেশন করিলেন ।  
পুরোহিত আবার আসিয়া, শুভযাত্রার শুভমন্ত্র উচ্চারণ পূর্বক,  
মাতা জয়কালী দেবীর প্রসাদী জবা-বিষপত্র তাঁহাদের হাতে  
দিলেন । চারিদিকে আবার মাহুলিক ধ্বনি উঠিল । বর-কণ্ঠা  
স্বতন্ত্র স্বতন্ত্র শিবিকায় গিয়া উঠিলেন । বাহকগণ শিবিকা  
স্বন্ধে লইল । কিন্তু হায় ! বরের শিবিকা, যাই দুই-চারি পা  
অগ্রসর হইয়াছে,—ক’নের শিবিকা হইতে অমনি পুনরায়  
সেইরূপ একটা হাঁচির শব্দ হইল ।

“একি, আবার ! না, আর ভাবিব না ;—যা কর মা  
জগদীশ্বর !”—ভবানী মনে মনে এই কথা বলিতে বলিতে,  
একটি নিশ্বাস ফেলিয়া, ধীরগম্ভীরভাবে শিবিকাপানে চাহিয়া  
রহিলেন ।

ঘোর রোলে বাঘভাণ্ড বাজিয়া উঠিল ।





## চতুর্থ পরিচ্ছেদ ।

—\*—

কিন্তু বাণ-ভাণ্ডের আড়ম্বরে,—বাহিরের জাঁকজমকে,  
দৈব ভুলে না ; অতি-সতর্ক, চারিচক্ষু বিষণীর স্তম্ভ  
হিসাব-নিকাশে নিয়তির লেখা মুছে না। অসীম সাগরের  
অনন্ত উন্নিমালার ন্যায় কৰ্ম্মসূত্র অনন্ত—হিসাব-নিকাশে তাহার  
কতটুকু আয়ত্ত করিবে ? এই জগৎ প্রকৃত জ্ঞানী ব্যক্তি দৈবের  
আশ্রয় লয়। দৈববলে, কালবিশেষে অদৃষ্টকেও জয় করা যায়।  
কিন্তু সব সময়ে নয়।

প্রথমে অস্তর্দৃষ্টিশালিনী, ভক্তিমতী ভবানী ইহা জানিতেন।  
জানিতেন যে, দৈববলেই জীবের পরম সহায়। তাহার তাহা  
নাই, তাহার সকল থাকিয়াও কিছুই নাই। এই জগৎই,  
দৈবের সাধনা প্রয়োজন। দৈবই পুরুষকারকে জাগাইয়া  
তুলে। তখন, প্রভু যেমন ভূত্যের দ্বারা ঈপ্সিত কার্য সম্পন্ন  
করেন, দৈবও তেমনি পুরুষকারকে ভূত্য নিযুক্ত করিয়া স্বকার্য  
সাধিয়া লন। এ হিসাবে, প্রভুহীন ভূত্য আর দৈবহীন পুরুষ-  
কার একই কথা—উভয়ের ক্ষমতা কতটুকু ?

জামাতা-কণ্ঠকে বিদায় দিয়া, ভবানী যেন বুঝিতে পারিলেন, এই দৈব, তারার প্রতি অনুকূল নন।—বুঝি বা তারার অদৃষ্টে কি হয় !

“হাঁচি, টিক্‌টিকি, বাধা,—যে মানে সে গাধা”—এমনি একটা কথা, আজকাল, বড় বেশী বেশী শুনিতে পাই। লেখক সত্য কথা লিখিয়া ‘গাধা’ আখ্যা পাইতেও প্রস্তুত ; তথাপি ‘মনে মানি অথচ মুখে মানি না’ বলিয়া, মিছা বাহাদুরী লইবার লোভে, ভেড়ার পালে মিশিতেও রাজী নয় !

ভবানী উচ্চসংস্কারসম্পন্ন, আদর্শ হিন্দু-রমণী ;—তিনি ক্ষুদ্র ও বৃহৎ সকল জিনিস হইতেই সারগ্রহণ করিতে জানেন,—সারগ্রহণ করিয়া থাকেন। তাই চির-প্রচলিত প্রবাদের মূলে যেটুকু সত্য আছে, তাহা তিনি মনের সহিত মিলাইয়া, আত্ম-জীবনে প্রত্যক্ষ করিয়া, আপন সিদ্ধান্তে উপনীত হইয়াছেন। বুঝিয়াছেন, এই সামান্য ঘটনাগুলিতেও, অবস্থা ও সময়বিশেষে, অতি গুরুতর ফল সংঘটিত হয়। তাই, জামাতা-কণ্ঠের বিদায়-কালে, হাঁচি-টিক্‌টিকির বাধাটা, তিনি উপেক্ষা করিতে পারিলেন না,—উপরন্তু যেন বুঝিলেন, কালের এই অস্পষ্ট আভাস, পরিণামে বা কি অশুভ-ফল সংঘটন করিয়া দেয় !

ফলে, হইলও তাই।—বিবাহের সাতদিনের মধ্যেই সেই রূপের নিখুঁৎ ছবি—ভবানীর জীবনাবলম্বন বালিকা তারা—বৈধব্যের কণ্টকাকীর্ণ মুকুট মাথায় পরিয়া চির-অবনতমুখী হইয়া রহিল!—সে মুখ ইহজন্মে আর উঠিবে না।

বালিকার কচি-মুখের হাসিরাশি ভাল করিয়া ফুটিতে-না-ফুটিতে, মুখেই মিলাইল। শরতের শোভাময়ী জ্যোৎস্না,

ধরা-বন্ধে প্রাবিত হইতে না হইতে অন্তর্হিত হইল। জগতের আলোকরাশি, সহসা যেন কি যাত্নমন্ত্রে চির-নির্ঝাপিত হইয়া গেল। কেন, কোন্ পাপে, কার অভিশাপে,—হায়! কে বলিবে ?

ভবানী এ ভীষণ সংবাদ শুনিলেন। পাষাণীর গায় স্থির, অবিচলিতা হইয়া শুনিলেন। চক্ষে একবিন্দু অশ্রু ঝরিল না,—নির্ঝাক্, নিষ্কম্পা, স্থিরনেত্রা হইয়া, রুদ্ধশ্বাসে দাড়াইয়া রহিলেন। তখন, সেই মুহূর্ত্ত, তাঁহাকে শোক, দুঃখ বা কান্নার অতীত অবস্থায় লইয়া গিয়াছে !

কিন্তু অধিকক্ষণ আর তাঁহাকে এ অসহ যন্ত্রণা সহিতে হইল না ;—একটা মর্শ্চছেদকর গভীর উষ্ণনিশ্বাসের সহিত—“মা, তারা” বলিতে বলিতে তিনি মূচ্ছিতা হইয়া পড়িলেন।

সেই মূচ্ছিতাবস্থায় এক স্বপ্ন দেখিলেন।—সেই শৈশবের ও ষৌবনের সেই বৈরাগ্যময় স্বপ্ন।—দেখিলেন, এবারও যেন মা-অন্নপূর্ণা, শান্ত-প্রসন্ন বদনে, ভুবনমোহিনী মূর্ত্তিতে, তাঁহার সম্মুখে আসিয়া দাড়াইয়াছেন,—ও বড় স্নিগ্ধ করুণাপূর্ণ নয়নে তাঁহাকে দেখিতেছেন। অনেকক্ষণ তিনি সেই ভাবে দাড়াইয়া দেখিলেন। উভয়েই উভয়কে দেখিতেছেন ;—সে চারি-চক্ষুই যেন মিলিয়া মিশিয়া অহেদ—এক হইয়া গিয়াছে ;—দৃষ্টি পলকহীন। অনেকক্ষণ এই ভাবে অতিবাহিত হইয়া গেল ;—মুখ দিয়া কাহারও কোন বাক্যফুরণ হইল না।

এইবার যেন জীব-জননী জগন্মাতার সেই অপূর্ব লাবণ্যময় মুখে একটু লাবণ্যময় হাসি-রেখা দেখা দিল। সে হাসিতে যেন ব্রহ্মাণ্ডের একটা মহারহস্য ফুটিয়া বাহির হইল। ভবানীও

যেন মায়ের সে নীরব হাসির মর্ম্ম বুঝিলেন । তিনিও যেন :  
 তন্মহুর্ভে ব্রহ্মময়ীর পূর্ণভাব প্রাপ্ত হইলেন । তাঁহার শোকতাপ  
 সব বিদূরিত হইল । তিনি যেন নুতন মানুষ হইলেন । প্রথম  
 তিনি কথা कहিলেন । মধুবর্ষী পবিত্রকণ্ঠে বলিলেন, “কি  
 আদেশ মা ? কণ্ঠাকে কোন্ কার্যের ভার দিতে আসিয়াছ ?”  
 এবার মার মুখেও যেন কথা ফুটিল । কিন্তু সে কথা ব্যক্ত  
 করিব, সে ভাষা কৈ ? মা, তোমার ভাষা, তুমিই ফুটাইয়া লও !

মা বলিলেন, “বৎসে ! এইবার—এতদিনে আমার সাধ  
 মিটিয়াছে ! তোমাকে যে ভাবে, যেমন অবস্থায় পাইবার আশা  
 আমি করিতেছিলাম, সেই ভাবে, সেই অবস্থায়, সম্পূর্ণরূপে  
 এখন তোমাকে পাইলাম । মা আমার ! আরও কিছুদিন এই  
 ধরাধামে, আমার কার্য তোমাকেই করিতে হইবে । তুমি  
 জন্মান্তরে, অনন্তকামনায় এ বর চাহিয়াছিলে, আমি তাহা  
 তোমায় দিয়াছি । এখন, বর পাইয়া পিছাইলে চলিবে কেন ?  
 এ বরের ইহাই নিয়ম । যে আমাকে চায়, তাহাকে সর্বস্ব খোঁও-  
 য়াইতে হয় ;—তবে আমি তার হই । ঠিক তার মনের মত  
 হইয়া রই । সে ভাবে—আমিই সেই ; আমি ভাবি—সেই আমি ।  
 ছ’য়ের ভেদজ্ঞান থাকে না । নরলোকও ক্রমে এ ভাব উপলব্ধি  
 করে । তবে, সে বড় জোর কপালের কাজ । তুমি আমার  
 হইয়াছ, এখন আমিও তোমার হইলাম । তোমার সঙ্গে সঙ্গে  
 থাকিব, সঙ্গে সঙ্গে ফিরিব ;—তুমি বুঝিতে পারিবে না যে,  
 আমি কোথায় নাই, আর কোথায় আছি । মা, এইবার তবে  
 পূর্ণরূপে ব্রত উদ্‌ঘাপন কর । এতদিন যাহা পালন ও পোষণ  
 করিয়া আসিতেছ, এইবার তাহার পরিণতি দেখাও ।



“দাও মা, জীবে আরও অন্ন দাও । ভব-ক্ষুধায় সে বড় কাতর, তাহার ক্ষুধা নিবৃত্তি কর । তোমার পরিপূর্ণ ভাণ্ডার,— কিছুরই অভাব নাই ;—যা আমি দিয়াছি, তা আমার সম্ভানগণ মধ্যে বিতরণ কর । দানে, ধ্যানে, ধর্মে, তীর্থে, পুণ্যে, বৈরাগ্যে—যখন যেরূপে ইচ্ছা হয়, আমার গচ্ছিত ধন—আমার কার্য্যেই ব্যয় কর ;—তোমায় আর জন্মগ্রহণ করিতে হইবে না ।

“মনে কর, তোমার সেই শৈশবের সেই ধূলা-খেলার দিন । শ্চোন-কপোত লইয়া আমি যে মায়ার খেলা খেলিয়াছিলাম,— তাহাতেই তোমার প্রথম পরীক্ষা আরম্ভ ;—এতদিনে তোমার সকল পরীক্ষারই শেষ । তুমি জয়লাভ করিলে । এই বিশ্ব-বিজয়িনী শক্তি লইয়া, তুমি যখন যেখানে যে ভাবে থাকিবে, দেবী বলিয়া আমার নামে পূজা পাইবে । জীবকে অন্নদানের সঙ্গে সঙ্গে,—শিবপূজা, গঙ্গান্নান ও সাধুদর্শন এই তিন কাজ এখন তুমি অনন্তকর্ম্ম হইয়া করিতে পারিবে । স্বর্গতুল্য বারাণসী ধামে, তোমার এ মহাকাব্যের মহামিলন হইবে ।

“জীব-জন্মের চরম সাধ, তুমি ইহজন্মেই মিটাইতে পারিলে । ‘জীবে প্রেম, স্বার্থ ত্যাগ, ভক্তি ভগবানে’,—এই যে মহান্ ধর্ম্ম তুমি মানবজীবনের সার বলিয়া বুঝিয়াছ, তাহা তোমার সার্থক হইবে । আমি তোমার চিরসঙ্গিনী হইয়া আছি ।—সাংসারিক হিসাবে সকলই তোমায় পরিপূর্ণ মাত্রায় দিয়াও, জীবহিতার্থে আমিই আবার একে একে তাহা কাড়িয়া লইয়াছি । কেননা, সকলের হিতেই তোমার হিত । তাই তুমি পতি-পুত্রে বঞ্চিত হইয়াছ ;—তাই তোমার শেষ আশাটুকুও ভাঙ্গিয়া দিলাম । কন্টার সংসার-মোহে পাছে তুমি লক্ষ্যভ্রষ্টা হও ;—পাছে অর্থের

প্রতি তোমার বিন্দুমাত্রও মায়া বসে ;—এই দ্রুত এই কচি-বয়সেই তোমার তারার বৈধব্য-দশা ঘটাইলাম । তোমার ও তারার একত্রে অবস্থান, বিশেষ আবশ্যক বলিয়া, আমি তারাকে রাখিলাম,—নচেৎ তাহাকেও সঙ্গে লইতাম । তারার মলিন-মুখ দেখিতে দেখিতে, তুমি দ্বিগুণ উৎসাহে জীবের মলিনমুখ মুছাইতে পারিবে ;—তারাও তোমার সেবা করিয়া, সংসারে মাতৃ-সেবার মাহাত্ম্য দেখাইবে,—এইজন্য তারাকে রাখিলাম । যাহা হউক, তারার জন্য তোমার কিছুমাত্র আশঙ্কা নাই ;—তোমার কন্যা—তোমার আদর্শই গ্রহণ করিবে ।

“এখন উঠ বৎসে,—চৈতন্যলাভ কর ।—চৈতন্যময়ী হইয়া জীবের মুক্তির পথ প্রসারিত করিয়া দাও । বলিয়াছি ত, আমি নিজে কিছু করি না যোগ্যপাত্র পেলে তার হাত দিয়াই আমার কাজ করিয়া যাই ? মা আমার ! তুমিই আমার সুযোগ্য কন্যা ;—তোমার দিয়াই আমি সকল কাজ করিয়া লইব । এখন উঠ বৎসে, চৈতন্যরূপিণী ! জননী-অন্নপূর্ণারূপিণী হইয়া, তুমিই কিছু দিন জীবের পালন ও রক্ষা কর ।—তোমার মাহাত্ম্যরূপিণী মানবী-মূর্তির সম্যক সাধ আমি মিটাইব । সাধ মিটিলেই তোমার মুক্তি ;—আমি আসিয়া তোমায় কোলে লইব !”

ভবানী, ভবানীর মস্তকে করপদ্ম স্পর্শ করিয়া আশীর্বাদ করিলেন । কন্যা যেমন মাতার চরণে প্রণতা হয়, রাণী ভবানী তেমনি দেবী ভবানীর চরণে প্রণতা হইয়া, তাঁহার অমৃতনীতল পাদপদ্ম বন্ধে ধারণ করিলেন । আহা-হা ! বুক চিরজন্মের মত জুড়াইয়া গেল !

চৈতন্যসঞ্চারে ভবানী উঠিয়া দেখিলেন, মা আর নাই।—  
তিনি কি অন্তর্ধান হইলেন,—না, ভক্তের সঙ্গে মিজাইলেন ?

মুহূর্তকাল ভবানী নির্বাক হইয়া চারিদিকে চাহিয়া দেখি-  
লেন। দেখিলেন, তাঁহার মুচ্ছাভঙ্গের প্রতীক্ষায়, পুরমহিলাগণ  
স্নানমুখে তাঁহার পানে চাহিয়া আছেন।

ধীরে ধীরে পূর্বস্মৃতি ফিরিয়া আসিল। ভবানী একটি  
নিশ্বাস ফেলিয়া বলিলেন, “দয়্যারামকে কেহ খবর দাও,—আজই  
তারাকে এখানে লইয়া আসিবার সবিশেষ বন্দোবস্ত করিতে  
হইবে।”

যথাদিনে তারা আসিল।—স্নানমুখী কোমল-কলিকা, মলিন-  
বসনে, নিরাভরণা মূর্তিতে, মায়ের সম্মুখে আসিয়া দাঁড়াইল।  
হায় ! কে নিশ্চয়-কঠিন-পাষণ-হস্তে জন্মশোধ তাহার সীমন্তের  
সিন্দূর মুছিয়া দিয়াছে ! সে শোভাময়ী সুখ-তারা, ভবানীর  
হৃদয়াকাশে আর উদয় হইবে না !

অবনতমুখী তারা, কাঁদ-কাঁদ মুখে, মায়ের কোল ঘেসিয়া  
দাঁড়াইল। ভবানী, তখন প্রকৃত ভবানীর ন্যায়, কন্যাকে বক্ষে  
ধারণ করিয়া, সাহস দিয়া বলিলেন,—“ভয় কি মা ! আমি  
তোমার আছি !”

তারার চোখ দিয়া তখন ফোঁটা ফোঁটা জল ঝরিতেছিল।  
মায়ের কথা শুনিয়া, এবার কাঁদিতে কাঁদিতে বলিল,—“মা !  
সেই জন্যই ত আমি তখন ব’লেছিলাম, আমার আর কোথাও  
যাইতে ইচ্ছা নাই,—আমি তোমার কাছেই থাকিব।”

“তাই থাকি ও মা। আমি তোমাকে সঙ্গে লইয়া সর্ব তীর্থে  
ফিরিব।”

“তীর্থ কেমন মা ? আমার তীর্থ দেখিবার বড় সাধ ।”

তোমার সঙ্গে আমারও সে সাধ মিটিবে ।”

আশ্চর্য্য !—ভবানীর চক্ষে, কেহ এক বিন্দু জল দেখিল না !  
শোকে জলও এমন জমিয়া যায় ?

তা যায় বৈ কি ? শোকে চোখের জলে কেহ নদী হাইতে পারে ; আর কেহ বা শোক সহিয়া-সহিয়া অগস্ত্যের সমুদ্র-গণ্ড-ষের ন্যায় আপন উত্তপ্ত-বুকে, শোকের সপ্ত-সমুদ্রও শোধিয়া লইতে সমর্থ হয় !—প্রকৃতি ও অবস্থাভেদে এটি হইয়া থাকে । পরন্তু, যে কাঁদিতে পায়, তুলনায় সে অনেক সুখী ।

দিনের পর দিন গেল,—শোক একটু পুরাতন হইয়া আসিল । রাজ-সংসার, বৈষয়িক কাজ-কর্ম—আবার যথানিয়মে চলিতে থাকিল ।

কিন্তু এইবার ভবানী ভাবিলেন,—“না, আর না ।—আর মায়ায় মুগ্ধ হইলে চলিবে না । কেনই বা আর ? সকল আশারই ত অবসান ; তবে এইবার মায়ের আদেশ পালন করি । তারার মলিন-মুখ মুছাইতে মুছাইতে, জীবের মলিন-মুখ মুছাইয়া দিই । আর কেন,—ভাঙার উন্মুক্ত করিয়া ফেলি !

“কিন্তু যে অবধি দেহ ধারণ করিতে হইবে,—ইহার রক্ষার জন্য একজন যোগ্যতর লোক চাই বটে । বিশেষ, এ রাজবংশের একেবারে উচ্ছেদ যাহাতে না হয়, তাহাও দেখিতে হইবে ।

“তবে, দত্তকপুত্র গ্রহণ করি । বংশের নাম ও মান, সে-ই রাখিবে । সৎশ্রদ্ধাত একটি ধার্মিক ব্রাহ্মণ-সন্তান পাইলেই তাহাকে শাস্ত্রসম্মত পুত্ররূপে গ্রহণ করিব । হাঁ, সেই ঠিক । তাহাতে সকল দিকই রক্ষা হইবে ।”

বৃদ্ধ দয়্যারামের সহিত এ বিষয়ে ভবানীর অনেক পরামর্শ হইল । দয়্যারামও রাণীর মতে মত দিলেন । অনেক অমুসন্ধানে ভবানীর পছন্দ সহি একটি সৎশ্রদ্ধাত ব্রাহ্মণ-সন্তান মিলিল । এই বালকের নাম রামকৃষ্ণ ।

ভবানী, রামকৃষ্ণকে যথাশাস্ত্র দত্তকপুত্র গ্রহণ করিলেন । রামকৃষ্ণ বয়ঃপ্রাপ্ত হইলে, ব্রহ্মচারিণী রাণী, তাঁহাকেই রাজ্য-ভার অর্পণ করিয়া, বিষয়-কার্যের সহিত নিঃসম্পর্ক হইয়া, শেষ-জীবন পর্য্যন্ত গঙ্গাবাসিনী হইয়াছিলেন । কিন্তু রামকৃষ্ণও ধার্মিকের সন্তান ;—বিশেষ রাণী ভবানীর স্বর্গীয় আদর্শ সম্মুখে পাইয়া তিনি যৌবনেই সংসারে বীতরাগ হন । তাই ‘মহারাজাধিরাজ পৃথ্বিপতি রামকৃষ্ণ’ \* নাম অপেক্ষা, ‘রাজযোগী রামকৃষ্ণ’ নামই তাঁহার অধিক খাটে । পুণ্যবতী দীর্ঘায়ুস্বতী রাণী ভবানীর দেহাবসানের পূর্বেই, তিনি দেহত্যাগ করেন । কিন্তু এ সকল ঘটনার পূর্বে, ভবানীর পুণ্যচরিত্রের আরও কয়েকটি চিত্র আশ্রয়গকে অঙ্কিত করিতে হইবে ;—নহিলে তাঁহার দেবী ভবানী নামের সার্থকতা আমরা দেখাইতে পারিব না ।

কন্যার বৈধবা সংঘটন ও দত্তকপুত্র গ্রহণের অব্যবহিত পরেই, ভবানী গঙ্গাহীন নাটোর ত্যাগ করিতে বাধ্য হইলেন । যেখানে প্রসন্নসলিলা ভাগীরথী কুলু কুলু তানে প্রবাহিতা হইয়া জীবকে স্বর্গের শোভা দেখাইতেছেন,—সাধিকা, ব্রহ্মচার্য্য-ব্রত-পরায়ণা—অন্নপূর্ণারূপিণী রাণী,—বিধবা কন্যাকে লইয়া, সেইখানে প্রশান্ত মনে বাস করিতে লাগিলেন । মুর্শিদাবাদ জেলার

\* The Modern History of the Indian Chiefs, Rajas, Zaminders, &c. By Loke Nath Ghose.

অন্তর্গত—বর্তমান আজিমগঞ্জের সন্নিকট—বড়নগর গ্রামের কথাই আমরা উল্লেখ করিতেছি। দ্বিতীয় বারানসী তুল্য এই পবিত্র স্থান এক্ষণে জঙ্গলে পরিণত হইতেছে। নাটোর গঙ্গাহীন স্থান বলিয়াও বটে,—আর মুর্শিদাবাদ—নবাব-বাটীর খুব নিকট হয় বলিয়াও বটে,—এই বড়নগরে নাটোর-রাজপরিবার—তঁাহাদের সৌভাগ্য সূচনার সম-সময়ে এক প্রাসাদ নির্মাণ করেন। আজিও লোকে তাহাকে ‘বড়নগর রাজবাটা’ বলিয়া উল্লেখ করিয়া থাকে। স্থানটি অতি রমণীয়। ভবানীর দত্তকপুত্র সাধকশ্রেষ্ঠ রামকৃষ্ণ এই রমণীয় স্থানেই চির-সমাধি লাভ করেন।





## পঞ্চম পরিচ্ছেদ ।

প্রসন্নসলিলা ভাগীরথী,—পুণ্যবতী মা আমার,—কুলু  
কুলু তানে আপন মনে চলিয়াছেন। জীবের  
নিস্তারের জন্তে মায়ের এ দ্রবয়ী মূর্তিতে মর্ত্যে আগমন।  
মা পতিতপাবনী ; তাই দিন নাই—রাত নাই,—বড় দুঃখী  
জীবকে আপন তীরে আসিয়া জুড়াইতে ডাকিতেছেন। মায়ের  
সে প্রসন্নমূর্তি দেখিলে প্রকৃতই পুণ্য হয়। যাকে চোখে দেখিলে  
পুণ্য, তাঁর স্পর্শে যে মুক্তি, তার আর কথা কি ? হিন্দুপুরাণে  
তাই গঙ্গার এত মাহাত্ম্য ; আস্থাবান্ আনুষ্ঠানিক হিন্দু—তাই  
গঙ্গাকে পতিতপাবনী পরমেশ্বরী বলিয়া স্তব করেন।

বড়নগরে, ভবানী যেখানে গিয়া বাস করিলেন, সে স্থানের  
গঙ্গার দৃশ্যটি, তখন অতি মনোহর ছিল। গঙ্গা অতি বিস্তৃত,  
শ্রোতপূর্ণ। কাক-চক্ষের ত্রায় নিশ্চল জল ঢল-ঢল করিতেছে।  
উভয় তীরে ঘন বৃক্ষশ্রেণী ; একটু দূরে নিবিড় জঙ্গল। পবিত্র,  
প্রশান্ত, নির্জন সে স্থান। সাধনার পুণ্যভূমি বটে।

নিজ গঙ্গার গর্ভ হইতে বড়নগরের রাজবাটীর ভিত্তি  
উত্থিত হইয়াছে। স্থানে স্থানে সুদৃশ্য বাঁধা-ঘাট। চারিদিকে

মন্দির ও দেবালয় । পুণ্যভূমি বারাণসীর পুণ্য-অদর্শে, দেবালয় গুলি গঠিত ও তাহাতে নানা দেব দেবীর পুণ্যমূর্তি প্রতিষ্ঠিত । প্রাতঃসন্ধ্যায় শঙ্খ-ঘণ্টা-কাসর-নির্নাদে ও বেদমন্ত্র উচ্চারণে দিক্ পুলকিত ও মুখারত হয় । নগরের প্রান্তদেশে সন্ন্যাসী, সাধু ও মহাস্তুগণের মঠ, ধর্মশালা ও আখড়া । সে সমুদয়ের যাবতীয় ব্যয় ভবানী দিয়া থাকেন । সাধনার উৎকৃষ্ট স্থান বলিয়া, পুণ্যবতী ভবানীর পুণ্য-আকর্ষণে, সেই গঙ্গাময় স্থানে দেশ দেশান্তর হইতে অতিথি, ভিক্ষু ও বানপ্রস্থাবলম্বী ব্রহ্মচারিগণ মধ্যে মধ্যে আসিয়া থাকেন,—এবং গঙ্গামানে, দেবদেবীদর্শনে, ও ভজনসাধনে আপন আপন ধর্মপ্রবৃত্তি পরিতৃপ্ত করিয়া ধন্য হন ।

প্রকৃতির এই শান্ত, স্নিগ্ধ, পবিত্র স্থানে, ভক্তিমতী ভবানী জন্ম-জন্মার্জিত ভক্তিরশি লইয়া, প্রাণ ভরিয়া, নিত্য নিরুজ্জনে, শিবপূজা, গঙ্গামান ও সাধুদর্শন করিতে লাগিলেন । তাহাতে তিনিও ধন্যা হইলেন, বাল-বিধবা কন্যা তারাকেও প্রকৃত ভক্তিমতী করিতে পারিলেন । তারা, জননীর আদর্শে, ব্রহ্মচর্যব্রতপরায়ণা হইয়া, সর্বপ্রকার ভোগসুখে জলাঞ্জলি দিয়া, ক্রমেই সাধনপথে অগ্রসর হইতে লাগিল,—সে-ও মাতার পবিত্র মন্ত্রে দীক্ষিতা হইয়া দেবপূজায় ও ধ্যান-ধারণায় জীবন সফল করিতে সমর্থ হইল । এই বড়নগরে, তারারও ৩ গোপালজীউর মন্দির প্রভৃতি অনেকগুলি দেবালয় সংস্থাপিত হইয়াছিল । ফলতঃ, মাতা-কন্যায় এই স্থানে কিছুকাল পরম শান্তিতে জীবন অতিবাহিত করিতে লাগিলেন ।

দেবী ভবানী, এখানে প্রকৃত দেবীজনোচিত পুণ্যস্থানে



জীবন যাপন করিয়া চলিলেন । ব্রহ্মচর্যের যতগুলি কঠিন নিয়ম, হিন্দুবিধবার যতগুলি শাস্ত্রনির্দিষ্ট কার্য্য,—সে সকলই তিনি আশ্চর্য্য মানসিক বলে সম্পন্ন করিয়া যাইতে লাগিলেন । রাণী প্রতিদিন রাত্রি চারিদণ্ড থাকিতে গাত্রোথান করেন । শয্যা হইতে উঠিয়াই, কিছুক্ষণ নিবিষ্টমনে জপ করেন । পরে সম্বন্ধ-সংস্থাপিত পুষ্প-বাটিকায় প্রবেশ করিয়া স্বহস্তে পুষ্পচয়ন কার্য্যে প্রবৃত্ত হন । তখনও রীতিমত অন্ধকার থাকায়, সম্মুখে ও পশ্চাতে দুইজন ভৃত্য মশালের আলোকে তাঁহাকে পথ দেখাইয়া লইয়া যায়,—তিনি সাজি ভরিয়া পুষ্পচয়ন করেন । দেবপূজার ফুল—নিজে পূজা করিবেন,—তাই তিনি নিজেই পবিত্র মনে পুষ্পচয়ন করেন,—লোকজনের উপর এ ভার অর্পণ করা উচিত মনে করেন না । পুষ্পচয়ন কার্য্য শেষ হইলে, শুদ্ধ অন্তরে রুক্ষদেহে গঙ্গান্নান । স্নানান্তে আর্দ্রবস্ত্রে অন্যান আড়াই দণ্ডকাল সেই ঘাটে বসিয়া ইষ্টমন্ত্র জপ ; পরে সেই গঙ্গাজলে দাঁড়াইয়া গঙ্গাপূজা—সে দৃশ্য দেখিলে মনে হয় না যে, কোন মানবী জলে দাঁড়াইয়া আছে,—যেন সাক্ষাৎ রুদ্রাণী করযোড়ে কাহার পূজা করিতেছেন ! তৎপরে পটবস্ত্র পরিধান পূর্ব্বক দেবালয়সমূহে গমন ও প্রত্যেক দেবদেবী দর্শন পূর্ব্বক ভক্তিভরে প্রণাম ও পুষ্পাঞ্জলি দান ; তৎপরে নিবিষ্টমনে শিবপূজা । এ সময় রাণীর বাহুজ্ঞান এককালে বিলুপ্ত হয় ; তাঁহার আত্মা যেন তাঁহার দেহ ছাড়িয়া কোথায় চলিয়া যায় । পূজান্তে, সমাগত সাধু-সন্ন্যাসী সন্দর্শন । প্রতিদিন দুই একটি প্রকৃত সাধু-সন্ন্যাসী, যেন সে সময় কোথা হইতে আসিবেনই আসিবেন । সাধু-সন্দর্শন কার্য্য সমাধা হইলে, গৃহে আসিয়া নির্ঠাবান্ ব্রাহ্মণের

যুধে পুরাণ শ্রবণ। পুরাণশ্রবণান্তে, আপন কণ্ঠ্যকে ও আশ্রিতা পুরনারীগণকে নানারূপ সহপদেশ দান; তৎপরে সেই যথানিয়মে স্বহস্তে দ্বাদশটি ব্রাহ্মণকে খাওয়াইয়া, বেলা আড়াই প্রহর গতে সেই একাহার—হবিষ্যন্ন গ্রহণ। তার পর একটু বিশ্রাম অন্তেই, বৈকাল হইতে অপরাহ্ন পর্য্যন্ত পুনরায় নিবিষ্ট মনে পুরাণপাঠ,—শ্রবণ ও উত্তমরূপে তাহার তাৎপর্য্য গ্রহণ। অতঃপর সন্ধ্যা হইবামাত্রই গঙ্গাদর্শন; স্বহস্তে গঙ্গাকে স্নাত-প্রদীপ প্রদর্শন; তার পর সন্ধ্যাবন্দনাদি কার্য্য সমাধান; পরে চারি পাঁচ দণ্ডকাল মালা জপ। এই সকল কার্য্য সুসম্পন্ন হইবার পর, তারাকে আপন কাছে ডাকিয়া নানারূপ সহপদেশ দান; তারারও জননীসহিত ধর্ম্মবিষয়ে বিবিধ প্রশ্ন; তৎপরে আশ্রিতা পুরস্ত্রীগণের তত্ত্বাবধারণ—কে কোথায় কি ভাবে আছে ও কি করিতেছে, তাহা দেখিয়া, রাত্রি দেড়প্রহরের পর শয়ন। আবার সেই রাত্রি চারিদণ্ড থাকিতে যথানিয়মে উত্থান।—প্রতিদিন এই ভাবে রাণীর দিন কাটিত। শীত, গ্রীষ্ম, বর্ষা,—বার মাস—সকল ঋতুতেই প্রতিদিন যথাভাবে তিনি এই নিয়ম প্রতিপালন করিতেন। ইহাতে এতটুকু আলস্য বা বিরক্তির ভাব ছিল না;—পরস্তু প্রকৃত উৎসাহ ও আনন্দের ভাব তাহাতে পরিদৃষ্ট হইত। অপিচ ইহাতে রাণীর স্বাস্থ্য এত ভাল থাকিত যে, এক দিনের জন্মও কেহ তাঁহাকে অসুস্থাবস্থায় দেখিতে পায় নাই। তাঁহার এই অদ্ভুত ব্রহ্মচর্য্য দেখিয়া,—ধর্ম্মময় জীবনের এই কঠোর সংযম দেখিয়া, তাঁহার আশ্রিতা পুরস্ত্রী,—এমন কি পরিচারিকাগণ পর্য্যন্ত, সদাচারসম্পন্ন ও সদমুষ্ঠানরতা হইল;—তারার ত কথাই নাই।

গঙ্গানানের মাহাত্ম্য,—ভবানী প্রকৃতই অন্তরের অন্তরে উপলব্ধি করিয়াছিলেন । তাই তিনি এই নিয়ম করিয়া দিয়া-ছিলেন যে, তাঁহার এই বড়নগর অধিকারস্থ প্রত্যেক ব্রাহ্মণ ও উপবীতধারী ব্রাহ্মণকুমারকে প্রতিদিন প্রাতঃস্নান করিতে হইবে । প্রাতঃস্নানের পর নিয়মিতরূপে সন্ধ্যাহিক ক্রিয়া সমাপন ও তাহার চিত্তস্বরূপ উর্দ্ধপুণ্ড্র ও রাখিতে হইবে । এ নিয়মের কোনরূপ ব্যতিক্রম ঘটিলে, শাস্তিস্বরূপ, ভবানী সেই ব্রাহ্মণ ও ব্রাহ্মণকুমারকে গঙ্গাপার করিয়া দিতেন ; তাঁহাদের বৃত্ত্যাদি সব বন্ধ হইয়া যাইত । ফলতঃ, সদাচারের প্রতি রাণীর এমনি প্রখরদৃষ্টি ছিল । তিনি সার বুদ্ধিয়াছিলেন, হিন্দুর পক্ষে, সর্বপ্রথম আচার-রক্ষা, তার পর অন্য ধর্মকর্ম ।— আচার-রক্ষা না হইলে, সমস্ত ধর্মকর্মই ভাসিয়া যায় । তাই দেবী ভবানী আত্মজীবনে সদাচারের জলন্ত দৃষ্টান্ত দেখাইতেন এবং তাঁহার পারিপার্শ্বিক সকলকেই সেই পুণ্যমন্ত্রে দীক্ষিত করিতেন । ফলতঃ, এই বড়নগর, রাণীর সর্ববিধ ধর্মকর্মের অতি উচ্চতম স্থান । এই স্থান হইতেই তাঁহার নাম ও কীর্তি-কথা ভারতের সর্বত্র প্রচারিত হয় । এ হেন জননী নিকট, তারা—ধর্ম ও নীতিশিক্ষা পাইল ; সুতরাং তাহার জীবনও ধন্য হইল । ফলতঃ তারাও অল্লাধিক পরিমাণে, মাতৃপদাক অনুসরণ করিতে সক্ষম হইলেন ।

বালিকা ক্রমে যুবতী হইলেন । তারার দেহে• রূপ আর ধরে না । উৎকট ব্রহ্মচর্য্য-ব্রতেও রূপের শিখা নিভে না । বরং সে শিখা আরও বর্ধিত হয় । সংযম ও সাধনায়, দেহের লাবণ্য ক্রমেই বাড়িতে থাকে । সে লাবণ্যে তখন

যেন এক স্বর্গীয় আভা বিকসিত হয় । বস্তুতঃ পুণ্যপ্রবৃত্তি ও স্মৃতিস্তার অনুশীলনে, মুখেও কেমন একটা পবিত্রতার ছাপ পড়ে । রূপের প্রতিমা, সৌন্দর্যের পূর্ণ প্রতিকৃতি তারার মুখেও এইরূপ একটা পবিত্রতার ছাপ পড়িয়াছে । তারার সে মাধুর্য-ময়ী মূর্তি দেখিলে, সাক্ষাৎ দশমহাবিচার সেই ভৈরবী মূর্তি মনে পড়ে । দেহের এই অতুল্য রূপ, মনের ঐ পুণ্যপ্রবৃত্তি,—বস্তুতঃ মাতার গায় তারারও ভিতর বাহির সুন্দর ।

কিন্তু হায় ! এ হেন সৌন্দর্যেরও শত্রু আছে ! এ স্বর্গীয়-শোভা কলঙ্কমলিন করিতেও লোকের প্রবৃত্তি হয় ! ধাতার সৃষ্টিরহস্য ও বিধান কিছুই বুঝি না,—তাই মনে হয়, দেবতা ও দানব—দুই পাশাপাশি থাকিয়া, প্রতিনিয়তই যেন যুদ্ধ করিয়া যাইতেছে ! এ সংগ্রামের অবসান যে কবে হইবে,—আদৌ হইবে কি না, তাহা সেই সর্কনিয়ন্তাই জানেন !

তারার এই অনিন্দ্যসুন্দর রূপেরও শত্রু হইল । সে শত্রু সামান্য শত্রু নয়,—সে শত্রু বড় প্রবল । ভাবী বঙ্গ-বিহার-উড়িষ্যার নবাব—কলঙ্কময় জীবন—পাপিষ্ঠ সিরাজউদৌলা—তারার রূপের শত্রু হইল । সে পাপিষ্ঠ একদিন কথা-প্রসঙ্গে, অশুচর-মুখে, ভবানী-দুহিতার অলৌকিক রূপ-লাবণ্যের পরিচয় পাইল । কাণ্ডজ্ঞানবিবর্জিত পিণ্ডার নাকি এ বিষয়ে দিগ্বিদিক্ বোধ ছিল না,—তাই সেই ভারতবিখ্যাতা, দেবীসমা পূজনীয়া, দ্বিতীয় অন্নপূর্ণার বিধবা কণ্ঠা হরণের কল্পনা করিতেও তাহার হৃদয় কম্পিত হইল না । কল্পনা শেষে কিপ্রকারিতার পথে অগ্রসর হইল । পাপিষ্ঠ কয়েকজন সৈনিক পাঠাইয়া, তারাকে বলপূর্বক হরণ করিয়া আনিতে অহুমতি

দিল । কিন্তু সিংহীর গহ্বরে প্রবেশ, শৃগালের পক্ষে অসাধ্য হইল ।  
দৈব যাহার সহায়, মানুষ তাহার কি করিবে ? হউক না সে  
নবাব-দৌহিত্র বা রাজ্যেশ্বর সম্রাট ? দৈবের নিকট সে কতটুকু ?  
বলা বাহুল্য, পাপিষ্ঠের সে পাপবাসনা পূর্ণ হইল না,—দৈবের  
নিকট,—দৈবভাবময় কার্যের নিকট,—সে পরাভব মানিল ।

যাহা হউক, কথাটা গিয়া ভবানীর কানে উঠিল । তখন,  
অকস্মাৎ ভীষণ ব্যাঘ্র সম্মুখে দেখিলে, নিঃসহায় পথিকের মনে  
যে ভাবের উদয় হয়,—পাপকথা কর্ণগোচর হইবামাত্র, ভবানী  
সেইরূপ ভীতা ও বিচলিতা হইয়া পড়িলেন । যুদ্ধের জ্ঞ  
তাঁহার সাহস, চিত্তের দৃঢ়তা ও ধর্মপ্রাণতা কোথায় চলিয়া গেল,  
—তিনি ধর ধর কাঁপিতে লাগিলেন । সেই কল্পিত দেহে,  
হৃদয়ের পরিপূর্ণ আকুলতায় তিনি ডাকিতে লাগিলেন,—  
“কোথায় তুমি অগতির গতি, বিপদভঞ্জন মধুহৃদন ! এ বিপদে  
ত্রাণ কর দয়াময় ! তুমিই সেই পাপ কোরব-সভায় দ্রৌপদীর  
লজ্জারক্ষা করিয়াছিলে,—আজি আমার দুর্ভাগ্যবতী কণ্ঠারও  
লজ্জা রাখ—লজ্জানিবারণ !—হে মা ন্মুণ্ডমালিনী, ভীমা, ভৈরবী  
রুদ্রেখরি ! এ সময় তুমি হৃদয়ে পূর্ণরূপে আবিভূতা হও,—  
আমায় বল দাও,—আমি নিজেই এই মহাশত্রু নাশ করি,—  
তারার ধর্মরক্ষা করিয়া নিষ্কণ্টক হই !—হায়, এই মহাপাপই  
একদিন বঙ্গের সিংহাসন অধিকার করিবে ? ওহো, ধর্ম !”

প্রার্থনায় বৃকে বল আসিল ।—আর্য্যরমণী সিংহবাহিনী  
মূর্ত্তিতে গর্জিয়া উঠিলেন ।—সতীর সেই করুণাপূর্ণ নয়ন ধক্ ধক্  
জ্বলিতে লাগিল । সম্মুখে পাইলেই, যেন তিনি সেই মহাপাপিষ্ঠকে  
তন্মুহূর্ত্তেই, কটাক্ষে ভস্মীভূত করিয়া ফেলেন !

ধর্মই ধর্মকে রক্ষা করেন । রাণীর আশ্রিত বহু বহু কোপীন-ধারী মহাস্ত ও সাধু, বড়নগরে বাস করিতেন । তাহারা এ পাপ-কথা শুনিবামাত্র, কর্ণে অঙ্গুলি দিয়া ‘রাম রাম’ শব্দ করিলেন, এবং তক্ষণাৎ কোপ-প্রজ্বলিত হৃদয়ে হুকুম দিয়া উঠিয়া, উচ্চকণ্ঠে ভবানীর নাম লইয়া, একরূপ নিঃসম্বলেই, সিরাজ-সৈন্যের উপর ঝাঁপাইয়া পড়িলেন । তার পর সতী-মাহাত্ম্যে ও দৈবপ্রভাবে, একরূপ বিনা আয়াসেই, তাহাদিগকে বিতাড়িত করিয়া দিতে সক্ষম হইলেন । সৈন্যগণ বলপ্রকাশ করিলে কি,—সহসা যেন তাহারা দাবানলে পড়িয়া,কোনওরূপে প্রাণ লইয়া পলায়নের পথ দেখিতে লাগিল । তাহারা যেন প্রত্যক্ষ দেখিতে পাইল,—মহা-দেবপ্রভা, ঘোরা, নৃগুণমাণিনী শ্রামামূর্তি,—একখানি সচোরক্ক-রঞ্জিত খড়া লইয়া, শূন্যে, তাহাদের মস্তকোপরি ঘুরিয়া বেড়াই-তেছেন এবং যেন কি মোহমন্ত্রে, তাহাদিগকে একেবারে আচ্ছন্ন করিয়া ফেলিতেছেন ! পুনঃ পুনঃ এই ভাব দেখিয়া, সৈন্যগণ ভয়ে পলাইল,—সাধু-মহাস্তগণ তখন জয়নাদ ছাড়িতে ছাড়িতে ভবানীকে এ সংবাদ দিলেন ।

প্রার্থনার ফল ফলিয়াছে বুঝিয়া, ভবানী ও তখন ঘোর ঘটায় কপালিনীকে পূজা দিলেন এবং মায়ের সেই মহাপ্রসাদ, পরম পবিত্রহৃদয়ে, সেই শত শত মহাস্ত-সাধুগণ মধ্যে বিতরণ করিয়া ধন্য হইলেন ।

প্রধান মহাস্ত তখন আর এক সূচ্যবস্থা করিলেন । মহাপাপ সিরাজের পাপেচ্ছা সমূলে বিনষ্ট করিতে এবং পলায়িত সৈন্য-গণকে সম্পূর্ণ নিরাশ্রয় করিতে, তিনি এক অভূতপূর্ব উপায় উদ্ভাবন করিলেন । কয়েকজন বিশ্বস্ত অনুচর দ্বারা, অবিলম্বে

সর্বত্র, ভবানী-দুহিতা তারার মৃত্যু সংবাদ রটনা করিয়া দিয়া, তিনি পথ এককালে নিষ্কণ্টক করিতে যত্ববান হইলেন । পাপিষ্ঠ-গণ আর না আসিয়া সে শান্তিধামের শান্তি-সুখ নষ্ট করিতে পারে,—তজ্জন্যই তিনি এই প্রকৃষ্ট কৌশল অবলম্বন করিলেন । শুধু তারার মৃত্যুসংবাদ রটনা করিয়াই তিনি কান্ত হইলেন না,—নিকটস্থ অধিবাসিবর্গের সম্যক্ বিশ্বাস উৎপাদন জন্য, তিনি সেই রাতে, বড়নগরের গঙ্গাতীরস্থ শ্মশানে, এক মহা অগ্নিক্রিয়া সমাধান করিলেন । রাশি রাশি কাষ্ঠ ও সুরভিত ঘৃত-চন্দন সংযোগে চিতাগ্নি প্রস্তুত করিয়া, তিনি দলে দলে হরিনাম সঙ্কীৰ্তনের ব্যবস্থা করিলেন । নিশীথ কাল,—চিতার আগুন ধূ-ধূ জ্বলিতেছে,—তৎসহ খোল করতাল-সংযোগে গগনভেদী হরিশ্বনি হইতেছে,—লোক-সাধারণ ভীতি-বৈরাগ্য-পূর্ণ অন্তরে শুনিল,—ভীষণ বিস্মচিকা রোগে, ভবানী-দুহিতা তারা, ইহলোক ত্যাগ করিয়াছেন ! চারিদিকে হায় হায় রব উঠিল,—ভবানী-ভক্ত অধিবাসিবৃন্দের মধ্যে হাহাকার পড়িয়া গেল,—অবিলম্বে তারার মৃত্যু-সংবাদ সর্বত্র রাষ্ট্র হইল । পলায়িত সিরাজ-সৈন্য-গণ ছদ্মবেশে গ্রামের আস-পাশেই লুকায়িত ছিল ; সুবিধামত আবার একদিন আসিয়া সহসা রাজপুরী আক্রমণ করিবে ভাবিয়া ওৎ পাতিয়া বসিয়াছিল ;—আজি লোকযুধে ভবানী-দুহিতার মৃত্যুসংবাদ শুনিয়া, তাহারা স্বয়ং স্বচক্ষে সেই চিতাগ্নি দেখিয়া আসিল, ও অস্তেষ্টিক্রিয়ার সেই কল্যাণকর সঙ্কীৰ্তনও শুনিয়া গেল,—সুতরাং এ সম্বন্ধে তাহাদের আর বিন্দুমাত্রও সন্দেহ রহিল না ;—তাহারা নিশ্চিন্ত মনে রাজধানীতে প্রত্যাবৃত্ত হইয়া, পিশাচ-প্রভুকে এ সংবাদ জ্ঞাপন করিল । বলা বাহুল্য, সেই প্রধান



মহাস্ত-মহারাজও, কোণলপূর্বক ইতঃপূর্বেই সিরাজের নিকট এ সংবাদ পাঠাইয়াছিলেন । তার পর সিরাজের বিশ্বস্ত অনুচর ও সৈন্যগণ স্মিয়াও তাহাই বলিল ;—আরও অনেকের নিকট পাপিষ্ঠ এ সংবাদ পাইল ;—তখন অগত্যা মহাপাপীর উদ্দাম লালসা মন্দীভূত হইয়া গেল ।

যাহা হউক, ‘আপাতত কিছুদিনের জন্য বড়নগর ত্যাগ করা শ্রেয়ঃ’ বিবেচনায়, ব্রহ্মচারিণী দেবী, কন্যাকে লইয়া নাটোর যাত্রা করিলেন । নৌকায় উঠিবার সময় মনে মনে বলিলেন,—

“হায় মা পতিতপাবনি, গঙ্গে ! তোমার পুণ্যতীরে বাস, কি এ পোড়া অদৃষ্টে আর সহিল না ? যদি মা এখানে লইয়া আস, ত আবার আসিব,—নহিলে এই শেষ । না, এ সময় রাজধানীর এত নিকটে থাকটা কিছু নয় ।—কোন কাজের অহঙ্কার করিতে নাই ।”

তার মনে মনে বলিল,—“হায় রূপ ! কবে এ রূপ ছাই হইবে ? কবে ইহা মাটিতে মিশিবে ?”







## ষষ্ঠ পরিচ্ছেদ ।

কিন্তু নাটোরে আর দেবী ভবানীর মন বসিল না ; অন্ন-  
দিন সেখানে থাকিয়াই তিনি তীর্থযাত্রা করিলেন ।

সকল তীর্থের সার গাৱাণসী । সেই বাৱাণসী ধামে, আনন্দ-  
কাননে, ভবানী যাত্রা করিলেন । ‘অর্দ্ধবজ্জেশ্বরী’ অতুলনীয়-  
দানশীলা রমণী যে ভাবে যাত্রা করেন, সেই ভাবে করিলেন ।  
অন্নপূর্ণা-বিশ্বেশ্বরের রাজ্যে, সেই মহা আনন্দধামে—যেখানে  
জীব মরিলে শিবত্ব প্রাপ্ত হয়,—তাহাকে আর জন্মপরিগ্রহ  
করিতে হয় না,—সেই পরম পুণ্যতীর্থে যাত্রা করিলেন । অন্যান  
সতের শত নৌকা নানারূপ দ্রব্য-সম্ভারে পরিপূর্ণ হইয়া, রাণীর  
সহিত গেল । অনেক লোক-নম্বর, অমাত্য-কর্মচারী, ও তীর্থদর্শনা-  
ভিগ্নাধী স্ত্রী-পুরুষ ভবানীর সমভিব্যাহারী হইল । সেই অর্দ্ধচন্দ্রা-  
কৃতি—গঙ্গাগর্ভ-সমুখিতা—মর্ত্যের কৈলাসপুরী—পরম পুণ্যস্থি,  
—দ্বিতীয়া অন্নপূর্ণাকে পাইয়া, যেন আনন্দে নৃত্য করিতে  
লাগিল । দেশ দেশান্তর হইতে অনেক কোটিপতি রাজা, মহা-  
রাজা, জমীদার, ব্যবসায়ী প্রভৃতি আসিয়া, কাশীধামে নানাবিধ

পুণ্যকর্মের অনুষ্ঠান করিয়া থাকেন বটে, কিন্তু দেবী ভবানীর আগমন যেন প্রকৃতই একটু বিশ্বয়কর।—তাঁহার জিয়া-কর্ম বিশ্বয়কর, দান ধ্যান বিশ্বয়কর, অন্নদান ও জলদান আরও বিশ্বয়কর। অভূতপূর্ব নিয়মে, অন্নদানে ও জলদানে, তিনি অক্ষয় পুণ্য সঞ্চয় করিলেন। সকলেই যুক্তকণ্ঠে তাঁহাকে জননী-অন্ন-পূর্ণা নামে অভিহিত করিল।

যে দিন তিনি কাশীতে প্রথম বাহির হইলেন,—যেদিন পঞ্চকোণী কাশী তিনি প্রদক্ষিণ করিলেন, সেদিন জানিতে পারিলেন, এই ‘এরঙ পত্রাকৃতি’ কাশীর ঠিক সীমা নির্দেশ নাই। তিনি আরও দেখিলেন, দেশদেশান্তরের বিস্তর যাত্রী, বাসস্থানের অভাবে বড় কষ্ট পায়। একটু দেখিয়াই দয়াবতী রাণী বুঝিতে পারিলেন, সহস্র সহস্র পথশ্রান্ত পথিক; ভারবাহী শ্রমজীবী, নিত্য-আগত নিরাশ্রয় স্ত্রীপুরুষ—বৃদ্ধ, রুগ্ন, অনাথ, আতুর—আশ্রয়ভ্রাবে, মাথা ফেলিয়া একটু থাকিবার অভাবে, বড় অসুবিধা ভোগ করে। তথায় অগ্ণা অগ্ণা রাজা বা জমিদারদিগের যে সকল ধর্মশালা বা পাণ্ডুভবন ছিল, তাহা পর্য্যাপ্ত নহে,—নির্দিষ্ট সংখ্যক অতিথি, ভিক্ষু ও সাধু-সন্ন্যাসীতেই তাহা পূর্ণ হইয়া যায়,—আপামর সাধারণের জন্ম—সর্বত্যাগী সন্ন্যাসী হইতে দরিদ্র সংসারী পর্য্যন্ত—সর্বশ্রেণীর লোক সমান ভাবে থাকিতে পায়, এমন আশ্রয় বা অতিথিশালা তথায় নাই। পর-হুঃখকাতরা, দীন-জননী ভবানী, একে একে, কাশীর সেই সকল অভাব মোচনে প্রবৃত্ত হইলেন।

প্রথমতঃ তিনি পঞ্চকোণী কাশীর সীমানির্দেশের সহিত, একটু অভিনব পন্থায়, পথশ্রান্ত পথিক ও ভারবাহিগণের শ্রম লাঘবের

জন্য একটি সুন্দর উপায় করিয়া দিলেন । তাহা এইরূপ ;—  
 “কাশীর চতুর্দিকে পঞ্চক্রোশ ব্যাপিয়া, কিঞ্চিৎ কিঞ্চিৎ ব্যবধানে,  
 এক একটি ‘ধর্মটোকা’ নির্মাণ করিয়া দিয়াছিলেন । অর্থাৎ ঐ  
 ঐ স্থানে এক এক পিলুপা, এক এক বৃক্ষ ও এক এক কূপ খনন  
 করিয়া দিয়াছিলেন । পথশ্রান্ত লোক, বা যাহারা আপন মস্তকে  
 দ্রব্যাদি বহন করে তাহারা, শ্রান্ত বা পিপাসায়ুক্ত হইলে, বিনা-  
 সাহায্যে, ঢোকায় উপর মোট বা দ্রব্যাদি রাখিয়া, বৃক্ষমূলে  
 বসিয়া বিশ্রাম এবং জলপানাদি করিত ; পরে ঢোকায় উপর  
 হইতে অক্লেশে মোট আপন মস্তকে লইয়া পুনর্বার গমন  
 করিত । মোট নামাইয়া বা তুলিয়া দিতে কাহারও সহায়তার  
 আবশ্যক হইত না । ঐসকল ধর্মটোকা অদ্যপি ( স্থানে স্থানে )  
 বর্তমান আছে । ইহা ভিন্ন ঐ পঞ্চক্রোশের মধ্যে এক এক  
 ক্রোশ অন্তরে এক এক পুষ্করিণী, ও স্থানে স্থানে তড়াগ, বাপী ও  
 কূপ খনন করা ছিল । সেই সকল স্থানে পথিক লোক বিশ্রা-  
 মাদি করিত এবং তাহাদের রক্তনের জন্য প্রস্তুত খোদিত আধা,  
 বাটী, জলপাত্র, তণ্ডুলাদি, ও ফল মূল সঞ্চিত থাকিত । স্থানে  
 স্থানে পথিকেরা, সচ্ছন্দে আহার ও বিশ্রাম করিত ।” \*

প্রকৃত পরব্যথাবোধ না থাকিলে, — দয়ার শরীর না হইলে,  
 কি কেহ এমন কাজ করিতে পারে ?

দ্বিতীয়তঃ, তীর্থযাত্রীগণের স্নানের ও পূজার সুবিধার্থ, অসি  
 হইতে বরুণা পর্য্যন্ত—বিস্তর ষাণ্-বাঁধা ঘাট—ভবানী নির্মাণ

\* নবনারী । \* নীলমণি বসাক প্রণীত । বসাক মহাশয়ের গ্রন্থ হইতে,  
 ষাণী ভবানী সংক্রান্ত, কাশী ও গয়াধামের দুই চারিটি ঘটনা ও অন্য দুই  
 একটি সংবাদ সংগৃহীত হইয়াছে ।

করিয়া দিলেন। সে সকল ঘাট দিব্য প্রশস্ত—আজিও তাহা বর্তমান আছে।

তৃতীয়তঃ, আতিথ্য সংকার। ভবানীর আতিথ্যসংকার, কাশীতে প্রবাদের মত কথিত। এমন যত্ন, এমন সুবন্দোবস্ত, এমন আহারের পারিপাট্য,—আর কোন অতিথিশালায় ছিল না। ভবানীর আশ্রয়ে আতিথ্যগ্রহণ করিতে পারিলে, লোকে সহজে আর কোনও অতিথিশালায় যাইতে চাহিত না। এইরূপ অতিথিশালায় গায় অনেক গুলি অন্নসত্রও ছিল। কাশ্মীরী-ভিক্কারীগণ সেই সকল সত্রে অন্নজলগ্রহণে পরিতৃপ্ত হইয়া, দুই হাত ভুলিয়া উচ্চকণ্ঠে,—‘জয় মা ভবানী অন্নপূর্ণার জয়’ বলিয়া আনন্দধ্বনি করিত। এক আধটি নহে,—তিন তিন শত প্রকাণ্ড প্রকাণ্ড বাড়ী ভবানী নির্মাণ করিয়া দিয়াছিলেন। ঐ সকল বাড়ী সাধারণতঃ ধর্মশালা বলিয়া কথিত। দু’মাস, দু বছর বা দশ বছরের জন্ম নয়, যাহাতে চিরদিন,—রাণীর অবর্তমানেও ঐ সকল ধর্মশালা নিয়মিতরূপে চলে, ভবানী এমন পাকা বন্দোবস্ত করিয়া দিয়াছিলেন :—বুঝুন, তাহার ব্যয় কত! এই তিন তিন শত ধর্মশালায় প্রতিদিন কত লোক সেবা ও আশ্রয় পাইত, তাহাও ভাবিয়া দেখুন।

পুণ্যবতী দয়াময়ী ভবানীর সর্ববিষয়েই দৃষ্টি ছিল। যে সকল দরিদ্র বা ধর্মভীরু লোক, আপনাদের অন্নহীনতা বা ধর্মশীলতার জন্ম, শেষদশায় কাশীবাসের ইচ্ছা করিত, ভবানী সেই সকল লোককে সপরিবারে সম্বলে আশ্রয় দিতেন, এবং যাবজ্জীবন তাহাদের ভরণপোষণের যাবতীয় ব্যয় প্রসন্নমনে বহন করিতেন। অধিক কি, তাহাদের মৃত্যুর পর, তাহাদের অন্ত্যেষ্টিক্রিয়ার ব্যয়

হইতে শ্রদ্ধ-শাস্তির ধরচ পর্য্যন্ত, অকুণ্ঠিত ভাবে দিয়া থাকিতেন । পক্ষান্তরে, পথের পথিক আসিয়াও কাহারও অস্ত্যেষ্টিক্রিয়ার ব্যয় চাহিলে, বা তদনুরূপ কোন দায় জানাইলে, ভবানী অকাতরে তাহা দিতেন,—এক দিনের জন্মও এতটুকু বিরক্ত বা অসন্তুষ্ট হইতেন না,—বা কখন কোনরূপ কার্পণ্যও দেখাইতেন না ।

মুষ্টিভিক্ষা দিবার ব্যবস্থাও ভবানীর সুন্দর ছিল । কয়েকটি পাথরের চৌবাচ্ছাতে, প্রতিদিন আটমণ করিয়া ছোলা ভিজান হইত । যাহারা মুষ্টিভিক্ষা লইতে আসিত, তাহারা ভিক্ষার সহিত এই ভিজান-ছোলা ও একটু একটু গুড় পাইত । ভিক্ষার চা'ল কটি সঞ্চয় করিয়া রাখিত, আর এই ছোলা-গুড় জল খাইয়া তাহারা তৃষ্ণা নিবারণ করিত । তাহাদের তৃষ্ণানিবারণের সহিত ভবানীরও যেন ভব-তৃষ্ণা নিবারণ হইত !

তার পর দেবদেবী প্রতিষ্ঠা ও তাঁহাদের সেবা-ভোগ । এ পক্ষে ভক্তিমতী ভবানী, যেমনটি করিতে হয়, করিতেন ।—কাশীর নানাস্থানে, শত শত শিবলিঙ্গ ভবানীকর্তৃক প্রতিষ্ঠিত হইয়াছিল । ইহা ব্যতীত বিষ্ণেশ্বর, দণ্ডপাণি, দুর্গা, তারা, রাধা-কৃষ্ণ প্রভৃতি অনেক দেবদেবীর মূর্তি ইতস্ততঃ স্থাপিত হওয়ায় ৮ কাশীধামে ভবানীর নাম চিরস্মরণীয় হইয়া রহিল ।

ভবানীর নিজ-প্রতিষ্ঠিত দেবদেবীর যেমন নিত্য সেবা-ভোগ হইত, জননী-অন্নপূর্ণার মন্দিরেও ভবানীর সেইরূপ অদ্ভুত সেবা-ভোগের ব্যবস্থা ছিল । তথায় নিত্য পঁচিশমণ করিয়া তুলু বিতরণ হইত, এবং নানাবিধ সুস্বাদু অন্ন-ব্যাঞ্জে দণ্ডী, কুমারী, সধবা—প্রতিদিন ১০৮ জন ইচ্ছাভোজন করিয়া পরিভূক্ত হইতেন । ইহাদের ভোজনদক্ষিণা এক এক মুদ্রা করিয়া দেওয়া হইত । এই

সকল দেবদেবীর ভোগে, প্রতিদিন অন্যান্য চারি পাঁচ সহস্র লোক উত্তমরূপে ভোজন করিতে পারিত। সে ভোজনে ভবানী আত্মভোজন-সুখ অনুভব করিতেন। এই কাশীধামেও ভবানী পক্ষ্যাদি কীট-পতঙ্গের আহারদানের সুন্দর ব্যবস্থা করিয়াছিলেন। সে ব্যবস্থায় প্রচুর 'আত্মপ্রসাদ লাভ করিয়া তিনি ধন্য হইতেন।

একবার এক দিগ্বিজয়ী পণ্ডিত-সন্ন্যাসী, বর্ষাকালে, চাতুর্মাশ্য-মানসে, ৬ কাশীধামে উপনীত হন। সঙ্গে তাঁহার এক সহস্র শিষ্য ছিল। সেই সহস্র শিষ্যসহ, প্রথমতঃ তিনি এক পশ্চিম-দেশীয় ধনবান্ জমিদারের ধর্মশালায় গমন করেন। যে কারণেই হউক, সেই সন্ন্যাসী, সাধারণ হিসাবে সেবাগ্রহণ করিতে অসম্মত হইয়া, প্রতিশিষ্যের প্রতি এক টাকা হিসাবে, প্রতিদিন এক হাজার টাকা করিয়া খরচ চাহিলেন। এমনি চারিটি মাস সমভাবে দিতে হইবে বলিলেন। তাহা হইলে চারিমাসের খরচ দাঁড়াইল এক লক্ষ কুড়ি হাজার টাকা। ধনবান্ জমিদারের সাহসে বা প্রবৃত্তিতে তাহা কুলাইল না,— তিনি অসম্মতির ভাব জানাইলেন। সন্ন্যাসী হাসিয়া বলিলেন, “বুঝিলাম, এই কাশীধামে বসিয়া, অন্নপূর্ণা-বিশ্বেশ্বরের রাজ্যে আসিয়া, এই টাকাটা খরচ করে, এমন ভাগ্যবান্ কেহ নাই। তবে যাই,—কাশী ছাড়িয়া অন্য তীর্থ দেখি,—যদি কেহ এ নিয়মে সম্মত হন।”

কথাটা রাণী ভবানীর কর্ণগোচর হইল।—‘কাশী হইতে অভুক্ত দণ্ডী শিষ্যে ফিরিয়া যান’ শুনিয়া, তিনি তৎক্ষণাৎ এতটুকুও কালবিলম্ব বা ইতস্ততঃ না করিয়া, সাগ্রহে সেই

সন্ন্যাসীকে আপন আশ্রমে আনাইলেন, এবং পরম সমাদরে ও বিশেষ ভক্তিসহকারে, সেই সন্ন্যাসীরই অভিপ্রায়মত, প্রতিদিন হাজার টাকা হিসাবে ব্যয় দিতে লাগিলেন । দণ্ডী বুঝিলেন, টাকার মায়া ত্যাগ করিয়া, টাকাকে খোলার-কুচির-মত দেখিতে পারে, এমন লোকও কাশীতে আছে !

তার পর, সেই জমিদার যখন শুনিলেন, রাণী ভবানী, সেই সন্ন্যাসীকে সশিষ্যে আশ্রয় দিয়া, সন্ন্যাসীরই ইচ্ছামত, নিত্য নগদ টাকা গণিয়া দিতেছেন, তখন যেন তাঁহার চমক ভাঙ্গিল,—সন্ন্যাসীকে প্রত্যাখ্যান করাটা ভাল হয় নাই বুঝিলেন । অধিকন্তু সেই সঙ্গে এই অভিমান টুকুও আসিল যে,—“আমি এ অঞ্চলের একজন এত বড় ভূস্বামী ; আমাকে উঁচাইয়া বাঙ্গালা দেশের কে একজন ক্ষুদ্র রাণী না জমিদার, কাশীতে নাম লইয়া যাইবে?—না, তা হইবে না ।”—তখন সেই ধনবান্ ব্যক্তি, একটু ঈর্ষা ও প্রতিদ্বন্দিতার ভাবে, অথচ একটু ভক্তিপূর্ণ অন্তরে, কৌশলে, রাণীকে সেই টাকাটা দিয়া, সুস্থির হইতে মানস করিলেন । তিনি ভবানীকে মাতৃ-সম্বোধন করিয়া, একটি সিধা পাঠাইয়া দিলেন । সেই সিধার মধ্যে কতকগুলি মণি-যুক্তা-স্বর্ণ-যুদ্রা পুরিয়া, ভবানীর সেই এক লক্ষ কুড়িহাজার টাকাটা পূরণ করিয়া পাঠাইলেন । ভবানী অবশ্যই মাতৃসম্বোধনকারী জমিদারটিকে যথোচিত আশীর্বাদ করিলেন, কিন্তু সিধাটি ফেরৎ দিয়া বলিয়া পাঠাইলেন,—“কাশীতে বসিয়া আমি কাহারও দান গ্রহণ করিব না, মানস করিয়াছি ;—এমত অবস্থায় এ সিধাটি ফেরৎ পাঠাইতে বাধ্য হইলাম—এজন্য আপনি দুঃখিত হইবেন না ।” বুদ্ধিমতী ভবানী



বুঝিয়াছিলেন, এই সিধার মধ্যে নিশ্চয়ই ধন-রত্ন লুক্কায়িত আছে,—জমিদারটি সিধার অছিলায়, সশিষ্য সন্ন্যাসীর সেই চাতুর্য্যাত্মের ধরচটা তাঁহাকে পাঠাইয়া দিয়াছেন । বলা বাহুল্য, কৌতুহলী কৰ্মচারিবৃন্দ, রাণীর এই অনুমান, পরীক্ষাও করিয়াছিলেন । পরীক্ষায়, তাঁহাদের অনুমান মিলিয়াও গেল । অবশ্য, রাণীর ইচ্ছাক্রমে ইহা হইয়াছিল । \*

এইরূপ, কাশীতে ভবানী সম্বন্ধে যে কতরূপ প্রবাদ প্রচলিত আছে, তাহার সংখ্যা নাই । একবার রাজসাহী হইতে রাণীর,—  
৮ কাশীধামের ধরচ পঁছঁছিতে কিছু বিলম্ব হইয়াছিল । বৎসর বৎসর এক সহস্র করিয়া নৌকা নানাবিধ দ্রব্যসম্ভারে পূর্ণ হইয়া তাঁহার নিকট আসিত, সেই সঙ্গে নগদ টাকাও আসিত । এবার যথাসময়ে নৌকাগুলি আসিল, কিন্তু নগদ টাকা পঁছঁছিতে কিছু বিলম্ব হইল । কাশীর দৈনিক ধরচ,—যথানিয়মে যেরূপে হউক সম্পন্ন হওয়া চাই ;—এমত অবস্থায় ধরচ পঁছঁছিতে বিলম্ব হওয়ায়, ভবানী কিছু চিন্তিত হইলেন । সে সময় কাশীতে কেশবরাম নামে এক মহা ধনশালী বণিক বাস করিতেন । ভবানী সেই বণিকের নিকট, অতি অল্পদিনের জন্ত, এক লক্ষ টাকা ঋণ চাহিয়া পাঠাইলেন । বণিক, রাণীর লোককে উত্তর দিল,—“বাজালা দেশের রাজা বা রাণীদিগকে আমি জানি ; দুই দশ সহস্র টাকা বিষয়ের মুনাফা থাকিলেই লোকে ঐ সকল ব্যক্তিকে রাজা বা রাণী আখ্যা দেয় ।—না বাপু, আমা হইতে

\* একজন কাশীবাসী সূত্রাক্রমের নিকট এই ঘটনাটি শ্রুত হইয়াছিলাম  
—লেখক ।



এ টাকা ঋণ দেওয়া হইবে না ।—কে রাণী ভবানী, তাঁর আর কত, আমি এ সব কিছুই জানি না । সুতরাং অত টাকা আমি ধার দিতে পারিব না ।” বলা বাহুল্য, বণিক সাধ করিয়া টাকা সাজিল,—সুদ-খোর সুদের সবিশেষ বন্দোবস্ত ও বিশেষ বাধা-বাধি না করিয়া, সুধু-হাতে টাকা দিতে রাজী হইল না,—সেইটিই হইল আসল কথা ।

ভবানী ইহা শুনিলেন, কিছুমাত্র অসন্তুষ্ট বা মনঃক্ষুব্ধ হইলেন না ;—বিশেষের ইচ্ছায় সেইদিনই সন্ধ্যার পর, শান্তি-পাহারা-লোকজনসহ, তাঁহার জমিদারী হইতে নগদ পাঁচ লক্ষ টাকা আসিয়া পঁহুছিল । নৌকার পথ,—নৌকা পঁহুছিতে দিনকয়েক বিলম্ব হইয়াছিল ।

এদিকে, সেইদিন রাত্রে, সেই অতি-হিসাবী সুদখোর বণিক স্বপ্ন দেখিল, যেন জননী-অন্নপূর্ণা তার শিররে দাঁড়াইয়া বলিতেছেন,—“ওরে অজ্ঞান, করিয়াছিস্ কি ? কাকে ঋণ দিতে অসম্মত হইয়াছিলি ? রাণী ভবানী তোঁর নিকট টাকা ধার চাহিয়াছিল,—সে তোঁর পরম ভাগ্য ! যা, এখনি গিয়ে তাঁর পায়ে পড়,—নহিলে তোঁর সর্বনাশ হইবে,—সব যাইবে ! আরে মন্দভাগ্য !—ভবানীকে চিন না ?—ভবানী আর আমি যে এক !”

স্বপ্ন ভাঙ্গিয়া গেলেই, বণিক ধড়ফড় করিয়া শয্যা হইতে উঠিয়া পড়িল, এবং বিশেষ ভয়-ব্যাকুলতাসহকারে, প্রভাত হইতে না হইতে, পুণ্যবতী রাণীর ঘারে গিয়া উপস্থিত হইল । পরে, রাণীর সেই কর্মচারীকে,—যিনি রাণীর হইয়া পূর্বদিন টাকা ধার চাহিতে গিয়াছিলেন,—তাঁহাকে, বিস্তর অমুনয়-বিনয়

করিয়া বলিল,—“আপনি আমায় ক্ষমা করুন, রাণীমাকেও আমায় ক্ষমা করিতে বলুন,—আমার সহস্র অপরাধ হইয়াছে,—আমি জানি নাই যে, তিনি কে ? ভবানী—সত্যই মা-ভবানী। আমি মূঢ়, আমার চৈতন্য হইয়াছে,—মাকে গিয়া এ কথা বলুন। বলুন, লক্ষ টাকা আমি সঙ্গে লইয়া আসিয়াছি,—আরো যদি টাকার দরকার হয়, তিনি লক্ষ করিয়া পাঠাইলেই আমি দিব। এখন, মাকে আমি একবার দেখিয়া যাইব ;—তাঁর চরণ-রেণু লইয়া কৃতার্থ হইয়া যাইব।—কৃপা করিয়া মাকে এ সংবাদটি দিন।”

কর্মচারী উত্তর করিলেন,—“টাকার আর প্রয়োজন হইবে না,—কেন না, টাকা কল্য সন্ধ্যার পরই আসিয়া পঁছিয়াছে। তবে রাণীমাকে দর্শন,—তা আমি সংবাদ দিতেছি, তিনি যেরূপ আদেশ করেন, পশ্চাৎ বলিতেছি।”

ভবানীর নিকট এই সংবাদ গেলে তিনি বলিয়া পাঠাইলেন,—“এখানে এমন সময় দেখা করার সুবিধা হইবে না ;—যখন আমি মা-অন্নপূর্ণার পূজা করিতে যাইব, সেই সময় মায়ের মন্দিরে গেলে দেখা হইতে পারিবে।”

বণিক অগত্যা, তাহাই শ্রেয়ঃ ভাবিয়া, যথাসময়ে অন্নপূর্ণার মন্দিরে উপস্থিত হইল।

সোনার অন্নপূর্ণা ; মায়ের সে দিব্যমূর্তি সিংহাসনে উপবিষ্টা ; সে স্নিগ্ধোজ্জ্বল রূপে মন্দির আলোকিত ; সেই মন্দির মধ্যস্থলে, মায়ের সম্মুখে,—ধ্যাননিমীলিতনেত্রা, কৃতাজলিপুটা, তপ্তকাঞ্চন-বর্ণা,—যোগিনী মূর্তি,—কে ইনি ? অপরূপ রূপা, বাহুজ্ঞানশূণ্ণা, দিব্য করুণামাধা মুখমণ্ডল,—কে এ মা ? সর্বান্তে অলৌকিক

দীপ্তি, হস্তপদযুগে বিভূতি-চিহ্ন, ভস্মাচ্ছাদিত অগ্নিসম অপূর্ণ  
তেজোময়ী মূর্তি,—কে এ বামা ? দেবী না মানবী ? না আর  
কেহ ?—এরূপ অদ্ভুত ভঙ্গিমায় মাতৃপদ অর্চনা করিতে বসিয়া-  
ছেন ? আহা-হা ! ঐ দুই রূপ যে এক হইয়া গিয়াছে ? ঐ মা,  
না, এই মা ?—ঐ অন্নপূর্ণা, না এই অন্নপূর্ণা ? চিন্ময়ী, হৃৎময়ী, না  
মায়াময়ী,—কে ইনি ? ইনিই কি রাণী ভবানী ?—হায় মা !  
কবে আবার তুমি এ পতিত ভারতে আবিভূতা হইবে ?

বণিক—তাহারও সময় হইয়া আসিয়াছিল,—বণিক জ্ঞান-  
নেত্রে ভবানীকে চিনিতে পারিল,—ভবানী ও অন্নপূর্ণাকে  
প্রকৃতই অভেদ দেখিল। দেখিয়া, ভক্তি ও বিশ্বয়ে অভিভূত  
হইয়া, মা মা বলিয়া কাঁদিতে কাঁদিতে, ভবানীর পাদতলে  
আছাড়িয়া পড়িল।

কোটিপতি বণিক—কাশীর তদানীন্তন একজন ধনকুবের,—  
আজি শুভক্ষণে, মঙ্গলময় মুহূর্তে, জননী-অন্নপূর্ণার মন্দিরে,—  
অন্নপূর্ণারূপিনী ভবানীর পাদপদ্মে এরূপ ভাবে পতিত,—অল্পক্ষণ  
মধ্যে এই মহা সুসংবাদ সর্বত্র রাষ্ট্র হইল। তখন, সেই পবিত্র  
আনন্দকানন, প্রকৃতই আনন্দময়ী মূর্তি ধারণ করিল। কেননা,  
সেই কুসীদজীবী রূপণস্বভাব মহা ধনশালী বণিক, সহসা মুক্তহস্ত  
হইয়া, নানারূপ দানধ্যান-ক্রিয়ায়, আপামর সাধারণকে বিশ্বয়-  
বিমুক্ত করিয়া ফেলিল। সূতরাং সকলেই আনন্দস্থচক ব্যোম্  
ব্যোম্ ধ্বনিতে আকাশ-মেদিনী বিদীর্ণ করিতে লাগিল। অপিচ,  
এই প্রত্যক্ষ ও একরূপ আশ্চর্য ঘটনার মূলে, রাণী ভবানীর  
অলৌকিক প্রভাব জানিতে পারিয়া, সকলেই মুক্তকণ্ঠে “জয় মা  
ভবানী-অন্নপূর্ণা” বলিয়া, করযোড়ে তাঁহাকে স্তব ও পূজা করিতে

আরম্ভ করিল। ভবানী তখন বড়ই কুণ্ঠিত ও সঙ্কুচিত হইয়া পড়িলেন। বুঝিলেন, কিছুদিন তাঁহাকে এ সোনার কাশী বা ত্যাগ করিতে হয়।—কিছুদিন এ স্থান ত্যাগ করিয়া, একটু প্রচ্ছন্নভাবে না থাকিলে, বুঝি তাঁহার আর রক্ষা নাই। কেননা, সেই বণিকের ঞ্চার, ক্রমে অনেকেই তাঁহাকে দ্বিতীয় অনূর্ণা ভাবিয়া, সত্য সত্যই তাঁহার পদে পাণ্ড-অর্ঘ্য দিতে উৎসুক হইয়া পড়িল।

বস্তুতঃ, ৮কাশীধামে পূণ্যবতী ভবানীর এত মান, এমনি প্রতিপত্তি। সত্য সত্যই এখানে তিনি সাক্ষাৎ ভবানী বলিয়া সম্পূজিতা হইতেন। আজিও অনেক প্রাচীন কাশীবাসী, প্রাতঃস্মরণীয়া দেবীজ্ঞানে, ভবানীর উদ্দেশে প্রণাম করেন। সাধক আত্মারামের মানস-পূজিতা ভবানী,—সত্যই একদিন তাঁহার কণ্ঠরূপে, ‘ভবানী’ নাম সার্থক করিয়াছিলেন। এই জন্মই কি কণ্ঠার ‘গৌরী’ নাম তাঁহার ভাল লাগিত না? এই জন্ম,—কি কণ্ঠার বৈধব্য জন্ম,—অথবা এই দুই কারণে,—তাহা তিনিই জানিতেন। সাধক, সাধনতত্ত্বের গূহ্য কথা, কাহারও নিকট প্রকাশ করেন না। তিনিও তাই করেন নাই।





## সপ্তমপরিচ্ছেদ ।

কাশীধামের গায় ৬গয়াধামেও ভবানীর অনেক পুণ্য-  
কীর্তি আছে । গয়াতেও তিনি অনেক দেবদেবীর  
মন্দির, অতিথিশালা, পান্থনিবাস প্রভৃতি নিৰ্মাণ করাইয়া  
দিয়াছিলেন । এই স্থানেও তাঁহার ধৰ্মনিষ্ঠা ও দানধ্যানের  
সবিশেষ পরিচয় পাওয়া যায় । গয়ালীগণ আজিও সসম্মে  
তাঁহার নাম উচ্চারণ করিয়া থাকেন ।

যেবার তিনি প্রথম এই পুণ্যতীর্থে আগমন করেন, সেবার  
মহাসমারোহে, তিনি পিতৃলোক ও স্বশ্রুকুলের শ্রাদ্ধশাস্তি-  
ক্রিয়াদি সমাপন করিয়াছিলেন । কিন্তু মৃত আত্মীয়স্বজনের  
প্রেতাঙ্গার চিরমুক্তিকামনায়, বড় আশ্বস্ত হৃদয়ে, যখন তিনি  
বিষ্ণুপাদপদ্মে পিণ্ডদান করিবার আয়োজন করেন, তখন জনৈক  
অর্থলোলুপ গয়ালী-মহাপ্রভুর দৌরাণ্ড্যে, তাঁহাকে বড় মনস্তাপ  
পাইতে হইয়াছিল । এই পাণ্ডা মহাপ্রভুদিগের অনেকেই  
দৌরাণ্ড্য ও জুলুম,—প্রায় সর্বত্র সর্বকাল হইতে অল্পবিস্তর  
আছে । ধৰ্ম্মাত্মা ও নিম্পহ তীর্থ-পুরোহিত যে আদৌ নাই,—  
এমন নহে ;—তবে তাঁহাদের সংখ্যা অতি অল্প ।—জ্বরদস্ত ও

অর্থগুরু পাণ্ডাই অধিক। সে জ্বরদস্তীর বেগ, সকলকেই অল্পাধিক পরিমাণে সহিতে হয়। অল্পে পরে কা কথা, - দানের অধিতীয়া ঈশ্বরী—স্বয়ং রাণী ভবানীকেও তাহা সহিতে হইয়াছিল। অমন পুণ্যবতী, দান-ধর্মের অবতাররূপিণী রাণী,— তাঁহার সহিতও তদানীন্তন প্রধান গয়ালী মহাপ্রভু “সুফলের” ফুরণ লইয়া অসম্ভাব করেন। তিনি ভোগের আগে প্রসাদ চান। অর্থাৎ, রাণী বিষ্ণুপাদপদ্মে পিণ্ডদান স্বরূপ, সুফলের হিসাবে, কি গুরু-দক্ষিণা দিবেন,—অগ্রে বাগ্দত্তা হউন, পরে পিণ্ডদান করিতে পারিবেন। এই বাবদে, সেই গয়ালী মহাপ্রভু, ভবানীর নিকট অল্প স্বল্প করিয়া পাঁচ লক্ষ টাকা চান! সে ত চাওয়া নয়,—একরূপ দাবী, জ্বলুম, বা উৎকট আব্দার! এমন কি, সেই প্রভুর নিয়োজিত সেই সত্য ভব্য প্রধান প্রতিনিধি বা পাণ্ডা মহাশয়টি শেষ স্পষ্টতই বলিয়া ফেলিলেন,—“রাণী-মা পাঁচ লাখ টাকা দিবেন কি না স্বীকার করুন,—তবে আমরা তাঁহাকে পিণ্ডদান করিতে দিব।”

এই অতি-বড় ধৃষ্টতাসূচক বাক্যে, ভবানী কিছু বিরক্ত হইলেন। তখন তিনি সেই প্রধান গয়ালী মহাপ্রভুর নিজ মুখের কথা শুনিতে চাহিলেন। বলিলেন,—এই যে অসম্মানকর ও বিরক্তিকর ব্যবহার,—ইহা তাঁহার জ্ঞাতসারে হইয়াছে কি না জানিতে চাই।

অর্থমোলুপ গয়ালী ভাবিল,—“ধর্মভীতা রাণীকে, ‘পিণ্ডদান করিতে দিব না’ এই ভয় দেখাইয়া, কৌশলে এই পাঁচ লাখ টাকাটা আদায় করিয়া লই। কি জানি, যদি কার্যোদ্ধারের পর এতটা টাকা এককালে না দেয়?”

কাণ্ডজ্ঞানহীন গয়ালী,—অথবা আর সব বিষয়ে জ্ঞান টু-  
টনে,—কেবল এই পরের টাকা ধরে আনিবার সময়ে অজ্ঞান,—  
গয়ালী ভাবিল, “হাঁ, এই যুক্তিই ঠিক ; রাণী ভবানীকে এই-  
রূপ ভয় দেখাইয়া, কোশলে টাকাটা আদায় করিয়া লই।”—  
তাই রাণীর লোককে বলিল, “হাঁ, কি জ্ঞান, ও টাকা-কড়ি  
জিনিসটাই কু ; বিশেষ এ তীর্থক্ষেত্র ;—এ স্থানের দেনা-  
পাওনার কথাটা, আগে থাকতে ফুরণ হওয়াই ভাল ।”

লোক ফিরিয়া গিয়া ভবানীকে গয়ালী-প্রভুর কথা জানা-  
ইল । শুনিয়া, ভবানী ভাবিলেন,—“পিণ্ডদান আপাতত স্থগিত  
ধাকে থাকুক, ইহার একটা চূড়ান্ত ব্যবস্থা করা আবশ্যিক হই-  
য়াছে । আমার টাকা আছে আমি দিলাম ; কিন্তু যার অর্থভাগ্য  
নাই ?—এমন অনেক লোকও ত প্রতিদিন এই মহাতীর্থে  
আসিতেছে-যাইতেছে ? তবে, তাহাদের প্রতিও এইরূপ এবং  
আরও অনেকরূপ পীড়ন হয় ? হাঁ, নিশ্চয়ই হয় ।—কি আশ্চর্য্য !  
ধর্ম্মকার্য্যেও এমন বণিগ্ৰস্তি ? না, ইহা উপেক্ষা করা আমার  
উচিত হয় না ;—এর একটা প্রতিবিধান করিয়া তবে আমি  
নিশ্চিন্তমনে বিষ্ণুপাদপদ্মে পিণ্ডদান করিব ;—তবে আমি  
পবিত্রমনে ‘সুফল’ লইয়া এ স্থান ত্যাগ করিব ।”

ভবানী যে, রত্ন অলঙ্কার সহ—সর্ব্বরকমে পাঁচ লাখ টাকা  
গুরুদক্ষিণা না দিতেন এমন নয়,—কিন্তু পূর্ব্ব হইতে এইরূপ  
জুলুম ও ফুরণের এইরূপ কড়াকড়ি দেখিয়া, তিনি কিছু বিরক্ত  
হইয়াছিলেন ;—সেই বিরক্তি ক্রমে উত্যক্ততায় পরিণত হয় ;—  
তাহার ফলে, তিনি সেই গয়ালী মহাপ্রভুর এই দুর্কিনীত  
ব্যবহার, —যুর্নিদাবাদে—নবাবের গোচরে আনেন । তাহার ফল

তখন বড় বিষম হয়,—তখন সেই অর্থগৃধু গয়ালীর চমক ভাঙ্গে ;—তখন তিনি বুঝিতে পারেন, কাহার সহিত কি ব্যবহার করিয়াছেন !

অশেষ-গুণালঙ্কতা রাণী ভবানী, নিজগুণে কি হিন্দু কি মুসলমান—সকলেরই বিশেষ শ্রদ্ধা ও ভক্তি আকর্ষণ করিয়া-ছিলেন ;—তাই তাঁহার এই অভিযোগ নবাব-দরবারে উপনীত হইবামাত্র, নবাব কোনওরূপ ইতস্ততঃ না করিয়া, তৎক্ষণাৎ যুদ্ধের সুবাদারের প্রতি আজ্ঞা দিলেন,—“অবিলম্বে ঐ গয়ালীর জমিদারী ও ভূ-সম্পত্তি প্রভৃতি সমস্তই কাড়িয়া লও ।” যখন নবাবের এই কথা কার্যে পরিণত হইবার উপক্রম হয়, তখন সেই অতি-লোভী গয়ালী-প্রভুর চৈতন্য হইল ;—বুঝিলেন, কাহার সহিত কি ব্যবহার করিয়াছেন—এবং সেই ব্যবহারগুণে, কোন্ কার্যের কি ফল হইয়াছে । বলা বাহুল্য, আর বিন্দুমাত্র কালক্ষেপ না করিয়া, সেই গয়ালী প্রভু গলবস্ত্র হইয়া, অতি ভয়ব্যাকুলচিত্তে, “মা মা” বলিয়া, ভবানীর শরণাপন্ন হইলেন,—এবং তিনি ‘কিছু না দিয়াই পিণ্ডদান করিয়া যান’,—মুক্তকণ্ঠে এই কথা বলিতে লাগিলেন । কিন্তু ধর্মপ্রাণা ভবানীর উদ্দেশ্য ত তা নয়,—তিনি পবিত্রমনে পিণ্ডদান-ক্রিয়া সম্পন্ন করিয়া, ‘সুফল’ স্বরূপ, সেই পাঁচ লাখ টাকাই গয়ালী-প্রভুকে গুরু-দক্ষিণা দিলেন, এবং তাহার আনুসঙ্গিক আরও অনেক অর্থব্যয় করিয়া কৃতার্থ ও ধন্য হইলেন । বলা বাহুল্য, ভবানীর অনুরোধে, সুবাদার ও নবাব, সে যাত্রা এই গয়ালীকে ক্ষমা করিলেন ।

আর একবার এই গয়ালী-প্রভু, নবাব-সরকারে নিয়মিত



রাজস্বদানে অক্ষম হওয়ায়, কারারুদ্ধ হইয়াছিলেন। পরোপকার-ব্রতধারিণী ভবানী, এই সংবাদ অবগত হইবামাত্র, নিজে জামিন হইয়া, তীর্থগুরুকে কারায়ুক্ত করেন, পরে বধাসময়ে সেই টাকা নিজ ভহবিল হইতেই সরকারে জমা দেন,—গুরুর নিকট হইতে তাহা আর তিনি গ্রহণ করেন নাই। এইরূপ সদ্যবহারে, তিনি সেই তীর্থগুরুর ‘সুফল’-দানের ঋণ—সুদ সমেত পরিশোধ করেন,—অথবা চিরকালের জন্ত সেই গয়ালী মহাশয়কে কিনিয়া রাখেন। গয়ালী-প্রভু বুঝিলেন, দেবী ভবানী ‘দেবী’ নাম সহজে পান নাই ;—অনেক তপশ্চায়, অনেক আত্মত্যাগে, তিনি এ মহামহিমময়ী আধ্যা লাভ করিয়াছেন।

তখন সেই তীর্থগুরুও কৃতজ্ঞতার পূত-সলিলে ডুবিয়া গিয়া ভবানীর নিকট আপন হৃদয়োচ্ছ্বাস দেখাইতে বাধ্য হইলেন। এক খানি স্বর্ণ-খালে করিয়া, আপন মস্তকের উষ্ণীষ ভবানীর নিকট পাঠাইয়া, একখানি পত্রে এই মর্মে লিখিয়া দিলেন,—  
“মা! আমি তোমার চিনি নাই,—তাই আপন দুষ্কৃতিবশতঃ, তুচ্ছ অর্থলোভে, তোমার সহিত ওরূপ অসদ্যবহার করিয়া-ছিলাম। সত্যই তুমি দয়াময়ী মহাদেবী ;—তাই, আমি না বলিতেই; নিজগুণে আমার ক্ষমা করিয়াছ ;—আমায় ক্ষমা চাহিবার অবসরই দাও নাই।—আবার সেই ক্ষমার সহিত এমন একটি কাজও করিলে, যাহা নরলোকে একান্তই বিরল। মা, সার্থক তোমার ভবানী নাম! যাই হউক, আমি না বুঝিয়া, তোমার নিকট যে অপরাধ করিয়াছিলাম, তজ্জন্য এক্ষণে যার-পর-নাই অনুতপ্ত। এ অনুতাপ আন্তরিক—অকপট কিনা, তাহা তুমিই বিচার করিও। মা, তুমি আমার সেই অতি-বড়

হৃদ্দিনে, নবাব-সরকারে বিপুল রাজস্ব দিয়া, আমার মান ও প্রাণ বাঁচাইয়াছ ;—আমি তাহার প্রতিদানস্বরূপ এই উষ্ণীষ তোমায় পাঠাইলাম ।—মা, মনে রাখিও, তোমার তীর্থগুরু মস্তক ভূমি কিনিয়া রাখিলে !”

পত্রখানি পাঠ করিয়া মহাপ্রাণা ভবানী আর্দ্র হইলেন ;— তিনি সেই স্বর্ণখাল সহ উষ্ণীষ ফেরৎ পাঠাইয়া, তৎসহ আরও কিছু ধনরত্ন গুরু-প্রণামী স্বরূপ দিয়া, উত্তরে লিখিলেন,—“আমি যে কাজ করিয়াছি, তাহা কর্তব্য বুঝিয়াই করিয়াছি ;—সুতরাং ইহাতে প্রশংসার কিছু নাই। বরং সেই কার্যের পুরস্কার স্বরূপ, আমি প্রচুর আত্মপ্রসাদ লাভ করিয়াছি ।—তাহাই আমার পরম লাভ জানিবেন। আপনি আমার তীর্থগুরু,—পরম পূজ্যস্পদ ;—এমত অবস্থায়: আপনার ঐ পবিত্র শিরোভূষণ গ্রহণ করিলে আমার বিশেষ অকল্যাণ হইবে ; সুতরাং ধর্ম্মভয়ে আমি উহা ফেরৎ পাঠাইলাম ;—অপরাধ গ্রহণ করিবেন না।”

পত্রপাঠে গয়ালী-প্রভু স্তম্ভিত হইলেন। বুঝিলেন,—“হাঁ, হিন্দুকুললক্ষ্মী—রাজরাজেশ্বরীই বটে! এ মহাপ্রাণতা, এমন উচ্চাশয়তা,—দেব-হৃদয়েই সম্ভবে। সত্যই ভবানী দেবী!”

ভবানী ভাবিলেন, “ছি! কাহারও কোন একটু কাজ করিলে, তাহা আকার এই ভাবে তাহার নিকট হইতে আদায় করিয়া লইতে হয়? তদপেক্ষা কিছু না করাও যে, এক হিসাবে ভাল।”

এমনি না হইলে, মা! তোমার পুণ্য-চরিত, এ দীন কবি-হৃদয়ে, এমনি আধিপত্য স্থাপন করিয়াছে? সার্থক তোমার জনম, —সার্থক তোমার জীবন! আর সার্থক আজ এই কীর্ণ লেখনী!



## অষ্টম পরিচ্ছেদ ।

নবাব আলিবর্দী খাঁ পরলোকগত হইয়াছেন ; তাঁহার শূন্য-সিংহাসনে তাঁহার প্রাণোপম প্রিয়তম দৌহিত্র সিরাজ-উদ্দৌলা উপবিষ্ট। নবাব সিরাজের কার্যাবলী ইতিহাস পাঠকের অবিদিত নাই। তিনি কি পরিমাণে দোষী বা নির্দোষ ছিলেন, তাহার বিচার-বিতর্কের স্থান ইহা নহে। তবে তাঁহার অদম্য ইন্দ্রিয়লালসা ও ভীষণ দুঃপ্রবৃত্তি যে সর্ববাদিসম্মত, সে বিষয়ে বিন্দুমাত্রও সন্দেহ নাই। অন্য প্রমাণের আবশ্যক নাই,—তবানীত্বহিতা তারার প্রতি পাপদৃষ্টিই তাহার প্রকৃষ্ট প্রমাণ। এখন এইরূপ এবং অন্য অনেকরূপ কারণ দর্শাইয়া, বাঙ্গালার তদানীন্তন জমিদারমণ্ডলী ও প্রধান ব্যক্তিগণ একযোগে, সিরাজের উচ্ছেদকামনা করিলেন। ভিতরে ভিতরে ঘোর ষড়যন্ত্র চলিতে লাগিল।

আলিবর্দীর অবসানের পরেই, বাঙ্গালায় ঘোর রাষ্ট্রবিপ্লবের সূচনা হয়। চারিদিকেই অরাজকতা ও বিশৃঙ্খলতা,—চারিদিকেই বিদ্রোহের সূচনা। সিংহাসনের লোভ—বড় লোভ। এই লোভে কেহ কেহ প্রাণও দিল।

ইন্দ্রিয়পয়ায়ণ ঘোর বিলাসী সিরাজের অণু সহস্র দোষ থাকিলেও এই রাষ্ট্র-বিপ্লবের বিরুদ্ধে, কিছুদিন তিনি অক্লান্ত পরিশ্রমে যুঝিয়াছিলেন । কিন্তু বাঙ্গালায় মুসলমান-রাজত্বের উচ্ছেদ নাকি বিধাতার ইচ্ছা, তাই শেষরক্ষা আর হইল না ।

নবদ্বীপাধিপতি মহারাজ কৃষ্ণচন্দ্র সে সময় বাঙ্গালার একজন প্রধান জমিদার । তিনি এবং তাঁহার সহিত আর কয়েকজন প্রবল ধনশালী ও শক্তিমান ব্যক্তি মিলিত হইয়া, সিরাজের সিংহাসনচ্যুতি সম্বন্ধে নানারূপ ষড়যন্ত্র-জাল বিস্তার করেন । রাজা রাজবল্লভ, ধনকুবের জগৎশেঠ, মীরজাফর, এবং তৎপুত্র মীরণ প্রভৃতি—এই ষড়যন্ত্রে লিপ্ত ছিলেন ।

যখন বাঙ্গালার সকল জমিদার,—সকল বলশালী ব্যক্তিই, সিরাজের উচ্ছেদকামনায়, ভীষণ ষড়যন্ত্রে লিপ্ত, তখন একটি মাত্র মহাপ্রাণ—একটি মাত্র মানবী আকারে দেবী,—যেই ষড়যন্ত্রের প্রতিকূলে দাঁড়াইয়াছিলেন । অথচ সিরাজের প্রতিকূলে যদি কাহারও সর্বপ্রথম দাঁড়ান আবশ্যক হইয়া থাকে,—অস্তুরের ভীষণযন্ত্রণায় দিগ্বিদিক্ জ্ঞানশূন্য হইয়া ভীষণ প্রতিশোধ গ্রহণ, যদি কাহারও পক্ষে খুবই স্বাভাবিক হয় ;—তবে ঐ কথিত দেবীরই তাহা সম্পূর্ণ সম্ভবে ।—সর্বগুণসমলঙ্কতা, প্রাতঃস্মরণীয়া রাণী ভবানীকেই আমরা এখানে নির্দেশ করিতেছি । কেননা, সিরাজের অমার্জনীয় দুর্কিনীত ব্যবহারে, সত্য সত্যই তিনি মর্মে মর্মে আহত হইয়া আছেন । কিন্তু কামায়ী ধর্মের অবতার স্বরূপিণী দেবী—‘রাজদ্রোহিতা মহাপাপ’ জানিয়া,—সে মনের কষ্ট মনেই রাখিলেন । কিন্তু তথাপি তাঁহার উদ্দেশ্য সিদ্ধ হইল না,—হতভাগ্য সিরাজ রাজ্যচ্যুত ও অতি নৃশংসরূপে নিহত হইল ।



## নবম পরিচ্ছেদ ।

মুসলমান-রবি অস্তমিত, হিন্দু-গৌরব অবনত,—সেই দুদিনে সেই ভীষণ 'ছিয়াত্তরের মন্বন্তর' দেখা দিল। সে ভীষণ মন্বন্তর বা দারুণ দুর্ভিক্ষ, বঙ্গ-ইতিবৃত্তের একটি চির-স্মরণীয় ঘটনা। শম্ভুশ্যামল উর্ধ্বর-ক্ষেত্রে, এমন দেশব্যাপী নিদারুণ অন্নকষ্ট হইতে পারে,—এমন গগনভেদী হাহাকার উঠিতে পারে, তাহা সহসা অনেকের কল্পনারও অতীত। কিন্তু তাহা হইয়াছিল ;—বঙ্গালী ১১৭৬ সালে সত্য সত্যই এরূপ ঘটনা ঘটিয়াছিল। দীন-জননী দয়াময়ী ভবানী এ ঘটনায়, প্রকৃতই অন্নপূর্ণা-মূর্তি ধারণ করিয়াছিলেন। সেই কথাই এখন বলিব।

রাষ্ট্র-বিপ্লবের মহাপাপেই হউক, অথবা দৈব-অভিসম্পাতেই হউক,—ছিয়াত্তরের মন্বন্তরে, প্রকৃতি অতি ভীষণ সংহারমূর্তি ধারণ করিয়াছিলেম। একাদিক্রমে দুই বৎসর কাল ঘোর অনা-বৃষ্টি ;—আকাশে একবিন্দু জল নাই,—খাল বিল, নদী নালা, বাপী তড়াগ সব শুকাইয়া গিয়াছে,—নরকণ্ঠও বুঝি বিগুহ হই-রাইছে। অস্থিচর্মসার—নয়কঙ্কালমূর্তি অসংখ্য নরনারী—কোথা

হইতে দলে দলে আসিতেছে, যাইতেছে,—ইতস্ততঃ ঘুরিয়া-ফিরিয়া হা-হা করিয়া বেড়াইতেছে। যেন কোথাও একটু ছায়া নাই, শীতলতা নাই, পিপাসার একটু জলও নাই ;—প্রখর রবি-তাপ যেন সৃষ্টি ধ্বংস করিবার উদ্দেশ্যে, ধরা-বক্ষে পতিত হইয়াছে ;—যেন দ্বাদশ-রবি সমুখিত জ্বালাময় উত্তাপে, জীবকুল বলসিয়া, জ্বলিয়া, পুড়িয়া মরিবার উপক্রম হইয়াছে। “বৃক্ষবল্লরী পুষ্পপত্রহীন, নির্জীব, জীর্ণশীর্ণ ও মৃতপ্রায়। ধাণ্ডক্ষেত্র শুষ্ক-সাহারায় পরিণত। গো-মহিষাদি জন্তুগণ নিদারুণ যন্ত্রণায় ছটফট করিয়া মরিতেছে। এমন এক এক করিয়া কত জীবই অসহ যন্ত্রণার সহিত যুঝিতে যুঝিতে মৃত্যুমুখে পতিত হইতেছে ! নর বা নারী, পশু বা পক্ষী, যাহার মুখের দিকে চাহিবে,—সকলেরই এক দশা। প্রকৃতির ভিতর হইতে প্রাণটুকু যেন চলিয়া গিয়াছে ;—তাই বৃক্ষবল্লরীতে আর শ্রামলতা নাই, চন্দ্রকিরণে সে শীতলতা নাই, ধরা-বক্ষে কোথাও যেন একটু মাধুর্য্য নাই ;—আছে কেবল সারাদেশ ব্যাপিয়া দারুণ উত্তাপ ! সে উত্তাপে দেশ জ্বলিতেছে !

“অনার্হুষ্টি, আবার অন্নকষ্ট ! কৃষক আশাপূর্ণনেত্রে আকাশ-পানে চাহিয়া চাহিয়া চক্ষু মুছিয়াছে ; লাঙ্গল ও বলদ লইয়া চক্ষু মুছিতে মুছিতে গৃহে ফিরিয়াছে। লাঙ্গলে মাকড়স্য জাল বুনিয়াছে। দারুণ উত্তাপে বলদ মরিয়া গিয়াছে। কৃষকের গৃহ অন্নহীন। শতগ্রন্থিময় ছিন্নমলিন বস্ত্রখণ্ড কোমরে জড়াইয়া কোনরূপে তাহারা লজ্জানিবারণ করিতেছে। গৃহস্থের দুয়ার হইতে অতিথি ফিরিতেছে। পথে পথে ভিখারীর ভিড়। মায়ের কণ্ঠ জড়াইয়া শিশু কাঁদিতেছে ;—হায় ! মেহময়ীর কোমল বুকে সে স্বর্ণ-সুখা, কৈ, আর ত নাই ? শুষ্ক-কণ্ঠে শিশু কাঁদিতেছে,

কাঁদিতে কাঁদিতে মায়ের কণ্ঠ জড়াইয়া, মায়ের জীবনাধিক মায়ার  
পুস্তলি, মায়ের বুকের উপর পড়িয়া মরিতেছে !”

কেবল ত ছটা বা দশটা জেলাব্যাপী এ দুর্ভিক্ষ নহে,—সমগ্র  
বাঙ্গালা-বিহার-উড়িষ্যা ব্যাপিয়া এ ভীষণ দৃশ্য ! পথে পথে লোক  
মরিল,—হাটে মাঠে ঘাটে গোষ্ঠে শবদেহ পড়িয়া রহিল,—শূণাল-  
কুকুরে সে দেহ লইয়া টানাটানি করিতে লাগিল । জনপদ  
নির্জন,—জঠরজ্বালায় কে কোথায় ছুটিয়া ছটকাইয়া পড়িয়াছে,  
—সর্বত্রই যেন শ্মশান !

এ শ্মশানে দিক্ আলোকিত করিয়া, কে তুমি দাঁড়াইয়া  
জননি ? কোটি কোটি লোককে অন্ন-জল দিয়া, ভাণ্ডার উন্মুক্ত  
করিয়া, কে তুমি করযোড়ে উর্দ্ধনেত্রা হইয়া আছ মা ? অন্নপূর্ণা-  
রূপিণী মহাদেবী তুমি ;—তোমার ত মা অকুরন্ত ভাণ্ডার ;—  
তবে ভয় কি মা,—প্রাণ ভরিয়া জনমের সাধ মিটাও ;—আমরা  
তোমায় ঐ ভাবে দেখি !

ছিয়াত্তরের সেই ভীষণ মন্বন্তরের সময়, লোকরক্ষার জন্য,  
একমাত্র রাণী ভবানীই, শেষমুহূর্ত পর্য্যন্ত যুঝিতে লাগিলেন ।  
কোটি কোটি লোককে তিনি অন্নজলদানে রক্ষা করিতে লাগি-  
লেন । “অগ্ন্যাণ্ড রাজা বা জমিদারগণ যখন আপন আপন স্বার্থ  
লইয়া বাস্ত”,—কেহ বা মানের দায়ে লুকাইয়া সরিয়া বা গা-  
ঢাকা দিয়া পড়িলেন,—তখন “দীন-জননী দয়াময়ী ভবানী”,  
সেই পবিত্র ব্রহ্মচারিণী মূর্তিতে,—এইভাবে রাজসাহীর সেই  
মহাশ্মশানে দাঁড়াইয়া, করযোড়ে শৃণুপানে চাহিয়া, যেন কাঁহাকে  
কি বলিতে লাগিলেন । সে ব্যক্তিও যেন সঙ্কোচে, অন্নের অশ্রুত  
ভাষায়—তঁাহাকে জানাইল.—



“না, আর আশা করিও না,—জীবের ভোগের কাল ফুরাইয়া আসিয়াছে,—তোমারও কার্যকাল অবসান,—শীঘ্রই তুমি এখানে চলিয়া এস । জীব-রক্ষায় তুমি যথাসর্ব্ব দিয়াছ, তোমার ভাণ্ডার শূন্য ;—কিন্তু আর পাইবে না,—জীব ঐ ভাবেই মরিবে । আবার যদি কেহ জন্মজন্ম তপস্বী করিয়া তোমার মত হয়, তবে সেই আসিয়া মর্ত্যে, এ সৌভাগ্যের অধিকারী হইবে ;—কিন্তু সেদিনের বহু বিলম্ব ।—জীবের সে তপোবল নাই—আমি কি করিব ? বৎসে, পরদুঃখে আজন্ম অশ্রু ফেলিয়া আসিতেছ,—জীবনের শেষযুহুর্তেও সেই অশ্রু সম্বল করিয়া, এ নিত্য-ধামে চলিয়া এস ;—তোমায় আর ও মাটির পৃথিবীতে থাকিতে হইবে না !”

উর্দ্ধনেত্রী জননী তখন একটি নিশ্বাস ফেলিয়া, হতাশভাবে আপন কপালে হাত দিলেন । ঝর্ ঝর্ করিয়া সেই স্বভাবসঞ্জল করুণামাখা নয়নে জল পড়িতে লাগিল ;—হায় ! সে জল আর ধামিল না । জননী-অন্নপূর্ণারূপিণী ভবানী দেখিলেন,—সত্যই তাঁহার ভাণ্ডার শূন্য,—আর জীব রক্ষা হয় না ! মাতা বুঝিলেন,—বিধাতা বিমুখ,—তাঁহারও কর্ম্মক্রান্ত জীবনের অবসান,—হায় ! কৃষ্ণের জীবকে আর কে রক্ষা করিবে ?

কিন্তু, কাঁদ কেন মা-জননি ? এ ভীষণ যন্ত্রণে, ত তুমিই কোটি কোটি লোককে অন্নজলদানে বাঁচাইয়াছ ? তবে শেষরক্ষা হইল না ? তা তুমি কি করিবে ? একা তুমি কি করিতে পার ? এরূপ বিরাট দান-ব্রতে, কুবেরের অক্ষয়ভাণ্ডারও শূন্য হইয়া যায়,—তোমার সম্পত্তি কতটুকু মা ? তবে যে তুমি এতদিন বুঝিলে, তাহা এ সম্পত্তি-বলে নয়,—তোমার হৃদয়-বলে ! এখন, যাও মা



ভবানি ! সাধন-ব্রত উদ্‌যাপন করিয়াছ,—এইবার সেই নিত্য-  
ধামে চলিয়া যাও ।—ঐ দেখ মা, জগজ্জননী তোমায় আহ্বান  
করিতেছেন ! যাও মা লক্ষ্মীস্বরূপিণি ! এ চক্ষুচক্ষু হইতে অদৃশ্য  
হইয়া, তোমারই যোগ্য লোকান্তরে চলিয়া যাও,—আমরা চক্ষু  
মুদ্রিয়া, অন্তরের অন্তরে তোমার পাদপদ্ম ধ্যান করি !

‘অর্দ্ধবগ্নেশ্বরী’ ভবানী, তখন শূন্যহস্তে, একরূপ নিঃস্বলে,  
তাঁহার বড় সাধের বড়নগরে, শেষ গঙ্গাবাস উপলক্ষে, গমন  
করিলেন । যথাদিনে সেইখানে, সজ্জানে ইষ্টমন্ত্র জপ করিতে  
করিতে, তাঁহার গঙ্গালাভ হইল ।

ইতি তৃতীয় খণ্ড

গ্রন্থ সমাপ্ত







